

ՄԱՐՏԻՐՈՍ ՄԵԼԿՅԱՆ

Հ. ԳԻԳԱԼԻՆՅԱՆ

A I

20695

7 ml honeybees

is Pugstone

is Beehive

78 frag.



АКАДЕМИЯ НАУК АРМЯНСКОЙ ССР
ИНСТИТУТ ИСКУССТВ

Г. В. ОГАНЕСЯН

МАРТИРОС МНАКЯН

ИЗДАТЕЛЬСТВО АН АРМЯНСКОЙ ССР
ЕРЕВАН 1969

ՀԱՅԿԱԿԱՆ ՍՈՀ ԳԻՏՈՒԹՅՈՒՆՆԵՐԻ ԱԿԱԴԵՄԻԱ
ԱՐԳԵՍՏԻ ԽՆԱՏԽՈՒՏ

Հ. Վ. ՀՈՎՀԱՆՆԻՍՅԱՆ

H
A | 10695
10

ՄԱՐՏԻՐՈՍ ՄՆԱԿՅԱՆ



ՀԱՅԿԱԿԱՆ ՍՈՀ ԳԱ ՀՐԱՏԱՐԱԿՉՈՒԹՅՈՒՆ
ԵՐԵՎԱՆ 1969



Հարտիրոս Մնակյան (1912)

Աշխատուրյունը նվիրված է արևմտանայ քատ-
րոնի խոշորագույն դերասաններից և ռեժիսորներից
մեկի՝ Մարտիրոս Մնակյանի կյանքին ու ստեղծա-
գործուրյանը։ Մանրամասն լուսաբանված էն նրա
բնական կյանքը, առանձին դերակատարումները,
ստեղծագործական սկզբունքները և քատերական-հա-
սարակական միջավայրը։

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՐԱԿԱՆՈՒԹՅԱՆ ԳՐԱԴԱՐԱՆ

ԱՐԱՐԱՏԻ ՀԱՅԱՍՏԱՆԻ ՎԵՐԱՎՐԱՐ

ՀԵՂԻՆԱԿԻ ԿՈՂՄԻՑ

Մարտիրոս Մնակյանը հայ պրոֆեսիոնալ քատրոնի սկզբնավորման շրջանի նշանավոր գործիչներից է՝ հարուստ և հետաքրքիր արտիստական անհատականություն, մեկն այն դեմքներից, որ երեկ տվել է պոլսահայ քատերական միջավայրը:

Մնակյանի արտիստական կյանքն սկսվում է անցյալ դարի 50-ական թվականների վերջին, երբ հայ իրականության մեջ նոր միայն նախադրյալներ էին ստեղծվում ազգային պրոֆեսիոնալ քատրոնի համար, և ավարտվում մեր դարի երկրորդ տասնամյակում, երբ Պոլսում հիշատակներ էին մնացել այդ քատրոնից։ Հայ ոչ մի դերասանի ստեղծագործություն չունի ժամանակի այսպիսի լայն ընդգրկում։ Դա մի ամբողջ էպոխա է, որ իր մեջ է ամփոփում անցյալ դարի արևմտահայ պրոֆեսիոնալ քատրոնի և նրա հետ կապված դերասանական սերնդի պատմությունը։

Իր մեջ միավորելով ուսուցչին, դերասանապետին, բեմագրողին և քարզմանչին, Մեակյանն իր անհատական նկարագրով ամենից առաջ եղել է դերասան։ Չունենալով իր կրտսեր ժամանակակցի՝ Պետրոս Ադամյանի տաղանդի ուժը և արվեստի ընդգրկման սահմանները, միակն է եղել, որին մի շրջան փորձել են համեմատել նրա նետ։ Այդպիսի համեմատության հարկ չկա այսօր։ Արվեստը համեմատություններ չի սիրում։ Մի արվեստագետի մեծությունը չի փոքրացնում մյուսին, և յուրաքանչյուր արվեստագետ ինքն է սահմանում իր արվեստի շափանիշները։ Բայց շդիմելով համեմատությունների, չենք էլ կարող ուշադրության շառնել, որ Վահրամ Փափազյանն իր ուսուցիչներին՝ Նովկիլիին, Զակոնիին և Զիռողամո Գոցցիին հիշելիս, նրանց շարքն է դասում և Մեակյանին։ Խոկ Աբելյանին ուղես մեծություն համեմատելով Մումե Սյովլիի նետ, նա գրում է. «Նույնն էր և Մեակյանը, այն տարբերությամբ, որ առաջինը ֆրանսիացի լինելով իր արտաքինը տիրապետելու բարձր շնորհն ուներ, մինչդեռ եւկրորդը՝ նույն այդ սեփական շնորհները դասավորելու վարպետությունը»¹։ Նույնքան ուշագրավ, բայց ավելի կոնկրետ է Փափազյանի մյուս դիտողությունը. «Իր կատարած կերպարի հետ նույնանալու ընդունակ արտիստներ տեսել եմ և նրանց բիվը Քիշ շէ, բայց նույնանալ քատ արվեստի զանազան ձևերի, ապրել ոչ միայն գործը, այլև հեղինակի ժամանակը՝ քչերին է տրված, և Մարտիրոս Մեակյանն այդ քշերի մեջ բացառիկ տեղ էր գրավում»²:

¹ «Երևակուան Երևան», 1965, № 305:

² Վ. Փափազյան, «Հետադարձ հայացք», հ. 1, Երևան, 1956, էջ 212:

Այնուամենայնիվ, այսօր ժիշտ է հիշատակվում Մնակյանի անունը, և մեր ժամանակակիցներին շատ բան հայտնի չէ նրա մասին: Խնչո՞ւ: Հայ պրոֆեսիոնալ քատրոնի ձեռավորման շրջանի մասին (60—70-ական թվականներ) մենք ավելի պակաս գիտենք, քան' 90—900-ական թվականների: Խսկ Մնակյանի գործունեությունը հայ քատրոնում սահմանափակվում է 60—80-ական թվականներով: Նրա հետազա ստեղծագործական կյանքն ընթացել է հայ քատրոնից դուրս: Ապրելով և գործելով սովորանական Թուրքիայի մայրաքաղաքում, Համբիդ II գահակալության ամենամռայլ տարիներին, Մնակյանը կորած մնաց հայ քատրոնի համար քառորդ դարից ավելի, դատապարտված՝ կրելու այն բոլոր հարգածները, որոնց զոհ գնաց արևմտահայ քատրոնը: Մնակյան արտիստի կյանքն իր ամբողջ հակասականությամբ, իր վերելիներով և անկումներով, անցյալ դարի արևմտահայ քատրոնի պատմությունն է, ավելի նիշտ՝ նրա խորհրդանշումը:

Անցյալում շատ է գրվել Մնակյանի մասին, ավելի շատ, քան արևմտահայ բեմի հետ կապված որևէ դերասանի մասին: Նկատի շունենք հիսուն տարվա (1861—1912) ընթացքում հրապարակված քատերախոսականներն ու քոնճիկները, այլ կենսագրական բնույթի այն հոդվածները, որ ցրված են նախասովետական շրջանի թերթերում ու հանդեսներում: Դրանց զգալի մասը գրվել է Մնակյանի կենդանության օրոք, նրա ինքնակենսագրության՝ («Էլույս», 1901, թիվ 36, 37) հիման վրա և ավելին չէ, քան փաստերի պարբերական կրկնություն: Դրանք հրապարակ են եկել ավելի շուտ՝ որպես հարգանքի

տուրք պատվելի արտիստին, քան որպես ուսումնասիրություն։ Այդ բոլոր հոդվածների ընդհանուր թերությունն այն է, որ նրանցում ոչինչ չի ասված ամենազլիսավորի՝ դերասանի ստեղծած բեմական կերպարների մասին։ Բացառություն են կազմում Շարասանը (Ս. Թյուրյուննյան), 1912 թվականին Մնակյանի բեմական գործունեության հիմնամյակի առիվ հրատարակված նկարազարդ ալբոմի (Կենսագրական Մարտիրոս Մնակյանի, Կ. Պոլիս, 1912) հեղինակը և բանասեր Ս. Դավթյանը։ Առաջինն իր «Թրքահայ» բեմը և իր գործիշները (Կ. Պոլիս, 1914) աշխատությունում թվարկում է դերասանի մի տասնյակից ավելի դերակատարումներ, ընդհանուր գովեստով խոսելով նրանցից մի երկուսի մասին։ Մյուս կենսագիրը ավելի ժիշտ թվով դերակատարումների մասին է հիշում։ Իր ձեռագիր բղբերում մի քանի դերեր է թվարկում նաև Ս. Դավթյանը։

Մնակյանի կենսագրականների մյուս ընդհանուր թերությունը արևմտահայ քատրոնի պատմության ժամանակագրական փաստերի շփորն է։ Կան և ուրիշ տիպի աննշանություններ։ Այստեղ համեմատաբար ուշադիր է գտնվել Ս. Դավթյանը, որը գրել է Մնակյանի գործունեության վերջին շրջանի մասին (Թե ո դ ի կ, «Ամենուն տարեցույցը», 1927)։

Մնակյանի մասին գրել են նաև Թեոդիկը, պատմաբան Ա. Ալպոյանյանը, դերասաններ Ա. Մադարյանը, Ե. Թոլայանը, Ա. Դմբերյանը, Ն. Պեշիկքաշլյանը, քուրք քատրոնի պատմաբան Ռեֆիկ Ահմեդը և ուրիշներ։ Բոլոր կենսագիրները, առանց բացառության, չեն գրել, կամ հարեանցիորեն,

մի նախադասությամբ են հիշատակել նրա գործունեության
թիֆլիսյան շրջանը, մոռանալով ամենակարևորը՝ Մնակյանի
դասական խաղացանկի կերպարները, որոնք նրան բարձրաց-
րին մելոդրամային ռեալիզմից և մոտեցրին բնավորություն-
ների քատրոնի ռեփին: Ի դեպ, կենսագիրներից ոչ մեկը չի
փորձել որևէ կերպ քացարել Մնակյանի դերասանական
նկարագիրը: Այդ արել է միայն Վահրամ Փափազյանը, որն
իր «Հետադարձ հայացք» և «Թուրք քատրոնի զարգացման
պատմությունը» (ձեռագիր) գրերում ոչ թե դերասանի կեն-
սագրության փաստերն է ներկայացրել, այլ նրա արտիստա-
կան կերպարը: Փափազյանն ինչ-ինչ տեղերում վերացել է
հավաստիությունից, երեմն էլ՝ դեպքերի ու փաստերի տրա-
մաբանությունից, մոռացածք լրացրել է իր արտիստի երեա-
կայությամբ, բայց Մնակյանի արվեստին տվել է դիպուկ և
պատկերավոր բնուրագիր, նրա մարդկային և ստեղծագոր-
ծական կերպարը ներկայացրել է կենդանի գծերով, գեղար-
վեստականուն համոզիչ և ավարտուն:

Այս գրքի համար փորձել ենք աղբյուր ծառայեցնել
Մնակյանի մասին գրված այն ամենը՝ ինչին հնարավորու-
թյուն ենք ունեցել ծանոքանալ: Դերասանի կյանքի մասն ու
խոշոր փաստերը աշխատել ենք նշտել, ի մի բերել, հնարա-
վորին շափ լրացնել կենսագրական շղթայի օղակները, զու-
գահեռաբար բացելով նրա ստեղծագործական կերպարը: Մեր
հիմնական աղբյուրը ժամանակի քատերական ժննադասու-
թյունն է, թեև նա իիշ դեպքերում է մասնագիտունն մոտեցել
թեմական կատարման խնդիրներին: Մնակյանի դերակատա-

բումների մասին գրվածք, ինչպես և շատ շատերի, երբեմն մի ժանի խոսք է, երբեմն ավելին, լավագույն դեպքում պարզ նկարագրություն, ավելի շատ հիացմունքի խոսք և պակաս կոնկրետ միտք: Գրավոր փաստը գուցե ոչ մի մասը չի կազմում անհետացող գեղարվեստական երեսութիւն, բանի որ գեղարվեստական պրժեք չէ, այլ նրա բողած հետքը: Բայց էական այստեղ բննադատության մասնագիտական խոսքը չէ, այլ հետքի ձեռ ու խորությունը: Այդպիսին է շքեղ հրավառությունից մնացած մոխիրը, որ չի կարող լույսի զգացում արքնացնել, բայց կարող է գաղափար տալ կրակի և լույսի մասին: Թատերախոսականները, դերասանի խաղի անմիջական տպավորության տակ գրված խոսքերը, մեմորային նյութերը, ականատեսների թեկուզ և խամրած տպավորությունները, նույնիսկ անկենդան լուսանկարները եթե ի վիճակի չեն մեզ հաղորդակից դարձնելու դերասանի այլևս գոյություն չունեցող արվեստին, ապա միշտ կարող են օգնել զգալու այդ արվեստի ժամանակին ունեցած հասարակական արձագանքը, զնահատելու նրա պատմական դերը, հասկանալու դերասանի ստեղծագործական սկզբունքները, պատկերացնելու նրա գեղարվեստական միջավայրը, նաշակի, ընկալումների, միտումների ոլորտը: Աշխատության նպատակն է «վերականգնել» Մնակյանի արտիստական կերպարը արևմտահայքատրոնի պատմության ընթացքի մեջ, բացահայտել նրա անհատականության ու խաղանի առանձնահատկությունները, կապված իր միջավայրի և ժամանակի բեմական մտածողության նետ:

ԱԶԳԱՅԻՆ ԹԱՏՐՈՒՆԻ ԳԱՂԱՓԱՐԸ

Պրոֆեսիոնալ թատրոնի գաղափարը հայ իրականության մեջ 50—60-ական թվականների լուսավորական շարժման և ազատագրական տրամադրությունների արդյունք էր: Ազգային բուրժուազիայի զարգացումը, տնտեսական կյանքի որոշ կայունությունը բնականորեն արթնացնում էին կուլտուրական անկախության ձգտումներ, և ազգային իդեալների որոնումը կատարվում էր հոգևոր կյանքի ողբրտներում: Հայության արևելյան և արևմտյան հատվածները տոգորված էին նույն նպատակներով, քաղաքական ու կուլտուրական վերածնության նույն ձգտումներով, թեև ապրում էին քաղաքական տարրեր պայմաններում: Արևմտահայ բուրժուազիան տնտեսական կապերով և կուլտուրական ձգտումներով հակված էր դեպի եվրոպական իրականությունը, իսկ քաղաքականապես ենթարկված էր արևելյան բնակալության ավանդներով ապրող օսմանյան պետության օրենքներին:

XIX դարի սկզբում Թուրքիան ետ էր մնացել քաղաքա-
 կիրթ աշխարհի զարգացումից երկու հարյուրամյակով։ Այն
 ժամանակ, երբ Ֆրանսիան կատարել էր բուրժուական հե-
 ղափոխություն, իսկ Ռուսաստանում հաստինանում էր ազ-
 Արլական հեղափոխականների սերունդը, Թուրքիայում դեռ-
 ևս չկար հողի մասնավոր սեփականություն, և օմանյան
 կառավարողները պայքարում էին կենտրոնացված ավատա-
 կան միապետության համար։ Թուրքական բռնապետությու-
 նը, սորվացրած լինելով Արևելքի և Կենտրոնական Եվրո-
 պայի շառ ժողովորդների, իր ամրող գոլության ընթաց-
 քում չէր կարողացել ստեղծել տնտեսական ու ազգային
 հենարան և «իր ոչնչացրած քաղաքակրթության ավերակ-
 ների վրա շարունակում էր ապրել անապատի զգացմունք-
 ներով և նույնական հասկացողություններով»¹։ Սկսած
 XVIII դարի կեսից այդ ռազմա-ավատական պետությունը
 կանգնել էր բուրժուականացող Եվրոպայի առաջ արևելյան
 հետամնացությամբ։ Բուրժուական հարաբերությունների հա-
 մար Թուրքիայում չկար սոցիալ-տնտեսական հիմք։ Նորն
 այստեղ հաստատվում էր դանդաղ, հիվանդագին և միշտ՝
 պատմականորեն ուշացած։ Դրա հետ միասին Եվրոպայում
 բուրժուական կարգի ամրապնդումը և կապիտալիստական
 հարաբերությունների զարգացումը մի կողմից՝ սրում էին
 պայքարը «օմանյան ժառանգության» համար, մյուս կողմից՝
 բերում ազգերի և ազգային պետությունների կազմավորում։

¹ Լեռ, Հայոց պատմություն, հ. 3, էջ 4:

Աս նոր իմաստ էր տպիս թուրքահպատակ ժողովուրդների ազատագրական ձգտումներին, որոնց թվում էր նաև ժողովուրդը: Թուրքական հողի վրա աճած նայ բուրժուազիան դարձել էր նենարան արևմտքից թափանցող բուրժուական քաղաքակրթության համար:

Ակսած 40-ական թվականներից արևմտահայ հասարակական միտքը ամբողջովին կլանված էր ազգային ինքնագիտակցության և ազատագրության գաղափարներով: Այդ գաղափարների իրագործման ճանապարհին մտավորականությունը հիմնում էր իր ազգային դպրոցը, ազգային մասունք, ազգային թատրոնը: Մշակութային կյանքի բոլոր երևույթները գնահատվում էին ամենից առաջ հայրենասիրական ու լուսավորական գաղափարների իրագործման տեսակետից: Դպրոցն ու թատրոնը նորա համար էին, որ տարածենին մայրենի լեզուն, գրականությունը, և մանավանդ՝ պատմությունը: Նոր ծնվող թատրոնը բնույթով լուսավորական էր և հայրենասիրական: Այն ծնվում էր որպես դպրոց, դպրոցի նետ միասին և նորա պատերի ներսում:

Դպրոցական ներկայացումների պրակտիկան 40-ական թվականների վերջում Վենետիկի Մխիթարյաններից անցել էր Պոլսի Կաթոլիկական դպրոցները: Թատերական փորձերը աստիճանաբար տարածում են գտնում նաև լուսավորչական դպրոցներում: Փոխավում է խաղացանկի բնույթը՝ կրոնա-քարողախոսական թեմատիկային փոխարինում է պատմա-հայրենասիրականը: Այդ պրոցեսը կատարվում է բավական արագ. 50-ական թվականներին Պոլսի և Զմյուռնիայի

ազգային վարժարաններում բեմադրվող պիեսները գերազանցապես պատմական ողբերգություններ էին: Այս շրջանում է, որ արևմտահայ առաջավոր մտավորականությունը պայքար է սկսում ազգային պրոֆեսիոնալ թատրոնի համար:

Արևմտահայ իրականության մեջ «դպրոցական թատրոնը» պրոֆեսիոնալ թատրոնի նախապատրաստումը եղավ: Այստեղից է սկիզբ առնում պոլսահայ դերասանության առաջին սերունդը: Մարտիրոս Մնակյանը պատկանում է այդ սերնդին, և նրա բեմական գործունեությունը նույնպես մկավում է «դպրոցական թատրոնից»:

* * *

Մարտիրոս Մնակյանը ծնվել է 1837-ին Կ. Պոլսի հին թաղամասերից մեկում՝ Պալաթում: Հայրը՝ Մնացական Մնակյանը եղել է զինվորական դերձակ, «պարկեշտ և ուսումնասեր մարդ», ինչպես գրում է Մնակյանի կենսագիրը: Դերասանապետի մանկության ու պատանեկության տարիներն անցել են Խազգյուղում, որը բնակություն էր հաստատել նրանց ընտանիքը տղայի ծնվելուց մի քանի տարի հետո:

Խազգյուղը բնակեցված է եղել հայ, հովն, հրեա և թուրք արհեստավորներով: Ժամանակի ընթացքում այստեղ են հաստատվել հայ ամիրաներ և սեղանավորներ, հոգևոր ու պետական գործիչներ: Սկսած 30-ական թվականներից Խազգյուղը դադել է պոլսահայության կրթական-լուսավո-

բական շարժման կենտրոններից մեկը: Այստեղի Ներսիսյան վարժարանում կրթություն են ստացել ժամանակի նշանավոր հասարակական գործիչներ Գրիգոր Աղաջոնը, Մինա Չերազը, մանկավարժ Ռեթենոս Պերպերյանը, բանատեղծ և հրապարակախոս Եղիա Տեմիրճյանը, քժիչ Տիգրան Փեշտիմազյանը և որդիներ: Ներսիսյան վարժարանի աշակերտ է եղել նաև դերասանապես Մարտիրոս Մնակյանը:

50-ական թվականների սկզբին, երբ Մնակյանը Ներսիսյան վարժարանի աշակերտ էր, Պոլսի ասիական թաղամասներում չկար ժամանակակից տիպի թատրոն: Այստեղ ամենատարածված զվարճավիքը արևելյան թատերախաղներն էին: Ցերեկը շուկաների հրապարակներում ամբոխը հավաքվում էր նայելու օրթա-օյնների հտպիտներին, իսկ սրճարաններում Շամազանի ուրախ գիշերներին տղամարդկանց զվարճացնում էին թուրք կարագյոզչներն ու մեղահները:

Եվրոպական Պոլիսը սրանցով չէր ապրում: 40-ական թվականներից Բերայում կար թատրոնի եվրոպական տիպի շենք, կառուցված Աքդուլ Մեջիդ սուլթանի օրոք¹: Սա Նաումի հայտնի թատրոնն էր, որի հանդիսատեսն էին Բերայում ապրող եվրոպական դեապանությունների աշխատակիցներ, թուրք բարձրաստիճան անձինք, նաև՝ հայ ամիրաների ու հայուստ վաճառականների ընտանիքներ: Նաումի թատրոնում Աերկայացումներ էին տալիս իտալական օպերային, երեմն էլ՝ դրամատիկ խմբեր:

¹Տե՛ս Ս. Գավրյան, Եվրոպական թատրոնը Թուրքիո մեջ (Ս. Փրկչի ազգային հիմքանդանոցի «Ընդհանակ տարեցույց», 1932):

1855 թվականին Մնակյանն ավարտում է Ներսիսյան
վարժարանը: Նրան պահում են դպրոցում՝ որպես երկրա-
շափության դասատու: Միաժամանակ, որպես «այցելու ու-
սուցիչ», մաթեմատիկայի և ֆրանսերենի դասեր է տալիս
Կետիկ-փառայի, Էյուպի Ս. Եղիայի և Ազգային հիմքանդա-
նոցի վարժարաններում: Այդ նույն ժամանակ էլ Ներսիսյան
վարժարանում Մնակյանի գործակցությամբ թատերական
ներկայացումներ է նախաձեռնում ֆրանսերենի դասատու,
բժիշկ Գարեգին Չափրաստճյանը: Դրանք դեպքից-դեպք և
տոնից-տոն տեղի ունեցող հանդեսներ են եղել: Ներկայա-
ցումները պատրաստվել են տարվա ընթացքում, ուսումնա-
կան ծրագրին առընթեր և ներկայացվել Վարդանանց տոնի
կամ բարեկենդանի առթիվ: Խաղացվել են Միրզա Վանան-
դեցու ողբերգությունները, որոնք այդ տարիներին ամենա-
տարածված պիեսներն էին դպրոցական բեմերում: Չափ-
րաստճյանի բեմադրությունների գլխավոր դերակատարը
Մնակյանն է եղել: Այս մասին վկայում է Չափրաստճյանի
եղբայրը՝ դերասան Միքայել Չափրաստը. «Մնակյանը իր
ընկերակիցներուն միջև ամենեն մեծ ընդունակություն ցուց
տվողն է եղած, ինչպես կը հիշատակեր մեզի եղբայրս իր
կենդանության միջոցին»¹: Մնակյանն այս խմբում միակ
մարդն էր, որ իր հետագա կյանքը ամբողջովին կապեց
թատրոնի հետ:

1859 թվականին Չափրաստճյանը դուրս է բերում իր
խումբը՝ դպրոցական ներ շրջանակից և Մնակյանի հետ

¹ «Մանզումնի Էֆրամ», 1907, թիվ 1727:


միասին ձեռնամուխ լինում Խասգյուղի թատրոնի կազմակերպմանը: Այդ գործին մասնակից են դառնում Սերովբե Պենկյանը և Թովմաս Ֆանուլյանյանը: Չափրաստճանին նյութական օգնություն են ցուց տվել Ստեփան և Առաքել Ալթունտյուրիները և Մկրտիչ ամիրա Շեղայիրյանը¹:

Ալթունտյուրիները Ներսիսյան վարժարանի մոտ կառուցում են թատրոնի շենք: Չափրաստճանն իր շուրջն է համախմբում մի խումբ տաղանդավոր երիտասարդների, որոնք հետագայում պետք է դառնային «Արևելյան թատրոնի» գլխավոր ուժերը: Մնակյանից, Պենկյանից ու Ֆանուլյանից բացի, Հերիմյանի թատերախմբից (Բերա) հրավիրվում են նաև Պետրոս Մաղաքյանն ու Ստեփան Էքչյանը: Թատրոնի երաժշտական ղեկավարն է եղել Տիգրան Չուխաջյանը:

Ինչպես Պեղիկթաշլյանը Օրթագյուղում (1856) և Հերիմյանը Բերայում (1856)², այնպես էլ Չափրաստճանը Խաս-

¹ Վ. Զարդարյան, Հիշտակարան, հ. Բ, Կ. Պոլիս, 1912, էջ 196:

² Մ. Պեղիկթաշլյանի և Սր. Հերիմյանի թատերախմբերը, որոնք մեկը մյուսից անկախ կազմակերպվել են գրեթե միաժամանակ, առաջին թատրոնական կազմակերպություններն են պղղահայ իրականության մեջ: Նրանք պայմանները և մթնոլորտը են նախապատրաստել պրոֆեսիոնալ թատրոնի հիմնադրման համար: Բանասեր Գ. Ստեփանյանն իր «Ուրվագիծ արևմտահայ թատրոնի պատմության» արժեքավոր աշխատությունում այդ թատերախմբերին տալիս է: «Թաղային թատրոններ» անունը, քանի որ նրանց գործունեությունը՝ հիմնականում սահմանափակվել է Պոլսի մեկ-երկու թաղամասում: Այն դերասանները (Մնակյան, Մաղաքյան, Էքչյան, Աճեմյան և այլն), որոնք հետագայում հիմնեցին «Արևելյան թատրոնը» (1861), իրենց բեմական մկրտությունն ստացել են թաղային թատրոններում:



գյուղում պատրաստվում էր սկիզբ դնելու արևմտահայ առաջին պրոֆեսիոնալ թատրոնի, որ նա անվանել էր «Հայկան թատրոն»:

«Հայկան թատրոնը» բացվում է 1859 թվականին, բացմարդիկ հանդիսատեսների ներկայությամբ, հանդիսավոր պալմաններում: Ներկայացվում է «Վասակ կամ անիծյալ ընտանիք» կատակերգությունը, որի հեղինակը ըստ Սմբատ Դավթյանի եղել է «միսիթարյան վարդապետ մը»¹: Ներկայացումից առաջ Տիգրան Չոխաչյանի նվագակցությամբ երգվում է նրա հեղինակած «Դաշնակ առաջին ներկայացման Հայկան թատրոնին որ ի Խասգյուղ» հայրենասիրական երգը²:

Հենց այդ երգն էլ առիթ է դառնում, որ ներկայացումը առաջինը և վերջինը լինի «Հայկան թատրոնի» կյանքում: Թատրոնը փակվում է: Փակվելու հիմնական պատճառը Բերայի թատրոնի տնօրեն Միշել Նաումի դատն էր Ալթունտյուրի եղբայրների դեմ: Նաումին վերապահված էր Պոլսում թատրոնի շենք պահելու տասը տարվա մենաշնորհ: Քաղաքում թատրոնի երկրորդ շենքի գոյությունը պետք է նվազեցներ Նաումի թատրոնի գաստրոլյորների և հանդիսատեսների թիվը: Դատից մի շաբաթ հետո, կառավարական հրամանով թատրոնի շենքը հիմնահատակ քարուքանդ է արվում:

¹ Ս. Դավթյան, Հայ թատեր կյանքի արշավույսը, «Ընդարձակ տարեցույց», 1926, էջ 369—405:

² Մ. Միանսարյան, «Քնար հայկական», 1868, էջ 543—544:

Այս ձեռվ վերջ է դրվում պոլսահայ առաջին թատրոնական կազմակերպություններից մեկին, որի հիմնադիրներից մեկը Մարտիրոս Մնակյանն էր: Այսպիսի ճախողումից հետո նա դերասաններ Մաղաքյանի և Հովհաննես Անեմյանի միջնորդությամբ մտնում է Սրապիոն Հերիմյանի խումբը, որը ներկայացումներ էր տաղիս Նաումի թատրոնում: Հերիմյանը գործերով մայրաքաղաքի կենտրոնում Բերայում, ալգրում (1856-ից) գգուշանում էր հայերեն ներկայացումներ կազմակերպելոց: Իր «Վահրամ» ողբերգությունը նա բեմադրում է իտալերեն լեզվով, իսկ եվրոպական հեղինակներին՝ թուրքերեն: 1860-ին Հերիմյանը բեմադրության է պատրաստում իտալացի դրամատորգ Մոնտիի «Արիատուտեն» ողբերգությունը գրաքար թարգմանությամբ: Մոնտիին դիմելը պատահականություն չէր: XIX դարի առաջին կեսի իտալական դրամատորգիայի քաղաքացիական պարուը համահնչուն էր այն տրամադրություններին որոնցով ապրում էր արևմտահայ հասարակությունը: Նույն ոգով են գրված Պեշիկթաշլյանի և Հերիմյանի պատմական ողբերգությունները: Թերևս քաղաքական հեռատեսության կարելի է վերագրել այն, որ Հերիմյանը հայկական ներկայացումներն սկսում էր իտալացի դրամատորգի պիեսով:

Այս բեմադրությանը մասնակցել են գրեթե այն բոլոր դերասանները, որոնք պետք է հիմնեին «Արևելյան թատրոնը»: Ներկայացման ամենամեծ պակասությունը կին դերակատար չունենալն էր: Արիստոտելի դատեր՝ Կեսիրայի դերը, որը պիեսի միակ կանացի դերն էր, տրվում է Մնակյանին: Մնակյանը խմբում ամենաերիտասարդ դերասանն

էր՝ հազիվ քաներեք տարեկան, նուրբ դիմագծերով և բարեձև կազմվածքով։ Առաջին անգամը չէր, որ բեմ էր դուրս գալիս։ Բայց առաջին անգամ Նաումի թատրոնում, այն էլ կանացի դերով բեմ մտնելը նրա համար իրադարձություն էր։ Լուսավորված բեմը, մշուշապատ դահլիճից լավող հանդիսատեսի շնչառությունը, իր հագի ճերմակ շրջազգեստը, ուսերին թափված օտար, կանացի ոսկեգույն մազերը նրան այնպիսի հուզմունք և վախ են պատճառում, որ մեխիսած մնում է կուլիսի մթության մեջ, մտքում անընդհատ կրկնելով դերի առաջին բառերը. «հա՛յր իմ, հա՛յր իմ»։ Իսկ բեմում Արիստոտելն ապաստմ է Կեսիրային։ Մնակյանը չի համարձակվում բեմ մտնել և չի էլ նկատում ոչ Արիստոտելի դերակատար Էքշյանի սպառեալից հայացքները, ոչ իր կողքին կանգնած Մադաբյանին, որ խնդրում է նրան չխափանել ներկայացումը։ Ծարահատյալ, Մադաբյանը մի այնպիսի աքացի է հասցնում, որ «անփորձ դերասանութին» իր համար անսպասելի հայտնվում է բեմում, Արիստոտել-Էքշյանի թների մեջ, և իր վիրավորված ու աղաչական «հայր իմը» նետում էքշյանի դեմքին։ «Դերասանութու» անսովոր մուտքով ներկայացման «դրամատիկ լարվածությունը» նորոգվում է։

Մնակյանը սա համարել է իր առաջին ելույթը պրոֆեսիոնալ թատրոնի բեմում։

Ժամանակի մամուլում չկա ոչ մի խոսք այս ներկայացման դերակատարների մասին։ Դա չէր, որ պետք է զբաղեցներ հասարակական կարծիքը։ Ո՞վ էր դերասանի խաղին նայողը։ Թե ինչ էր կատարվում բեմում, ինչ էր ասվում և

ինչպես էր ասվում, այնքան էլ պարզ չէր գրաբար խոսքը շհասկացող հանդիսատեսի համար: Բայց բոլորի համար էլ կարևոր երևոյթն էր, որի հեղինակների նպատակն էր համազգային բնույթ տալ այդ երեկոյին, համարել հայ պրոֆեսիոնալ թատրոնի սկիզբ: Դա ինարկե այդպես չէր, բայց այդպես էր ներկայացվում մամուլում: Հեքիմյանն ու նրա կողմնակիցները պարզապես զգուշացել էին թատրոնը «Հայկան», «Արամյան» կամ որևէ ազգային անունով կոչելուց և անվանել էին «Արևելյան թատրոն»: Բայց այս ներկայացումով պրոֆեսիոնալ թատրոն կազմակերպելու հույսները չեն իրականանում: Մշտական թատերախումբ պահելու համար նյութական միջոցներ չկային, և մի շրջան հայ թատրոնական գործը կարծես կանգ է առնում: Դա կարճ է տևում՝ մինչև 1861 թվականի վերջին ամիսները: Այդ ընթացքում Մնակյանը շարունակում է խաղալ Ներսիսյան վարժարանը բեմում, երբեմն էլ երևոյթ է ունենում Հեքիմյանի խմբի հետ Նաումի թատրոնում:

Այս նույն ժամանակ իր ներկայացումներն է շարունակում Պեղիկթաշլանի կազմակերպած Օրթագյուղի թատերախումբը: Ապագա պրոֆեսիոնալ թատրոնի գործիչներից ոչ մեկին այս խմբում չենք տեսնում: Աշտեղ գործում էին մի խումբ անձնվեր երիտասարդներ առանց նյութական վարձատրության: Ոգեստության վրա պահված այս գործը պրոֆեսիոնալ թատրոնի հեռանկար չէր խոստանում, և այդպիսի հավակնություն չկար էլ: Խմբում չեն եղել մշտական դերասաններ, դերուսույց և ամենագլխավորը՝ ոչ մի դերասանու-

նի: Բայց Օրթագյուղի ներկայացումները մեծ հետաքրքրություն էին ստեղծել: Այս խումբը կազմակերպված լինելով փոքր-ինչ ավելի վաղ (1856), քան Չափրաստճանի և Հեքիմյանի խմբերը, հասարակական կարծիք էր ստեղծել ազգային թատրոնի գաղափարի շուրջը, բարոյական հող և ախապատրաստել պրոֆեսիոնալ թատրոնի համար, որն ստեղծվեց մեկ տարի հետո՝ 1861-ին:

1861 թվականի ամռանը Պոլսում հայ թատրոնական գործի գլուխ է անցնում մեկնասաների մի խումբ, Ստեփան և Առաքել Ալթունտյուրիների գլխավորությամբ, որոնց գործը ձախողվել էր Խազգյուղում: Կազմվում է վարչություն, որ ամեն ինչ անում է պրոֆեսիոնալ հիմքերի վրա դրված թատերախումբ կազմակերպելու համար: Ամենից առաջ ձեռք է բերվում հայկական ներկայացումներ կազմակերպելու պետական արտոնագիր: Դերասանական խումբը կազմվում է հիմնականում Բերայի թատերասերներից, որոնց թվում էր և Մնակյանը:

Այսպես է հիմնադրվում «Արևելյան թատրոնը», առաջին պրոֆեսիոնալ թատերախումբը Մերձավոր արևելքում:

«ԱՐԵՎԵԼՅԱՆ ԹԱՏՐՈՆՈՒՄ»

Հանդիսավոր իրադրության մեջ, 1861 թվականի դեկտեմբերի 14-ին տեղի է ունենում «Արևելյան թատրոնի» առաջին ներկայացումը: Երեկոն հայրենափրական ցույցի չվերածելու համար թատրոնի հիմնադիրները զգուշացել էին պատմական ողբերգություն ներկայացնելուց և բնմ էին հանել ֆրանսիական երկրորդական մի հեղինակի մելոդրամա՝ և խոսկերենից թարգմանված մի վոդնիլ: Այնուամենայնիվ այդ երեկոն մեծ խորհուրդ ուներ: Այն ճշանավորվեց Միքայել Նալբանդյանի «Ազգային թատրոն Պոլսի մեջ» հայտնի ճառով, որը բերում էր թատրոնի հասարակական դերի ավելի բարձր ըմբռնում, դառնում հայ նոր թատրոնի գաղափարական-գեղագիտական ծրագիրը:

«Արևելյան թատրոնի» բացումը մշակութային երևույթներուց առաջ, դարձավ քաղաքական երևույթ: Թատրոնը հիմնվել էր Ալթունտյուրիների նյութական միջոցներով, բայց նրա գաղափարական հովանավորությունն ստանձնում էր պղսահայ առաջավոր մտավորականությունը Սվաճյանի

գլուավորությամբ: «Արևելյան թատրոնի» գործունեության առաջին տարիները համընկնում էին այնպիսի երևույթների հետ, ինչպես «Ազգային սահմանադրության» համար պայքարը և Զեյթոնի ապատամբությունը 1862 թվականին: Սվաճյանը և նրա «Մեղոն» ոչ այնքան պաշտպանում էին նոր հիմնված մի մշակութային կազմակերպություն, որքան պոլսահայ առաջավոր մտավորականության գաղափարախոսությունն ու դիրքավորումը: Պարզ է, որ այսքանից հետո հայ ազգային թատրոնի գոյությունը սովորանական Թուրքիայի մայրաքաղաքում պետք է դիտվեր նախ որպես քաղաքական երևույթ: Դրանով էր իմաստավորված Մնակյանի և մյուս պրոֆեսիոնալ դերասանների գործունեությունը: Իսկ Նալբանդյանի ճանի հիմնական հարցերից մեկը դերասանի քաղաքացիականության հարցն էր. դերասանը ամեն ինչից առաջ պետք է լիներ հասարակական գործիչ, բարձր գաղափարների և բարոյական բարձր նկարագրի տեր մարդ: Իսկ Մնակյանը և պոլսահայ դերասանության առաջին սերունդը իրենց բուն գործունեությամբ հակառակ դրված էին այն շրջաններին, որոնք սկսել էին «թշնամանք տեղակ բովանդակ թատրոնի վրա, նախատել մարդիկ, որոնց կոչիկների խրացը արժանի չէին լուծանել, հայրուել նաև հանդիսականքը և անդուռն բերանով և վասակյան ճամարտակությամբ զրպարտել բոլոր ազգը և, կատաղի ճիվաղի պես փողոցից փողոց նետվել և տնից տուն վագելով դիմել մինչև ոստիկանությունը¹»: Թատրոնն ուներ այնպիսի

¹ Մ. Նալբանդյան, Երկերի լիակատար ժողովածու, Երևան, 1948, էջ 307—311:

մի ոլսույալ թշնամի, ինչպիսին էր հետադիմական կղերականության պարագլուխ Զամուռճյան-Տերոյենցը իր «Երևակով»:
«Սորա-հակառակ,—գրում էր Նարբանդյանը,—դերասանների և դերասանութեաց ջանքը, արգու հասարակության ընդունելության հետ կարող են մեծ ընթացք տալ թատրոնին»:
Այս խոսքերից էլ հետևում էր, որ թատրոնի գործը հասարակական մեծ նշանակություն ունեցող գործ էր, իսկ նրան նվիրվելը հերոսության նման մի բան:

Մնակյանի, որպես հայ առաջին պրոֆեսիոնալ դերասաններից մեկի, ստեղծագործական կյանքի սկիզբը անմիջականորեն առնչվում էր 60-ական թվականների լուսավորական գաղափարների, ազգային ինքնագիտակցության և ընդհանրապես այն ամբողջ պայքարի հետ, որ մղում էր արևմտահայ առաջավոր մտավորականությունը: Մնակյանին և իր ժամանակակիցներին բեմ էր տանում ամենից առաջ հայրենասիրությունը՝ քաղաքացիական մեծ պարտականությունների գիտակցությունը: Այդ թվականներին հայ իրականության մեջ թատրոնը չէր կարող դիտվել այլ կերպ, քան որպես լուսավորական և ազատագրական գաղափարների խոսափող, իսկ դերասանը՝ լուսավորիչ և հրապարակախոս: Նկատենք, որ արևելահայ թատրոնն էլ, որ հիմնադրվեց այս նույն շրջանում (1863 թ.), գոյության նույն շարժադիրները և նույն միտումներն ուներ: Հասկանալի պաճառներով լուսավորական և հատկապես ազատագրական միտումներն ավելի որոշակի արտահայտություն գտան արևմտահայ թատրոնում: Դրանք իրենց հետ բերեցին թատրոնի

և դերասանի արվեստի յուրահատուկ մի ըմբռնում, յուրահատուկ ոճաբանություն, որով դաստիարակվելու էր արևմտահայ դերասանության առաջին սերունդը: Արևմտահայ թատրոնը ձևավորվում է որպես հայրենասիրական թատրոն և դա իր կնիքն է դնում դերասանի ստեղծագործական նկարգրի և խաղաղության վրա: Մնակյանի արվեստը չէր կարող ազատ լինել նաև այն ազդեցություններից, որոնք դրսից էին թափանցում արևմտահայ հասարակական և մշակութային կյանքի բոլոր ոլորտները:

Դարի 50-ական թվականներից երկրի քաղաքական ու տնտեսական կառուցվածքը հարմարեցվել էր եվրոպական կապիտալի շահերին և ամենայն նորություն ներմուծվում էր դրսից: Դրիմի պատերազմից հետո, 1856-ի Փարիզի դաշնագրով Նապոլեոն III Ֆրանսիան Թուրքիայի հանդեպ ստանձնել էր քաղաքակրթություն տարածողի դեր, ձեռք էր բերել թուրքահպատակ քրիստոնյաներին հովանավորելու իրավունք և քավական հետևողականորեն տանում էր լուսավորություն և կաթոլիկություն տարածողի իր «առաքելությունը»: Տնտեսական և առևտրական կապերն արևմուտքի հետ, որ տեղի ունեին Պոլսի, Զմյուտնիայի և Տրապիզոնի քրիստոնյա վաճառականության և մասնավորապես հայ վաճառականության միջոցով, հող էին նախապատրաստել գաղափարական և մշակութային կապերի համար: Եվրոպական սպրանքների հետ միասին Թուրքիա էին մտնում ֆրանսիական մոդաներ ու բարքեր, նաև՝ գրքեր ու գաղափարներ: Պոլսի էին այցելում իտալական և ֆրանսիական թատերա-

խմբեր, իսկ կաթոլիկական դպրոցները և ֆրանսերեն լեզուն հիմք էին ծառայում, որ արևմտահայության մեջ տարածում գտներ ֆրանսիական ոռմանտիզմի գրականությունը և ֆրանսիական հեղափոխությունների գաղափարախոսությունը: Հայ առաջավոր մտավորականության ներկայացուցիչները, կրթություն ստացած լինելով Փարիզում, մոտիկից էին ծանրացել Եվրոպայում տիրող քաղաքական կարգերին և ուսումնասիրել ուսուպիստ-սոցիալիստների երկերը: Նըրանցից ումանք 1848-ի փետրվարին մարտնչել էին քարիկադների վրա, ոգեստրված էին ֆրանսիական հեղափոխությունների և Խոպհայի ազատագրական պատերազմի օրինակներով: Ժամանակն այնպիսին էր, որ պետք էր հզոր ձայնով ապլած վերամբարձ խոսք, մարդուն ազատության կոչող այնպիսի շեփորահար, ինչպիսին էր Ալֆիերին դարակզբի Խոպհայում: Արևմտահայ իրականության մեջ հայրենասիրական-ազատագրական պայքարի շեփորահարներ էին Պետրիթաշլյանն ու Հերիմյանը: Հայ հայրենասիրական թատրոնի բովանդակությանը միանգամայն ներդաշնակ էին դրաից եկող ազդեցությունները: «Արևելյան թատրոն» հայրենասիրական գաղափարների խոսքող լինելոց բացի, ենթարկված էր ժամանակի խոպհական և ֆրանսիական թատրոններում տիրապետող գեղարվեստական մտածողությանը: Ժամանակակից հայ հեղինակների պատմահայրենասիրական պիեսների, Ալֆիերիի և Մոնտիի քաղաքացիական տրագեդիաների, Հյուգոյի ոռմանտիկական դրամաների հետ թատրոն էին մտնում Դյումա-հայրը, Մոլիերը և սրանց հետ եվրոպական մելոդրաման՝ փարիզյան «Պորտ

Սև-Մարտեն» և **«Ամբիգյու կոմիկ»** թատրոնների մասսավական խաղացանկը: Գրական նյութը, որի վրա բարձրանում էին խոշոր դերասանական անհատականությունները Եվրոպյում՝ դարի առաջին կեսին, ֆրանսիական ոռմանտիզմի դրամատորգիան էր և մելոդրաման: Այդ տարիներին ֆրանսիական ոռմանտիկ բեմական դպրոցի խոշորագույն ներկայացուցիչ Ֆրեդերիկ Լեմեթըն ուներ հետևողիների ու ընդօրինակողների մի մեծ խումբ: Մելոդրամաները, որոնցում փայլել էր Ֆրեդերիկիլը տարիներ առաջ, շարունակում էին տեղ ունենալ Փարիզի մեծ ու փոքր բեմերում և քաղաքից քաղաք ու երկրից երկիր շրջող իտալական թատերախմբերի խաղացանկում:

Այդ թատերախմբերն այցելում էին նաև Պոլիս:

1861-ի աշնանը Պոլսում ներկայացումներ էր տալիս իտալական մի թատերախումբ, «կապոլոմիկո» (դերասանապետ) Չոլիի գլխավորությամբ: Խորի ուժիւրն է եղել մի լոթանասունամյա իտալացի, Աստի ազգանունվ: «Արևելյան թատրոնի» վարչությունը Աստիին հրավիրում է որպես դերուսուց և նույն թատերախմբի դիրիժոր Ֆուլինիին, որպես երաժշտական դեկավար: Առաջին ներկայացման համար Աստին թարգմանել է տալիս Չոլիի թատրոնի խաղացանկից երկու պիես՝ Ռութայի «Երկու հիսնապետներ» դրաման և իտալական «Պոլչինելլա» կոմեդիան: Աստիի խորհրդով և դեկավարությամբ, հայ դերասանները հաճախում են իտալական խմբի փորձերին ու ներկայացումներին¹: Այս

¹ Գրականության և արվեստի թանգարան, Թատերական բաժին, Ս. Դավթյանի ֆոնդ (այսուհետև՝ Ս. Դավթյանի ֆոնդ):

ձևով,թե դրամայի, թե կոմեդիայի հայկական բեմադրությունը մասամբ ընթօրինակվում է իտալականից:

«Երկու հիսնապետները» մելոդրամատիկ կառուցվածքի և բարոյափոսական-հումանիստական բովանդակությամբ մի գործ է, ունի սրբնաց պյութե, սուր և եֆեկտիվ բեմավիճակներ, դերասանին ստեղծագործելու հյութ տվող հետաքրքիր և խաղացվող դերեր: Հիսնապետ Վիլհելմը, որ ժամանակին հերոսություններ է գործել և պարգևատրվել շքանշաններով, զինվորական կարգապահությունը խախտելու համար դատապարտվել է մահվան: Նրան թույլ են տալիս գնալ տուն, հրաժեշտ տաղ ընտանիքին, իր փոխարեն, որպես պատանդ, պահելով ընկերոջը՝ Ռոբերտ հիսնապետին: Եթե նա ժամանակին չներկայանա, իր փոխարեն ընկերը պետք է պատժի: Վիլհելմի վերադառնալու ժամանակ հավապետը՝ Ռոբերտի հին թշնամին այնպես է անում, որ նավը շուտ ճանապարհ ընկնի և Վիլհելմը չկարողանա մահապատժի ներկայանալ: Բայց Վիլհելմը նետվում է ծովը, լողալով անցնում վիթխարի տարածություն և տեղ հասնում այն պահին, երբ արդեն պատրաստվում են գլխատել Ռոբերտին: Մարշալը, որի դերը կատարել է Մնակյանը, տեսնելով երկու հիսնապետների ընկերասիրությունն ու անձնագործությունը, ներում է շնորհում հրանց:

Մարշալը ձևով տիպիկ մելոդրամային կերպար է: Ամբողջ ներկայացման ընթացքում նա ծպտված է, և լսում, տեսնում ու իմանում է ամեն ինչ: Միայն վերջին տեսարանում Մարշալ-Մնակյանը դեն է նետում իր սև թիկնոցը, և հանդի-

աստեսը տեսնում է, որ խորհրդավոր անձանոթի թիկնոցի տակ թաքնված է եղել ճշմարտությունն ու արդարությունը մարմնավորող մի առապելական՝ անձնավորությունն, որի աչքից չի վրիպում ոչ մի անարդար գործ: Մարշալը սիմվոլիկ գործող անձ է: Մելոդրամայի սովորական էֆեկտն այստեղ իրենում թաքցնում է այդ ժանրի համար սովորական բարոյախոսությունը, որ աստծո արդարությունը կորած չէ, այլ թաքնված է և մարդու օրհնասական պահերին անպայման ցուց է տալիս իր դեմքը:

Սուազին ներկայացման ժամանակ, ինչպես գրել է Սվանջանն իր թատերախոսականում, «պարոն Մարտիրոսը այնքան ալ հաջողած չէ»¹: Մի տարի անց Մնակյանի Մարշալը դատնում է մելոդրամայով տարված հանդիսատեսի սիրելի հերոսներից մեկը: Այդ դերը նրան ուղեկցում է իր ամբողջ բնմական կյանքի ընթացքում մինչև խոր ծերություն: Ընդհանրապես «Երկու հիմնապետները» բավական երկար չ մնացել թե՛ արևմտահայ, թե՛ արևելահայ բնմերում, և Մնակյանն էլ հաճախ է անդրադարձել այս պիեսին:

Մարշալի դերը ներդաշնակ էր Մնակյանի արտաքին նկարագրին: Մնակյանը չուներ, այսպես կոչված, «դյուցագներգակ» դերասանի տվյալներ՝ բարձր հասակ, որոտացող ձայն, ինչպես Էքչյանը: Նրա միջինից քիչ բարձր, ուղիղ և համաշափ հասակը, մի քիչ խող բարիտոնը և ընդհանրապես մեղմ նկարագիրը կարծես բավական էր բնմական ազգի հերոսի ավանդական կերպարի համար: Բայց Մնակյա-

¹ «Մելոն», 1861, թիվ 147:

նի դերասանական հակումներն այլ էին; Նա թատրոն էր եկել հայրենասեր հերոսներ խաղալու համար. նրան քաշով էին էքչյանի դերերը:

«Արևելյան թատրոնի» հաջորդ բեմադրություններում Մնակյանի անհատականությունն ի հայտ է գալիս ոռման-տիկ-լիրիկական նկարագրի դերերում: Հերոսական և պայծառիկ ոճը, որը հասուն էր այդ թատրոնին, Մնակյանի խաղում ստանում է ոռմանտիկ-սենտիմենտալ գունավորում: Հերոսականությունը նրա խաղացած կերպարներում չի դըրսկորում խոշոր գծերով, ինչպես Էքչյանի մոտ. Մնակյանի դրամատիկ հերոսները չեն դառնում արտասովոր անհատներ: Ոչ այնքան հերոսականությունն, որքան բարությունն, ոռմանտիկ-սենտիմենտալ բեավորությունն և պոռթկացող, արտաքրուստ պայծետիկ, երգային խոսք: Այս ձևով են դրսելորվում Մնակյանի իդեալ-հերոսները՝ Սիսակը (Մ. Պեշիկ-թաշլյան՝ «Արշակ Բ»), Երվանդը (Թ. Թերզյան՝ «Սանդուկիստ»), որոշ ժամանակ անց՝ Ռոժեն (Սր. Մանավան՝ «Զրադացաւանի աղջիկը»), Ռինալդոն (Սր. Թղլյան՝ «Էլեոնորա») հետագայում՝ Պատուն (Սիլվիո Պելիկոն՝ «Ֆրանչեսկա դա Ռիմինի»): Ինչպես այս, այնպես էլ որիշ դերակատարումներում Մնակյանը չի ունեցել այնպիսի հաջողությունն, ինչպես Արուալ Փափազյանն ու Էքչյանը: Մնակյանի և մյուսների մասին գրվել է անհամեմատ քիչ, քան Արուալի մասին, որի բեմ բարձրանալը նոյնքան խոշոր երևույթ էր ժամանակի համար, որքան պրոֆեսիոնալ թատրոնի հիմնումը հայ իրականության մեջ: Բնակյան է, որ ոգևորության

ապապիսի մթնոլորտում աննկատ պիտի մնար ոչ միայն Մնակյանը, այլ ընդհանրապես դերասանի խաղը: Չի կարելի ասել, որ թատրոնի նոր հիմնված շրջանում ստեղծվել են պրոֆեսիոնալ, բարձրարվեստ դերակատարումներ: Դրամատիկ դերասանութու իր ամբողջ կարողությամբ փայլել է Արուպյակ Փափազյանը, բայց նրա հաջողության հիմքը ավելի շատ ներքին թափը, բարձրաձայն, տրամադրող խուքը և ոռմանտիկ դերասանութու էֆեկտներն են եղել, քան կերպարի հոգեքանական վերլուծման կարողությունը և դերասանական մշակված վարպետությունը: Այդ չափանիշով չեր, որ գևահատովելու էր դերասանի արվեստը: Հանդիսաւեսը բեմից ամենից շատ ուզում էր լսել պալթետիկ, ոգևորող խոսք: Նրան ավելի էին հոգում հայրենասիրական ու հակաբոնակալական ճառերը, քան հիսնապետ Վիլհելմի անձնական դրաման: Այդ էր պատճառը, որ Պեշիկթաշլյանի «Արշակը» կամ Թերզյանի «Սանդուխտը» ավելի ոգևորությամբ են ընդունվել, քան Հյուգոյի «Թագավորը զվարճանում է» («Արքայն զբունու») դրաման:

«Արևելյան թատրոնի» առաջին թատերաշրջանում Մնակյանը ճանաչում է գտնում որպես կրթված դերասան, բայց «առաջին սիրահարի» ամպլուան այնքան էլ նպաստավոր չէր, «քացարձակ դերասան» հոչակվելու համար: Երկրորդ թատերաշրջանում համեմատաբար լայնանում են նրա դերասանական ամպլուայի սահմանները: Մոլիերի «Ագահը», «Տարտյուֆը», Ռենյարի «Խաղամոլը», Հյուգոյի «Թագավորը զվարճանում է», Վոլտերի «Ալզիրը» հնարավորություն են տալիս նրան չափելու իր ուժերը, շոշափելու

իր մեջ դրամատիկ և կոմիկ դերասանին: Այսուամենապեսիվ՝ մի շրջան նրա մեջ շարունակում է տիրապետող մնալ ռոմանտիկ-սենտիմենտալ խառնվածքի դերասանը՝ ավանդական «առաջին սիրահարի» դերակատարը:

Երկրորդ թատերաշրջանի խաղացանկում չենք տեսնում ոչ մի պատմա-հայրենասիրական պիես: Այս երեսույթը բանասեր Գ. Ստեփանյանը բացատրում է այն ազգային-քաղաքական հաղածանքով, որ սկսել էր սովորանական կառավարությունը հայերի դեմ, Զեյթունի ապստամբությունից հետո (1862)¹: Սա թերևս ամենահիմնավոր բացատրությունն է:

Այստեղ դեր են ունեցել և ուրիշ հանգամանքներ: 60-ական թվականներին մելոդրաման իր ձևով և գաղափարախոսությամբ գրեթե նույնքան ներդաշնակ էր դերասանի կամ հանդիսատեսի ճաշակին և կյանքի առաջադրած խընդիրներին, որքան հայ պատմա-հայրենասիրական ողբերգությունը: Հասարակական միտքն այդ տարիներին գրաված էր ոչ միայն ազգի ազատագրության, այլև այդ նույն ազգի կրթական և բարոյական դաստիարակության խնդիրներով: Բորժուական հեղափոխությունների էպոխայում արևմտահայ իրականությունն ուշացած և լուրահատուկ ձևով ապրում էր լուսավորական շրջան: Հասարակական-քաղաքական կյանքի անկատարությունների լուծումը մտավորականության մի մասը տեսնում էր անհատի բարոյական կա-

¹ Գ. Ստեփանյան, Ուրվագիծ արևմտահայ թատրոնի պատմության, հ. 1, Երևան, 1962, էջ 245—249:

տարելագործման մեջ: Ազգի ու հայրենիքի գաղափարները և վերացական հումանիզմն ու բարոյախոսությունը հասարակական մտածողության հենարաններն էին: Այս մթնոլորտում առաջացավ ոչ միայն լուսավորական թատրոնի գաղափարը, այլև ձևավորվեց նրա գեղագիտությունը: Տեսակետները լուսավորական թատրոնի մասին պատեղ մշակվեցին ավելի վաղ, քան կրիմնվեր թատրոնը: Դեռևս մեկ տասնամյակ առաջ ազգային թատրոնի գաղափարն սկսել էր մշակվել եվրոպական լուսավորական թատրոնի լուսի տակ: Պեշիկթաշլյանի «Համազգյաց» լուսավորական ընկերության անդամներից մեկի՝ Հիսարյանի հոդվածը թատրոնի մասին, ապացուցն է այն բանի, որ արևմտահայ մտավորականության համար թատրոնի լավագույն օրինակը ֆրանսիական XVIII դարի երկրորդ կեսի լուսավորական թատրոնն էր¹: Եթե ուշադիր կարդանք Նալբանդյանի ճառը, կենկատենք, որ Նալբանդյանը արևմտահայ իրականություն բերելով թատրոնի հասարակական դերի նոր, ավելի բարձր ըմբռնում, այնուամենայնիվ նրա առջև դնում էր լուսավորական ուսալիզմի պահանջներ: «Թատրոնի բեմը ստոր չէ ուսումնական ամբիոնից, թատրոնի բեմն է այն աթոռը որ նատում է փիլիսոփայությունը և մարմնավորելով բանը կենդանի գործնական գաղափարներով ազատում է հասարակությանը այդ գաղափարը երևակայությամբ միայն ըմբռնելու աշխա-

¹ Տե՛ս «Արշալոյս Արարատյան», Զմյուռնիա, 1850, թիվ 359 և Վ. Սաֆարյան, Ե՞րբ է գրվել Պեշիկթաշլյանի «Կոռնակ» պիեսը, (ՀՍՍՀ Գ.Ս. «Լրաբեր» հասարակական գիտությունների, 1966, № 1, էջ 78—81):

տուլթենից, թատրոնի բեմն է բարոյական այն ահեղ դատաստանը, որ արդարությունը և հանցանքը առանց աշառության ստանում են յորյանց արժանի հասուցումը»: (Ընդգումները մերն են —Հ. Հ.):

Ուղակիորեն դնելով լուսավորական թատրոնի խնդիրը, Նալբանդյանը նկատի չուներ ֆրանսիական թատրոնը, բայց գիտակցում էր, որ հայ հասարակական կյանքը լուսավորական թատրոնի կարիք ուներ: Այնուամենայնիվ հայ թատրոնն անհաղորդ մնաց և՝ Դիդրոյի դրամատորգիական տեսությանը, և՝ Վոլտերի, Բումարշեի, Մերայեի դրամատորգիային: Դա անմարտելի նյութ էր հայ թատրոնի այն ժամանակվագործիշների համար, իսկ եվրոպական թատրոնի համար՝ վաղուց անցած շրջափուլ: Համենայն դեպք Վոլտերի «Ալզիր» թեև քիչ, բայց մի շրջան խաղացվեց «Արևելյան թատրոնում», ազգային պատմական պիեսների և թարգմանական մելոդրամաների կողքին: Իսկ մելոդրաման ոչ միայն մատչելի ժանր էր, այլև լիովին համապատասխան արևմտահայ լուսավորական թատրոնի միտումներին: Մելոդրաման քարոզում էր վերացական հումանիստական իդեալներ՝ դասային հավասարություն, հարգանք և կարեկցանք դեպի զյրկվածն ու աղքատը, արդարամտություն և սեր, ատելություն ստի, կեղծիքի ու չարագործության հանդեպ: Այն «արժանի հասուցում» էր տալիս «արդարությանն ու հանցանքին», որոնք ընդհանուր, վերացական հասկացություններ էին հասարակության ու հանդիսատեսի համար:

Մելոդրամայի աստիճանական տիրապետության համար կային և ուրիշ պատճառներ: Հայ պատմական ողբերգությունը չուներ ձևի կատարելություն. չէր կարող բավարարել բեմականության և նոր սկզբնավորվող դերասանական պրոֆեսիոնալիզմի պահանջները: Բնական է, որ մղումը դեպի գեղարվեստական տեսակետից ավելի կատարյալ պիեսներ մի շրջան կարող էր և մոռացնել տաղ ազգային դրամատորգիան: Նկատենք, որ պատմա-հայրենափրական ողբերգություններին այդ թատերաշրջանում փոխարինել են ոչ միայն մելոդրամաներ, այլև Մոլիերի դասական կատակերգությունները: Ժամանակի լուսավորական գաղափարախոսությանն առավել համահնչուն էր Վոլտերի «Ալզիրը»: Համարական պատճառներով մամուլը ոչինչ չի գրել այս վերջինի բեմադրության մասին: Մոլիերը նույնապես «անքարենուս» հեղինակների շարքին էր պատկանում, և մամուլը ոչ մի տեղեկություն չի թողել «Ժլատի» ու «Տարտյուֆի» բեմադրությունների մասին: Նույնիսկ հայտնի չէ, թե ով ինչ դեր է խաղացել: Չի գրվել նաև Հյուգոյի «Թագավորը զվարճանում է» դրամայի բեմադրության մասին: Ընդհանրապես «Արևելյան թատրոնի» առաջին երկու թատերաշրջանների ընթացքում թատերական քննադատությունը հազվադեպ է անդրադառնում թատերական արվեստի հարցերին: Թատերախոսականները շատ հաճախ գրվում են ի պաշտպանություն թատրոնի գաղափարի, որը դեռ ընդունելություն չէր գտել արևմտահայ հասարակության բոլոր խավերում: Թատրոնի, իբրև ազգային-հայրենափրական գործի, պաշտպանությունը այնքան միտք ու եռանդ է կլանում, որ

գեղարվեստական խնդիրները ակամա մղվում են ետին պլան:

Երկրորդ թատերաշրջանի (1862—63) կեսերին դերասանական խումբը բաժանվում է երկու մասի: Ըստ Հրանտ Ասատորիի, դա սկսվում է Մնակյանից, որը շհանդուրժելով թատերախմբում Էքչյանի ունեցած գերիշխող դիրքը, հրաժարվում է իր բոլոր դերերից և խմբից հեռանում¹: Նրա հետ միասին խմբից անջատվում են Հ. Վարդովյանը և Հ. Անենյանը: Վարդովյանի և Մնակյանի նախաձեռնությամբ կազմակերպվում է նոր խումբ, որը պատրաստվում է մեկնելու Զմյուռնիա՝ «Վասպուրական թատրոնում» ներկայացումներ տալու:

Զմյուռնիան արևմտահայության երկրորդ մշակութային կենտրոնն էր Պոլսից հետո, նոյնքան մոտ եվրոպական կենցաղին ու բարքերին: Մտավորականությունը բավական սերտ շփման մեջ էր եվրոպական լեզուների և գրականության հետ, իսկ իտալական երաժշտությունը և ֆրանսերն լեզուն առօրեական էին հայ բորբոքական ընտանիքներում դեռևս 40-ական թվականներին: 1853-ին այստեղ հիմնը-վել էր Տեսնեյան եղբայրների տպարանը: Հայտնի է Տեսնեյանների երախտիքը եվրոպական դասական հեղինակների, հատկապես Շեքսպիրի թարգմանության գործում:

1861-ի սկզբին Զմյուռնիայում հիմնվել էր «Վասպուրական թատրոնը», և քաղաքացիական ու պատմա-հայրենասի-

¹ Հր. Ասատոր, Բերայի «Արևելյան թատրոնին» առաջին երկու տարեշրջանները («Ընդարձակ տարեցուց», 1926, էջ 29):

րական թեմատիկան այստեղ ավելի մեծ տեղ ուներ, քան «Արևելյան թատրոնում»: Պատճառը թերևս այն էր, որ խումբը մայրաքաղաքից հեռու էր, չուներ պրոֆեսիոնալ բնույթ և ենթարկված չէր այնպիսի հետապնդումների, ինչպես «Արեվելյանը»¹:

Վարդովյան-Մնակյան խումբը փոփոխություն է առաջ բերում «Վասպորական թատրոնում»: Այս խմբի պրոֆեսիոնալ մակարդակը անհամեմատ բարձր էր, և «Վասպորական» խումբը գործել ցրվում է: Նրանից մնում են շնորհամեևը մի քանի հոգի, որոնք միանում են պոլսեցիների խմբի²: Թատերաշրջանի բոլոր ներկայացումներն անցնում են լեցուն հանդիսարանի առջև, որ կազմված էր հայերից, հովաներից, խովացիներից և ֆրանսիացիներից: Որոշ պիես-

¹ Գ. Ստեփանյանի «Ուրվագծում» պատահականորեն չի արձանագրված այն փաստը, որ «Վասպորական թատրոնի գործունեության» արձագանքել է Գր. Չիլինկիրյանի «Ծաղիկ» հանդեսը: Գ. Ստեփանյանը գրում է, որ հայունի չէ թե «Արշակ Բ-ից» հետո թատրոնը ինչ է ներկայացրել, որ 1861-ի գարնանը ներկայացումները դադարել են և նոր թատերաշրջանն սկսվել է 1862-ի դեկտեմբերին (էջ 273): Մինչդեռ ինչպես վկայում է «Ծաղիկը», 1861-ի ամունը «Վասպորական թատրոնը» ներկայացրել է Մոնտիի «Արիստոտելմը» և Վանանդեցու «Մեծն Ներսեսը» («Ծաղիկ» 1861, թիվ 2, 3): Մասնիվ տվյալներն ասում են, որ սրբազ պատահական ներկայացումներ չեն եղել, և մինչ այդ թատրոնն ունեցել է տևական գործունեություն:

² «Արշալուս Արարատյան», 1863, թիվ 701: Այստեղ ապամ է, որ Վարդովյանի ու Մնակյանի խումբը կազմված է եղել 16 մարդուց, որոնց մեծ մասը եղել են պոլսեցիներ, իսկ մի քանիսը տեղացի սիրողներ:

Անք խաղացվում են հունարեն և ֆրանսերեն, որոշ պիեսներ՝ թուրքերեն, նաև՝ իտալերեն: Անցյալ դարի հայ թատրոնական կազմակերպություններից ոչ մեկի խաղացանկը չի եղել ավելի բազմազան ու հետաքրքիր, քան Վարդովյան-Մնակյան խմբին: Խաղացվել է տասնմեկ ինքնուրուց պիես՝ հինգ ողբերգություն, վեց կատակերգություն, դրանց թվում Մնակյանի հեղինակած «Անհիշաչար բարեկամություն» և «Աչք կապուկ» վոդեկիլները: Խաղացանկում կենտրոնական տեղ են ունեցել Մոլիերը («Փուրսնյակ», «Ակամա բժիշկ», «Բոնի ամուսնություն», «Սերը բժիշկ է», «Ագան»), Հյուգոյի «Լուկրեցիա Բորջան», Վոլտերի «Ալգիրը», Դյումայի «Կատրին Հովարդը», Ալֆիերի «Վիրգինիան»:

Թատերաշրջանի վերջին ամիսներին Վարդովյանը վերադառնում է Պոլիս: Մնակյանը մենակ է կառավարում խումբը որպես դերասանապետ, դերուսուց և առաջատար դերասան: Իսկ հաջորդ՝ 1863—64 թատերաշրջանի սկզբում դեպի Զմյուռնիա է դիմում պոլարիայ դերասանների մի մեծ խոսն՝ գրեթե ամբողջ «Արևելյան թատրոնը» Էքչյանի գլխավորությամբ: Մնակյանի և Էքչյանի խմբերը միանում են: «Արևելյան թատրոնը» վերակառուցվում է Զմյուռնիայում Էքչյանի նախաձեռնությամբ:

«Արևելյան թատրոնի» գործունեության այս շրջանում (1862—1864) Մնակյանը կատարում է ավելի քան երեսուն տարրեր ժամրի ու տարրեր նկարագրի դերեր: Պատմական ողբերգությունը, ոռմանիկական դրաման և մելոդրաման շարունակում են մնալ այն հիմնական ժամրերը, որոնցով

ձևավորվում էր նրա ոռմանտիկ դերասանի անհատականությունը: Իր տարերքը հակաբունակալական տիրադների, պաթետիկ պոռթեկումների և մելոդրամատիկ էֆեկտների մեջ որոնող դերասանին ամենից ավելի ոգևորում են հայրենասեր հերոսների, ոռմանտիկ սիրահարների, հպարտ և ազնիվ վրիժառուների կերպարները:

Զենարոն (Վ. Հյուգո՝ «Լուկրեցիա Բորջա») այն դերն էր, որտեղ երիտասարդ Մնակյանի ոռմանտիկ դերասանի խառնվածքը դրսւորվում է ապրումի թարմությամբ և անկաշկանությունով: Պիեսը, պաթետիկ շնչով գրված, ոռմանտիկական դրամա է, գլխավոր հերոս՝ Զենարոն՝ միայնակ խըռությարար, անհաշտ վրիժառու, ըմբռատացած չարի ու բռնակալության դեմ: Զենարոն սպանում է Վենետիկի տիրակալուհուն՝ չարագործ և անառակ Լուկրեցիային և իմանում, որ սպանել է իր մորը, որ ինքը նույնակես Բորջաների անառակ տոհմից է: Ողբերգության և մելոդրամայի այս խառնուրդը բավական ներդաշնակ էր ոռմանտիզմի ոճով ու գաղափարներով դաստիրակված արտիստի դրամատիկական օգացմունքներին: Դա նաև անուղղակի արձագանքն էր ժամանակի քաղաքացիական և հայրենասիրական իդեալների: Մնակյանը գտնում է իր դերասանական թեման, հայտնագործում իր՝ մելոդրամայի դերասանի բացարձակ հնարավորությունները: Նրա լիրիկական և վերացական-հերոսական նկարագրի կերպարներում առաջատար մտտիվ էն դառնում հումանիզմը, պոռթեկացող հերոսականությունը և անիշխանական ոգին:

Չարի ու բռնության դեմ պայքարի թեման նույն տրամադրությամբ, բայց որիշ ձևի մեջ է լուծված Ս.Հեքիմյանի «Վահրամ Կամ ասպետն երկարաբազուկ» ուսմանտիկական ողբերգությունում: Վահրամի հոգեվիճակն ավելի բարդ է, քան Զենարդոյինը, նա դրված է ավելի ծայրահեղ դրամատիկական հանգամանքներում: Միագիծ դրական հերոսի փոխարեն այստեղ տեսնում ենք հակասական, երկատված էռություն, որ ուժեղ է և՛ իր դավաճանության, և՛ սիրո, և՛ վրիժառության մեջ: Վահրամը կուլում է իր մարդկային իրավունքի համար: Ինչ-որ տեղում Վահրամի վրիժառությունը թվում է մանր, էգոհատական: Բայց նա արդարացում ներ ունի: Վահրամը խարդավանքի զոհ է. ամբաստանվել է և աքսորվել իր երկրից՝ Կիլիկիայից, և հետո՝ ուզում են խվել իր սիրած աղջկան՝ Լառդկիեհն: Վահրամը դառնում է դավաճան և մտնում թշնամու բանակը: Ողբերգության հերոս դարձնելով հայրենիքի դավաճանին, Հեքիմյանը հեռացել է հայ պատմա-հայրենասիրական պիեսների ավանդական գաղափարախոսությունից: Թերևս այդ պատճառով էլ «Վահրամը» չի խաղացվել «Արևելյան թատրոնի» առաջին թատերաշրջաններում:

Պիեսն ավարտվում է նրանով, որ Վահրամը փախցնում է Լառդկիեհն: Թշնամու ձեռքը չընկնելու, իր հակառակորդ-ներից վրեժ լուծելու համար սպանում է և՛ նրան, և՛ իրեն: Սա ներկայացման վերջին ակկորդն է. հաղթանակում է մարդկային ազատությունը: Վահրամ-Մնակյանը մեռնում

Է որպես սիրելի հերոս և ներկայացման վերջում պասկվում
է «ընդհանուր ծափահարություններով և կեցցեներով»¹:

Հակումը դեպի մեղողրամատիզմը, թատերականորեն
է ֆեկտիվ, տարապալման զգացմունքների բախման վրա
կառուցվող տեսարանները Մնակյանի խաղում նկատելի
են եղել սկսած այս շրջանից: Հյուգոն և Դյումա-հայրը, որ
ամենատարածված հեղինակներից էին եվրոպական բեմում,
սիրելի են դառնում նաև Մնակյանի համար: Հյուգոյի դրա-
մաները, պաթետիկ շնչով, ընդգծված թատերայնությամբ,
պյուժեի մաքրությամբ և հավաքվածությամբ, արլեխաց դիա-
լոգներով, արագ զարգացող գործողությամբ, սուր կոնտ-
րաստների վրա կառուցված կերպարներով, ամենահետա-
քրքիր նյութն էին Մնակյանի խառնվածքի դերասանի
համար: Մնակյանն ամբողջ կյանքում սրտի թրթիռով է հի-
շել իր երկու հերոսներին՝ Զենարդին և Ռոդոլֆոյին. երկուն
էլ՝ ինքնամոռաց ներշնչանքով խաղացված դերեր, երկու
տեղում էլ կրքերի բախում, պաթետիկա:

Մնակյանի Ռոդոլֆոն նույնքան սիրելի է եղել հանդի-
սատեսի համար, որքան Զենարդոն, Վահրամը և Երվանդը:
Այստեղ էլ ողբերգական ինտոնացիան անցնում է ամբողջ
դերակատարման միջով: Վահրամի դերում բարոյական
հայթանակը կործանվող հերոսի կողմն է, իսկ այստեղ
հերոսը կենդանի է մնում, բայց պարտվում է բարոյապես:
Առաջին դեպքում հերոսի պայքարը իր շրջապատի հետ է,
երկրորդ դեպքում՝ սեփական խղճի:

¹ «Ծաղիկ», 1862, թիվ 54:

Ծագումով ազնվական, բայց հասարակ գինվոր Ռոդոլֆոն, սիրում է Կատարինային՝ բարձր դասի մի կնոջ, և չի կարող մերժել վենետիկյան փողոցային դերասանութու՝ Թիգրեի սերը, որի ազնվության ու հոգու վենության առաջնա իրեն ոչնչացած է զգում: Ռոդոլֆոն մոլորված է երկու իրար մերժող զգացմունքների միջև: Մնակյանը մեծ ոգեշընչվածությամբ է խաղում հաստկապես ներկայացման վերջին տեսարանը: Ռոդոլֆոն սպանում է Թիգրեին, կարծելով, որ նա Կատարինայի մահվան պատճառ է դարձել: «Դ. արարվածին մեջ,—գրում է «Արշալուս Արարատյանը»—Ռոդոլֆոն և Թիգրե երևելի են, երբ առաջինը բոլորովին անտարբեր երկրորդին ցուցքերած սիրո զգացմանը՝ կը հարցնե անոր «ըսե ի՞նչ ըրիր զՔաթարինա» որուն կպատաժանե՝ «ըսե զիս չե՞ս սիրեր Ռոդոլֆոն» և այս փոփոխակի հարցումներն եւոք կուլիսի առաջինին ցաստմասիրտ բարկությունն ու կատաղաբրդիր հուսահատությունը, որով մեոցնել կուզե զայն վրեժ լուծելու համար և երկրորդին ներողամտաքար և անմեղաքար ինքզինք մահվան զոհելու նվիրվելը, այն համոզման հաճությամբը, թե իր տարփավորեն պիտի սպանվի և անոր բով պիտի մեռնի»¹:

Թիգրեն մեռնում է Ռոդոլֆոյի անունը շուրթերին, իսկ Ռոդոլֆոն իմանում է, որ Կատարինան կենդանի է: «Ա.Դ. Թիգրե...» պոկլում է Ռոդոլֆո-Մնակյանի շուրթերից և ցաւումն ու վրիժառությունը միանգամից փոխվում են ցավագին զղման: Մնում է մի անտանելի, սուր ցավ, վիրավորանք,

¹ «Արշալուս Արարատյան», 1864, թիվ 730:

մարդուն կորսատյան մատնող զղում: Մնակյանն ամենից շատ է ծափահարվել է այս տեսարանում, որ խաղացել է Արուպակ Փափազյանի (Թիգրե) հետ միասին: «Աս մասին մեջ,—գրում է «Արշալուս Արարատյան»-ը—երկորեն ալ շատ գովության արժանի էին—ի տես, ծափք, կեցցեներ»¹:

Մնակյանի տարերքը ոռմանտիկական դրաման էր: Նրա բեմական հերոսները ճշմարտության և իրենց մարդկային իրավունքի համար ըմբռտացած ոռմանտիկ-սենտիմենտալ բնավորություններ են, դժբախտ սիրահարներ, պայքարելու և կործանվելու պատրաստ սրամերկ ասպետներ: Մնակյանական ոռմանտիկ հերոսի նկարագրին ամենից ավելի բնորոշ են անկեղծ, բեմականորեն չմշակված հոգականությունը, շթաքցված կիրքը, արտաքին հերոսականության, գեղեցիկ կեցվածքի և բարձր արտասանվող, երգային խորքի հետ միասին: Հայրենասիրությունը և հակաբունակալական ոգին Մնակյանի այս շրջանի ստեղծագործության հիմնական բովանդակությունն է և պաթոսը:

Մնակյանի արտիստական խառնվածքի մյուս կողմը դա հակումն է դեպի ժամերերի, թեմաների ու բնավորությունների բազմազանությունը, ֆարսից մինչև ոռմանտիկական ողբերգություն: 1863—1864 թատերաշրջանի ընթացքում նա կարողանում է դրսնորվել իր տաղանդի ամբողջ բազմակողմանիությամբ: 60-ական թվականների հայ դերասաններից ոչ մեկի խաղացանկում չենք նկատում այնպիսի բազմազանություն, որքան Մնակյանի: Նրա բեմական անձ-

¹ «Արշալուս Արարատյան», 1863, թիվ 702:

Հավորության մեջ կարծես համատեղված են եղել ոռման-տիկական հերոսը և մելոդրամային «չարագործը», սպոնա-ցին սիրահարը և վոդկիլային «կատակախտոսը», արկածա-խնդիր ասպետը և ազնվական հայրը: Զմյուռնյան գաստրոլ-ների շրջանում հավասարապես ծափահարել են Օրա «խոր-հրդավոր» Մարշալը («Երկու հիսնապետներ»), թեթևատիկ և անառակ Ռոբերտոն («Անառակն ու կեղծավորը»), ազնվասիրտ և առաքինի Սեղինյան ասպետը (Ռ. դ'Բրե-պուա՝ «Մենաստանի աղորին»), դավադիր Պապը («Մեծն Ներսես»), ազնիվ և գեղեցիկ Նեոլիեսը (Պ. Մետաստազին՝ «Թեսմիստոկլես»), խորամանկ և ճարպիկ Քլիթանդրը («Ժորժ Դանդեն»), սենտիմենտալ Արթյուրը (Ա. Դյումա-որ-դի՝ «Թերեգա»):

Կատակերգական խաղացանկում գլխավոր տեղը պատ-կանում է Մոլիերին: Իր սիրահարի ամալուայով Մնակյանը երևում է Մոլիերի «Ժլատ», «Ակամա բժիշկ», «Բոնի ամու-նություն», «Սերը բժիշկ է», «Պարոն Փորտնյակ», «Երկակա-յական հիվանդ» կատակերգություններում: Այնուամենայնիվ, որպես կատակերգակ դերասան, նա դաստիարակվում է հիմնականում վոդկիլային խաղացանկի վրա:

60-ական թվականներին և նրանց հետո երկար ժամա-նակ հայ թատրոնում (և ոչ միան հայ թատրոնում) ընդունված է եղել մելոդրաման կամ ոլքերգությունը ավարտել վոդկիլով: Մնակյանը շատ է սիրել դրամայից հետո անցնել ֆարսին, հանդիսատեսին ներկայանալ կատակային երգով, պարով, ձեռնածությամբ: Ընդհանրապես վոդկիլներում խաղացել են

«Արևելյան թատրոնի» գրեթե բոլոր դերասանները, բաց բոլորը չեն, որ ունեցել են կոմիկ դերասանի համարում: Քննադատությունը, բնորոշելով Մնակյանին հիմնականում որպես դրամատիկ դերասանի, գրում է, որ «սրտաշարժ մասերուն մեջ ամենուն ուշադրությունը կգրավեր», միաժամանակ հիշեցնում, որ իր արտաքին թեթևությամբ ու արագաշարժությամբ քիչ հաջողություն չի ունեցել նաև «կատակերգ խաղերու մեջ»¹: Մնակյանը Զմյուռնիալում ճանաչում է գտնում հատկապես «Երկու որկրամուներ», «Աչք- կապուկ» և «Համեստության վարձատրությունը» վոդեիլներով: Որպես կոմիկ սի շրջան ավելի բարձր է գևահատվում, քան Թրյանցը, որը հետագայում դասական կոմեդիայի լավագույն մեկնաբանը դարձավ հախատվետական շրջանի հայ թատրոնում: Թըրյանցի տաղանդը այդ տարիներին դեռ նկատելի չէր «օգնական սիրահարի» կոչված ամպլուայի տակ: Հանդիսատեսը որպես կոմիկ դերասանների ճանաչում էր Մնակյանին, Հովհ. Սճեմյանին և Հովսեփ Չերաչեին:

«Արևելյան թատրոնի» զմյուռնյան գաստրոների վերջում «Արշալույս Արարատյանը», բացի առանձին դերակատարումներից, փորձել է տալ յուրաքանչյուր դերասանի բեմական անձնավորության ընդհանուր բնութագիրը: Այդ բնութագրումները յուրահատուկ պարզունակությամբ բացահայտում են յուրաքանչյուր դերասանի անհատականության ու նրա դրսերման հնարավորությունների սահմանները: Այստեղ Մնակյանի մասին ասված է. «Քաջ է սիրո, հակամիտության,

¹ «Արշալույս Արարատյան», 1863, թիվ 702:

հուսահատության, բացականչության, հանդգնության, հանդգնախոս պատասխաներու, անտարբերության, անհոգատար հարցմանց, հուսահատական հարցմանց, ստիպման, շողոքրության, կեղծ ձևերու և կերպերու, բանարկու ուրախության, թեթևամիտ խոսակցությանց, վերջին բարեավերու, արժանավորության, հանդիմանությանց և ծանրաբարության մեջ: Հարմար է ողբերգության, թատերգության և կատակերգության համար»¹:

Մասնագիտական քննադատությունից հեռու և պարզունակ այս բնորոշումը պարզ և շոշափելի պատկերացում է տաղիս երիտասարդ Մնակյանի արտիստական նկարագրի, ինչպես նաև բեմական հանգամանքների ու վիճակների հանդեպ ունեցած որոշակի նախափրությունների մասին: Այդ նկարագրի բազմակողմանիությունը միշտ չէ, որ ենթադրում էր-հոգեբանությունների լայն ու խոր ընդգրկում: Դա վարպետության յուրահատկություն էր: Մնակյանը ո՞չ 60-ական թվականներին, ո՞չ էլ հետագայում շբարձավ այն դերասանը, որ ամպուա չի ճանաչում: Ներքին կերպարանափոխությունը, արտաքին տարրեր նկարագրերի, բնավորության տարրեր ոիթմերի համադրումը երկար ժամանակ մնաց նրա արվեստի առանձնահատկություններից մեկը: Այս նախասիրությունը շատ դերասանների երբեմն խանգարել է բարձրանալու մեծ մտքերի և մեծ զգացմունքների արվեստին: Սա այն դեպքն է, եթե դերասանի համար արտաքին դերապատկերներ ստեղծելը դառնում է մասնագիտություն: Այդ դերապատկերները կարող են երբեմն ներ-

¹ «Արշալոյս Արարատյան», 1864, թիվ 732:

դաշնակ լինել արտիստի ներքին նկարագրին, երբեմն՝ ոչ, երբեմն թվայ այդպիսին, բայց մեծ մասամբ նրանք դիմակի նման թաքցնում են արտիստի՝ զգալու, վերապրելու ընդունակ էությունը: Իսկ այդ էությունը մեկն է լինում: Եթե դա հարուստ է այնքան, որ ի վիճակի է իրենով մեծ կրքեր, նաև մեծ թեմաներ ու գաղափարներ անցկացնել, նա այլև արտաքին դիմակավորման կարիք չունի: Այդպես են եղել անցյալ դարի մեծ ողբերգակները, որոնք համամարդկային կերպարներն ու իդեալներն արտահայտել են սեփական էության միջոցով: Իսկ ներքին կերպարվորումն արտաքին դիմակի կարիք չունի:

Դերասանական մյուս տիպը, որին պայմանականորեն կարող ենք անվանել «դիմակավորվող», ստեղծել է փոքրինչ այլ բնույթի արվեստ: Այդ արվեստը նույնպես ունի դասական իր օրինակները թատրոնի պատմության մեջ. ֆրանսիական թատրոնում՝ Ֆրեդերիկ Լեմերժը, իսկ ռուսականում՝ Վասիլի Սամոյլյանը, երկուսն էլ երևելի կերպարանափոխվողներ, բայց հիմնականում մելոդրամայի վարպետներ: Դերասանական խառնվածքի այս տիպին է պատկանել 60-ական թվականների Մնակյանը, բայց կերպարանափոխումների կողքին նա ունեցել է մեկ այլ կերպար՝ իր վերապրելու ընդունակ էությունը, սեփական մտքերն ու զգացողությունները, որ բնական ու ներդաշնակ արտահայտություն են գտել ռոմանտիկական ողբերգության և մելոդրամայի մեջ:

Հետագայում նրա ստեղծագործության մեջ տիրապետող պետք է դառնար այս գիծը:

* * *

1863—64 թատերաշրջանով ավարտվում են «Արևելյան թատրոնի» գաստրոլները Զմյուռնիպում: Նյութական միջոցների պակասությունը հնարավորություն չի տալիս Էքչյանին մյուս թատերաշրջանում էլ շարունակելու ներկայացումները: Նա նոյնիսկ չի կարողանում դերասաններին այնքան վճարել, որ կարողանան Պոլիս վերադառնալ: Դերասանական ընտանիքը բարբայվում է: Ումանք մի կերպ իրենց շոգենավ են նետում և վերադառնում Պոլիս, մյուսները մնում են բախտի քմահաճույքին: Մնակյանը, Թրյանցը, Զերաչեն և հուշարար Սետեֆնյանը իրենց վերջին դուրուշները գինետանը ծախսելուց հետո, սկսում են «Երևելի Ստեփան աղայի» բանկը պարպել, որ միշտ բաց էր դերասանների համար: Այդ էլ վերջ ուներ: Մնակյանի ու իր ընկերների համար սկսվում են կիսաքաղց օրեր: Գեղեցիկ, կուշտ և քաջ բեմական հերոսների դերերում ծափահարվող դերասանը այս անգամ ապրում էր մեկ այլ իրականություն: Բեմական սիրահարը կյանքում էլ սիրահար էր և՝ ձախողակ: Սիրում էր դերասանութիւն Աղավնի Փափազյանին ու չէր սիրվում: Բայց այստեղ ոչ առի, ոչ էլ պաթենտիկ խոսքեր խաղացնելու ասպարեզ կար, և մելոդրաման ավարտվում է տխոր կատակերգությամբ:

Կյանքը թատրոն չէր, և ինքն էլ նման չէր բեմական հերոսի: Այն, ինչ խաղում էր բեմում, կարծես ոչ մի կապ չուներ իր աշխարհի հետ: Գեղեցիկ խոսքերը, սրամարտու-

թյունը, խանդը, թունավորումը, սպանությունը ի՞նչ կապ պիտի ունենային այս իրականության հետ՝ անփոխադարձ սիրո, գինետան պարտքերի և գրպանի դատարկության հետ։ Քաղցած և հոգնած նա Թրյանցի հետ օրերով թափառում է նավահանգստի մերձակա փողոցներում՝ բեռնատար որևէ շոգենասի հետ Պոլիս վերադառնալու հուզով։

* * *

«Արևելյան թատրոնի» Զմյուռնիայում գտնվելու շրջանում Պոլսում հայ թատերական կյանքը կանգ էր ստել։ Մաղաքյանը, որ Զմյուռնիա չէր գնացել, երբեմն պատահական ներկայացումներ է կազմակերպում, բայց նրան չի հաջողվում հիմնել նոր թատերախումբ։ Մաղաքյանը շատ ջանք է գործ դնում դրա համար, բայց նրան պակասում են դերասանական ուժերը։ Պրոֆեսիոնալ թատերախմբի քայլքայումից հետո Պոլսում աշխուժացել էին Օրթագյուղի և Խասգյուղի թաղային թատրոնները, դպրոցական և ընտանեկան ներկայացումները, իսկ Բերայի համբիսատեսը իտալական օպերա էր հաճախում։ Միաժամանակ Բերայում ներկայացումներ էր տալիս ֆրանսիական մի թատերախումբ։ Մաղաքյանի կազմակերպած «Հայ դերասանական ընկերությունը» մի քանի ներկայացումից հետո կազմադրվում է¹։

Ազգային թատրոնի կորուսը անհանգստություն է առաջացնում մտավորականության մեջ։ Նորից հարկ է

¹Տե՛ս Գ. Ստեփանյան, նշվ. աշխ., էջ 289։

լինում մեկնենասներին դիմելու։ Գործի գլուխ են անցնում դպրջալ Ալթունտյուրի եղբայրները։ Քանդելով թատրոնի հին շենքը, նրանք տեղում կառուցում են նորը, որին «Արև-վելլան թատրոն» անունն են տալիս։ Սրապիոն Հեքիմյանը խմբի վերակազմակերպմանն է ձեռնարկում։ Նա Խոպհա-յից հրավիրում է Աստիին և ամեն ինչ անում է վերականգ-նելու նախկին թատրոնական կազմակերպությունը նոյն ձևով։ Մնակյանը, որ 1864-ի աշնանը արդեն Պոլիս էր վե-րաբրձել, հրավիրվում է թատերախումբ, որպես երիտա-սարդ հերոսների դերակատար։

1865 թվականի հունվարին «Արևելլան թատրոնը» վերսկսում է իր ներկայացումները։ Առաջին ներկայացումը Թերզյանի «Սանդուխտն» էր, որի մասին «Մասիս»-ը հրա-պարակում է թատերագիր Սրապիոն Թղյանի հոդվածը¹։ Հայտարարելով «Արևելլան թատրոնի» վերականգնման մա-սին, Թղյանը ջանում է ոգևորություն և հետաքրքրություն առաջացնել այս ներկայացման շուրջը, նորից խոսել թատ-րոնի հասարակական դերի մասին, կենդանացնել հասարա-կական կարծիքը, ուշադրություն հրավիրել ազգային թատ-րոնի գաղափարի վրա։ Նա գրում է, որ նայ դերասանները զուրկ են առաջդիմելու հնարավորությունից, որ չեն խրա-խուավում ու գնահատվում այնպես, ինչպես՝ եվրոպական դերասաններն իրենց երկրներում։ Թղյանն օրինակ է բե-րում Մնակյանին։ «Պ. Մնակյանը,—գրում է նա, —որ այնքան

¹ «Մասիս», 1865, թիվ 673։

հատակ առոգանություն, վայելու ձևեր, զգացմունք և հարմարություն ցուցուց Երվանդի դերին մեջ, ինչպես կրնախափառավել կատարելության հասնելու, երբ անոր միջոցը որ ազգն է, կպակսի իրեն»¹:

«Արևելյան թատրոնի» նոր շրջանը Հերիմյանի գլխավորությամբ տևում է երկու տարի՝ 1865-ից մինչև 1867-ը: Նրա ներկայացումները նախկին ոգևորությունը չեն առաջացնում: Զկար այլևս սահմանադրական շրջանի լավատեսական տրամադրությունը: Սահմանադրության հետ կապված հույսերը չեն իրականացել և հայրենասիրական տրամադրությունների ալիքը հանդարտվել էր: Թատրոնից դուրս էր մղվել հայրենասիրական և քաղաքացիական թեման: Խճճուրովն պիեսներից մնացել էին Թերզյանի «Սանդուխտը», Հերիմյանի «Հարմակ և Աշխենը», «Պողոս և Վիրօհինան» (սենտիմենտալ մելոդրամա՝ գրված Բեռնարդեն դը Սեն Պիեռի համանուն վեպի հիման վրա): Սրանց առընթեր խաղացվել են Դյուկանժի և Դինոյի «Երեսուն տարի կամ խաղամոլի կյանքը», Հյուգոյի «Անջելոն» և թարգմանական այլ պիեսներ:

Մանկյանը 1865—66 թատերաշրջանի ընթացքում մասնակցում է թատրոնի բոլոր ներկայացումներին «առաջին սիրահարների» դերերով: Դերասանի նյութական անապահովությունը Մանկյանին ստիպել է նաև ուսուցչություն անել Կետիկ-փաշալի ազգային վարժարանում: Դերասանությունը այն աստիճան արհամարհված զբաղմունք էր, որ թաքցնելու

¹ Նույն տեղում, թիվ 674:

համար իր ով լինելը, Մնակյանը փոխել էր ազգանունը, դարձրել Թեստինյան: Մի շրջան նաև ն' ոսուցություն է անում, և՛ դերասանություն, իսկ որոշ ժամանակ անց հրաժարվում է բեմից: Դա եղել է 1867-ի սկզբում: Այդ օրուն թվականին բեմական ասպարեզ է մտնում Ադամյանը:

1867 թվականի փետրվարի 18-ին, «Արևելյան թատրոն» բեմադրում է Ռ. Սեսնեֆճյանի «Վարդան Մամիկոնյան փրկիչ հայրենաց» ողբերգությունը: Սա Միքայել Նալբանդյանի մահվան տարելիցին նվիրված այն պատմական երեկոն էր, երբ առաջին անգամ որպես պրոֆեսիոնալ դերասան բեմ է բարձրացել Ադամյանը, և տակավին աղջոնակ Վերգինե Գարագաշյանը արտասանել է Նալբանդյանի «Ըգատությունը»:

Այս քաղաքական ցուցը պատճառ է դառնում, որ թատրոնը փակվի: Մր. Մանայանը վարձում է «Արևելյան թատրոնի» շենքը և աղտոն սկսում է ներկայացումներ տալ իր կողմից դեկավարվող ֆրանսիական դերասանների խումբը:

* * *

Մնակյանը և արևմտահայ դերասանության առաջին մերունդը իրենցով հատկանշում են արևմտահայ պրոֆեսիոնալ թատրոնի և արևմտահայ բեմական դպրոցի սկզբնավորումը: Մնակյանի արտիստական հասունությունն սկսվում է հայ իրականության մեջ պրոֆեսիոնալ դերասանական

արվեստի կազմավորման հետ միասին: Ի՞նչ ավանդների վրա էր բարձրանում Մնակյանի սերտնդը, և արդյոք մինչև 60-ական թվականները արևմտահայ իրականության մեջ կայի՞ն բեմական արվեստի ավանդներ: Ինչ-որ բան գալիս էր դպրոցական թատրոնից, հատկապես՝ Մխիթարյանների: Դա ամենից առաջ դպրոցական թատրոնի վերամբարձ, ճառային ոճն էր, խոսքով խաղաղու, կամ խոսքեր խաղաղու արվեստը: Մնակյան այսպես է ներկապացրել իրենց խաղաղոնքը «Արևելյան թատրոնի» առաջին ներկապացման ժամանակ. «Սարսափահար հայացքներ կնետեինք իրարու, որոտածայն կոռնայինք, կերգեինք ոչ թե կիսուեինք, բերաններս կիսուեր, դեմքներնիս չեր խոսեր, կիսուեինք և ոչ թե կիսաղայինք»¹:

Սրամտության ու պատկերավորության հետ բավական շատ բան է ասում Մնակյանի բնորոշումը. «Կիսուեինք և ոչ թե կիսաղայինք»: Սա ժամանակի բեմական կատարման ամենաբռնորդ կողմն է, որ գալիս էր կլասիցիստական թատրոնից: Կլասիցիստական ողբերգությունը և կլասիցիստական խաղաղու մերժված էին Եվրոպայի կանոնավոր բեմերում, բայց հրանցից քիչ բան չեր ժառանգել Վենետիկի Մխիթարյանների դպրոցական թատրոնը, որի նպատակն էր ուսանող սաներից պատրաստել առենաքաններ ու քարոզիչներ, ոչ թե դերասաններ: Եվ ահա այդ ոճը Մխիթարյան սաների միջոցով անցել էր Պոլսի դպրոցական ներկապացումները, իսկ այնտեղից՝ պրոֆեսիոնալ բեմ:

¹ «Կենսագրական Մնակյանի», էջ 4:

Անվանել այդ աճը կլասիցիստական՝ սխալ կլինի: Դպրոցական բեմում խաղացվող պատմա-հայրենասիրական ողբերգությունները, որքան էլ որ գրված են հոեսորական ճոռունակով, այնուամենայնիվ հեռու են կլասիցիզմի օրինակներ լինելուց, առավել ևս՝ ձևի տեսակետից: Նույնիսկ Միսիթարյան դրամատուրգների ատենաբանություններով լիքը պիեսներում կա գործողություն՝ բեմական սուր դրություններ, մենամարտություն, սպանություն, անգամ՝ ճակատամարտ¹: Իսկ սա բերում էր խաղի ուրիշ՝ կլասիցիստականից տարբեր եղանակ: Պրոֆեսիոնալ թատրոնի սկզբնավորման շրջանի դրամատուրգների՝ Վանանդեցու, Պեշիկթաշլյանի, Հեքիմյանի և նրանց հետևորդների պիեսները ինչ-որ առումով սահմանակցվում են կլասիցիզմին, բայց հերոսական շունչը, պարետիկան և մեղոդրամատիկ տեսարանները նրանց մոտեցնում են ոռմանտիկական դրամային: Այս դրամատուրգիան ենթադրում էր բեմական կատարման սկզբունքներ, որոնք ընդհանուր քիչ բան ունեն կլասիցիստականի հետ: Բոլոր դեպքերում էլ խաղի այն եղանակը, որ հայ առաջին պրոֆեսիոնալ դերասանները բերում էին դպրոցական և թաղային թատրոններից, կլասիցիստական չինելով, ամենից առաջ պարզունակ էր, անմշակ: Մնակյանի բնորոշումը այդ էլ է ասում. «քերաններս կխոսեր, դեմքերնիս չեր խոսեր»: Ուրիշ կերպ լինել չեր կարող, քանի որ հայ իրականության մեջ դերասանի արվեստը պրոֆեսիոնալ ալիանդ-

¹ Մանրամասն տե՛ս Վ. Թերզիքաշյան, Հայ դրամատուրգիայի պատմություն, հ. 1, Երևան, 1959, էջ 181—155:

Աեր շուներ: Պրոֆեսիոնալիզմը գալիս էր դրախց՝ իտալական, որոշ ժամանակ անց՝ ֆրանսիական թատերախմբերի միջով։ Պոլիս այցելող եվրոպական թատերախմբերը առաջնակարգ չէին, բայց նորություն էին քերում։ Հայ դերասանները ընդօրինակում էին իտալական և ֆրանսիական դերասանների խաղի արտաքին ոճը, որով ավելի էին հեռանում դպրոցական թատրոնի հուետորականությունից, մոտենալով ոռմանտիկական և մելոդրամային խաղակերպին։

Մինչև 60-ական թվականները և 80-ական թվականներին Պոլիս այցելող խմբերը մեծ մասամբ եղել են իտալական¹։ Աստին և իտալացի մյուս դերուսուցները իտալական թատրոնի պատմության մեջ հայտնի դեմքեր չեն։ Անկախ նրանից, թե ինչ ծավալի ստեղծագործողներ էին նրանք, կարևոր այն է, որ նրանց միջոցով պոլարահայ բեմ են թափանցել իտալական շրջիկ թատերախմբերի որոշ ավանդներ։ Խաղանի տեսակետից այս թատերախմբերը կրում էին մի կողմից «կոմեդիա դել' արտեհ» ունալիզմը, որ XIX դար էին հասցրել Զակոնը Մոդենան և Ջաներինին, մյուս կողմից՝ իտալական թատրոնի կիառոմանտիկական կլասիցիզմը։ Աստիի և

¹ Մեր կարծիքով, իտալական ազդեցության արդյունք է նաև «դրասանապես» բառը, որն այդ տարիներին է մտել գործածության մեջ։ «Դերասանապես» իտալական «կապուլոմիկո» (capocomico) բարի բարացի թարգմանությունն է։ Capo նշանակում է առաջնորդ, պարագլուխ, պետ, comicо դերասան (տե՛ս «Համառոտ բարարան յիտալական» ի հայ ի տաճիկ», Վենետիկ, 1829), իսկ capocomico-թատերախմբի դեկավար, ուժիսոր և անտրեարենյոր։

մյուսների միջոցով պոլսահայ բեմ էր թափանցում XIX դարի առաջին տասնամյակների իտալական թատրոնի Էկլեկտիկ խաղաղությունը: Սա չպետք է շփոթել այն միասնական ունագիտական ոճի հետ, որ հաստատել էր Գուտառալո Մոդեռնան և որի ամենախոշոր ներկայացուցիչներն են Արելահիդա Ռիստորին, Թոմազո Սալվինին, Էռնեստո Ռուսին: Աստիճան ծեր էր Մոդեռնայի հետևորդը լինելու համար: Նա իտալական «հին դպրոցի» ներկայացուցիչներից է եղել, և այն, ինչ սովորել են նրանից Մնակյանն ու «Արևելյան թատրոնի» մյուս դերասանները, մասամբ եղել է ունագիզմ, մասամբ էլ՝ դերասանական խաղի մշակված պայմանական ձևեր: Ասել, որ դա վճառ է բերել հայ թատրոնին, ճիշտ չի լինի: Անպայման վերանայման կարիք ունի Չմշկյանի այն տեսակետը, թե Պոլիս այցելած իտալացի դերուստոցները եղել են շնորհիք ու տաղանդից զորով պատահական արկածախնդիրներ, իսկ նրանց պատվաստած խաղի եղանակը՝ մի ինչ-որ անձունի բան: Չմշկյանը գրում է, որ XIX դարի կեսին կլասիցիզմի և ունագիզմի զուգավորումով առաջ է եկել մի նոր ոճ՝ «հիմնված կլասիցիզմի կանոնավոր արտասանության, բնական առոգանության և ունալական բնական խաղի վերա, միմիկի և շարժվածքի բնականության վերա»: Չմշկյանի խոսքը ունանատիկ-մելոդրամայի խաղաղությունը մասին է, որը Ֆրանսիայում և Իտալիայում առաջ էր բերել «սաստիկ շառլատանություն», «ծուռը հաւկացած ունակական շկոլա», որմ «արտորվելով մեծ, կանոնավոր բեմերից և

թափառելով այս ու այն կողմը, հասել էր Պոլիս «Փրաձ-սեացոց և խտալացոց արկածախնդիրների շնորհիվ»¹:

Բնական է, որ պայքարելով ուսպիզմի համար, Զմբշկ-յանը չէր կարող ընդունել ոռմանտիկական թատրոնի սկզբունքները: Իր այդ տեսակետից էլ նա պարզապես ծաղրել է 60-ական թվականներին Թիֆլիս եկած պոլսահայ դերասան Ֆասոլյանի՝ խաղանը, որը կովկասահայ թատրոնում հին ոճ էր համարվում: Բայց անցած լինելով հանդերձ, այդ ոճը շառլատանություն չէր և ուներ իր մշակված սկզբունքները, որոնցով անցյալ դարի 50-60-ական թվականներին դերասանական մի ամբողջ սերունդ էր դաստիարակվել Եվրոպայում: Եթե Խոտիայում ոռմանտիկ-մելոդրամային խաղանը չէր տվել մեծ դերասաններ, ապա Ֆրանսիայում ուներ իր խոշոր վարպետները, ի դեմս Պիեռ Բոկաժի և Ֆրեդերիկ Լեմեթրի: Պոլսահայ բեմում հաստատված ոճը մի կողմից ֆրանսիական խաղանների, մյուս կողմից խտալացի դերուսուցների ազդեցության արդյունքն էր: Անկախ ամեն ինչից, դա պրոֆեսիոնալիզմի մի որոշակի մակարդակ էր, անպայմանորեն անհրաժեշտ նոր կազմավորվող մի թատրոնի համար: Մնակյանը, Մալաքյանը, Էքչյանը, Սրբուակ Փափազյանը, որքան էր որ օծուված էին բեմական տաղանդով, պետք էր մեկը, որ նրանց պրոֆեսիոնալիզմ պատվաստեր: Այդ բանն անում էր Աստին, մի արվեստագետ, որ հեղինակություն է ճանաչվել ոչ միայն Մնակյանի կողմից: Աստին բարձր է գնահատել, նրանից շատ

¹ «Մեղու Հայաստանի», 1881, № 228:

բան է սովորել նաև Մաղաքիանը: Հերիմյանը նույնպես եղել է նրան գնահատողներից մեկը, և ինչպես տեսանք, 1865-ին նա ինքն է Աստիին երկրորդ անգամ հրավիրել Պոլիս: Վերջապես արևմտահայ թատրոնի պատմությունը գրող բոլոր բանասերները (Ժարասան, Սմբ.Դավթյան, Հր.Ասատրի) հարգանքով են տալիս իտալացի ծերունի դերանանապեսի անունը:

Աստին շատ ջանքեր է թափել «Արևելյան թատրոնի» առաջին բեմադրության վրա: Այդ և հաջորդ ներկայացումների փորձերի ժամանակ նա աշխատել է հայ դերասանների մոտ մշակել դերասանի արվեստի ճիշտ ըմբռնում, նրանց վարժեցրել այն բանին, որ լավ խաղի պայմանը ոչ թե որոտացող ձայնն է, ահեղ կեցվածքը, այլ ներքին հավասարակըշընվածությունը, պահվածքի թեթևությունը, խոսքի հանգըստությունը: Աստին սովորեցրել է խոսել ցածր, բառերն արտասանել հստակ, ժեստերով շնկարագրել խոսքը: Նա նոյնիսկ միզանացենները գծել է կավիճով, փորձերի ժամանակ դերասաններին ստիպել է խաղալ առանց ժեստի, թևերը մեջքին կապած և այլն: Աստին իր պարապմունքները շարունակել է նաև թատերաշրջանի փակվելուց հետո՝ ամուսնամիսներին, որի ընթացքում թատրոնի վարչությունը դերասաններին վճարել է կես աշխատավարձ: Դա փաստորեն եղել է լուրահատուկ դերասանական ստոդիա: Հաջորդ թատերաշրջանում դերասաններն արդեն ձեռք են բերում նկատելի վարպետություն: Ինչպես գրում է Հրանտ Ասատրիը, «բացականչությունները հետզինետե կը չափավորվին և եղա-

հակով խոսվածքները կը պակասին շնորհիվ Ասթիի խորհուրդների»¹:

Ժամանակի ընթացքում «Արևելյան թատրոնի» դերասանները, որոնց մեծ մասը ներքուստ օժուլած մարդիկ էին, կարողանում են տիրապետել արտաքին վարպետության հնարիների: Դրան զուգահեռ թատերական քննադատությունը դերասանի արվեստին սկսում է հայել որպես ինքնուրույն բնագավառի, որպես մասնագիտության և այն էլ դժվար մասնագիտության: Առաջ են գալիս դերասանի արվեստի գնահատման չափանիշներ. խոսվում է այն մասին, որ դերասանի վարպետությունը պետք է ձեռք բերվի աշխատանքով, որ «դերասանության երկու գլխավոր կետերը. բնական և ստացական հատկությունը պարտավոր է դերասան մի ունենալ ի միամին»²:

Թատերական քննադատությունը Մնալյանին գնահատել է որպես կրթված և մշակված դերասանի, որն իր «շարժվածոց, խոսվածքին և քաղվածքին մեջ վարպետություն ունի»³: Մեկ այլ հոդվածում, Վահրամի դերակատարման կապակցությամբ, ասված է, որ նա իր գեղեցիկ ու հատակ առոգանությամբ և վայելու ձևերով «հիրավի պատիվ կրերեն դերասանական խումբին»⁴: Այս խոսքերի հեղինակը Մնալյանի խաղում նկատել է շատ ավելի էական բան, քան արտա-

¹ «Ընդարձակ տարեցույց», 1926, էջ 312:

² «Վարդ», 1862, թիվ 11:

³ «Արշալուս Արարատյան», 1864, թիվ 732:

⁴ «Ծաղիկ», 1862, թիվ 54:

քին վարպետությունը: Գտնելով, որ Մնակյանն ունի կատարյալ արտաքին ձևեր, նա ասում է, որ դերասանի խաղի արտաքին ձևերը անկատար կարող են մնալ, եթե նա իր կատարման հիմքում չդնի բովանդակություն, միտք: «Մարդկային կիրքերը,—գրում է նա,—իմացմամբ և զգացմամբ կը գրգոր միայն, և դերասանի մը շարժումները և ձևերը միայն այն ատեն բը-նական են, երբ այս կիրքերու գրգոռումին կը հետևին անոնք: Սուանց իմանալու և հասկնալու անկարելի է գրգուել»¹: Դերասանի արվեստի այսպիսի բանինաց գնահատության հազվադեպ ենք հանդիպում արևմտահայ մամուլի էջերում: Քըն-նադատը Մնակյանի մեջ տեսնում է արդեն պրոֆեսիոնալ դերասանի, որ զգում է մտածելով և մտածում զգալով, նրա խաղում նկատում է հակում դեպի ռեալիզմը, դեպի բնական շարժումները, որոնք այլ բան չպետք է լինեն, քան զգացված և գիտակցված կրքերի արդյունք:

Բեմական ռեալիզմի պահանջը եղել է արևմտահայ պրոֆեսիոնալ թատրոնի սկզբնավորումից սկսած: Դա սկըսվում է Նալբանդյանի ճանից և իր զարգացումն է գտնում Մադաթիա Գարագաշյանի հոդվածներում, ապա՝ Հովհաննես Խորասանճյանի «Ծխմարտություններ և անաշառություններ» հոդվածաշարում²: Այս ամենը հիմք է տալիս մտածելու, որ արևմտահայ բեմական դպրոցը սկզբից ևեր չէր կարող լինել միատարր: Ռոմանտիկական խաղանքի կողքին նկատելի հակում է եղել նաև դեպի ռեալիզմը: Մասամբ պանով

¹ «Ծաղիկ», 1862, թիվ 54:

² Մանրամասն տե՛ս Գ. Ստեփանյան, նշվ. աշխ. էջ 461—480:

կարելի է բացատրել, որ հետագայում պոլսահայ դերասան-ներից ոմանք Կովկասում որակվել են «հին դպրոցի» հետեւ-վողներ (Ֆասովանան, Էքչյան), ոմանք էլ շատ շուտ են յուրացրել, այսպես կոչված «իրապաշտ դպրոցը» (Աղամ-յան, Աստղիկ, Սիրանովչ, Մնակյան, Գարագաշյաններ, Ազնիվ Հրաչյա, Մարի Նվարդ, Թրլյանց) և բարձր գնահատ-վել որպես ռեալիստ դերասաններ:

Անկասիած, տիրապետող ոճը 60-ական թվականներին սոլոսահայ թատրոնում եղել է ոռոմանտիկականը, որն ինչ-որ տեղում ունենալով ռեալիստական միտումներ, ազատ չի եղել նաև կլասիցիզմից մնացած ազդեցությունից: Նկատենք, որ հայ նոր թատրոնը եվրոպականի հետ համեմատած շատ ժաշ էր կազմավորվել: Բնականաբար մղում կար ըմբռնելու այն, ինչ ձեռք էր բերել եվրոպական թատերական կուլտու-րան դարի առաջին կեսում: Զգսում կար նաև հասկանալու անցած ժամանակաշրջանին պատկանող դրամատորգիա-կան արժեքները: Այստեղից էլ պարզ է դատնում, թե ինչու Մնակյանի այդ շրջանի խաղացանը պետք է կազմված լի-ներ տարբեր էպիխանների և տարբեր ոճերի հեղինակներից: պատմա-հայրենասիրական ողբերգություն և կենցաղային կոմեդիա, սրանց կողքին՝ Կորնել, Սոլիեր, Վոլտեր, Մետա-ռազին, Ալֆիերի, Հյուգո, Դյումա և Բուշարդի:

Մնակյանի համար չէր կարող անհետևանք անցնել իտա-լական նոր բեմական դպրոցի՝ «կոլորիտային ռեալիզմի» խո-շոր ներկայացուցիչներից մեկի՝ Աղեկահյան Ռիստորիի գաս-ռուները 1865-ին: Եվրոպական խմբերի ու դերասանների

ելույթները վաղոց սովորական էին դարձել Պոլսի թատերական կյանքում, բայց Ռիստորիի այցը երևոյթ էր: Մինչև Ռիստորիի այցը և նրանից հետո Պոլս են եկել և որիշ թատերախմբեր ու դերասաններ, որոնց մասին չի գրվել մամուլում, որոնք երևոյթի իմաստ չեն ստացել, բայց աննկատելի կերպով իրենց հետքն են թողել Մնակյանի և նրա ժամանակակիցների արվեստում: Այդ խմբերում եթե չեն եղել համաեվրոպական մեծություններ, ինչպես Ռիստորին, ապա անպայման եղել են տաղանդավոր դերասաններ, շկոլա անցած արտիստներ¹:

* * *

Մնակյանը որպես պրոֆեսիոնալ դերասան ձևավորվում է 60-ական թվականներին, և նրա արվեստի վրա իր կնիքն է

¹ Արևմտահայ թեմի գործիչների և եվրոպացի դերասանների միջև քստ երևոյթին եղել են սերտ կապեր: Այդ մասին մամուլը տեղեկություններ չի թողել, բայց պեսք է կարծել, որ Զոլին, Աստին, Ֆուկինին (Զոլինի թատրոնի երաժշտական դեկավարը, որ միաժամանակ եղել է «Արևմբան թատրոնի» երաժշտական դեկավարը) միակը չեն եղել, որոնք մասնակցել են նաև թատրոնական գործին: Այսպէս, ինչով բացատրել չերապարակիւած թարգմանական պիեսների ստատությունը «Արևմբան թատրոնի» խաղացանկում: Այդ պիեսների մի զգայի մասը ամենայն հավանականությամբ Պոլս է բերվել եվրոպացի անորեկտենցիոնների միջոցով: Հայտնի է, որ նաև թատրոնի գործիչները զգեստներ և դեկորներ են գնել նրանցից: Կարող էին նաև պիեսներ վերցնել, ինչպես այդ ցույց է տալիս «Երկու հիմնապետների» և «Պուշչինելլայի» օրինակը:

70-ԱԿԱՆ ԹՎԱԿԱՆՆԵՐԻՆ

«Արևելյան թատրոնի» ներկայացումները 1867—1868 թատերաշրջանում ընդհատվում են, ապա՝ վերսկավում, և դրան հաջորդում է երկու տարի տևող դադար: Թատրոնական գործի մեջնաշնորհն անցնում է Վարդովյանի «Օսմանյան թատրոնին», որի կազմակերպումը համընկավ «Արևելյան թատրոնի» փակմանը: «Արևելյան թատրոնի» դերասանների մի մասը հավաքվում է այս խմբում: Դերասանների մեկ այլ խումբ հրաժարվում է Վարդովյանին համագործակցելոց: Վարդովյանի թատրոնում սկզբնական շրջանում չենք տեսնում ոչ Մնակյանին, ոչ Էրշյանին, ոչ Մաղարյանին, ոչ Արուպակ Փափազյանին, ոչ Էլ Աղամյանին, որը նոր էր բեմ բարձրացել: Իր թատրոնի առաջատար դերասաններին Վարդովյանն ապահովում է բարձր աշխատավարձով, բաց այդ էլ չի գալթակղեցնում հայրենասիրական թատրոնի ջատագովներին: Նրանցից շատերը մի շրջան հրաժարվում են բեմից:

Ամբողջովին նվիրվելով մանկավարժական գործունեության, Մնակյանը վճռել էր խաչ քաշել անցյալի վրա, մոռանալ թատրոնն ու դերասանությունը և սկսել նոր կյանք, որ ավելի բանական լիներ, առավել ևս ապահով։ Եվ դրա ադիթը ներկայանում է։ 1861-ին «Արամյան» կրթական ընկերությունը Կեսարիա քաղաքում հիմնել էր դպրոց աղջիկների համար։ Ընկերության հիմնադիր Սենեքերին Մանուկյանը Մնակյանին ուսուցի պաշտոն է առաջարկում այդ դպրոցում։ Իսկ Մնակյանը, որպես երկրաշափության դասասու, արդեն բավական ճանաչում էր գտել Կետիկ-փաշադի և Էլուպի ազգային վարժարաններում։ Նիկոնավը ազգանունով մի հուն, որը Մանուկյանների տան մասնավոր ուսուցիչն էր, նրան խորհուրդ է տալիս ընդունել առաջարկվող բոլոր պայմանները և մեկնել Կեսարիա։ Թատրոնի գայթակղեցնող մոտիկությունից հեռու լինելու համար Մնակյանը պատրաստվում է համաձայնել ամեն պայմանի։ Ամենից առաջ նրան առաջարկում են ամուսնանալ, քանի որ, ըստ ընդունված կարգի, աղջիկների վարժարանի ուսուցիչն ամուսնացած պետք է լիներ։ Այս պայմանը Մնակյանին ետ է կանգնեցնում, բայց գործին միջամտում են և որիշներ։ Մնակյանին իր մոտ է կանչում Ներսես Վարժապետյան պատրիարքը և հորդորում համաձայնել հանուն ազգային լուսավորության գործի։ Մնակյանը համաձայնում է և վճռում «ինքնասպան ըլլալու համար ծով նետվելուն պես» ամուսնանալ։

«Բավկական խոսված երիտասարդ էի ես ալ այն ատեն, պատմում է նա։—Սիրային պատմություններս բերնե բերան

Կշրջեին: Ինչպես դերասանության, նույնպես ամուրիության ալ մեկ անգամեն վերջ տալու համար որոշեցի կարգվիլի: Այնչափ սարսափած էի դերասանութենեն, որ կմուածեի կամա-ամկամա ամուսնանալ, որպեսզի գեթ ամուսնությունս արգելք ըլլար ինձ կրկին անգամ ելլելու բեմ, որ անորության ու թշվառության մղձավանշը կար, որոնց երկութին ալ համը զգացեր էի կաշիին վրա: «Ամուսնացուցեք զիս» ըսի ուստմնական խորհրդի պատկառելի անդամոց»¹:

Մնակյանն ամուսնանում է Ակյուտարի Ծեմարանի ուսուցչութիւներից մեկի՝ Խմաստութի Էամերյանի հետ: Երիտասարդ ուսուցչութու մտքով էլ չէր անցնում, որ իր ամուսին Մարտիրոս Թեստիճյանը դերասան Մնակյանն է: Երկուսն էլ ամուսնացել էին որիշների խնդրանքով և միջամտությամբ, առանց իրար ճանաչելու:

1868-ի հոկտեմբերին նրանք ճանապարհվում են դեպի Կեսարիա:

* * *

Փոքր Ասիայի խորքերում ընկած մի գավառական քաղաք էր Կեսարիան՝ կորած փոշու և մառախուղի մեջ: Հետդարյան քերդի ավերակները և Արգեռու լեռան սառը զանգը վածը իմացողին հիշեցնում էին, որ այստեղ հեռավոր ժամանակներում ծաղկել էր պատմական Կապադովկիայի

¹ Դերասան Երվանդ Թոլյայանի ձեռագիր հուշերից (ԳԱԹ, Թատերական բաժին):

մայրաքաղաքը: Այժմ նեղ ու ցեխոտ փողոցները, տների գորշ պատերը կապ չունեին նրա փառավոր անցյալի հետ: Արևոն պատեղ պակաս էր, և հորիզոնը՝ նեղ: Օրվա բոլոր ժամերին, քաղաքի բոլոր ծայրերում անցորդին կարծես մոտիկից, անթարթ հետևում էր քաղաքի վրա կախված սառը լեռը: Եվ ամեն ինչ հիշեցնում էր աքսորավայր, բացի «Արամյան ընկերության» դպրոցից, որ պետք է աշխատեին Թեստիճյան ամուսինները: Դպրոցը դուրս էր նեղ ու ցեխոտ փողոցների լաբիրինթոսից: Քաղաքի գորշ ու անհրապույր ֆոնի վրա դա մի գեղեցիկ ու լուսավոր շինություն էր, տեղավորված ընդարձակ պարտեզի բացատում:

Գավառական փոքրիկ քաղաքի կյանքը նախկին դերասանին միանգամից երևում է նեղ ու անհրապույր: Մարդը սովոր էր կյանքը դիտել արտիստի նման, որտեղ նրանում միշտ նոր տպավորություններ, բայց հանկարծ զգում է իրեն բանտարկված: Եվ քանի որ ինքնական էր ընտրել իր աքտորը, վճռում է ոչ մի գեով այլևս ետ չնայել ու ետ չդառնալ:

Բայց ուսուցչությունը Մնակյանի համար ինչ-որ մի անջիղ գործունեություն չի դառնում: Այստեղ էլ նա եռանդ ու կարողություն է ներդնում, գուցե ոչ պակաս, քան թատրոնում: Այդպես էլ պետք է լիներ, քանի որ 60-ական թվականների հայ իրականության մեջ դպրոցը և թատրոնը նույն իմաստն ունեին և նույն գաղափարին էին ծառայում: Մտավորականի և հասարակական գործչի ասպարեզը կամ լրագրությունը պետք է լիներ, կամ էլ թատրոնն ու դպրոցը: Այս հաստատություններն էին իրականացնում ազգային

լուսավորության գաղափարը։ Այդ նույն գաղափարին ծառացերու մղումով Մնակյանը ուսումնական ամբիոնի մոտ դառնում է նույնքան ստեղծագործող, որքան թատրոնի բեմում։ Հետագայում, թատրոնում էլ Մնակյանը երբեք չի մոռացել իր ուսուցի կոչումը, որ նա հավասարապես վերագրում էր և դերասանին։ «Ըմբառ Կեսարիա պաշտոնավարությունը,—գրում է Ա. Ալպոյանյանը,—հիշատակելի մնացած է հին սերնդի մեջ, վասն զի առաջին վարժապետն էր արդիական, որ նորություններ կտաներ հետը Կեսարիա Կ. Պոլիսնեն։ Ան իսկական հիմնադիրն է աղջիկներու վարժապետն»¹։

Մնակյանն իր նորարարությամբ հակադրված էր գալանական դպրոցի ուսուցիչների և հոգաբարձուների պահպանողականությանը, դաստիարակության մեջ ընդունված ավանդական ձևերին։ Նա դպրոցում հաստատում է խրախուսների և պատժի բոլորովին նոր ձևեր, շատ տարբեր «հնօրյա պատվելիներու» ընտրածից։ Խրախուսանքի ամենաբարձր ձևը եղել է մետաղյա ուկեզօծ կրծքանշանը, որ տրվելիս է եղել առաջադիմ աշակերտութիւններին։ Մնակյանի գործունեությունը, որ կարող էր ամենդունելի թվական պահպանողական ուսուցիչներին, բարեբախտաբար խրախուսվում է «Արամյան ըմկերությունը» հիմնողների կողմից։ Վերջիններս Մնակյանին ուժ ամսով ուղարկում են Եղողատ գավառը, այնտեղի ազգային վարժարանները բարեկարգելու համար։

¹ Ա. Ալպոյանյան, Պատմություն հայ Կեսարի, Ա. հատոր, Կանիք, 1937, էջ 1218։

Մնակյանը Կեսարիապում ապրում է չորս տարի: Ինչպես գրում է Ալպոյանցանը, այդ չորս տարիների ընթացքում Մնակյանը հեղաշրջող դեր է կատարել Կեսարիայի կրթական կյանքում: Այդ չորս տարիների ընթացքում ևա չի դադարում իր մեջ զգալ արտիստին, «որ ինքզինքնին կծածկեր թեն, սակայն օր մը պիտի տկարանար»: Եվ դա այդպես էլ էր: Ընդհանուրի հարգանքով շրջապատված ևա պատվավոր հյուրի նման է ապրում Կեսարիայում: Փողոցում բոլորը ակնածանքով են բարեւում մայրաքաղաքից եկած «վարժապետին»: Բայց թե ինչ էր կատարվում այդ վարժապետի՝ սև զգեստով պարուրված ու հոճայի մորուքով մարդու հետ, ոչ ոք չգիտեր: Իսկ ևա տեսնում էր, որ խարում է իրեն, խաղում է մի դեր, որ իրենը չէ: Բայց թատրոն վերադառնալը դժվար էր: Նա արդեն երեք զավակների հայր էր և զգում էր, որ այլևս դժվար է ապավինել դերասանի բոհնմական կյանքին: Բայց թատրոն վերադառնալու միտքը Մնակյանին հետապնդում է ամեն քայլափոխում: Նա այդ թաքցնում է շրջապատից, ընտանիքից ու զգում է, որ բոլորվին մենակ է այդ փոսի մեջ ընկած, հորիզոն չունեցող քաղաքում: Իսկ Պոլսից ստացված լրագրերում կարդում է միայն թատերական քրոնիկները ու հայտարարությունները: «Կեսարիա կը կարդայի լրագիրներուն մեջ թատրոնի ազդեր Վարդովյանի տնօրենության ներքև տված ներկայացումներու, հոգիս տեղեն կը թնդար», — գրում է ևա¹: Եվ մի անդիմադրելի ժամկություն ստիպում է ես նայել, թողմել իր պոեզիայից զորկ,

¹ «Լուս», 1901, թիվ 37:

նյութապես ապահով, անտանելիորեն կանոնավոր կյանքը և դառնալ «դերասանության անորոշ, անկայուն, «այսօր կա, վաղը չկայի» բոհեմական ասպարեզին:

«...Լրագիրներեն, ընկերներուս նամակներեն կը հետևեի մայրաքաղաքի թատերական կյանքին, որ իմ պակսեղովս չէր կանգ առած,—պատմում է Մնակյանը: —Ընդհակառակն իոն կշարունակեին ներկայացումներ տալ, նոր դերասաններ, նոր հեղինակներ կելլեին մեջտեղ, թատրոնը կապրեր, և ինչպես հեռուեն լսված թմբուկին ձայնը, ականջին անուշ կհնացեր հիմա: Կերազեի լուսավոր թատերաբեմը, մեր կուլիսները, ընկերներս, փայլուն դերերս, ծափահարությունները»¹:

Այնուամենայնիվ, ի՞նչ էր կատարվում Պոլսում:

Վարդովյանի «Օսմանյան թատրոնը» շարունակում էր կանոնավոր ներկայացումներ տալ, իսկ 1871—1872 թվականներին Օրթագյուղում վերակազմակերպվել էր «Արևելյան թատրոնը» Պետրոս Մաղաքյանի նախաձեռնությամբ: Այստեղ էր Ադամյանը: «Ադամյանի հաջողությանց արձագանքը կհասներ մինչև Կեսարիա,—շարունակում է Մնակյանը, —թատրոնի որդը դարձյալ սկսավ կրծել սիրոս: Ա՞հ, այդ սարսափելի որդը, որ մարդը հանգիստ չի ձգեր...Մարդանգամ մը որ բեմ ելավ, անգամ մը որ խմեց այդ նեկտարեն, վայելելով անոր պատճառած դառնություններն ու հաճույքները, ալ վերջնականապես թունավորված է. չի կարող իր

¹ ԳԱԹ, Ե. Թոլյայանի ձևոագիր հուշերից:

վրայեն թոթափել այդ Նեսոսի պատմուճանը, ինչպես կըսէ Քին»: Եվ Մնակյանը վճռում է վերադառնալ Պոլիս՝ կնոջը համոզելով, որ այնտեղ «ուսուցիչ պիտի ըլլա, դերսաւան չպիտի ըլլա»:

1872 թվականի աշնանը Մնակյանը Պոլսում է: Առաջին մարդը, որ հանդիպում է նրան, Մաղաքյանի թատրոնի հուշարար, թատերագիր Տիգրան Գալեմճյանն էր: Մնակյանը մտադրվել էր մտնել Վարդովյանի խումբը, բայց Գալեմճյանը նրան խորհուրդ է տալիս գնալ Մաղաքյանի մոտ: Մաղաքյանն իմացել էր Մնակյանի վերադառնալու մասին և նրան էր սպասում: Իմանալով, որ Մաղաքյանի թատրոնը միայն հայերեն լեզվով հերկայացումներ է տալիս, Մնակյանը գնում է այնտեղ: Վարդովյանը Մնակյանին իր խումբն է հրավիրում որպես ուժիսոր և երիտասարդ հերոսների դերակատար: Մնակյանը հրաժարվում է, չնայած Վարդովյանի խոսումներին ու թախանձանքներին:

Մաղաքյանի թատրոնում էին Ադամյանը, Ազնիվ Հրաչյան, որ նոր էր բեմ բարձրացել, Դավիթ Թրյանցը, Սիրանույշը, Աստղիկը, հետագայում Մարի Նվարդը: Անցյալ դարի հայ թատրոնի պատմության մեջ ոչ մի թատրոնական կազմակերպություն տաղանդների այսպիսի համախմբում չի ունեցել: Մաղաքյանը «Արևելյան թատրոնի» ավանդներն էր շարունակում: Պատահական չի եղել, որ ժամանակակիցներն այս շրջանը «պոլարիայ թատրոնի ուկեդարի» են համարել: Բայց Մաղաքյանը, որքան էլ որ ազգային թատրոնի շատագով էր, այնուամենայնիվ չի կարողանում ամրողապես իրա-

գործել իր ծրագիրը: Ազգային թատրոնի պահպանման համար չկար լիարժեք ազգային դրամատորգիա: Մաղաքյանը սկզբում չի բեմադրում նաև նայ պատմական ողբերգություններ, թերևս մտածելով, որ նրանց ժամանակն անցել է: Դա այդպես չէր: Հայրենասիրական թեման չէր հնացել, բայց 60-ական թվականների լավատեսական տրամադրությունը հանգած էր: Չնայած դրան, հրապարակի վրա էին Դուրյանի ոռմանտիկական դրամաները, որոնք ինչպես Չուանյանն է նկատել, «վերջին աղաղակներն էին նայ հսկրենասիրական թատրոնի»: Մաղաքյանը այս հյութին ևս չի դիմում: Կյանքը առաջադրում էր նոր խնդիրներ: Ռեալիստական թատրոն ստեղծելու կարիք կար, որ չէր կարող չգտալ Մաղաքյանը: Բայց պատկերացումներն այդ թատրոնի մասին այնքան անորոշ էին, որ Պարոնյանի կատակերգությունները որպես թատրոնի նյութ մնում էին չհնաւկացված: Եվ Մաղաքյանի թատրոնի խաղացանկը կազմված էր գրեթե ամբողջությամբ մելոդրամաներից: Բացառություն էին կազմում Թերզյանի «Սանդուխսոր» և Հյուգոյի «Թագավորը զվարճանում է» դրաման: Մելոդրամաներն ավելի բարձր էին պատմական ողբերգություններից և բեմական էին: Իսկ Մաղաքյանը չգիտեր թատրոնը բարձրացնող որիշ դրամատորգիա: Դրա համար էլ առաջին թատերաշրջանում նա Վարդովյանի քաղաքականությանը այնքանով միայն կարողացավ հակառակությունը, որ նոյն մելոդրամաները բեմադրեց հայերեն լեզվով:

Սկսած այս թվականներից Մնակյանի խաղացանկում տիրապետող է դառնում մելոդրաման: Այս ժանրի տիրապե-



Մնակյանը Արքաս Ֆարիայի դերում

ՀԱՅ ՊԱՏԻՔԵՐԵՎԵՐ
ՀՈԽՎԱՆՑԱՆ ԳՐԱԴԱՐԱՆ
ԽՈՎՃԱԿԱՆ ՀԱՅԱՍՏԱՆ

դակիորեն, երբեմն էլ շատ կրնկրետ, արտացոլում էին գըտնում բուրժուական իրականության հակասությունները:

Իսկ ինչո՞ւ 70-ական թվականներին այդ ժամանք հակասության մեջ էր ազգային-հայրենասիրական ողբերգության և կենցաղային կատակերգության հետ: Արևմտահայ կենցաղային կատակերգությունը նեղ էր իր շոշափած խնդիրներով և մեծ մասամբ՝ եւլրոպական վոդկիլի արտաքին ազդեցության արդյունք: Պարոնյանը մնում էր դեռևս չհասկացված, թեև նրա կատակերգությունները ձևականորեն կրում են այդ ազդեցությունը: Իսկ արևելահայ կենցաղային կատակերգությունն իր կենսական խնդիրներով և ավելի շատ արտաքին հատկանիշներով տեղային էր: Նրա արևմտահայ բեմ չանցնելն ուներ և այն պատճառը, որ թատրոնի առջև դրված էր հայրենասիրական սուպերենտթյուն: Բայց թատրոնը կարիք ուներ ընդգրկելու ավելի լայն իրականություն: Կենցաղային կատակերգությունը պետք է վերաբեր ավելի «լուրջ» ժանրի: Արևելահայ թատրոնում այդ իրականացնում էր Սունդուկյանը, իսկ արևմտահայ իրականության մեջ Պարոնյանը դեռևս թատերական հեղինակ չէր: Սունդուկյանը, ավելի մոտ լինելով թատրոնին, ստեղծում էր հայ դասական կատակերգությունը և հայ ռեալիստական թատրոնը: Պոլասիայ բեմն անհաղորդ մնաց այդ վերափոխությանը. այստեղ թատրոն էր ստեղծում պատմա-հայրենասիրական դրաման: Եվ իրականության ավելի լայն ընդգրկման միտումը թատրոնը տանում էր դեպի թարգմանական խաղացանկ, որի ամենամատչելի տեսակը մելոդրաման էր:

Պիեսները, որոնցում հանդես է եկել Մնակյանը 1872—73: թատերաշրջանի ընթացքում, մելոդրամային ժանրի տիպիկ օրինակներ են, որտեղ առկա են հայածված և դատապարտված ազնիվ մարդու, դժբախտ հերոսութու, չարագործի և բարոյախոս ազնվական հոր պվանդական կերպարները: Այսուհանդերձ, Մնակյանի խաղացած մելոդրամաների գգալի մասը զերծ չէ սոցիալական բովանդակությունից: Դրանց թվում են ժամանակին շատ տարածված «Արյան բիծ», «Լյուսի Դիդիե», «Լիոնի սուրհանդակ» պիեսները:

Մնակյանի խաղացանկում սոցիալական մելոդրամայի լավագույն նմուշը պետք է համարել Թեոդոր Բարբյերի «Փարիզի աղքատները»: Բարբյերն այսօր մոռացված հեղինակ է, բայց նրա պիեսները ժամանակին դրվել են Դյումառիու դրամաների կողքին, իսկ «Փարիզի աղքատները» եղել է ամենատարածված և շատ խաղացվող մելոդրամաներից մեկը: Գլխավոր դրամատիկական հերոսի՝ Բլանդրոգի դերը Մնակյանի կատարումով, եղել է ամենաշատ սիրված բեմական կերպարներից Օթքագյուղի թատրոնի բեմում:

Մադաբյանի թատրոնում Մնակյանը փոխում է իր ամպլուան: Այստեղ նրան երիտասարդ հերոսների դերերում չենք տեսնում: Այդպիսի դերերի համար կար Սդամյանը: Մելոդրամայի «հակառակորդների» և «ազնվական հայրերի» դերերը նոր կողմերից են բացում նրա բեմական կերպարը: Տարբեր, հակադիր նկարագրի դերերը ավելի են մշակում նրան որպես կերպավորման վարպետի, ներկայացնող դե-

րասանի: Մնակյան սկսում է ձեռք բերել այն, ինչը պետք է դառնար նրա վարպետության հիմնական հատկանիշը, «մարդկային կիրքերուն և անոնց պատճառած զանազան վիճակներուն մանրամասն ծանոթությունը և այդ վիճակներն իր ամբողջ անձով արտահայտելու, ներկայացնելու կարողությունը»¹: Մարշալի, Բլանդրոգի, Ժերոմի («Լիոնի սուրբանդակ») դերերում եթե նա կարող էր ներգործել իր հոգականությամբ և արտաքին հնացրով, ապա այնպիսի դերեր, ինչպես Հենրի 8-րդը (Ա. Դյումա—հայր «Կատրին Հովարդ»), Վիկոնտ դ' Սերվալը («Արյան բիծ»), Սարգանը («Լյուի Դիդիե»). պահանջում էին կերպավորման ուրիշ սկզբունք:

Այս երեք կերպարները տարբեր տիպի և տարբեր ծավալի «չարագործներ» են: Ընդ որում, մելոդրամայում պրոտագոնիստ («հակառակորդ») դերասանը համեմատարար ավելի շահեկան վիճակի մեջ է, քան դրական հերոսի դերակատարը: «Հակառակորդի» դերը միշտ էլ կերպավորման և տիպականացնան ավելի շատ հնարավորություն է ընձեռում դերասանին նա դերասանին կարծես ավելի շատ իրավունքներ է տալիս անհատական, բնորոշ գծեր որոնելու, քան մելոդրամայի իդեալ հերոսը, կամ ազնվական հայրը, որ կոչված է առաքինության դասեր տալու հանդիսատեսին: Բայց Մնակյանի խաղացանկում այս տիպի հերոսներն ել փոքր թիվ չեն կազմել, և դա իր կնիքն է դրել նրա ստեղծած

¹ Շարասան, մշվ. աշխ., էջ 41:

«չարագործների» կերպարների վրա: Այստեղ նույնպես նա հակվել է դեպի սուր բեմավիճակների, ծայրահեղ անցումների և հոգեքանական կոնտրաստների ցուցադրումը: Այս իմաստով բնորոշ դերակատարումներից է նրա դ' Սերվայլը («Արյան բիծ»):

Պիեսը տիպիկ մելոդրամա է, իսկ դ' Սերվայլը տիպիկ մելոդրամային «հակառակորդ»՝ խաքեքա, դրամանենգ, ստորագրություններ կեղծող, խաղամոլ, պարտքեր վերցնող և չվճարող: Սուրը մեքենայություններ գործադրելով, նա ուզում է տիրանալ Մարիին՝ մի առաքինի աղջկա, ուզում է կործանել դրամայի ազնիվ հերոսների երջանկությունը: Նրա մեքենայությունները ոչ գեղարվեատական արդարացում և ոչ էլ հոգեքանական հիմնավորում ունեն: Ինչպես բոլոր մելոդրամաները, այնպես էլ սա ավարտվում է առաքինության հաղթանակով և չարի կործանումով: Ազնիվ մարդիկ երջանկանում են, իսկ դ' Սերվայլը ինքնասպան է լինում: Ինչո՞ւ պետք է չարագործը ինքնասպան լիներ: Պիեսի այսպիսի ավարտը դերասանին հուշում է հանգամանքների դրամատիկ լուծում: Ինքնասպանությունը կարծես մաքրում է դ' Սերվայլին, հանդիսատեսին ստիպում է խղճայ չարագործին, մտածել է տալիս, որ նա պիեսում առենավատ մարդը չէ: Մոտենալով դերին այս բարոյախոսության դիրքերից, Մնակյամը փոխում է ներկայացման վերջին տեսադրամը: Ըստ պիեսի, այդ տեսարանում բեմի վրա պետք է լինեն իրենց նպատակին հասած դրական հերոսները՝ Արթյուրը և Մարին, իսկ պատշգամբից պետք է լավի

դ' Սերվալի ատրճանակի կրակոցը: Բայց Մնակյանի դ' Սերվալը ինքնասպան չի լինում: Առանց ատրճանակ կրակելու հա վերջին տեսարանում մտնում է բեմ և... խելագարվում: Դա մի ամրող տեսարան է, հոգեբանորեն չարդարացված, բայց թատերականորեն էֆեկտիվ, հանդիսատեսին ցնցող: «Մնակյան ոստիսի դերը ներկայացուց,—գրում է «Մեղուն»—ինքն ալ նույն խաղին մեջ յուր կարողութենեն վեր գործեց. մանավանդ վերջին արարի ցնորումը»¹:

Հատ քննադատի, Մնակյանի դ' Սերվալին խելագարության է հասցնում տարապայման զգացմունքների պայքարը: Քննադատը գրում է նաև, որ այդ բեմադրության մեջ Մնակյանի դ' Սերվալը, Ադամյանի Արթյուրը և Ազնիվ Հրաշյայի Մարին եղել են մեկը մյուսին չզիշող, հավասար ուժի դերակատարումներ:

Զգայացունց տեսարաններով հանդիսատեսին սարսկեցնելը ժամանակին համարվել է դերասանական հմտության չափանիշներից մեկը: Մելոդրամատիկ էֆեկտները ընդունված են եղել անցյալ դարի դերասանական արվեստում: Ուրիշ ի՞նչ տեղում մելոդրամայի դերասանը կարող էր ցուց տալ իր օժտվածությունն ու վարպետությունը, եթե ոչ ծայրահեղ հոգեվիճակների ցուցադրման տեսարաններում: Վարպետ դերասանները շատ անգամ իրենք են իրենց համար նման տեսարաններ ստեղծել պիեսում: Դրանք եղել են դերասանի օժտվածությունն ու վարպետությունը ցուցադրող, կատարման իմաստով բարդ բեմական դրություններ: Նման

¹ «Մեղուն», 1873, թիվ 118:

տեսարաններում դերասանը կամ պետք է տակնուվրա ամեր հանդիսատեսին, կամ ծիծաղելի դառնար: Հայտնի է, որ դարի առաջին կեսի դերասաններից, շեքսպիրյան Ռիչարդի և Շեյլովի հոչակավոր դերակատար Էդմոնդ Քինը մեծ հաճուքով և ցեցող ուժով է խաղացել Օվերիչի խելագարության տեսարանը Ֆիլիպ Մեսինչերի «Հին պարտքերը վճարելու նոր եղանակ» մելոդրամայի վերջին տեսարանում: Վաշիստու Օվերիչը իր բոլոր մեքենայություններից հետո տեսնում է, որ խճճվել է որիշների խարեւությունների ցանցի մեջ, և կատաղությունը նրան խելագարության է հասցնում: Քինը մելոդրամայի դերասանի իր ամբողջ վարպետությունը գործ է դնում հենց խելագարության տեսարանում, հիստերիա և ջղաձգություն առաջ բերելով թե դահլիճում, թե բեմի վրա: Հանդիսատեսների մեջ գտնվող Բայրոնը ուշաթափվում է: Ներկայացումը կանգ է առնում, դահլիճից դուրս են բերում ուշաթափ կանաց¹: Հարկ չկա այս օրինակով Մնակյանին համեմատել այդ առապելական դերասանի հետ: Բայց սկզբունքը նույնն է: Մնակյանը եղել է անցյալ դարի այն դերասաններից, որոնց դրամա խաղալու վարպետությունը կատարելագործվել է պատիսի խաղացանկի վրա:

Սահաբյանի խմբի 1872—73 թատերաշրջանի վերջին ներկայացումը եղել է «Հավատք, հույս, սեր» մելոդրաման, որից հետո խումբը ցրվել է: Հաջորդ թատերաշրջանից Մնակյանին տեսնում ենք Վարդովյանի թատրոնում, որպես

¹ С্�в. С. Игнатов, История западноевропейского театра нового времени, М.—Л., 1940, стр. 134, Н. Минц, Эдмунд Кин, М., 1957, стр. 78.

ոեժիսոր և դերասան: Այս նույն ժամանակ Մաղաքյանը նորից է կազմակերպում իր խումբը, անվանում այն «Արևելյան թատրոն» և որպես ավանդություն, թատերաշրջանն սկսում «Երկու հիմնապետներով»: Նա խաղացանկում աստիճանաբար պակասեցնում է թարգմանական պիեսները, տեղ հատկացնելով պատմա-հայրենասիրական պիեսներին: Մաղաքյանին մի շրջան հաջողվում է կենսագործել «Արևելյան թատրոնի» վերականգնման իր ծրագիրը, բայց նյութական դժվարությունները թույլ չեն տալիս դիմանալու «Օսմանյան թատրոնի» մրցակցությանը: Վարդովյանը բարձր աշխատավարձով իր թատրոնն էր տանում Մաղաքյանի դերասաններին: Սկզբում Մաղաքյանից հեռանում են Մնակյանը և Թրյանցը, իսկ 1873—74 թատերաշրջանի վերջում՝ գրեթե մնացած բոլորը:

Վարդովյանի խումբը ներկայացնում էր ժամանակակից տիպի եվրոպական թատրոնական կազմակերպությունն: Այն ուներ նվագախումբ և երգչախումբ, խուլացի ոեժիսոր, պարուսոյց, դիրիժոր: «Օսմանյան թատրոնը» հանդիսապես էր մասուցում մի բազմազան ու խայտարդետ խաղացանկ՝ եվրոպական մելոդրամաներ, հայ պատմական ողբերգություններ, ժամանակակից թուրք հեղինակների պիեսներ, հետագայում՝ նաև օպերետներ: 70-ական թվականների առաջին կեսին Վարդովյանը թիջ տեղ չի հատկացրել պատմա-հայրենասիրական պիեսներին, դիմելով հատկապես Դուրյանի դրամատորգիային: Այս է պատճառ եղել, որ

մտավորականության մի մասը ի դեմս Վարդովյանի տեսում
էր պոլսահայ բեմի վերանորոգչին: Վարդովյանի պաշտպա-
նությամբ և Մաղաքյանի դեմ է հանդես եկել նաև «Մեղուն»,
որի հրատարակիչներն էին Պարոնյանը և Սվաճյանը:

Մաղաքյանի՝ միայն հայերեն ներկայացումներ կազմա-
կերպելու ջանքերը թերթը գնահատում էր որպես անձնական
պայքար Վարդովյանի դեմ: Նույն կերպ է գնահատվել և այն,
որ Մաղաքյանը փորձել է նորից իր խումբը տանել Մնակ-
յանին և Թրյանցին: «Ի՞նչ կնշանակե, երբ այ. Մաղաքյան
Վարդովյան խումբն Մնակյանն ու Թրյանցը համոզել
կաշխատեր, որ իր խումբը գան,—գրում է «Մեղուն»:—Մի՞թե
չգիտեր Մաղաքյանը, որ Մնակյանը և Թրյանցը առնելուն
պես Վարդովյանը միայն Պենկյանով և Ֆասովյանով
պիտի մնար: Գիտեր և ուզածն ալ աս էր: Ի՞նչ կնաշանակե
երբ Մաղաքյան կըսէ թե՝ Արևելյան թատրոնը տաճկերեն
ներկայացումներ չպիտի տա, այլ միայն հայերեն: Ասով
Վարդովյանը հարվածել չէ նե, ի՞նչ է նապատակը»¹:

Երկու խմբերի միմյանց հակադրվելը «Մեղուն» բացա-
տրում էր Մաղաքյանի և Վարդովյանի անձնական թշնաման-
քով: Մինչդեռ այսուղ սկզբունքների պայքար կար: Վար-
դովյանի թուրքական խաղացանկը ապագտայնացման առաջ
էր կանգնեցրել հայ թատրոնը, և Մաղաքյանի պայքարը դրա
դեմ էր: Խոկ մտավորականությունը ցանկանում էր անշատ
թատերախմբերի փոխարեն տեսնել մեկ միասնական և հաս-

¹ «Մեղուն», 1873, թիվ 191:

տատուն թատրոն: Այդպիսին էր «Օսմանյան թատրոնը», որ անհամեմատ ապահով վիճակում էր, քան մինչ այդ Պոլսում եղած որևէ հայկական թատերախումբ: Այս էր հիմնական պատճառը, որ ժամանակի ընթացքում Մնակյանի հետ միասին այնտեղ համախմբվեցին «Արևելյան թատրոնի» գրեթե բոլոր հիմնական ուժերը, բացի Արուսյակ Փափազյանից, Մաղարյանից և Ադամյանից:

Բնաց «Օսմանյան թատրոնը» նույնպես ազատ չէր քաղաքական հետապնդումից: Դա սկսվում է Նամըք Քեմալի «Վաթան» պիեսի արգելումով 1873-ին¹: Ներկայացումներն ընդհատվում են: Դերասանների մի խումբ Մնակյանի և Թրյանցի գլխավորությամբ մեկնում է Սալոնիկ: Բայց այստեղ էլ շարունակվում են հետապնդումները: Քաղաքի կառավարիչ փաշայի հրամանով ներկայացումներն արգելվում են, իսկ Մնակյանը և Թրյանցը ձերբակալվում և ետ են ուղարկվում Պոլիս, այնտեղից աքսոր ուղարկվելու համար: Մնակյանին և Թրյանցին աքսորից ազատելու համար հարկ է լինում դիմել սուլթանի մեծ վեզիրին: Դրանից մի քանի ամիս անց «Օսմանյան թատրոնի» ներկայացումները վերսկավում են գրաքննության հսկողությամբ: Ինչպես գրում է Ռեֆիկ Ահմեդը, Թուրքիայում ներկայացումների գրաքննությունը պաշտոնապես հաստատվել է այս դեպքից հետո²:

Մինչև 1878 թվականը Մնակյանը հիմնականում եղել է Վարդովյանի թատրոնում: 1876-ին նա մի շրջան հեռանում է

¹Տե՛ս Վ. Ստամբուլօս, Համակ Կեմալ, Մ., 1931, ստ. 165—165.

²Ռեֆիկ Ահմեդ Սեվենզիլ, Թուրք թատրոնի պատմություն (թուրքերեն), Խաթանքով, 1934, էջ 52:

Վարդովյանից: Դա այն շրջանն էր, երբ Վարդովյանի թատրոնում հիմնականում տրվում էին թուրքերեն ներկայացումներ և ամսվա մեջ մեկ-երկու անգամ միայն՝ հայերեն: Այդ ընթացքում Մնակյանը միանում է Մադարյանի և Ազնիվ Հրաչյանի կազմակերպած նոր թատերախմբին, որի գոյությունը սակայն շատ կրաք է տևում¹: Մնակյանը նորից գտնում է Վարդովյանի մոտ:

«Օսմանյան թատրոնում» գտնվելու ընթացքում Մնակյանը դառնում է այդ խմբի հեղինակությունը կազմող ուժերից մեկը: Այստեղ նա բացարձակ հեղինակություն է հանաչվում որպես ուժիսոր: Իր բեմադրողի և դերուատուցի վարպետությունը ևա կատարելագործում է այդ տարիներին, աշխատելով սկզբում իտալացի ուժիսոր Նոչիի հետ, իսկ հետագայում՝ 1875—76 թատերաշրջանից սկսած, ֆրանսիացի Մենատիեի հետ: Մնակյանը «Օսմանյան թատրոնում» ուսուցչի դեր է ունեցել պոլարիա բեմի շատ դերասանների համար: Այստեղ Մնակյանի ուժիսորությամբ են ստեղծագործել Դավիթ Թրյանցը, Երանուինի Գարագաշյանը, Գարեգին Ռշտունին, Միքայել Չափրաստը: Որպես պրոֆեսիոնալ դերասանուինիներ այդ տարիներին են ձևավորվել Աստղիկը, Սիրանոյշը, Մարի Նվարդը, Վերգինե Գարագաշյանը:

«Օսմանյան թատրոնում» Մնակյանը հնարավորություն է ունեցել խաղալու ամենաբազմապիսի դերեր առանց

¹ Ազնիվ Հրաչյան, Խմ հիշողություններս, Փարիզ, 1909, էջ 64—65 (պատմեատել՝ Ազնիվ Հրաչյան):

ամպլուայի սահմանափակումների: Այսպիսին է եղել նրա խաղացանկը. Պիեռ, Անդրե և Բլանդրոզ («Փարիզի աղքատներ»), Տակորեկ (Է. Սյոմ' «Թափառական հրեա»), Գուտավով (Ա. Դյումա-որդի՝ «Քույր Թերեզա»), լորդ Հենրի Բենֆոր (Ժ. Բուշարդի՝ «Ս. Պողոսի եկեղեցու գանգահարը»), Արշակ Բ («Կույրն Տիրան»), Արքա Ֆարիհա («Կոմս Մոնտե Քրիստո»), Դոն Սեզար (Դյումանուար և դ' Էնեների՝ «Դոն Սեզար դ' Բազան»), Արման Դյուվալ («Քամելազարդ կինը») և այլն:

Որպես շատ բեմադրվող հեղինակներ Մնակյանի համար առավել ճշանակալից են դառնում Էժեն Սյուն և Դյումաները: Նրա համար հայտնություն է դառնում Արման Դյուվալի դերը: Ազնիվ և համակրելի դեմքը, արտաքին պլաստիկան, սալոնային փայլը, փափուկ, երգեցիկ բարիտոնը, ելաչիներով հարուստ դեկլամացիան միացած անկեղծ հուզականության հետ, թատերական էֆեկտ և հմայք են հաղորդել կերպարին: Մնակյանի Արման Դյուվալը երկար ժամանակ համարվել է անգերազանցելի: Նա այս դերով հանդես է եկել մինչև 90-ական թվականները և խաղընկեր է ունեցել պոլսահայ բեմի բոլոր Մարգարիտ Գույշեներին՝ Երանուի Գարագաշյանին, Ազնիվ Հրաչյային, Սիրանուշին, Մարի Նվարդին: «Արման Տյուվալի դերն իր անմահացումն եղած է, իրեն չափ ոչ մեկ դերասան թրքահայ բեմին վրա այնքան ճշմարիտ ներկայացուցած է այս տիեզերական դերը»—գրում է Շարասանը¹:

¹ Շարասան, 62վ. աշխ., էջ 43:

70-ական թվականների երկրորդ կեսին թատրոնում գերակշռող են դառնում օպերետը և մելոդրաման: Որքան ուժեղանում է սովորական կառավարության քաղաքական և ազգային հաջածանքը, թատրոնը կորցնում է իր լուսավորական և հայրենասիրական բովանդակությունը, իսկ նրանում ստեղծագործող անհատը հեռանում է դերասան-քաղաքցու դիրքերից: Եթե 60-ական թվականներին թատրոնը Պոլսում դիտվում էր որպես հայրենասիրական գործ և հասարակական պարտք թե դերասանի, թե հանդիսատեսի համար, ապա 70-ական թվականների ընթացքում այն աստիճանաբար փոխում է էությունը: Այս պրոցեսը կատարվում է մեկ տասնամյակի ընթացքում և իր կնիքն է դնում Մնակյանի ստեղծագործական նկարագրի վրա:

Ետքնիթա՞ց, թե առաջընթաց շարժում էր դա դերասանի համար: Դերասանը դադարում էր հայրենասիրական և լուսավորական գաղափարների քարոզիչ լինելուց, նրա արվեստը դառնում էր ապաքաղաքական և ապազգային: Բայց, խաղաղով դրամատորգիական ձևի տեսակետից կատարյալ պիեսներ, դերասանը դառնում էր ավելի պրոֆեսիոնալ: Եթե 60-ական թվականներին Մնակյանն ամենից ավելի հակաբռնակալական տիրադների և պաթետիկ պողոկումների մեջ էր որոնում դրամատիկական գագամունքը, այժմ հակվում էր դեպի հոգեբանական փոխանցումների, լուր խաղի և ընդհանրապես ճշմարիտ բեմական գործողության արվեստը: Մելոդրաման մշակում էր լուրահատուկ ռեալիզմ, դերասանին հեռացնում պատմական ողբերգությունը:

թյան պաթետիկ, հանդիսավոր ոճից: Այս դեպքում էլ, իհարկե, դերասանի մտածողությունը մնում էր ոռմանտիկական. կերպարը ազատ չէր գործում, գրկված էր սեփական կամքի ինքնագիտակցումից և շատ էլ հեռու չէր գնում հեղինակի բարդյական միտումի արտահայտիչը լինելուց:

Մելոդրամային ռեալիզմը ռեալիզմ էր այնքանով, որ ենթադրում էր խոսակցական, հոգական խոսք, օգացմունքների ոչ պայմանական, այլ ճշմարտությանը մոտ վերարտադրություն: Այստեղ չէր կարող բացառվել նաև պատրաստի հոգեվիճակներ ներկայացնելը, «քաց» ցուցադրական խաղը: Դա մելոդրամային խաղառն է, որը Եվրոպայում վերջնականացել է 19-րդ դարի կեսին, իսկ պոլսահայքեմում իր խկական ձևով հաստատվում էր 70-ական թվականների ընթացքում:

* * *

1878-ին «Օսմանյան թատրոնը» փակվում է: Պատճառը մի կողմից նոր սկսված ոուս-թուրքական պատերազմն էր, մյուս կողմից այն, որ լրացել էր Վարդովյանի պետական արտօնագրի ժամկետը:

Ոուս-թուրքական պատերազմը արևմտահայության մեջ կենացնացնում է 60-ական թվականների մթնոլորտը: Մուսական զորքի հաղթանակները ազատագրության հույսեր են ներշնչում: Հայրենասիրական երգեր են երգվում, սահմանադրական ճառեր արտասանվում, կազմակերպվում են թատե-

րախմբեր: «Օսմանյան» խումբը բաժանվում է երկու մասի: Խմբի մի հատվածը Ֆասոլյանյանի գլխավորությամբ սկսում է ներկայացումներ տալ Պոլսում, իսկ որոշ ժամանակ հետո անցնում է Բուրսա: Մյուս հատվածը Մնակյանի գլխավորությամբ գնում է Սաղոնիկ: Այնտեղ էր նաև Պենկյանի նորակազմ օպերետային թատրոնը: Պենկյանն իր մոտ է հրավիրում Մնակյանին և Տիգրան Չոխաճյանին և քեմադրության է պատրաստում բավական կանոնավոր օպերետային խաղացանկ:

Ռուսական բանակն արդեն գրավել էր Աղրիանապոլիսը, և Պենկյանն իր խումբը տանում է այնտեղ: Մնակյանն այստեղ կատարում է մի քանի դերեր՝ Պլոտոն («Օրփեոս»), Մենելաոս («Հրաշագեղ Հեղինե»), Բողեր («Ժիրոֆիե-Ժիրոֆլյա»), Բոնրոնե («Մադամ Անգո») և Լերլերիջի Հորհոր աղա, Արիֆ (Չոխաճյան «Արիֆ»):

Օպերետային ներկայացումների շրջանն ավարտելոց հետո Մնակյանը Պոլիս չի մեկնում: Դերասանների մի խմբի հետ, որոնց մեջ էր և Մարի Նվարդը, նաև Աղրիանապոլսում կազմակերպում է դրամատիկ ներկայացումներ: Մինչև 1878—79 թատերաշրջանի վերջը Մնակյանը շարունակում է իր ներկայացումները, Աղրիանապոլսից հետո՝ Սաղոնիկ, Մերսին և Ադանա քաղաքներում: Վերադառնալով Պոլիս, նա մի շրջան միանում է Օրթագյուղի թատերախմբին, որ կազմակերպել էր Ազնիկ Հրաշյան: Այնուհետև նա դարձալ միանում է Վարդովյանին, որը ձեռնամուխ էր եղել իր խմբի վերականգնմանը:

Ռուս-թուրքական պատերազմն ավարտվում է Սան-Ստեֆանոյի դաշնագրով (1878): Սկսվում է հայկական հարցի պատմությունը: Դա իր հետ բերում է քաղաքական և ազգային նոր հալածանք, որի հետևանքներից մեկն էլ հայկական ներկայացումների արգելումն էր:

Հայկական ներկայացումները Պոլտամ դադարում են, իսկ հաջորդ տարի՝ 1880-ին վերսկավում են «Օսմանյան թատրոնի» ներկայացումները Մնակյանի գլխավորությամբ: Վարդովյանը դարձել էր Համիդի պալատական խմբի դերասանապետը, իսկ թատրոնի տնօրինությունը հանձնել Մնակյանին: Բայց այստեղ դերասանները պակաս էին. ոմանք Ֆասոլյանյանի հետ գնացել էին Բուրսա, մյուսները Պենկյանի օպերետային խմբում էին: Մնակյանը մի քանի թուրքերեն բեմադրություններով ավարտում է թատերաշրջանը և մնում տարտամ ու անորոշ վիճակի մեջ: Մնում էր համոզվել, որ ոչ միայն հայ, այլ ընդհանրապես թատրոնը հեռանկար չէր խոստանում սուլթանական Թուրքիայի մայրաքաղաքում:

Կառ միայն մի ելք՝ մեկնել Կովկաս:

ՄԵԼՈԴՐԱՄԱՆ ԵՎ ԴԵՐԱՍԱՆԱԿԱՆ ԱՎԱՆԴՆԵՐԻ ԳԱՂՑՆԻՔՆԵՐԸ

...Կային դրամաներ, որոնց մասին ասում էին.
«Ինչ դատարկ պիես է, բայց ինչ հիանալի է խաղում
Ֆրեդերիկը»:

Կոկեն—ավագ

Տափակ խոսքերը, անհավաստի բնավորություն-
ները մեղողրաման դարձնում են ցածր կարգի մի
արվեստ, բայց այդ ցածր արվեստը պահպանում էր
իր մեջ եղիսաբերյան թատրոնի բույրը և իսկական
դերասանական ավանդների գաղտնիքները:

Շառլ Դյուպիեն

Գևորգ Զաշկյանի, Գաբրիել Սունդուկյանի, իշխան
Յազդ Թումանյանի և ուրիշների նախաձեռնությամբ 1879
թվականին Թիֆլիսում կազմակերպվում է «Թատրոնական
մասնաժողով»: Այս կազմակերպության նպատակն էր հայ

թատրոնը դուրս բերել ճգնաժամից՝ նոր հիմքերի վրա դնել
այն գործը, որ սկսել էին Զմշկյանն ու Ամրիկյանը 60-ական
թվականներին: Զմշկյանի թատերախումբը, որ մի տասնամ-
յակ առաջ հայկական միակ պրոֆեսիոնալ թատերախումբն
էր Թիֆլիսում, այժմ գրեթե քայլքայված էր: Զմշկյանը մտա-
ծում էր համախմբել արևելահայ և արևմտահայ դերասանա-
կան ուժերին, ստեղծել նոր թատերախումբ: Եվ ահա, նրա
նախաձեռնությամբ Թիֆլիս են հրավիրվում Ադամյանը,
Աստղիկը, Սիրանուչը:

Թիֆլիսահայ դերասանները դաստիարակված էին հիմնա-
կանում Սունդուկյանով: 60-ական թվականներին Թիֆլիսի
բնմում քիչ տեղ չունեին նաև տեղական կյանքից առևլած
կենցաղային կատակերգությունները: Բայց Զմշկյանն ավելի
շատ հակված էր դեպի Փոքր Թատրոնի ավանդները: Թվում
է, այս գիծը պետք է շարունակվեր և զարգացվեր 80-ական
թվականներին, երբ ավելի նպաստավոր պայմաններ կային
թատերախումբի կանոնավոր գործունեության համար: Դրանով
էլ տարակուասեք ու վրդովմունք առաջացավ ամենից առաջ
Ադամյանի և Սիրանուչի բերած օտարութի խաղացանկի
հանդեպ: Ի հակակշիռ հանդիսատեսի բացահայտ հիաց-
մունքի և ոգևորության, թատրոնի ներսում սկսվեց մի պայ-
քար, որը մամուլում ևս դարձավ բանավեճի առարկա:
Այստեղ ամենասկզբունքայինը «Մշակի» և նրա հմբագրի՝
Գրիգոր Արծրունու դիրքն էր: Արծրունու պայքարը ուալիզմի
համար էր, բայց նա ծայրահեղության մեջ էր իր «հակա-
ֆրանսիական» տրամադրությամբ: Արծրունին ժխտում էր ոչ

միայն մելոդրամայի, այլև Հյուգոյի և ընդհանրապես ոռման-տիզմի գոյության իրավունքը հայ թատրոնում։ Դյումա-որդու «Քամելազարդ կինը» նաև համարում էր նույնքան անընդունելի, որքան «Արյան բիծ» և «Սեր առանց համարման» մելոդրամաները։ Այն ժամանակ, երբ Սպանդար Սպանդարյանը հիացած էր Արյանի տաղանդով և վարպետությամբ, որիշները նույն Արյանին հայտարարում էին միջակ դերասան։ Որիշ կերպ չեր կարող լինել, քանի որ դերասանի արվեստի չափանիշ էր դարձել նախ և առաջ նրա խաղացանկը։

1879—80 թատերաշրջանի վերջում Արգար Հովհաննիսյանը մեկնում է Պոլիս՝ դերասանական նոր ուժեր հրավիրելու համար։ Նա հրավիրում է Մնակյանին և Գարգաշյաններին։

Մնակյանը Թիֆլիսի հանդիսատեսին ներկայացավ որպես մելոդրամայի դերասան։ Մելոդրամային կերպարները, որոնցով նա հանդես եկալ այստեղ, փոքր մասն էին կազմում այն հսկայական խաղացանկի, որով հոչակվել էր իր բեմական գործունեության նախորդ տասնամյակում։ Դրանք մեծ թիվ չեն կազմում նաև այն նոր կերպարների կողքին, որ նա ստեղծեց Թիֆլիսի բեմում։ Այնուամենայնիվ, այդ դերակատարումները էական տեղ են գրավել Մնակյանի բեմական կենսագրության մեջ։ Առանց այդ մելոդրամային կերպարների դժվար է պատկերացնել նրա արտիստական ստույգ նկարագիրը, ճիշտ աղնպես, ինչպես չի կարելի ճիշտ պատկերացնել ունենալ XIX դարի եվրոպական և ոռուական բեմական դպրոցների մասին, առանց նկատելու մելոդրամայի ոնեցած դերը դերասանի արվեստում։

Մելոդրաման շատ դեպքերում գրեթե նույնքան նշանակալից է եղել թատրոնների և առանձին ստեղծագործողների կյանքում, որքան և դասական դրամատորգիան։ Սուած գալով ֆրանսիական հեղափոխությունների նախօրյակին, որպես ամենադեմոկրատական ժանրը և որպես գաղափարական զենք իր դիրքերն ամրապնդող բոլոժուական դասակարգի համար, մելոդրաման հետագայում եթե ինչ-որ իմաստով կորցրեց իր սոցիալական սրությունը, ապա երբեք չկորցրեց իր հմայքը և պահպանվեց ամբողջ XIX դարի ընթացքում։ Ռուսական բեմում Մոչալովից և Շչեպկինից հետո այդ ժանրը նշանակալից տեղ ուներ այնպիսի դերասանների խաղացանկում, ինչպես Լենսկին, Խվանով-Կոզելսկին, Նեմիրովկա-Ռալֆը։ Եվրոպական բեմում դարի երկրորդ կեսին առաջ էր եկել «մելոդրամայի վարպետ» հասկացությունը, որը փաստորնն կապվում էր Ֆրեդերիկ Լեմեթրի հետևորդների անունների հետ։ Մելոդրամայի վարպետներից էր նաև դարավերջի անգլիացի նշանավոր դերասան Իրվինգը։ Իհարկե այլ էր մելոդրամայի իմաստը դարի առաջին կեսին, այլ էր հետագայում։ Այդ նոյն ձևով, մելոդրաման նոյն իմաստը չուներ 60-ական և 80-ական թվականների հայ թատրոնում։

Ութ տարի շարունակ (1872—1879) Մնակյանը խաղացել էր գերազանցապես մելոդրամաներ։ Այս խաղացանկում կենտրոնական տեղը պատկանում էր այն պիեսներին («Երեսուն տարի կամ խաղամոլի կյանքը», «Ծեր կապրալը», «Փարիզի հնահավաքը», «Ս. Պողոսի եկեղեցու զանգա-

հարը», «Դոն Սեզար դը Բազան»), որոնցով հոշակվել էր Ֆրեդերիկ Լեմեթրը, և որոնք, շնորհիվ նրա հետևորդների, չէին իջնում փարիզյան բեմերից: Մնակյանը նույնպես Ֆրեդերիկի հետևորդն էր իր բեմական կյանքի առաջին տարիներից:

Արծրունու և մելոդրամայի հակառակորդների պայքարը չկարողացավ խսպատ վտարել այդ ժանրը թատրոնի բեմից, այն էլ այնպիսի ժամանակ, երբ դասական դրամատորգիայի հաստատումը դարձել էր առաջնագույն խնդիր: Մնակյանը և Ադամյանը յուրացրել էին խտալական և ֆրանչիական բեմական արվեստի արտաքին ոճը, որը միացած մեխական օժնվածության հետ, դերասանական պրոֆեսիոնալիզմի բարձր մակարդակ էր, անկախ այն բանից, ընդունելի էր այդ իր բոլոր կողմերով, թե՛ ոչ: Բնականաբար այստեղ վերապահություն կար ոոմանտիկ-մելոդրամային ոճի հանդեպ, քանի որ այդ ոճի ներկայացուցիչները անփոխարինելի վարպետներ էին հայ թատրոնի համար: Պայքար՝ այն արդյունքը տվեց, որ մելոդրաման պահպանվելով դասական դրամատորգիայի կողքին, հաշտեցվեց բեմական կատարման ոնախտական ոճի հետ: Ինչպես Մնակյանի, այնպես էլ մյուս պոլարիայ դերասանների համար շատ շուտով պարզ դարձավ, որ հին պիեսը պետք էր խաղալ նոր ոճով: Մելոդրաման պետք էր խաղալ ոնախտական հիմքի վրա:

Մնակյանի առաջին խվի ելույթներից հանդիսատեսը և քննադատները նկատում են, որ գործ ունեն ոչ սովորական դերասանի, այլ տաղանդավոր ու փորձված մի արտիստի

հետ, որն ամեն բեմի կարող է պատիվ բերել: Մնակյանի բերած պիեսներն («Ալպյան հովվութի», «Թերեգա», «Ծեր կապրալը», «Դոգլաս») այնպիսին էին, որոնցում մելոդրամայի վարպետը ազատ հնարավորություններ ուներ դրսնորվելու հոգական ներգործման ուժով:

«Թերեգա» Դյումա-որդու երկրորդական գործերից է և ձևի առումով ոչ այնքան բնորոշ նրա դրամատորգիական մտածողությանը: Բայց այստեղ էլ առկա է ֆեմինիստական գաղափարախոսությունը, որ միշտ եղել է նրա առեղծագործության հիմքում: Պիեսի այուժեն տիպիկ մելոդրամատիկական է: Նեապոլու ինչ-որ հրդեհի ժամանակ Արտյոր անունով մի ֆրանսիացի երիտասարդ մահից փրկել է մի իտալուհի՝ Թերեգային: Այս ոռմանտիկ միջադեպին հաջորդել է սերը և հետո՝ անջատումը: Անցել են տարիներ, և Արտյորն անունացել է մի որիշ աղջկա՝ Ամելիայի հետ: Ամելիայի հայրը՝ Դըլոնեն, հարուստ, առաքինի և պատվախնդիր մի ծերունի գինվորական է: Ինչ-որ մի հեռավոր ճանապարհորդությունից նա տուն է վերադառնում ամուսնացած: Սա դերասանի առաջին մուտքն է: «Բեմ մտնելուն պես,—գրում է քննադատը,—մենք տեսնում ենք գորովալիր մեկ հայր, որ նվիրել է յոր ամբողջ կանքը, յոր միակ սիրելի աղջկա Ամելիայի համար»¹: Բայց Ամելիան չգիտե, որ իր հայրն ամուսնացել է մի երիտասարդ իտալուհու հետ: Հանդիսատեսը նույնպես անտեղյակ է դրան: Մնակյանը դեռ ոչ մի բառ չի արտասա-

¹ «Մելու Հայաստանի», 1880, № 72:

նել, բայց նրա ամբողջ կերպարանքում շփոթմունքի, ամորթի և վախի նման բան կա: Դըլոնեն Ամելիային է նայում իր մեղքի ծանրությունն զգացող մարդու մոլորված ու մտածեռ հայացքով, և «դեռ մեկ բառ չարտսասնած, հանդիսականը նկատում է, որ այդ անսահման զավակասերը մեկ հանցանք է գործել, որ վախենում է հայտնել յուր զավակին: Ուրիշ դերասան այդ բանն արտահայտելու համար գուցե հազար ու մի մոնողգներ կարդար, բայց չեր ունենա այն հաջողությունը, որը ուներ պարոն Մնակյանը իր մնջիկ խաղով և մտքերի լակրնական արտահայտությունով»¹, —շարունակում է քննադատը:

Դրաման զարգանում է: Բեմ է գալիս Դըլոնեի երիտասարդ կինը և... դա Թերեզան է: Արտյորի և նրա հին սիրավեսը նորոգվում է: Հետագայում Ամելիան պատահաբար գտնում է նրանց նամակները և իմանում ամեն ինչ: Ամեն ինչ իմանում է և Դըլոնեն: Ծերունին մենամարտի է հրավիրում Արտյորին: Հանդիսատեսը Մնակյանի դեմքի վրա կարդում է բանականության չենթարկվող զայրույթ, կատաղություն: Դերասանը ատամներով դուրս է քաշում ձեռնոցը, նետում Արտյորի դեմքին: Թվում է նա պետք է գոռա, բայց ցածր ու խոլ ձայնով ասում է. «Ես ձեզ կապանեմ»: Նրա թույլ ձայնը և զապված զայրույթը սարսկցնում է հանդիսատեսին: Բայց ասկում է մի խոսք, և ծերունու կատաղությունը փոխվում է ցավագին զղչման: Ամելիան հայտնում է, որ ինքը շուտով մայր է դառնալու: Ծերունին հանկարծ ինչ-որ մոռաց-

¹ Նոյն տեղում:

ված բան է մտաբերում և մի երկար, զարմացական քացականչություն է պոկվում նրա շորթերից: Ինչպես քննադատն է գրում, «այդ ամենի առյուծը» հանգստանում է փոքրիկ երեխայի նման: Նա ամաչում էր իր զայրույթի համար:

Պիեսն ավարտվում է նրանով, որ Արտյուրը և Ամելիան միասին հեռանում են տնից, իսկ Թերեզան ինքնասպանությամբ է քավում իր «հանցանքը»: Նա մեռնում է ծերունի ամուսնու գրկում, ներումն և հայրական օրինություն ստանալով հրանից: Բոլորովին մենակ մնացած ծերունու համար սկզբում է մի անասեղի հոգեկան տառապանք, և մեղողրաման ավարտվում է առանց ավանդական երջանիկ վախճանի: «Վերջին տեսարանում, որ խարված ծերունին գգում է, որ ինքն է մեղավոր յուր հանցավոր կնոջ առաջ, աննման էր Պ. Մնակյանը», — եզրափակում է քննադատը¹:

Նոյն տիպի դերակատարումներից է Մնակյանի Մորիսը «Ալպյան հովվունի» մեղողրամայում: Հանդիսատեսի առջև դարձյալ տառապող հայրն է, պատերազմից ու գերությունից դարձող մի ծերունի, որ Ըվելցարիայի լեռներում որոնում է իր տարիներ առաջ կորցրած դստերը՝ հովվունի Պովրեթին: Նախորդ դերակատարման նկարագրությունից հետո քննադատը միայն հիշեցնում է. «Ծերունի սպարապետի դերը «Հովվունում» Մնակյանն անցկացրեց միևնույն տակտով, միևնույն բնական խաղով, որի մասին ավելորդ եմ համարում խոսել»²:

¹ «Մեղու Հայաստանի», 1880, № 72:

² Նոյն տեղում:

Մեկ ուրիշ դեմ՝ դարձյալ զինվոր և դարձյալ հայր: «Պիեսան թե դրամատիկական, թե բնմական կետից աննշան է,—գրում է «Մեղու Հայաստանի» թատերախոսը,—միակ արժանավորությունը կայանում է նորանում, որ այ. Մնակյանը (Անտոն Սիմոն) առիթ ունենա ցուց տպու, թե ինչպես քնական և լավ կարող է նա բարկությունից և հոգվո հուզմունքից դառնալ մունջ, կրոցնել խոսելու կարողությունը»¹: Եվ իսկապես, Դյումանուար և դ'Էններիի «Ծերունի կապրալ» մելոդրաման ավելին չէ, քան այդ: Պիեսը թերևս այնքան տարածված չլիներ, եթե նրանով հոչակված չլիներ Ֆրեդերիկ Լեմերը: Վերջինիս Անտոն Սիմոնի դերում գրավել է այն հանգամանքը, որ նա առիթ է ունեցել երեք գործողություն շարունակ խաղալ լուս, առանց խոսքի: Կոկլեն-ավագը իր «Դերասենի արվեստը» աշխատությունում Ֆրեդերիկի այս դերակատարումը գնահատում է որպես անխոս խաղի լավագույն օրինակ²:

Անտոն Սիմոնը նապոլեոնյան բանակի տասնապետ է, արկածախնդիր մի զինվորական, հին լովելաս, բայց ազնիվ ու շիտակ մի մարդ: Այդպիսին է նա պիեսի առաջին արարում: Երկրորդ արարում անցել է քանի տարի: Սիմոնը իր հայրենի գյողն է վերադառնում արդեն ծերացած: Սիմոնի վերադարձը անսպասելի է: Դա այն պարտադիր անակնկալն է, որտեղից շուր է գալու իրադարձությունների ընթացքը, և կորսված

¹ Նոյն տեղում, № 82:

² Коклен-старший, 1 скусство актёра, Л., 1937, стр. 98.

արդարությունը գտնելու է իր տեղը: Սիմոնի բացակայության ժամանակ տանուտերը տիրացել է նրա հոգեզավակի ժառանգությանը, և հանդիսատեսն սպասում է, որ պիտի բացվի գաղտնիքը, ու չարը պատժի: Մնակյանը կուլիսներում արդեն կանխատեսել է դերասանական էֆեկտը և գիտե, որ հանդիսատեսն իրեն է հետևելու ամբողջ տեսարանի ընթացքում: Մուտքից առաջ կարճ, սպասողական դադար տաղուց հետո նա բեմ է մտնում և խաղում մի ամբողջ լուր տեսարան. ծունկ է իշնում եկեղեցու դռանը, լուր աղոթում, շնորհակալ լինում աստծուն, որ ինքը՝ ծեր գինվորը, իր հայրենի գյուղն է վերադարձել: Տեսարանը տպավորիչ է, դամիճնում թաշկինակներ են թրչվում, հանդիսատեսը ապաստղական դրության մեջ է: «Պարոն Մնակյանի իբրև ծերունի տանապետ Սիմոնի վերադարձը յուր հայրենիքը, յուր գյուղը, գերությունից վերջը երկրորդ գործողության սկզբունքնական և սրտաշարժ էր», —գրում է քննադատը¹: Մնակյանը հանդիսատեսի մեջ նախ համակրանք է արթնացնում իր հերոսի հանդեպ, որ հետո նոյն հանդիսատեսը ցավ զգա, թե ինչու այդ մարդը զրպարտվեց գողության մեջ և վշտից ու անպատվությունից պապանձվեց, իսկ չարն անպատիծ մնաց: Դերասանը ցնցող տպավորություն է գործում այն տեսարանում, երբ հավաքված գյուղացիների ներկայությամբ իբր հաստատվում է նրա գողությունը: Նա ուզում է ինչ-որ բան ասել, բայց զգում է, որ համր է: «Մոնիշ դառնալու տեսարանը,—գրում է Սպանդարյանը,—խիստ

¹ «Մեղու Հայաստանի», 1880, № 80:

արհեստով էր և թատրոնում գտնվող հասարակության վրա ճնշող տպավորություն թողեց, այնչափ բնական և այնչափ ազդու էր Մնակյանի խաղը»¹: Ինչպես գրում է մյուս ականատեսը, այդ տեսարանում ավելի բարձր արվեստ և վարպետություն չէր կարելի պահանջել դերասանից: «Ինչ գեղեցիկ էր Մնակյանը և ինչքան ուստմնասիրելի գիտության համար այն բռպետում, երբ վշտից ու անպատվությունից նա հանկարծ պապանձվում է և չէ կարողանում յուր գլխին կիտված հասարակության հայտնել, որ նա «ծեր զինվոր Սիմոնն է»: Բեմական արհեստը Մնակյանի խաղից բարձր ոչինչ չի կարող պահանջել աղբախի մեկ դերում և կունենա իրավունք»²:

Այս և հաջորդ երկու գործողություններում Մնակյանը լուս խաղով իր վրա է պահում հանդիսատեսի ուշադրությունը: Նա անընդհատ ուզում է հասկացնել իրեն շրջապատողներին, որ ինքը Սիմոնն է, որ տանուտերը ստահակ է և կողոպսիչ, բայց համը է ու նրան չեն հասկանում: Տանուտերը շարունակում է իր չարագործությունները: Իսկ արդարություննը դեռ համը է մնում ծերունի զինվորի կերպարանքով: Պիեսի ավարտվում է բարու հաղթանակով և չարի կրծանմամբ, և արդարությունն ու իրավունքը գտնում են իրենց տեղը:

Մնակյանի Սիմոնը հիշեցրել է Մորիխին, և ուրիշ կերպ է չէր կարող լինել: Դրանք երկուսն էլ նույն մարդն են: Եվ

¹ Նոյն տեղում, № 82:

² Նոյն տեղում, № 80:

Մնակյանը նրանց պատկերել է նույն գգացմունքներով, նույն մտքերով և նույն արտաքինով: Երկուսն էլ հայր են, երկուսն էլ պատերազմից ու գերությունից դարձած, որ հայրենիքից դուրս տառապելուց հետո երջանկություն են որոնում իրենց ընտանիքի գրկում: Երկուսին էլ թվում է, թե նորից և նոր ուրախություններով պիտի սկսվի կյանքը, բայց հանդիպում են աշխարհի իրենց անծանոթ անարդարություններին: Թող որ հեղինակի ցանկությամբ հերոսները արդարության ու ճշմարտության հանգրվանին հասնեն, թող որ պիեսը բարոյախոսությամբ վերջանա: Դերասանին անհանգըստացնողն այդ չէ, այլ հալածված ու մերժված, ամեն ինչ կորցրած մարդու ողբերգությունը, կարենցանքն ու քրիստոնեական հումանիզմը այդ մարդու հանդեպ:

Մնակյանի մելոդրամայի կերպարները շատ դեպքերում ստացել են սոցիալական մերկացման իմաստ և ուժ: Այս տեսակետից նրա դերակատարումների շարքում առանձնանում է հատկապես մեկը, որը թերևս կարելի է լավագունը համարել: Դա Սարգան անունով «չարագործն» է («Լյուսի Դիդիե»), որ հիշեցնում է մեկ ուրիշ «չարագործի»՝ 70-ական թվականներին խաղացված դ' Սերվային («Սրյան բիծ»): Որքան նման են այս կերպարները գրական հիմքում, նույնքան տարբեր են դերասանական մեկնաբանությամբ և կերպավորման ակզեռով:

Դիեսի պյումեն չափից ավելի պարզ է, մի բան, որ անսովոր է այս ժանրի համար: Լյուսի և Դիդիե ամուսինները սիրում են իրար և թվում է ոչինչ չի կարող խոռվել այդ

ազնիվ ու առաքինի ծնված մարդկանց կյանքը: Բայց նրանք սնանկացել են և Դիդիեն պարտքեր է արել: Որքան առաքինի և ազնիվ են այդ ամուսինները, նույնքան անազնիվ ու չար է նրանց պարտատերը՝ Սարգանը: Նա արտաքուստ Դիդիեի բարեկամն է, փրկում է նրան սնանկությունից, իսկ մտքում որդշել է տիրանալ նրա կնոջը: Եվ նա բեմական «չարագործին» վայել անամոթությամբ Լյուսիին առաջարկում է իր առնական ծառայությունները, այլապես կարող է նրա ամուսունուն բանտ ուղարկել, որպես անվճարունակ պարտապանի: Պիեսը վերջանում է Լյուսիի մահով և Դիդիեի խելագարությամբ: Չարը հաղթանակում է:

«Արժեր այ. Մնակյանին տեսնել Սարգանի դերում, պ. Սդամյանի առջև կանգնած,—գրում է Սպանդարյանը: —Որչափ էլ որ այ. Սդամյանը յուր փառավոր էֆելտներով, ազնիվ խոսքերով զարդարված դերումն էր, պ. Մնակյանը ըստ ինքյան մի փոքր և խայտառակ բնավորություն ներկայացնող դերումը, զարմացրեց, գրավեց հասարակությանը յուր բնական և ազդու խաղով»¹:

Արդարն, ի՞նչ է ներկայացրել Մնակյանի «խայտառակ բնավորություն» ունեցող դերը, և ի՞նչ հասկացել քըն-նադատը «քնական և ազդու» բառերի տակ: Պիեսը սովորական մելոդրամա է, կերպարները՝ չափից դուրս պարզունակ: Բայց այստեղ դժվար չէ նկատել սոցիալական կոնֆլիկտի տարրը: Թե որքանով կարող է այն տեսանելի լինել, կախված է Սարգանի դերակատարից:

¹ «Մեղու Հայաստանի», 1880, № 71:

Սարգանը ի բնե եսամոլ, դաժան և խարեքա երիտասարդ է, զորկ մարդկային կերպարանքից և ավելին չէ, քան պիեսից պիես անցնող մի պատրաստի սրիկա: Այդ տրադիցիոն ավանդության տիպից Մնակյանն ստեղծում է «մեկ որիշ անձնավորություն, մեծ հասակով մարդ, փորձված, մոլեգին և հարուստ բանկիր» (ընդգծումը հեղինակին է—Հ. Հ.): Քննադատը գրում է, որ Մնակյանն այդ դերին տվել է կենուանի մարդկային կերպարանք և մարմնավորել է նրան «շոշափելի ձևով» ցուց տվել «ոչ թե մեկ խարեքա երիտասարդ, կրակոտ խպանացու, այլ մեկ հաշվով, կնոջ սիրո մեջ անխփող մարդ, որի կրքի առաջ խոնարհվում է ամեն բան»:

Սպանդարյանը պատճենականորեն չի ընդգծել «քանիկիր» բառը: Դերակատարումից ստացած անմիջական տղապավորությունն է այդ: Դերասանը Սարգանին պատկերել է ոչ երիտասարդ, այլ կյանքը վաղուց ճանաչած, հասակն առած և փորձված մարդու կերպարանքով: Արտաքին մանրամասների միջոցով Մնակյանը կոնկրետացրել է կերպարը, խախտել չարագործի ավանդական սիմեման: Սարգանը ոչ թե գայթակղիշ և սրիկա է ի ծնե, այլ աղբախին է դարձել, որովհետև փող ունի, «քանիկիր է»: Մնակյանը մելոդրաման բարձրացրել է սոցիալական դրամայի աստիճանին:

Ինչպես Ադամյանը, այնպես էլ Մնակյանը, որպես մելոդրամայի վարպետ առաջին անգամ գնահատվում է Սպանդարյանի կողմից: «Մշակը» և Գրիգոր Արծրունին շարունակում են պահպանել իրենց ծայրամեջ ժխտողական

դիրքը մելոդրամայի և ընդհանրապես ֆրանսիական խաղացանկի հանդեպ: Մնակյան ազատ մնաց «Մշակի» քննադատությունից: Արծրունիկն ապառած լինելով իր ասելիքը Սդամյանի մասին, այժմ հարկ էր համարում լոել, նույնը չկրկնելով համար: Նա շարունակում էր մնալ այն մտքին, որ մելոդրամայի դերասանը չէր կարող բարձր արվեստ ունենալ: Սպանդարյանն այդպես չէր մտածում: Բարձր կարծիքի շինելով խաղացվող պիեսների գեղարվեստական որակի մասին, նա գտնում էր, որ դրանք նորություն էին թիֆլիսահայ հանդիսատեսի համար: Մելոդրաման, իրականության պարզունակ ընդգրկումով հանդերձ, այդ տարիներին հակադրություն էր թատրոնի տեղային ըմբռնման: Չվերցնելով կոլորիտ և կենցաղաճություն, նա բացառում էր կենցաղային ռեպիզմը, լայնացնում դերասանի մասնագիտական տեսադաշտը: Մելոդրամայի պաշտպանները՝ Սպանդարյանը և «Մեղու Հայատանիի» մյուս ռեգենգենտը բարձր կարծիքի չին այդ թվականներին խաղացվող մելոդրամաների մասին: Եթե նրանք կրքոտությամբ չեն պաշտպանել Արծրունու և «Մշակի» դիրքը և նույնիսկ հակադրվել են նրանց, ապա ոչ այն պատճառով, որ նիացած են եղել մելոդրամաների գգայացունց պյուճներով: Նրանք նպատակ են ունեցել խրախուսել նոր աշխուժացած թատրոնական գործը: Այս տեղում նրանց քիչ է զրայեցրել պիեսների սփյալ ընտրությունը և ամենից ավելի հետաքրքրել է թատրոնի գլխավոր դեմքը՝ դերասանը: Դերասանը չէր կարող ուշադրության կենտրոնում շինել, երբ ի դեմս Ադամյանի, Մնակյանի և Գարագաջյանների հրապարակ

Հին եկել հանդիսատեսի և քննադատների համար բոլորովին
նոր, նետաքրքիր և մեկը մյուսին չկրկնող արտիստական ան-
հատականություններ: Այլևս կարևոր չէ, թե ինչ պիես էր խա-
ղացվում. կարևոր այն էր, թե ինչպես էր խաղացվում:
Սպանդարյանը չէր կարող չնկատել, որ մելոդրամա
խաղալու համար դերասանը պետք է ունենար ամենից
առաջ պրոֆեսիոնալ բարձր վարպետություն, մշակված
տեխնիկա: Որպես այդպիսի դերասանների նա մատնացուց-
էր անում Աղամյանին և Մնակյանին: Նա գրում է, որ Մնակ-
յանը «Աղայան հովվուիի» և «Թերեզա» մելոդրամաներում
ցուց է տվել դերասանական արվեստի այնպիսի կատարելու-
թյուն, որպիսին «Թիֆլիսի բեմն շատ հազիվ է տեսած»¹: Սա
ասվում էր մի դերասանի մասին, որն ամենից առաջ
ինքնատիպ և նոր էր իր նկարագրով: Մնակյանի արտիստա-
կան կերպարը հայտնություն էր Սպանդարյանի համար:
«Ինչ պակասություններ էլ որ գտնելու լինենք ա. Մնակյանի
խաղի մեջ,—գրում է նա, —այժմ իսկ կարող ենք ասել, որ նա
տաղանդավոր դերասան է, որ նա գլխից մինչև ոտքը
արտիստ է, որ հայ բեմը մինչև այսօր նորա նմանը չէ ունեցել,
չենք էլ կարող ասել, թե երբ կունենա: Թեպես և ճաշակի
վերա վիճել կարելի չէ, բայց ով որ նորա խաղը գնահատել
է կամենում, պետք է ինքն էլ փոքր ինչ հասկանա արհեստից,
աչք ունենա»²:

Քննադատի խոսքերում չափազանցում էլ կա, որը մշտա-
կան ուղեկիցն է տաղանդավոր դերասանի խաղից ստացած

¹ Նույն տեղում, № 76:

² Նույն տեղում, № 71:

անմիջական, դեռ չսառած տպավորությունների: Քննադատին խորթ չէ նաև հանդիսատեսի հոգեքանությունը, որն իր հիացումն արտահայտելու համար դիմում է ամենաբարձր չափանիշներին:

Մեկ ուրիշ քննադատ գրում է. «Ծշմարիտն ասեմ իմ կյանքիս մեջ շատ լավ դերասաններ եմ տեսել, բայց քչերին եմ գտել նորանցից ավելի բազմակողմանի, ինչպես ես գտա այ. Մնակյանին Դը Լոնեի դերում «Թերեզայի» մեջ, Մորիս ծեր տասնապետ գինվորի դերում «Հովվուհու» մեջ և Սարգանի դերում «Լյուսի Դիդիեի» մեջ: Դերասանի արժանավորությունն է ոչ միայն ըմբռնել դերի իմաստը, այլև մշակել նորան մանրամասն և մարմնացնել յուր մեջ դերի էությունը, մնալ հավատարիմ նորան մինչև խաղի վերջը: Պարուն Մնակյանը այդ տեսակ խղճմտանքով և արվեստին նվիրված դերասաններից է... Փառք և պատիվ Մնակյանի արհեստագիտության»¹:

Բարձր գնահատելով Մնակյանի տաղանդն ու վարպետությունը, այդ հույս քննադատությունը չէր մոռանում հիշեցնելու, որ նա իր դերասանական ներքին նկարագրով շատ տարբեր էր Սոհայլանից: Նրանց անհատականությունների և ոճի մեջ այնքան տարբերություն կար, որքան անձնավորությունների: Մեկը միշտ խաղացել էր ոռմանտիկ հերոսներ և սիրահարներ, մյուսը՝ հատկապես վերջին տարիներում, ավելի շատ՝ «ազնվական հայրեր» և «չարագործներ»: Մեկը տրամադրությունների դերասան էր, նեռու

¹ «Մեղու Հայաստանի», 1880, № 71:

ամեն տիպի կենցաղալությունից, իսկ մյուսը՝ բնավորությունների դերասան, որի կերպավորումներին խորթ չեն մանրագծերը, նաև կենցաղն ու միջավայրն արտահայտող գծերը: Մեկը՝ զգացող և վերապրող դերասան, մյուսը՝ դիտող և վերարտադրող, մեկը՝ ծայրահեղորեն տրամադրության մարդ, անհավասարակշիռ, որ կարող էր հրճվել բարության ու գեղեցկության հանդիպելիս և ողբերգականորեն ընդունել շնչին տհաճություններ, մյուսը՝ միշտ հանդարտ, առողջ մարդու կեցվածքով, անվրդով ու հարգանք ներշնչող լրջությամբ, որ երբեք չէր կորցնում սրախոսելու կարողությունն ու կրթված մարդու արժանապատվությունը: Ծատերական քննադատությունը մի շրջան Մնակյանին և Աղամյանին մոտենում է որպես հավասար հեղինակությունների: Ծատերն էին նկատում, որ Մնակյանն ավելի շատ փորձ և հմտություն ուներ, քան Աղամյանը, առանց իմանալու, որ վերջինս ավելի շատ լիցք ուներ ապագայի համար: Մնակյանն այդ ժամանակ քառասուներեք տարեկան էր, դերասանի ստեղծագործական ուժերի լիակատար հասունացման շրջանում և ունեցել էր մոտ քառ տարվա գործունեություն: Աղամյանը հրաման տասներկու տարով երիտասարդ էր, թեև, հեռու սկսնակ լինելուց, քայլ նույնապես՝ մելոդրամայի դերասան, որ դեռ չէր մոտեցել Ծերսպիրի կերպարներին: Աղամյանը դեռ Աղամյան չէր դարձել, ինկ Մնակյանը ուսուցիչ էր ճանաչվում շատ պոլսահայ դերասանների, դրանց թվում և Աղամյանի համար: Որպես մելոդրամայի վարպետների, հրանց մեջ էական տարբերություն թերևս չկար:

Մնակյանի փորձը և հմտությունը գալիս էր ոչ միայն նրանից, որ յոթ տարով ավելի շուտ էր քեմական ասպարեզ մտել, այլ, որ կապված լինելով «Օմանյան» խմբի նման հաստատուն թատրոնական կազմակերպության հետ, վերջին ուժ տարում ունեցել էր տևական և անընդմեջ գործունեություն։ Աղամյանը խաղացել էր ընդհատումներով, ճիշտ այնպես, ինչպես գործել էին զուտ ազգային դեմք ունեցող խմբերը։

Ո՞րն էր Մնակյանի փորձն ու հմտությունը։

Մելոդրաման ուներ մի առանձնահատկություն, որը զանց էր առնվում հրա քննադատների կողմից։ Այդ ժանրը ամբողջ XIX դարի ընթացքում ամեն ինչ լինելուց առաջ, դերասանական արվեստի դպրոց էր։ Եթե օրինաչափ է թվում մելոդրամայի գոյությունը դարի առաջին կեսի դերասանների խաղացանկում, ապա տարօրինակ և անսովոր է թվում, որ այդ քամահարված ժանրը վարպետության դպրոց է եղել նաև նորագույն ժամանակների որոշ արվեստագետների համար։ Ֆրանսիական քեմի նշանավոր վարպետ, «Ատելե» թատրոնի հիմնադիր Շառլ Դյուլլենը գրում է, որ քեմական արվեստի գաղտնիքներն ուսումնասիրել է «մելոդրամայի դպրոցում» և իր դերասանական տեխնիկան մշակել է Փարիզի արվարձանային թատրոններում, խաղալով «մելոդրամայի վերջին մոհիկանների» հետ, որոնց նաև անվանում է «քեմահարթակի հրձիգներ»¹։

Մնակյանը պատկանում է անցյալի այն դերասանների թվին, որոնց համար մելոդրաման եղել է վարպետության

¹ Шарль Дюллен, Воспоминания и заметки актера, М., 1958, стр. 35—38.

դպրոց: Այդ վարպետությունը գալիս էր մելոդրամային ժանրի մի քանի առանձնահատկություններից: Դերասանը մելոդրամային դերերում միշտ կանգնած է բեմական դժվար խնդիրների լուծման առաջ, հարկադրված է իմաստավորված լուծումներ, համոզիչ և արդարացնող բեմավիճակներ գտնելու երկդիմի գգացմունքների, դրույլունների ծայրահեղ դրամատիզմի, անակնիկալ հոգեբանական անցումների համար: Այդպիսի դերերից է Մեակյանի Ժերոմը «Լիոնի սուրբանդակ» մելոդրամայում, որի մասին Սաանդարյանը գրել է. «Կան պիեսներ, որոնք բանաստեղծական կետից, դրամատիկական արհեստի կողմից մասնավոր նշանակություն չունին, բայց պարունակում են յորյանց մեջ աշնաբիչ դերեր, որտեղ տաղանդավոր դերասանը կարող է յուր շնորհը, արհեստը ցուց տալ և զարգացնել նորան, օրինակ «Լիոնի սուրբանդակ»: Հենց այդ պատճառով էլ հարկավոր է այդպիսի պիեսների ներկայացումը»¹:

Նախկին բարձրաստիճան ազնվական Ժերոմը պանդոկ է վարձել Փարիզից Լիոն տանող ճանապարհի վրա, մի գյուղում: Փարիզի սպոնսորներից հետո նա ընտրել է գինեվաճառի պարզ կենցաղը, հրաժարվել իր դասակարգից և դարձել սեփական աշխատանքով ապրող «ազնիվ բուրժուա»: Ինչ-որ անհայտ շարագործներ, որ կողոպտել են Լիոնի փոստը, կողոպտում են և պանդոկապան Ժերոմին: Կողոպտիչների պարագույն Դեբյուկը, որտեղից որտեղ

¹ «Մեղոն Հայաստանի», 1880, № 78, 84:

նման է Ժերոմի փարիզաբնակ որդուն՝ Լեյուրկին, և Ժերոմին թվում է, որ իրեն ատրճանակով սպառնացողն իր որդին է: Դերյուակի փոխարեն դատարանին է հանձնվում կատարվածին անտեղյակ Լեյուրկը: Հպարտ և պատվախար-դիր ծերունին վշտացած է, վիրավորված է նրա արիստոկրա-տական արժանապատվությունը: Ինչպես գրում է Սպանդար-յանը, «այդ դերում դերասանը միայն մի տեղ ունի, որ կարող է ցուց տալ յուր դերասանական արժանավորու-թյունը»: Դա հոր և որդու հանդիպման տեսարանն է, դատա-վարությունից հետո: Ժերոմը կախաղան անպատվություն համարելով, ատրճանակը հանձնում է իր կարծեցյալ մեղա-վոր որդուն և ստիպում ինքնասպան լինել:

Այս դերը նախորդ թատերաշրջանում խաղացել էր Զմշկյանը: Սպանդարյանը գրում է, որ «Պ. Զմշկյանը հասկացել էր այդ դերը միևնույն տեսակետից, ինչպես պ. Մնակյանը», բայց հոր և որդու հանդիպման տեսարանում Մնակյանը գերազանցել է Զմշկյանին: Նա ավելի վարպետու-թյամբ է պատկերել տառապող հոր զգացմունքների հակա-մարտությունը: Քննադատն այսպես է նկարագրում Զմշկյանի դերակատարման այդ հատվածը: «Պ. Զմշկյանը այդտեղ ատրճանակը հանձնելուց հետո նայում էր յուր որդուն ան-շարժ դիրքում, գլուխը միայն խոնարհեցնելով կուրծքի վերա՝ զգալով յուր տառապանքը յուր սրտի մեջ»: Լեյուրկը վերցնում է ատրճանակը, բայց չի կամենում ինքնասպան լինել: Հոր և որդու հանդիպման տեսարանն ավարտվում է հետևյալ խոսքերով.

Ժերոմ—Դժբախտ... չես կարողանում: Ինքնակամ չե՞ս
ուզում մեռնել:

Լեպուրկ—Ոչ:

Ժերոմ—Ուրեմն ինչպե՞ս համարձակվեցիր ինձ սպանել:
Դու ինձ խայտառակեցիր: Անիծյալ լինիս,
անիծյալ...

Լեպուրկ—(ծունկի գալով) Հա՞յր իմ...

Ժերոմ—Անիծյալ լինիս, անիծյալ...¹

Վերջին խոսքերի վրա Ժերոմ—Զմշկյանը «արագու-
թյամբ հեռանում է միշի դռնից»²:

Այս նույն տեսարանում բեմական խնդիրն այլ կերպ է
լուծում Մնակյանը: Նա ատրճանակը հանձնում է Լեպուրկին
և ոչ թե սպասում որդու ինքնասպան լինելուն, կանգնում
նրա դիմաց և տառապանք խաղում, այլ հեռանում է նրանից
դեպի բեմի խորքը և սկսում է «սրբել յուր արտասուքը
թաշկինակով»:

Դերասանն այս պարզ գործողությունը կատարում է
զուտ տեխնիկապես, առանց արտաքին, հուզականության:
Հանդիսատեսք չի տեսնում ոչ նրա դեմքը, ոչ էլ արտասուքը,
բայց նիշում է, որ Ժերոմ—Մնակյանը արդարադատ լինելուց
առաջ հայր է: Եվ այստեղ այնքան տրամադրանական է
դերասանի բեմական վարքագիծը, որ նա այլևս կարիք
չունի իրենից արհեստականորեն կիրք դուրս կորզելու,
տրանսի մեջ ընկնելու, արցունքներ հոսեցնելու: Տեսարանի

¹ Մորո, Սիրողեն, Դեղակուր, Լիոնի սուրբանդակ կամ կողոպտված
փոստ, (ԳԱԹ, Թատերական բաժին, ձեռագիր պիեսների ֆոնդ):

² «Մեղու Հպատակի», 1880, № 84:

շարունակությունը Մնակյանը խաղում է դարձյալ հետևելով գգացմունքի տրամաբանությանը: Նա կրճատում է ամբողջ տրամախոսությունը և արտասանում միայն վերջին «անհծյալ լինիս» բառերը: Այստեղ Մնակյանը ոչ թե արագ դուրս է գնում, այլ մի քանի քայլ է անում դեպի կովիսները և մնում անշարժ: Մերդուամային էֆեկտը փոխարինվում է հոգեբանական տեսարանով:

Դերասանական խնդիրն այստեղ թվացածից ավելի բարդ է, և Մնակյանը գտնում է նրա ամենատրամաբանական, գեղարվեստորեն ամենահիմնողից լուծումը՝ հուզական էֆեկտի է հասնում առանց գգացմունքներ խաղալու: Դա նշանակում է, կերպարի ոգու կյանքը տեսանելի դարձնելու համար գտնել հոգեկիճակն առավել ստուգ արտահայտող արտաքին ձև, բեմավիճակ, գործողություն, արարքների տրամաբանությամբ մոտենալ հուզգի աղբյուրին և հանդիսատեսին հաղորդել ոչ թե հուզը, այլ նրա գաղափարը: Սա արդեն ճշմարիտ դրամատիկական-թատերական գործողություն է, որ պատրաստի գգացմունքի փոխարեն ներկայացնում է նրա շարժումը, հաղորդում նրա պատրանքը: Ընդհանրապես, անցյալ դարավերջի հշանավոր դերասաններին հասուն է եղել հուզական էֆեկտի հասնելու այս եղանակը, որը շատ դեպքերում կարող էր լրացնել ներքին հուզականության պակասը: Հուզական էֆեկտի հասնելու հման եղանակը բնորոշ է ոչ թե հուզական տարերքի, այլ ներկայացումի դպրոցի (հատկապես ֆրանսիական) դերասաններին:

Մնակյանը մոտ է կանգնած եղել Աերկապացումի դպրոցին: Ժամանակի թատերական քննադատության փաստերը բերում են այն համոզման, որ նա, երբեմն, ավելի շատ ապավինել է իր տրամաբանությանն ու արտաքին վարպետությանը և ավելի քիչ՝ բռնկմանը և պողոթկումին, արտիստի քմահաճ ու անորսապի տրամադրությանը: Մնակյանի փորձը և հմտությունը, որի մասին հաճախ է հիշում քննադատությունը, հաճախ հանգում էր նրան, որ լավ ուսումնասիրած լինելով մարդկային տարրեր հոգեվիճակների արտաքին արտահայտությունները, ձգտել է այդ ձևով ամեն անգամ վերադառնալ հոգեվիճակի աղբյուրին:

Մելոդրամայի հին վարպետներին հասուկ է եղել նաև արտաքին թատերականության և ծայրահեղ հասուրալիստական ձևերի գուգորդումը: Մնակյանն այստեղ բացառություն չէ:

Այդ կարգի դերակատարումներից է Մնակյանի կոմս Մլուտելը, Էժեն Սյուի «Դուգլաս» պատմական մելոդրամայում: «Այդպիսի շինծու և դժվարամարս դեր հանձն առնուլ որևիցե թատրոնում, հազիվ թե վստահանար որևիցե փորձված դերասան, առանց ի նկատի առնելու, որ նա կարող է կտրվել հանկարծ յուր դերի ամենաաննշան տեսառումներից մեկում և այնուետև... կորավ դերասանի համառումը ժողովրդի աշքում»¹: Սպանդարյանը, հաստատելով այն միտքը, որ «շինծու դերը» պահանջում է հոգեբանորեն առա-

¹ «Մեղու Հայաստանի», 1880, № 76:

վել ճշմարիտ խաղ, գրում է, որ «պարոն Մնակյանը վստահացավ անել այդ և վերջացրեց յուր գործը հաղթությամբ»:

Դիեսի նյութը վերցված է 17-րդ դարի Անգլիայի քաղաքական խոռվության դեպքերից: Կրոմվելի հրամանով Շոտլանդիայի իշխան Դուքլասը բանու է նետվել գլխատվելու համար: Դուքլասի բարեկամ կոմս Մյուտեյը ծպտված, Զոն Վալքեր անվան տակ գնացել է Լոնդոն և մի նամակով խնդրել Կրոմվելին՝ իրեն հանձնել Դուքլասի դահճի պաշտոնը: Նա նպատակ ունի գլխատման ժամանակ ուշացնել կացնի հարվածը և ամրուի մեջ թաքնված իր մարդկանց միջոցով փրկել Դուքլասին: Մյուտեյը ձեռք է բերում դահճի իրավունքը, բայց գլխատելու պահին նրա հյարդերը չեն դիմանում և ուշաթափ վայր է ընկնում: Վրա է համում խկական դահճը և մի հարվածով գլխատում Դուքլասին: Մյուտեյն ուշքի է գալիս, տեսնում է իր բարեկամի գլխատված դիակը, և նրան թվում է, թե ինքն է սպանել: Ահա մի կատարյալ մելոդրամատիկ սիտուացիա, «խաղացվող» վիճակ Մնակյանի համար: Եվ առաջին գործողության վերջում Մյուտեյ-Մնակյանը բեմ է նտնօւմ գունատված ու ցրված հայացքով: Մտնում է և մնում անշարժ, հայացքը մի կետի: Վարագույրն իշնում է հանդիսատեսի ծափերի տակ: «Երևալի եր նորա խաղը և թե միմիկը առաջին գործողության վերջում» —գրել է Սպանդարյանը¹:

¹ «Մեղոն Հայաստանի», 1880, № 77:

Երկրորդ գործողություն: Անցել է տասներկու տարի: Սպանված Դոգլասի որդին՝ Վիլհելմը, փնտրում է իր հոր դահճին: Իսկ Մյուտեյը ցնորված է: Մնակյանը լուր տեսարաններ է խաղում: Առանց մի խոսք արտասանելու, նա ցուց է տալիս, թե ինչպես երբեմն լուսի շող է առկայծում ծերունու մթնած ուղեղում: Այդ պահերին նա լարում է հիշողությունը, մտաքերելու, թե իսկապես ինքն էր Դոգլասին սպանողը: Նա ոչինչ չի հիշում: Մնակյանը խելագար չի խաղում, այլ մի մարդ, որին թվում է, թե կորցրել է հիշողությունը հոգեկան ցնցումից, բայց իրականում հիշելու ոչինչ չունի: Խելագարության տեսարանը նա թողնում է խաղալու չորրորդ գործողությունում, Վիլհելմի հետ հանդիպման տեսարանում: Մյուտեյի և Վիլհելմի (Ադամյան) հանդիպման տեսարանը մելոդրամային լարման բարձրակետն է: Վիլհելմը ցուց է տալիս նրան սպանված Դոգլասի պատկերը: Մնակյանը նայում է նկարին և մի ակնթարթ քարանում: Նա անշարժ դիտում է նկարը և աստիճանաբար նրա այլայլված հայացքը հանդարտվում է, ու մի քանի վայրկյան ուշադիր, հանգիստ և կենտրոնացած զննում է նկարը: Հաջորդ վայրկյանին նրա շրթունքներին ժպիտ է երևում. շրթունքները ծիծաղում են, իսկ աչքերը սարսափ են արտահայտում: Սարսափին հաջորդում է մի ջղապին թուլություն, և դերասանն սկսում է հանդարտ ու անհոգ ծիծաղել: Այս անգամ աչքերն ել են ծիծաղում: Ծիծաղը գնալով ուժեղանում է: Մի պահ, և այդ անհոգ ծիծաղից պողթկում է մի ջղաձիգ, բարձրաձայն բրբիչ: Կարծես սառը ջուր են լցնում հանդիսատեսի գլխին:

«Դրա խելագարվելը կատարյալ հրաշք էր»,—պատմում է Մանդինյանը¹: «Երևելի էր նորա խելագարության տեսարանը Դուգլասի պատկերի առաջ,—գրում է մեկ որիշը: Այդ ծիծաղից արդուս պաղեց երակներիս մեջ... Պ. Մնակյանը սկզբից մինչև վերջ հավատարիմ մնաց յուր բնավորությանը և ցուց տվեց, որ այդպիսի գրան-արժեմեր գեղարվեատ դերասաններ եվրոպացոց բեմերի վրա անգամ քիչ կարող են գտնվիլ»²: «Ծխող և գլխավոր դերը պ. Մնակյանին էր, —գրում է Սպանդարյանը,—որը նա բնական, մտածված և ազդու խաղաց: Անտարակույս պ. Մնակյանը բազմակողմանի տաղանդավոր դերասան է և Զոն-Վալքերը յուր գլխավոր դերերից մենքն է»³:

Մնակյանի բարձր օժտվածությունը, փորձն ու վարպետությունը, ներքին կուլտուրան, հավասարակշիռ բնավորությունը և ընդհանրապես կրթված մարդու հմայքը շրջապատում ատեղծում են առանձնահատուկ ակնածանք և առանձնահատուկ վերաբերմունք նրա հանդեպ: «Մասնաժողովը» Մնակյանի համար ատեղծում է ամենանպատավոր պայմաններ, որ նա կարողանա թարգմանել, բեմադրել և խաղալ ցամկացած պիեսն ու դերը: Այդ շրջանում Մնակյանը մեծ թվով թարգմանություններ է կատարում ֆրանսերենից: Դրանից բեմադրվել են Օֆֆենբախի «Լապտերավառ հարսանիք» օպերետը, Էդմոն Գոնդինի «Գալո, Մինար և

¹ Ա. Մանդինյան, հիշատակարան (ԳԱԹ, Թատերական բաժին):

² «Մելոյ Հայաստանի», 1880, № 76:

³ Նույն տեղում, № 77:

ընկերներ» կոմեդիան, մեկ գործողությամբ վոդկիներ՝ «Մարդս կատարյալ չէ», «Կարմիր տաքատ», «Ծշմարիտ քաջություն», «Յուտ դիեզ կամ տեսոր Տամբերլիկ» և այլն։ Սրանք բոլորը թարգմանված են արևելահայ գրական լեզվով։ Այդ պիեսներում անսպառ հնարավորություններ կան դերասանի արտաքին վարպետության կատարելագործման համար։ Նրանցում որպես կանոն մեկ, կամ ամենաշատը՝ երկու հետաքրքիր կերպար կա, որտեղ օժտված դերասանը կարող է ազատորեն ցուցադրել իր կոմիկական տաղանդը, իմպրովիզացիոն հնարիներով կառավարել ամբողջ ներկայացումը։ Մնակյանի թարգմանություններում ամենից առաջ երեսում են նրա դերասանական-կատարողական հակումներն ու նախասիրությունները, երեսում են նովճիսկ, թե որ դերի և որ տեսարանների համար է նա թարգմանել պիեսը։

Դրանցից է Օֆֆենբախի «Լապտերավառ հարսանիքը», ավելի շուտ կոմիկական օպերա, քան վոդկիլ։ Այստեղ չկան թյուրիմացության վրա սարքված սյուժետային շաբլոն սխեման, առակնելալ դրությունները, բառախաղերը և այլն։ Չափածո խոսքը, երաժշտությունը, պարը, երգը դերասանից պահանջում են թեթև խոսք, արտաքին նկութություն, ոհթմի լավ զգացողություն և ընդհանրապես՝ սկզբից մինչև վերջ ոհթմի վրա կառուցվող խաղ։ Մնակյանը մեծ հետաքրքրություն է առաջացրել, այս ներկայացման մեջ կատարելով գլխավոր հերոսի՝ Գիլոյի դերը։ Ներկայացման հաջորդ օրը թերթում գրվել է. «Դա մեզ համար նորություն էր։ Միայն այնքանը կարող ենք ասել, որ պարոն Մնակյանի բազմա-

կողմանի դերասանական ուժի մասին ոչ միայն չփալվեցինք, այլև գտանք, որ եթե այդ արտիստը կամենա ի սրտե նպաստել հայ թատրոնի գործունեությանը, հրաշքներ կարող է գործել»¹:

Այնուհետև, Մնակյանը շարունակում է դասական պիեսներին և մելոդրամաներին առընթեր հանդես գալ նաև վոդկիլներուն: Իր առաջին բենեֆիսի աղթիվ նա որոշում է ներկայացնել մի ցնցող մելոդրամա և մի ծիծաղաշարժ վոդկիլ՝ «Երկու հիսնապետները» և «Տեսոր Տամբերլիկը»:

Մարշալի և Ռոբերտի դերերից հետո գլխավոր դրամատիկական հերոսի՝ Վիլհելմի դերը Մնակյանի համար նորություն էր: Մնակյանին գրավել է պիեսի մելոդրամատիկ ինտոնացիան, որն առավել ընդգծված է երկրորդ գործողությունում, երբ մահվան դատապարտված Վիլհելմը վերջին անգամ այցելության է գնում իր ընտանիքին: Մելոդրամատիզմն այստեղ իր բարձրակետին է հասնում: «Պ. Մնակյանը այս տեսարանում ամենաազդու տպավորություն գործեց հանդիսականների վրա»—եզրափակում է քննադատը²: Մնակյանն ըստ երևույթին գործի է դրել մելոդրամապի դերասանի իր ամբողջ վարպետությունը: Զգալացունց մելոդրամայից հետո Մնակյանը հանդիսատեսին է ներկայանում որպես բուֆոնադային դերասան: Գրեթե նույն էֆեկտով է նա խաղում «Տեսոր Տամբերլիկ» վոդկիլի գլխավոր հերոսի դերը:

¹ «Մեղու Հայաստանի», 1880, № 83:

² «Մեղու Հայաստանի», 1881, № 5:

Գլուղացի Ժան Բերնիկին ինչ-որ կատակասերենք բռնում են շուկայում, տանում երաժշտասեր մի ընտանիք, Աերկայացնում հոչակալոր տեսոր Տեմբերլիկի փոխարեն և ստիպում երգել Օթելլոյի արիան: Բնական մարդն ընկնում է պայմանական՝ իր էությանը ոչ Աերդաշնակ միջավայր և դառնում իւեղճ կամ ծիծաղելի: Մնակյանն ընտրում է վերջին վիճակը: Կատակասերները տանտիրոջը համոզում են, որ նա ձևանում է, որ մեծ դերասանը պարզապես կատակում է: Իսկ հանդիսատեսն անզուսպ ծիծաղում է Ժան Բերնիկի երգի, պայմանական քաղաքավարությունից ազատ, անբռնագրու, կոշտ ու կոպիտ շարժուձևի, պրոզայիկ դատողությունների ու պատահական բառախաղերի վրա: Այս տիպիկ վոդկիլային տեսարանը Մնակյանը ցուցադրում է նույնքան հավատի, որքան մահապարտի երկդիմի հոգեվիճակը: «Պ. Մնակյանը Ժան Բերնիկի դերում, գրում է քննադատը, — կրկին անգամ ցույց տվեց, որ ինչպես լավ դրամատիկ է, նույնպես և լավ կոմիկ է»¹:

Մնակյանի կոմիկական տաղանդը թեև ձևավորվել էր հիմնականում վոդկիլային խաղացանկի վրա, բայց նա բոլոր կոմեդիաներում չէ, որ վոդկիլային դերասան էր և գիտեր, որ բոլոր կոմեդիաները չի կարելի խաղալ «Տեսոր Տամբերլիկի» եղանակով: Ժան Բերնիկի հումորը խորությունից ու նպատակից գորեկ է, նրա նպատակն ինքը ծիծաղն է՝ ծիծաղ ծիծաղի համար, որպեսզի հանդիսատեսը, մելոդրամայի ցնցումները վերապրելուց հետո, առողջ հյադերով նայի

¹ Նույն տեղում:

իրականությանը: Սա ժամրի առանձնահատկությունն է, որ ժամանակին ստեղծել է խաղի վոդկիլային ոճ: Դասական կոմեդիայի վարպետները եվրոպական և ուսական բեմում եղել են նաև վոդկիլի վարպետներ: Անկասկած, ինչպես նրանց, այնպես էլ Մնակյանի համար վոդկիլն իր տեղն է ունեցել, բարձր կոմեդիան՝ իր տեղը: Մնակյանին, որպես կատակերգակ դերասանի, հասուկ են եղել ազնիվ արտահայտչածները, նուրբ հումորը: Այդպիսի դերակատարներից է նրա Բեկկերը Օգնորիշինի «Ընտանեկան գաղտնիք» կոմեդիայում: Շերտոնի Բեկկերը թյուրիմացության մեջ է. ուզում է ամուսնանալ մի երիտասարդ աղջկա հետ, առանց իմանալու, որ նրա հետ գաղտնի ամուսնացել է իր որդին: Մնակյանն այսուղ հեռու է գրուեսկից: Նրա Բեկկերը ավելի շատ հմայիչ է, քան ծիծաղելի: Մնակյանի համար դա նոյն ազնվական հայրն է, միայն՝ կյանքի ոչ դրամատիկական, այլ կոմիկական հանգամանքներում: «Որքան կոմիզմ և կատարման նորություն կար—աննկարագրելի է»—այս դերակատարման առթիվ գրել է «Մեղու Հայաստանին»¹:

Ժամանակին Մնակյանը շատ է տարվել «Դոն Սեզար դը Բազան» կոմեդիայով: Դոն Սեզարը համաշխարհային դրամատորգիայի ամենահմայիչ կերպարներից մեկն է: Շատ դերասանների է ոգևորել չարի ու անարդարության դեմ կովող աղքատացած ազնվականի և արկածախնդիր ասպետի կերպարը, որի բեմական մարմնավորման ավան-

¹ Նոյն տեղում, № 219:

դությունը, ինչպես և պիեսի մտահղացումն սկսվում են Ֆրեդերիկ Լեմեթրից¹:

Դերը ծայրից ծայր լի է սրախաղությամբ, հնարամիտ արարքներով, սրամիտ դարձվածքներով և ընդհանրապես կենսուրափս, լավատեսական տրամադրությամբ: Սա թերևս կարելի է համարել Մնակյանի արտաքին վարպետության վը-րա կառուցված լավագույն դերերից մեկը: Այստեղ նա ցուց է տվել «մինչև մանրամասն բնական և գեղեցիկ» խաղ²: Դե-րակատարման բոլոր հատվածները մշակվել են իրենց մանրամասներով՝ մի բան, որ ընդհանրապես հատուկ է եղել Մնակյանի ոչ միայն այս դերին:

Մանրամասների մտածված մշակումը Մնակյանի բեմա-կան վարպետության ամենաէական առանձնահատկությունն է: Այդ բանը սկզբից ներ նկատել է Սպանդարյանը: Թիֆլիսի բեմում Մնակյանի առաջին դերակատարումների մասին (Մորիս, Դըլոնե, Սարգան) նա գրել է. «Բացի այն, որ Մնակյանը ճշտությամբ ըմբռնել էր ամեն մեկ դերի իմաստը, նա մանրամասն մշակել էր ամեն մեկ դիրքը, երեսի արտահայտությունը և անգամ բերանից դուրս եկած հընչ-յունը»³: Խաղի պայմանի եղանակը պետք է որ հնարավոր լիներ միայն ներքին հավասարակշռության դեպքում: Մնակ-յանը չիննելով պատահական ներշնչանքի դերասան և բեմում երբեք չկորցնելով ներքին հավասարակշռությունը, լավ

¹Տե՛ս Հ. Յօգրաֆ, Ալեքսանդր Պավլովիչ Լենսկի, Մ., 1955, ստ. 99.

²«Մեղու Հայաստանի», 1880, № 90:

³Նույն տեղում, № 71:

իմանալով, թե ինչը՝ որտեղ, երբ և ինչ չափով, միշտ կարողացել է իր ուժերը հավանարապես տեղաբաշխել ամբողջ Աերկայացման մեջ, նախապես որոշելով Էֆեկտների տեղերը՝ կանխատեսելով, թե դերակատարման որ հատվածներում պետք է ցնցել հանդիսատեսին: Էֆեկտը միշտ եղել է մտածված, երա Աերգործման ուժը՝ չափված ուսուոգված: Մնակյանն իր դերակատարումները չի ծանրաբեռնել Էֆեկտներով, սովորաբար նա ընտրել է երկու, ամենաշատը՝ երեք հատված: Հանդիսատեսը և քննադատը մեծ մասամբ իրենց հետ տարել են այդ հատվածի տպավորությունը: Մնացած տեսարաններում նա ցուց է տվել չափած-ձևած, կանոնավոր, երբեմն ել՝ միապաղաղ ու անկիրք խաղ: Մնակյանի որևէ դերակատարում, եթե չի ունեցել ցնցող տեսարաններ, ապա իր ամբողջության մեջ անպայման եղել է արտիստականորեն մշակված և վայելու:

Ծրջապատին ամենից շատ հիացրել է Մնակյանի փայլուն դերասանական տեխնիկան: Նա կարողացել է ֆիզիոգիական ճգրտությամբ պատկերել մարդկային ոչ սովորական հոգեվիճակները՝ խելագարությունը, հարբածությունը մահը և այլն: Սա այն էր, ինչն առավելություն էր տալիս Մնակյանին՝ Զմշկյանի, Մանդինյանի, Ավալյանի և խմբի ուրիշ դերասանների հանդես: Հենց այս ել նկատի է ունեցել Մանդինյանը, գրելով. «Մնակյանը շատ փորձված ու հմտութեանան է, ինձ նման ճիճուները չեն կարող մրցել երա հետք: Պետք է շատ տարիներ, որ նրան հասնենք»¹:

¹ Ա. Մանդինյան, Հիշատակարան:

Շատ տարիներ անց, եթք Մնակյանը յոթանաւուն անց ծերունի էր և չուներ նախկին եռանդը, բեմում ապավինում էր իր հանելուկային տրյուկներին, որով դեռ կարողանում էր հոգիներ տակն ու վրա անել: Այդ տարիներին քսանամյա Վահրամ Փափազյանը հիացել է նրա անբացատրելի թվացող վարպետությամբ: «Պետք եղած րոպեին նա իր կամքի ոժով և ստեղծագործական գաղտնախորհուրդ միջոցով մահվան դալուկը իշեցնում էր իր դեմքին կամ մահամերձի դժնդակ քրտինքով ճակատը թրջում»—գրում է Փափազյանը¹:

Մնակյանը մեծ չափով հակված է եղել դեպի զգացմունքների հակամարտության և հոգեբանական ծայրահեղությունների վրա կառուցված դերերը: Բնականաբար, մելոդրամայում նա հանգել է կերպարի զգացմունքների ճշգրիտ վերարտադրությանը, տարվել է հոգեվիճակների նուրբ փոխանցումներով, սիրել է հետևողականորեն վերարտադրել տրամադրությունների այն եկածը, որ ապրում է դրամայի հերոսը ամբողջ ներկայացման ընթացքում: Մելոդրամա խաղալու այս վարպետությունը նա զուգակցել է մտածվածության, զուսպ և լակոնիկ արտահայտչածների, հոգեբանական խնդիրների անսպասելի և ինաստավորված լուծումների հետ: Շատերը նույնիսկ այն կարծիքին են եղել, թե Մնակյանը սովորել է Փարիզում և այնտեղ է ուսումնասիրել դրամատիկ արվեստը: «Փարիզի աղքատների» մի ներկայացումից հետո «Կավկազընկի կուրյեր» թերթում գրվել է. «Պիեսը լավ գնաց շնորհիվ

¹ Վ. Փափազյան, Վարպետներ, «Սովորական արվեստ», 1955, № 4, էջ 38:

պարոնայք Ադամյանի և Մնակյանի տաղանդի, որոնք դրականորեն արդարացնում են ֆրանսիական արտիստների դիպումը և դրանում զարմանալու ոչինչ չկա, քանի որ երկուսն էլ դրամատիկ արվեստն ուսումնասիրել են ֆրանսիական թատերական դպրոցներում»¹: Ի՞նչն էր քննադատին բերում այդ համոզման: Հավանաբար՝ կերպավորման միջոցների և արտահայտչածների մշակվածությունը, բեսի օրենքների անսխալ իմացությունը, բարձր ճաշակը, ընդգրծված արտիստականությունը: Մտածե՞լ է արդյոք վերոհիշյալ տողերի հեղինակը, որ Մնակյանին և Ադամյանին երբնէ չեր վիճակիվել Փարիզում լինել, իսկ թատերական դպրոցների մասին նրանք հեռավոր գաղափար ունեին միայն: Բայց այնքան էլ զարմանալի չէ, որ Մնակյանի ու Ադամյանի մասին ժամանակին այդպես են մտածել. Վահրամ Փափազյանը մինչև վերջերս էլ համոզված էր, թե Մնակյանը երիտասարդ տարիներին ականատես է եղել Ֆրեդերիկ Լեմեթրի խաղին, ներշնչվել է նրա արվեստով: Մնակյանը տեսել էր վարպետ դերասանների, մանավանդ 70-ական թվականների վերջում, երբ Պոլիս այցելող թատերախմբերը գերազանցապես ֆրանսիական էին: Այդ տարիներին Ֆրեդերիկն այլև Կենդանի չէր, բայց ֆրանսիական բեմարվեստը շարունակում էր նրա գծած ճանապարհով զարգանալ: Որպես մերդութանայի դերասան, Մնակյանը դաստիարակված էր 70-ական թվականների ֆրանսիական բեմարվեստի սկզբունքներով: Մնակյանը Ֆրեդերիկ Լեմեթրի այն բազմաթիվ հետևողներից մեկն էր, որոնք թատրոնի պատմության մեջ հիշվում են «մելոդրամայի վարպետներ» անունով:

¹ «Кавказский курьер», 1881, № 6.

ՈԵԱԼԻՉՄԻ ՇԱՆՍՊԱՐՀԻՆ

...Կովկասի դրոշմը նվիրագործեց զմեգ
արվեստագետի կնիքով:
Մարտիրոս Մնակյան

Գրականության մեջ հաճախ է հայտնվել այն միտքը, որ պոլսահայ դերասանները Կովկաս են բերել եվրոպացի երկրորդական դերասաններից ընդօրինակված «խաղի կեղծ ձևեր», ընդհանրապես բեմական կատարման ոռմանտիկական ոճ և միայն Կովկասում են դարձել ռեալիստ դերասաններ: Մոտավորապես նույնն են հաստատում իրենք՝ պոլսահայ բեմի վարպետները, և նրանց թվում հենց ինքը՝ Մնակյանը: Մոտեցումն սկզբունքորեն ճիշտ է: Ռեալիստական դրամատորգիան, որ սկզբից նեթ տիրապետող էր կովկասահայ թատրոնում, չէր կարող էական դեր չունենալ այստեղ: Բայց չպետք է բացարձակացնել այս տեսակետը և արևմտահայ դերասաններին կապել միայն ու միայն ոռմանտիկական խաղառնի հետ և նրանց արվեստի գնահատման համար շփնտրել ուրիշ մեկնամկետ:

Պոլսահայ դերասանների խաղի ոճը 70-ական թվականներին, այն չէր ինչ 60-ական թվականներին, Զմշկյանը, որ ծաղրով էր նկարագրում Ֆասոլյանյանի հնատն խաղակերպը, բարձր կարծիքի էր 80-ական թվականներին Թիֆլիս այցելած պոլսահայ դերասանների մասին: Հատ Զմշկյանի, նրանց արվեստն իրենց ներկայացրել է «կլասիկականի» և «ռեալականի» սինթեզը¹: Ընդ որում, Զմշկյանի ասած կլասիկականը մեր հասկացած ռոմանտիկականն է: Զմշկյանի հոդվածները հիմք են տալիս հաստատելու, որ Մնակյանը և նրա պոլսահայ խաղակիցները սկզբից նեթ նկատելիորեն հակված են եղել դեպի եվրոպական նորագույն ոճերը: Մնակյանի խաղի մասին եղած մեզ արդեն հայտնի գնահատումները ցուց են տալիս, որ մնալոդրամային դերերում նա ավելի շատ հակված է դեպի ռեալիստական, քան ռոմանտիկական խաղանք: Չի բացափում այն, որ այդ ռեալիզմն ունեցել է ուժեղ արտահայտված ռոմանտիկական գունավորում: Այնուամենայնիվ դա բեմական նոր ոճ էր, շատ տարբեր 60-ական թվականների ոճից: Դիմենք մի հետաքրքիր և բնորոշ փաստի: 1880—81 թատերաշրջանի վերջում Թիֆլիս է մեկնում նաև պոլսահայ բեմի հին վարպետներից մեկը՝ Ստեփան Էքչյանը, որի անունը 60-ական թվականների թերթերում տեսնում ենք Արույակ Փափազյանի անվան կողքին, մի դերասան, որն այդ տարիներին շատ ավելի բարձր է գնահատվել, քան Մնակյանը: Էքչյանը Թիֆլիս է ժամանում շատ մեծ ակնկալություններով՝ Ադամյանին ու Մնակյանին ներմաց-

¹ «Մեղու Հայաստանի», 1881, № 228:

Անդու և բոլորին ցույց տալու, «թե ինքն է միակ դերասանը և արտիստը»¹: Նա իրավունք ուներ այդպես կարծելու, քանի որ ժամանակին միայն դրվագանք էր լսել ու կարդացել իր խաղի մասին:

Թիֆլիսում Էքչյանը պատրաստվում է հանդես գալու ժամանակին շատ տարածված «Սեն-Տրուպեզի տիկինը» մելոդրամայում (Անիսէ Բուրժուա և դ'Էնների): Մուսական թերթերից մեկը հանդիսավորությամբ տպագրում է նրա հայտարարությունը: Հանդիսատեսը, որ Պոլսից եկածների մեջ միշտ էլ հետաքրքիր և նոր արտիստական անհատականություններ էր տեսել, անհամբերությամբ սպասում է Էքչյանի ելույթին: Բայց տեսնենք, թե Ադամյանով և Մնակյանով հիացած Մանդինյանն ինչ կարծիք ունի Էքչյանի մասին: «Էքչյանը հին շկոլայի դերասան է, ողբերգություններ խաղացող, ձայնը անախորժ և դեմքը սակավ գրավիչ, բեմի վրա կանգնել չգիտեն, մասն գալ՝ նույնպես, անդադար կանգներ է անում և սարսափելի ձայններ հանում, Վարդան ու Արշակներ է ներկայացնում հին դայդի, թեպետ և սպոնի ձևեր էլ է անում, մեկ խոսքով հին ձևերը նորի հետ խառնված են երևում... Դերասանության նշույլ անգամ չեմ նկատում նրա մեջ. ոչ ձայն, ոչ շարժ ու ձևեր, ոչ հնմտություն ունի բեմի համար»²: (Ընդգծումները մերն են—Հ. Հ.):

Ներկայացման ժամանակ հանդիսատեսը որոտընդուս ծափերով է դիմավորում Էքչյանի առաջին մուտքը: «Մատ-

¹ Ա. Մանդինյան, Հիշատակարան:

² Նոյն տեղում:



Մանկանը Ժորժ Շյուվալի դերում
(Ա. Դյումա-որդի՝ «Բամելազարդ կինը», 1881 թ)



րոնը դղրդաց, ծափանարություններին վերջ չկար,—պատմում է Մանդինյանը:—Էքչյանը չկարծեմ որ կյանքում տեսած լինի այսպիսի ընդունելություն: Աղամյանը և Մնակյանը բարկությունից պոռշներն էին կրծոտում: Բայց «Էքչյանը երկու երեք խոսքից ցուց տվեց, թե «какого поля ягодко»,—շարունակում է նա: Եվ դա Մանդինյանի անձնական կարծիքը չէր միայն: Այդ մասին գրեց նաև «Մեղու Հայաստանին»¹:

Էքչյանն իհարկե զորկ չէր տաղանդից: Նրա ոճն էր հին: Իսկ այդ տարիներին արևելանայ թատրոնում դերասանի արվեստը գեահատվում էր ամենից առաջ ոճի տեսակետից: Մանդինյանը նրան «անտաղանդ» որակելով, չի մոռանում հիշեցնել նրա հնատն լինելու մասին: Իսկ 60-ական թվականներին Զմշկյանի կողմից այնքան խստրեն քննադատված ֆատովաճյանն ասել էր. «Պարծանքով կրնամ ըսել, որ Էքչյանին հետևողն եմ»²: Էքչյանը թեև տաղանդավոր, բայց հին, արդեն մերժելի դարձած ոճի դերասան էր և այդպիսին էլ մնացել էր, իսկ Մնակյանն անհամեմատ բարձրացել էր նրանից՝ դարձել նոր ոճի դերասան: Թե նա, թե Աղամյանը ոչ միայն նոր էին իրենց ավագ արվեստակցի համեմատ, այլև բավական մոտ Զմշկյանի և Մանդինյանի հասկացած ուսալիզմին: Պատահական չի եղել, որ Մնակյանը մելոդրամային խաղացանկի կողքին նույն հաջողությամբ հանդես է եկել դասական պիեսներում և ժամանակակից ֆրանսիական հեղինակների, այսպես անվանված, «սալոնային պիեսնե-

¹ «Մեղու Հայաստանի», 1881, № 93:

² Գ. Զմշկյան, Խմ հիշատակարանը, էջ 40:

րում»: Մանդինյանը գովեստով է խոսում նրա այնպիսի դերերի մասին, ինչպիսիք են Մոնտիգլենը (Դյումա-որդի «Ալֆոնս»), Ժորժ Դյուկալը («Քամելազարդ կինը»), Ռենարը և դ'Ալերոնը («Կանանց շոգեկառքը»): Մամուլում ընդհանրապես բարձր են գնահատվել Մնակյանի Դյումա-որդու, Օկտավ Ֆելքեի, Էմիլ Ժիրարդենի դրամաներում կատարած դերերը:

Այս պիեսների գգալի մասը Արգար Հովհաննիպյանի թարգմանություններն են: Ի հակակշիռ կոպիտ մելոդրամաների, Հովհաննիպյանը մատնացուց էր անում եվրոպական բներում տարածված ֆրանսիական խաղացանի լավագույն և մոնշները: Դրանք ևս ազատ չեն մելոդրամայի տարրերից և սենտիմենտալ-քաղքենիական բարոյախոսությունից, բայց այստեղ չկան անտրամաքանական պատահականություններ, չնախատեսված հոգեբանական անցումներ, դրությունների կոնտրաստներ, թունավորում կամ սպանություն: Դրանք մելոդրամաներ չեն ձևական և ժանրային առանձնահատկություններով, այլ ուղղիստական դրամաներ բարոյախոսական միտումով և սենտիմենտալ գունավորմամբ: Այստեղ սենտիմենտալ պաճուճանը պիեսի ներքին, հոգեբանական բովանդակության սույն դրսուրման ձևն է, իսկ պիեսի հիմքում տեսնում ենք մարդկային ավելի բնական փոխհարաբերություններ, քան մելոդրամայում: Որպես հոգեբանական դրամաներ նրանք պահանջում են բեմական կատարման ավելի հորիզոնական ուղղություն: Եվ Մնակյանն այստեղ հիմնականում գնացել է հոգեբանական զննումների ճանապարհով, որոնելով նրանցում իմաստավորված լուրջուններ,

իին նույնապես երիտասարդ չէ, ինչպես Սարգանը և դարձյալ անհամակրելի է: Բայց Մնակյանը նրան բուրժուայի կերպարանքով չի պատկերել: Նորվադի-Մնակյանը սպոնսային արկածախնդիր է, Զնշկյանի բնորոշմամբ «աճառակ, կրքամոլ և դուելիստ արիստոկրատ»¹:

Թվուն է թե աս կարող էր հիշեցնել Մնակյանի մյուս կերպարը՝ Ալվարեցը (Եմիլ դ'Ժիրարդեն՝ «Մի կնոջ տանշանք»): Բայց այստեղ նրա կերպավորումն առավել տարրեր է և ինքնորույն: Ընդ որում, այս պիեսը, որպես հոգեբանական դրամա, լավագույնը կարելի է համարել 80-ական թվականների խաղացանկում: Գլխավոր գործող անձինք ընդամենը չորսն են: Սյուժեն պարզ է: Մաթիլդայի ամուսինը՝ Անրի Դյումոնը, չգիտե, որ իրենց դստեր Ժաննայի իսկական հայրն ինքը չէ, այլ իր տան բարեկամ Ալվարեցը: Մաթիլդայի և Ալվարեցի սիրո պատմությունը հին է և ամեն վայրկյան կարող է նորոգվել, բայց երկուսն ել ուզում են մոռանալ անցածը: Պիեսի ֆինալը դրամատիկ է, բայց ոչ զգայացունց: Հեղինակն անլուծելի է թողնում բոլոր հարցերը և իր հերոսներից ոչ մեկին արհեատականորեն չի երշանկացնում: Պիեսի հերոսները բոլորն ել մենակ են մնում: Ժաննան կորցնում է իր կարծեցյալ հորը, Դյումոնը՝ Մաթիլդային, Ալվարեցը՝ նույնապես:

Մնակյանի Ալվարեցի մասին եղած երկու տարրեր կարծիքներն ել հաստատում են, որ դա եղել է նրա ամենահետաքրքիր կերպարներից մեկը: «Պ. Մնակյանի դերը

¹ Նույն տեղում, № 228:

ոչինչ էր և թե իր քնավորությամբ անհամակրելի, բայց և այնպես Պ. Մնակյանի Ալվարեցը չկորավ։ Նա ներկայացրեց մի հաստատ և որոշ տիպ։ Ուշադրության արժանի է այն երևույթը, որ Պ. Մնակյանը համեմատաբար աննշան դերում յուր դիմացի զորեղ իշխող դերում խաղացողի մոտ չի կորչում, ինչպես ապացուցեց այս ներկայացման ժամանակ, նոյնպես և «Հյուսի Դիդիեի» Սարգան ռերում։ Այս նշանակում է, որ նա արհեստով դերասան է, որ նա բեմական արհեստը լավ հասկանում է և տաղանդ ունի»¹։

Ինչպիսի՞ն է այստեղ Մնակյանի ներկայացրած «հաստատ և որոշ տիպը»։ Մյուս քննադատի կարծիքով Մնակյանը, թեև լավ է խաղացել, բայց սխալ է հասկացել կերպարը։ Նրա Ալվարեցը հեռու է եղել անառակ և գալքակղիչ լինելուց։ Բայց այստեղ քննադատն է սխալվել, ոչ թե դերասանը։ Ալվարեցը ոչ Սարգանի նման «հարուստ բանկիր» կարող էր լինել, ոչ ել Նորվադիի նման «դուելիստ արիստոկրատ»։ Հեղինակն իր հերոսների արարքների համար արդարացումներ է որոնում, առանց մեկն ու մեկին դատապարտելու։ Չմշկյանը գրում է, որ դիտելով այդ ներկայացումը «մարդը մտածում է, քննում մեկի կամ մյուսի վարմունքը և ափսոսում է միայն մարդկության թուլության վրա»²։

Ալվարեցը ևս Սարգանի և Նորվադիի նման իր սիրած կնոջ ամուսնուն փրկել է սնանկացումից։ Բայց դա երկրորդական հանգամանք է դերասանի համար։ Մնակյանի Ալվարեցը

¹ «Մեղու Հայաստանի», 1880, № 90:

² Նոյն տեղում, 1881, № 252:

գայթակղիչ և անառակ չէ, այլ մի մարդ, որ ամբողջ կյանքում
միայն սրտով է կառավարվել: Դերասանը ոչ մի չափով չի
դատապարտում նրան: Դա ընդգծում է հատկապես ներկա-
յացման վերջին տեսարանում: Անրի-Մուանյանը հուսահատ,
նախատինքներ է թափում Մարիլայի և Ալվարեցի գլխին: Ալվարեց-Մնակյանը ամբողջ տեսարանի ընթացքում մեկ
երկու բառ ունի: Մնացած ժամանակ նա լուր է: Հեղինակի
ուսմարկում ասված է, որ նա վերջում «հուսահատ դուրս է
գնում սենյակից»: Մինչդեռ Մնակյանը մնում է բեմուն
մինչև վարագույրի ընկնելը: Այնքան արտահայտիչ է եղայ
այս տեսարանում Մնակյանի լուրջունը, որ նրա մեկնաբա-
նությունը չընդունող քննադատը գրել է. «այնուամենայնին
երրորդ արարվածի վերջում յուր մնջիկ խաղով դարձալ
ապացուեց, որ ոչ թե դերասանն է դերի համար, այլ դերը
դերասանի համար»¹:

Մնակյանի դերակատարումներն ամեն անգամ եղել են
նրա սեփական մտահացումները: Բոլոր դեպքերում էլ նա
ստեղծել է հանդիսատեսի ու քննադատի համար անպայման
անձանոթ բեմական կերպարներ: Այս տեսակետից է գնա-
հատվել նաև Մնակյանի կոմս Կարինոլին (Օկտավ Ֆելլե՝
«Դալիլա»): «Պարոն Մնակյանը այն չներկայացրեց, ինչ որ
նեղինակի ստեղծած անձնավորությունն էր, նա արակ այն,
ինչ կարող էր անել մեկ հմուտ դերասան, լավ խաղաց և...
ստիպեց համոզվել, որ նա կարող էր մեզ առավել որոշ տիպ
ցուց տալ»²:

¹ «Մեղու Հայաստանի», 1880, № 87:

² Նոյն տեղում, № 79:

«Մեղու Հպատակի» թատերախոսներն ավելի են տարվել Մնակյանի մելոդրամային կերպարներով: Մելոդրամայի վարպետ լինելով հանդերձ, Մնակյանը, թերևս պակաս ուժեղ, բայց առավել ռեալիստ է հոգեքանական դրամաներում: «Մտածված խաղ», «քնական և ազդու խաղ», «քնական և մտածված խաղ». այս և նման արտահայտություններով են գնահատվել նրա շատ դերակատարումներ: Սրանք պատահականորեն ասված խոսքեր չեն: Նույնիսկ Գրիգոր Աճրունու նման դժվարահաճ քննադատը, որ ոչինչ չէր ուզում ընդունել բացի ռեալիզմից, գալիս է այն համոզման, որ «Մնակյանը ճշմարիտ դերասան է դառնում, խաղը խելացի է և մտածված, դիկցիան պարզ է և հասկանալի»¹: Այս բանը նա խոստովանում է «Քամելազարդ կինը» դրամայի բեմադրության առիթով:

Դիեսն առաջին անգամ խողացվում է 1880-ի դեկտեմբերի 4-ին: Մնակյանը, որ Պոլսում Արման Դյուվալի ամենալավ դերակատարն էր համարվում, այս անգամ հանդես է գալիս Ժորժ Դյուվալի դերով: Արման խաղում է Ադամյանը, Մարգարիտ Գոթյե՛ Աստղիկը: Հայ Մանդինյանի, այս եղյակին մեծ ջերմությամբ է ընդունել հանդիսատեսը: - Ներկայացնումը կրկնվել է և հաջորդ՝ 1881—82 թատերաշրջանի սկզբում, Ազնիվ Հրաչյափ մասնակցությամբ: Արծրունու տպավորությունն էլ այս ներկայացնումից դրական է, թեև նա պիեսն անվանում է ոռմանտիկական և հավասարապես անընդունելի գգայացունց մելոդրամաների հետ միասին: «Ռոմանտիկական պիեսներում

¹ «Մշակ», 1881, № 168:

խոր ազդեցություն են գործում միայն կարգից դուրս տաղան-
 դավոր արտիստները, իսկ հասարակ մահկանացուներն ան-
 զոր են հաղթել անքնականությունը», — գրում է Արծրունին¹,
 իսկ նրա հաջորդ տողերից երևում է, որ Մնակյանը և Աղամ-
 յանը կարողացել են հաղթահարել «ոռմանտիկական պիեսա-
 յի» «անքնականությունը»: Իսկ «դիկցիա» ասելով նա հաս-
 կացել է դերակատարման խոսքային մասը, ոչ թե միայն
 դերասանի արտասանությունը, ինչպես հասկանում ենք
 այսօր: Արծրունին ակնարկում է Մնակյանի խոսքի արտա-
 հայտչականության և բարեհնչունության մասին: Արծրունին
 Մնակյանի դերակատարման թերությունն է համարում այն,
 որ Մարգարիտի հետ հանդիպման տեսարանում «իր երկար
 մոնողգով նա գրավում է իր վրա հասարակության ամբողջ
 ուշադրությունը և այդ ժամանակ Հրաչյային հանդիսականը
 մոռանում է, այլև նրա վրա չի նայում»²: Նա օրինակ է
 բերում ուս դերասաններ Շերնովի և Նեմիրովա-Ռալֆի
 կատարումը, գտնելով, որ այդ տեսարանում հանդիսատեսի
 ուշադրության կենտրոնում պետք է լինի Մարգարիտը և ոչ
 թե Դյուվալ-Բայը: Իհարկե պարտադիր չէ, որ պիեսի հերո-
 սուին բոլոր տեսարաններում ներկայացման կենտրոնում
 լինի, առավել ևս այն դեպքում, եթե Ժորժ Դյուվալի դերակա-
 տարի համար դա միակ տեսարանն է: Եվ այստեղ էլ կեր-
 պարը երկրորդական չէ: Իսկ մենախոսությունը պիեսի
 կարևոր հատվածներից մեկն է պիեսի հոգեբանական լուծ-
 ման համար: Կերպարն ամբողջովին այդ մենախոսության

¹ «Մշակ», 1881, № 168:

² Նույն տեղում:

մեջ է ամփոփված. այստեղ է երևում Ժորժ Դյուվալի հայրական վիշտը, բուրժուայի արժանապատվությունն ու աշխարհիկ նախապաշտպատվածությունը։ Այդ մենախոտությամբ է իմաստավորվում Արմանի և Մարգարիտ Գոթիկի դրաման։

Արծրունին իրավացի էր, երբ նկատել էր տաղիս Մնակյանի ռեալիստ դերասան դառնալը։ Բայց Մնակյանն այդ ապացուցել էր ավելի վաղ։

Աչքի անցկացնելով Մնակյանի թիֆլիսյան խաղացանկը, կարելի է նկատել, որ 1881—82 թատերաշրջանում նա ընդամենը մի քանի մերդամա է խաղացել։ Թատրոնի խաղացանկի աստիճանական փոփոխության համեմատ փոխվել է և Մնակյանի դերասանական կերպարը։ Մեկ տարվա ընթացքում նա կատարել է մի հսկայական քայլ Դյումայից և Հյուգոյից մինչև Գրիբոյեդով, Գոգոլ, Սունդոկյան, Շեքսպիր։ Մնակյանի այցելությունը Թիֆլիս, համընկնում էր «Մասնաժողովի» երկրորդ թատերական տարվան, երբ այդ շրջադարձի համար արդեն բավական քան էր արվել։ Մելոդրամաների հետ միասին խաղացանկ էին մտնում Շեքսպիրը և Շիլերը։ Այս իմաստով նշանակալից երևույթ էր Շեքսպիրի «Անսանձի սանձահարումը» կոմեդիայի բեմադրությունը 1880 թվականի հոկտեմբերին¹։ Վարդովյանի բեմադրած «Մակրեթից» (1867) հետո դա երկրորդ ամբողջական ներկայացումն էր, որով հայ բեմ էր մտնում Շեքսպիրի դրամատորգիան։ Վարդովյանի Մակրեթից և Զմշկյանի Շելլոկից ու Օթելլոյից հետո հայ բեմում շեքսպիր-

¹ «Մեղու Հայաստանի», 1880, № 77:

յան որևէ նոր կերպար չեր երևացել: Այդ նորը եղավ Մնակյանի Պետրուչիոն:

Դոն Սեգարի և Արման Դյուվալի փայլուն դերակատարը չեր կարող վատ Պետրուչիոն լինել: Բայց Մնակյանը նոր էր ծանօթանում կերպարի հետ: «Գալով Պետրուչիոյի դերին, —գրում էր քննադատներից մեկը, —մենք շատ բան չունենք սեկլու, այսքան միայն նկատեցինք, որ Պ. Մնակյանը այս անգամ ևս ցուց տվեց յուրիշն հմուտ և խղճմտանքով դերասան»¹: Հնարավոր է, որ այս Պետրուչիոն ունենար պակասություններ, բայց ինչպես հաստատում է Սպանդարյանի կարծիքը, Մնակյանի դերակատարման մեջ արդեն առկա է եղել կերպարի ճիշտ ըմբռնումն ու մեկնությունը: Սպանդարյանը գրում է, որ ամբողջ ներկայացման ընթացքում բեմում իշխում էին երկու հոգի՝ Աստղիկի Կատարինան և Մնակյանի Պետրուչիոն: Վերջինս «կատարյալ յուր դերումն էր, կամակոր կինը զապելու խիստ ընդունակ»²: Կերպարի այսպիսի նկարագիրը մեզ ճիշտ է երևում այնքանով, որ Պետրուչիոն առնականության ու կամքի մարմնացում է, շոշապատի վրա իշխող, դիմացինին իրեն ենթարկող ուժեղ բնավորություն, որ փնտրում է իր նմանին: Մնակյանի Պետրուչիոն հիմքում մոտ է եղել շեքսափիլյան կերպարի ոգուն: Հատ Սպանդարյանի, ներկայացման երրորդ գործողության ավարտը եղել է ամենահետաքրքիր հատվածներից մեկը, երբ Պետրուչիոն, իբր պաշտպանելով Կատարինային,

¹ «Մեղու Հայաստանի», 1880, № 79:

² Նույն տեղում, № 77:

կովում է երևակալական ավազակների խմբի հետ: Շեքսափիրի պիեսում այսպիսի տեսարան չկա, դա ավելացրել է Մնակյանը: Կենառութան, առնական և ասպետորեն հպարտ Պետրուչիոն հայտնվում է ցեցոտիների մեջ, ժամանուած սուրբ գոտուց կախ և ձեռքին ձիու մտրակը: «Ինձ հետ է պաակվում, ոչ թե հագուստիս»,—ասում է նա, պատրաստվելով Կատարինայի հետ հանդիսավոր երթով մեկնելու իր դղյակը: Հանդիսավոր երթը սկսվելու պահին նա ցուց է տաղիս, թե իբր ավազակները շրջապատել են իրենց և ուզում են հափշտակել իր սիրեցյալին:

Վայ կտամ նրան ով համարձակվի
Փակել իմ ճամփան: Գրումիո սուրդ առ,
Մենք պաշարված ենք ավազակներով:

Պետրուչիո-Մնակյանը վեր է առնում իր ժամանուած սուրբ և սկսում մենամարտել կարծեցյալ ավազակների հետ, գոչելով.

Փրկիր սիրուիոդ թե տղամարդ ես,
Մի վախենա Կատ, գեթ համարձակվեն,
Քեզ կպաշտպանեմ միլիոն մարդու պես¹:

Ինչպես էլ, որ խաղացված լինի Մնակյանի Պետրուչիոն, այն ունեցել է իր պատմական դերը: Ինչպես իրավացիորեն

¹ Հատվածը թերված է Խ. Դաշտենցի թարգմանությամբ (Վ. Շեքսափիր, Ընտիր երկեր, հ.2, Երևան, 1953, էջ 104): 1880 թվականի թարգմանությունը չի պահպանվել:

գտնում է Ռ. Զարյանը, Վարդովյանի Մակրեթը, Չմշկյանի Շելլոկը և Օթելոն, Մնակյանի Պետրոչյոն «միասին առած շեքսպիրյան դրամատուրգիայի բեմական տրադիցիաների հայտապատմություն»՝ ևս հայ թատրոնում¹: Մնակյանի Պետրոչյոն հայ թատրոնի պատմության մեջ առաջին քայլերից մեկն էր Շեքսպիրի դրամատուրգիան յուրացնելու ճանապարհին: Հաջորդ քայլն անհամեմատ մեծ եղավ: Դա Աղամյանի Համլետն էր:

Այս նշանավոր ներկայացման մեջ Մնակյանը հանդես է գալիս Կլավդիոսի դերով: Պոլոնիոսի դերակատար Մանդինյանը դժգոհ է եղել դերաբաշխությոց, լինելով այն կարծիքին, որ Մնակյանը կարող էր ամենալավ Պոլոնիոսը լինել: Պատմածից երևում է, որ Մնակյանը որոշ տեսարան-ներում փորձել է Կլավդիոսի դերին կատակերգական երանգ տալ: Նոյնը նա արել է Հենրի 8-րդի դերում («Կատրին Հովարդ»): Մնակյանի այդ հակումը շատերն անվանել են «մասհարություն»: Բայց Մնակյանը սովորաբար մտածված ձևով է մշակել իր դերակատարումները: Կլավդիոսի և Հենրի 8-ի կերպարները թեև միմյանցից շատ են տարբեր, բայց ունեն մի ընդհանուր գիծ՝ երկուսն ել թագավոր են, երկուսն ել՝ մարդապան, բռնատիրող: Հենրի 8-րդի արարքները այնքան շինծու են և գեղարվեստորեն շպատճառաբանված, որ կերպարին պարողիկ մեկնաբանություն տալով, կարելի էր այդ դերից դուրս բերել ոչ թե բռնակալ թագավոր, այլ նրա ծաղրանկարը: Կլավդիոսն այդպիսին չէ: Այնուամենայ-

¹ Ռ. Զարյան, Աղամյան (կյանքը), էջ 150:

Աիվ, Մնակյանն այս դերում չի ներկայացրել խոշոր բռնակալի և խոշոր չարագործի: Կարելի է համաձայնել Մնակյանի հետ, եթե ընդունենք, որ Համլետը Կլավդիոսին սպանելով ոչ թե «իր շավից դուրս սպառքած» ժամանակն է ուղղում, այլ ոչնչացնում է մի նենգ ու փոքրոգի մարդասպանի, որ պահարանց է գողացել արքայական թագը: Մակրեթի կամ Ռիչարդ 3-րդի կողքին Կլավդիոսը փոքր ահճատ է, և եթե Մակրեթի ու Ռիչարդի մահը ողբերգական է, ապա Կլավդիոսի մահվանը գրեթե նշանակություն է չի տրվում: Կլավդիոսի թեման, համենայն դեպս, ողբերգական չէ, և Մնակյանը մահվան տեսարանում նույնիսկ ծիծառ է հարուցել՝ մի բան, որ ներդաշնակ չէր ներկայացման ընդհանուր ոճին: Եվ այդ բանն արվել է մտածված: Այստեղ արդեն առկա է Կլավդիոսի կերպավորման յուրօրինակությունը:

«Համլետի» բեմադրության մեջ ինչպես Մնակյանի Կլավդիոսը այնպես էլ մյուս դերակատարումները քիչ ուշադրություն են գրավել: Ադամյանի Համլետը այնպիսի իրադարձություն էր, որ Մնակյանի հետ միասին Սիրանուշի Օֆելիան, Ե. Գարագաշյանի Գերտրուդը, Մանդինյանի Պոլոնիոսը դիտվել են որպես «օժանդակ» կերպարներ, թեև առանձին-առանձին դրանք բոլորն ել զերծ չեն հետաքրքրությունից: Ըստ Մանդինյանի, Մնակյանի Կլավդիոսը ներկայացման մեջ եղել է ուշադրության արժանի դերակատարումներից մեկը:

Այս նույն շրջանում բեմադրվել է նաև Շիլերի «Ավագակները»: Ներկայացումն ընդհանուր առմամբ բարձր չի

գնահատվել, իսկ Մնակյանի Կարլի և Աղամյանի Ֆրանցի
մասին եղած կարծիքները հակասական են: Սպանդարյանը
երկուսի դերակատարման մեջ էլ նկատել է ուժեղ և թույլ
տեղեր: Հատ հրա, Մնակյանն «իբրև լավ դերասան այդ
դժվար և ծանր դերում տեղ-տեղ լավ էր»¹: Ուրեմն՝ դերակա-
տարումն ամբողջության մեջ եղել է պակասավոր: Մյուս
քննադատի կարծիքով, Մնակյանը ճիշտ է ըմբռնել «դերի
իմաստը», բայց խաղացել է սառը և պատկերել է միագույն
ներկված վերացական հերոս²: Դերասանն աղատեղ չի կարո-
ղացել հաղթահարել ոռմանտիկ հերոսի միակերպ, ուղղագիծ
նկարագիրը: Մնակյանի համար նորություն չէր ազնիվ
ավագակի և խոռվարարի կերպարը, բայց ներուականու-
թյունը և ոռմանտիկ շունչը, որ հատուկ էին Մնակյանի վաղ
շրջանի դերակատարումներին, այժմ՝ բոլորովին որիշ
դրսւորում էին պահանջում: Ոռմանտիկ պայտոսի փոխարեն
այժմ ավելի շատ հարկավոր էր զուապ հուզականություն:
Բայց այդ զուապ հուզականությունը, որից նա անկաշկանդ
կերպով օգտվում էր մելոդրամա խաղալիս, չկարողացավ
համատեղել այն թեմայի հետ, որ նրա տարերքն էր 60-ական
թվականներին: Մնակյանը Կարլ Մոռի դերում փորձում էր
կրկնել իր նախկին թեման, բայց ոչ նախկին հավատով:
Տեր կարելի կրկնել 60-ական թվականների ոռմանտիկ-նե-
րուական ոճը, բայց Մնակյանը չգտավ նաև միջինը. նա

¹ «Մեղու Հայաստանի», 1880, № 88:

² Նույն տեղում, № 85:

սկսել էր թեքվել դեպի դասական կոմեդիան և վերացական հերոսի կերպարը այլևս շատ բան չէր ասում նրան:

1880 թվականի դեկտեմբերին բեմադրվում է Օստրովսկու «Արդյունավոր պաշտոնը»: Ռուսական մամուլում գրվեց, որ պոլսահայ դերասաններ Սիրանուշի, Աստղիկի, Գարագաշյանների, Ադամյանի և Մնակյանի ստեղծած կերպարները եթե տիպիկ ռուսական չեն եղել, ապա համենայն դեպս հաջողված են եղել¹: Վիշնևսկու դերն առաջինն էր, որով Մնակյանը ծանոթանում էր ոուս դասական դրամատուրգիային: Այս ներկայացումից մի քանի շաբաթ հետո Մնակյանը հանդես եկավ Գրիբոյեդովի «Խելքից պատուհասում» Ֆամուսովի դերով:

Մնակյանի Ֆամուսովը ամենասպասելի երևոյթ-ներից մեկն էր նրա ստեղծագործական կյանքում: Այս դերակատարման հաջողությունը մասամբ նախապատրաստված էր. սպոնային արիատոկրատի մաներները, տարեց մարդու ծանրաբարու նկարագիրը, խրատաբանության մեջ շուայ, իրեն գնահատող և իր արժանապատվությունն ընդգծող մարդու կերպարը Մնակյանին ծանոթ էր դեռևս մելոդրամաներից: Պարզվում էր, որ բարոյախոս «ազնվական հայրերից» մինչև Ֆամուսով Մնակյանի համար մի քանի քայլ էր միայն: Եվ Ֆամուսովի դերում Մնակյանը դրսեվորվեց իր տաղանդի ամբողջ ուժով, իր դերասանական կերպարի ամենաբնորոշ կողմերով: Բայց նա ոչ միայն

¹ «Կավказ», 1880, № 347.

անձանոթ էր ոռոսական իրականությանը, ոռոս գրականությանը և Գրիբոյեդովին, այլև չէր տեսել Ֆամուսովի ոչ մի դերակատարի, թեկուո՞ւ երկրորդական: Այս բոլոր դժվարությունները Մնակյանը կարողացավ հաղթահարել տաղանդավոր դերասանի ներքնատեսությամբ:

1881 թվականի հունվարի 8-ի «Խելքից պատուհասի» բեմադրությունը լայն արձագանք գտավ Թիֆլիսի հայկական և ոռոսական մամուլում: Թատերախոսականներում ընդգծվում էր հատկապես այն, որ պիեսը լավ էր ուսումնասիրված և ճիշտ հասկացված իր բեմական մեկնաբանության մեջ: Բարձր էին գնահատվում Սիրանուշի Սոֆիան, Վ. Գարագաշյանի Լիզան, Մանդինյանի Ռեպետիլովը և հատկապես Աղամյանի Չացլին ու Մնակյանի Ֆամուսովը: «Կարելի է իսկական հաճուքով հետևել նրանց խաղին չիմանալով անգամ հայերեն լեզուն», —գրում էր ոռոսական մամուլը¹: «Զմայված մնացինք Մնակյանի, Աղամյանի, Վերգինե Գարագաշյանի և այլոց խաղից»²—գրում էր վրաց հայտնի գրական և թատերական գործիչ Դավիթ Էրիսթովը: Նա միաժամանակ հիշեցնում էր, որ չնայած Գրիբոյեդովի կոմեդիայի դժվար թարգմանելիությանը և թարգմանության թերություններին, շնորհիվ Մնակյանի և Աղամյանի փայլուն դերասանական կատարման, պիեսը հնչել է «ոռուերեն լեզվով»:

«Կավկազի» ռեցենզենտը ավելի չափավոր է գովեստի

1 «Կ. 3» 1881, № 9.

2 «Փորձ», 1881, № 2, Գրիբոյեդովի «Խելքից պատուհաս» հայկական բեմի վրա»:

մեջ. «Չի կարելի քիչ թե շատ արդարացի կերպով պահանջել, —գրում է նա,—որ պարոնայք Աղամյանը, Մնակյանը և Մանդինյանը, որոնք գոյցե չեն եղել, համենայն դեպս չեն ապրել Մոսկվայում, նույնքան լավ պատկերեին Զացկո, Ֆամուսովի և Ռեպետիլովի վերին աստիճանի տիպիկ դերերը, ինչպես այդ արել են Մոսկվայի հայտնի դերասաններ Շումակին, Շչեպկինը և Ժիվոլիխնին»¹: Զնայած դրան, նա չի մոռանում հոդվածի վերջում ավելացնել. «Ուշադրության առնելով «Խելքից պատուհասի» նման խիստ ազգային պիեսի հետ կապված դժվարությունները, կարելի է անկեղծորեն շնորհակալ լինել հայ դերասաններից, որ նրանք պիեսը խաղացին այնքան լավ, որքան կարող էին»: Մնակյանի մասին նա գրում է. «Պարոն Մնակյանը (Ֆամուսով) իհարկե նման չէր հոչակավոր Շչեպկինին և բավական չափազանց-րեց իր դերը, բայց համենայն դեպս արժանապատվությամբ դուրս եկավ նրանից»: Քննադատը համաձայն չէ դերի կերպավորման սկզբունքին, և իզուր է փորձել Մնակյանին համեմատել Շչեպկինի հետ, որը վերջին անգամ Ֆամուսով էր խաղացել հայկական ներկայացումից քանի տարի առաջ: Այնուամենայնիվ, կերպարի ո՞ր կողմն է ընդգծել Մնակյանը: Այս հարցին պատասխանում է Դավիթ Էրիսրովի «Գրիբոյեդովի «Խելքից պատուհասը» հայկական բնմի վրա» հոդվածը:

Նախ՝ ո՞վ է Էրիսրովը: 1879 թվականին Էրիսրովը մասնակցել է Գրիբոյեդովի մահվան 50-րդ տարեդարձի

¹ „Կավказ”, 1881, № 9.

առթիվ Թիֆլիսում կազմակերպված սիրողական ներկայացմանը, որտեղ նա կատարել է Զացկու դերը¹: Նույն առիթով նա Թիֆլիսում դասախոսություն է կարդացել Գրիբոյեդովի կյանքի և գործունեության մասին, որը հրատարակվել է առանձին գրքույկով²: Էրիաթովը հայտնաբերել է Գրիբոյեդովի կոմեդիայի 1831 թվականի արտագրություններից մեկը և հրատարակել, կցելով նրան փոքրիկ առաջարան և տեքստաբանական ծանոթագրությունները: Դա եղել է «Խելքից պատոհասի» բառասուներկուերորդ հրատարակությունը, որ լույս է ընծայվել դարձալ հեղինակի մահվան հիմնամյակի առթիվ³: Թե կենսագրական ակնարկը, և թե առաջարանն ու ծանոթագրությունները խոսում են այն մասին, որ Էրիաթովը բավական լավ է իմացել կոմեդիան և նրա ստեղծման պատմությունը, ծանոթ է եղել նրա բազմաթիվ ձեռագիր օրինակների: Այս համագամանեքը պարուղում է Մնակյանի Ֆամուսովի գնահատումների մեջ Էրիաթովի կարծիքն ընդունել պակաս վերապահությամբ: Ըստ նրա հոդվածի, Մնակյանը կարողացել է կատարելապես հաղթահարել Ֆամուսովի դերի հետ կապված բոլոր դժվարությունները: «Պարոն Մնակյանը իբրև Ֆամուսով կատարելատիպ էր, նա ծանրաբարո էր, աղա էր սկզբից մինչև

¹Տե՛ս Վ. Վարդանյան, Գրիբոյեդովը և նայ թատրոնը, Երևան, 1955, էջ 87:

²Տե՛ս Դ. Գ. Թրիստով, А. С. Грибоедов, Биографический очерк Тифлис, 1879.

³Տե՛ս А. С. Грибоедов, Горе от ума, Тифлис, 1879.

վերջ», գրում է նա¹: Մնակյանը Ֆամուսովի կերպարում ընդգծել է ամենաէականը՝ այն, ինչի մասին ժամանակին գրել է Շեպկինը. «Մի մոռանաք, որ Ֆամուսովը որքան էլ գոենիկ է, որքան էլ ծիծաղելի իր մտածողության եղանակով և արարքներով, համենայն դեպս նա աղա է, բարին այդ բարի լրիվ իմաստով»²: Շեպկինը դժգոհ էր իր ֆամուսովից այն պատճառով, որ այն ավելի շուտ պլեքել էր, չինովնիկական միջավայրի մարդ, քան արիատոկրատ և խոշոր աստիճանաւոր: Դա նկատել են նաև Բելինսկին ու Ալ. Գրիգորևը: Շեպկինի, Բելինսկու և Գրիգորևի տեսակետը նաև Գրիբոյեդովի տեսակետն է: Հայտնի է, որ Շեպկինը ծանոթացել է Ֆամուսովի դերին Գրիբոյեդովի անմիջական ցուցումներով: Ֆամուսովի կերպարի ըմբռնման շշեպկինյան ավանդությունը տարբեր արտահայտություններով շարունակել են Սամարինը, Դավիդովը, Լենսկին: Այն ժամանակ, երբ Մնակյանը Ֆամուսով էր խաղում, Շեպկինի մասին միայն հիշողություններ էին պահպանվել: Մնակյանը, հավանաբար, չէր ել լսել Շեպկինի կամ Սամարինի անունները, բայց ստեղծագործական բնազդով և արվեստագետի ներքին աչքով Ֆամուսովին տեսնում էր մոտափրապես այնպես, ինչպես այն ներկայացվում էր ոուսական բեմում: Բայց նրա ստեղծած դերապատկերը կարող էր շատ տարբեր լինել ոուսական

¹ «Փորձ», 1881, № 2:

² С. С. Данилов, Очерки по истории русского драматического театра, М.-Л., 1948, стр. 212—213.

բեմի Ֆամուսովներից, կարող էր բոլորովին չհիշեցնել Շեպկինի Ֆամուսովին։ Դա այդպես էլ պետք է լիներ, քանի որ Շեպկինը և Մնակյանը տարրեր էպոխաների և տարրեր միջավայրի դերասաններ են եղել։ Մնակյանի Ֆամուսովի ծանրաբարո աղայականության մեջ կարող էր և ուսուցիկ հանդիսավորություն կամ վոդենիլից եկող չափազանցություն լինել, առավել ևս, երբ ամբողջ ներկայացման մեջ ընդգծված հնչել է չափածո խոսքը։ Բայց Շեպկինը Գրիբոյեդովի չափածոն արձակի է վերածել, թեև նրանից հետո եկող Ֆամուսովները չեն շարունակել այդ. հատկապես Սամարինը առանձնահատուկ երաժշտականությամբ է արտասանել չափածո խոսքը։ Եվ դա՝ Շեպկինից քան տարի հետո։ Չափածոն ընդգծել է հանդիսավորությունը, որ ներդաշնակ էր Կերպարի վարքագծին. դա ավելի էր ընդգըծում բոլոր հանգամանքներում իր անձն ու արժանապատվությունը մատուցող արիստոկրատի տիպը։ Մնակյանի Ֆամուսովը հենց պայմանի է եղել. ծանրաբարո, հանդիսավոր, իր արժանապատվության գիտակցությամբ սկզբից մինչև վերջ։ Ֆամուսով-Մնակյանը ծանրաբարո է և Լիզայի հետ սիրաբնելու պահին, և Զացկու գլխին բարոյակտություն կարդալիս, և Սկալազուրի հետ սնամեջ դատողություններ անելին։ Նա իր աղայականությունը մատուցում է ներկայացման սկզբից, հենց առաջին մուտքից։ Պատվավոր արիստոկրատը սիրաբանում է իր սպասուհու՝ Լիզայի հետ, բայց չի մոռանում իր աղայական արժանապատվությունը, չի իշնում իր պատվանդանից։ Այս տեսարանում Մնակյանի Ֆամու-

սովոր ընդհանուր եզրեր ունի Սամարինի Ֆամուսովի հետ:
Սա նույնպես կատակասեր է եղել, սիրալիր, բայց ոչ կատա-
կը, ոչ էլ սիրալիրությունը հրան դուրս չեն բերել իր աղայա-
կանության գիտակցությունից¹: Խոկ 80-ական թվական-
ներին Սամարինը համարվում էր ոռոսական բեմի լավա-
գույն Ֆամուսովը:

Մնալիսանի Ֆամուսովի ամենահետաքրքիր տեսարանը, ըստ Էրիսթանովի, նրա հշանավոր մենախոսությունն է իր համագույշ քննու՝ Մաքսիմ Պետրովիչի մասին:

Հենց այդ է որ դուք բոլորդ հապարտ եք անտառեկի².
Հարցնեիք արածներից ձեր հայրերի,
Սովորեիք հետևելով ձեր մեծերին.
Մենք օրինակ, կամ թե՛ իմ հանգուցյալ քենին,
Մաքսիմ Պետրովիչը...

Հայացքը լուրջ, բարձք գոռող,
Խսկ եթէ պետք լիներ հաճոյանալ՝
Թերվում էր երկուտակ և նա:

Արքունական մի հրավերքում, մի օր նա սայշաբեց,
Ընկալ այնպես, որ քիչ մեաց՝ իր ծոծրակը չջախչախեց.
Ծերուկը ախ քաշեց և ձայնն էլ խոպոտված.
Բաց շնորհվեց նրան ժպիտը բարձրագույն:

¹ В. Н. Давидов, Рассказ о прошлом, М.-Л., 1931, стр. 116.

² Գ. Տեր-Աստվածատրյանի թարգմանությունը, որով խաղացվել է պիեսը 1881-ին, չի պահպանվել: Հատվածը բերվում է Գ. Արտվի թարգմանությամբ (**Ս. Գրիգորյեան**, «Խելքից պատուհաս», Երևան, 1958):

Բարեհաճեց խնդալ մեր կայսրութիւն.
Խոկ ճա՞՛, ինչպէ՞ս...

Ելավ, կարգի եկավ, և տալ ուզեց ողջովսն,
Բայց վայր ընկավ երկրորդ անգամ, արդեն դիտմամբ
Ծիծաղն ուժեղացավ և հա՛ երրորդ անգամ ճիշտ
Հովհանովյամբ:
Զեր կարծիքով ինչպե՞ս էր, հա՞... ըստ մեր նա շատ էր
բանիմաց.

Ընկավ ցավով ելավ առողջ,
Եվ տես թե ով, ո՞վ ամենից հաճախ.
Արքոնիքում վիստի էր հրավիրված:
Ո՞վ էր այնտեղ լսում խոսքեր բարձրահաճ,
Մաքսիմ Պետրովիչը: Ամենուրեք այդ ուն հարգանքն
Էր շատ:

Մաքսիմ Պետրովիչի: Կատա՞կ է, հա՞:

Այս մենախոտառթյունը սկզբունքային ճշանակություն
ունի պիեսի և դերի մեկնաբանության համար: Այստեղ է
ամփոփված Ֆամուսովի կերպարի անհատական և սոցիալա-
կան բնութագիրը: Մնակյանը չի սխալվել, եթե հատուկ
ուշադրություն է դարձրել այս մենախոտառթյան մատուցմանը:
Այստեղ է ամբողջությամբ երևում իսկական Ֆամուսովը՝
արիստոկրատական արժանապատվության տակ թարնեկած
պահպանողականը, եսամոլը և շողոքորթը: Պատահականու-

թյուն չի եղել, երբ Փոքր Թատրոնի 1831 թվականի բեմադրությունում, որը կոմեդիայի առաջին ներկայացումն էր պրոֆեսիոնալ թատրոնում, ցարական գրաքննությունը Շենպկինի դերից նախ այս մենախոսությունն է կրնատել¹: «Պատհական չէ, որ Շենպկինից և Սամարինից հետո եկող ոուսական բեմի մյուս Ֆամուտվները՝ Դավիթովը, Լենսկին, ավելի ուշ՝ Ստանիսլավսկին այս մենախոսությունը մեկնաբանել են որպես կերպարը բնութագրող ամենաբնորոշ հատվածներից մեկը»:

Նույնպիսի արտահայտչականությամբ է հնչել Ֆամուտվ-Մնակյանի «ճաշակը, հոգիս, փոփոխվող ձև և» բառերով սկսվող մենախոսությունը դարձալ երկրորդ գործողության մեջ՝ Սկալազորի հետ հանդիպման տեսարանում: Համեմատաբար թույլ է եղել Ֆամուտվի և Զացկու դիալոգը Մաքսիմ Պետրովիչի պատմությունից հետո: Տեսարանը պահանջում է լարված տրամադրություն, արագ տեմպ. Զացկին խոսում է երկար, և նրա կրակոտ խոսքերին Ֆամուտվը պատասխանելու է մեկ կամ երկու բառով: Ֆամուտվի կարճ պատասխանները այսուեղ պետք է հնչեն որպես պատրաստի եզրակացություններ Զացկու մասին: Ֆամուտվ-Մնակյանը հենց այդպես էլ իմաստավորել է տեսարանը, բայց Զացկի-Աղամյանին դուրս է բերել ոիթմից և լարումն ընկել է: Զիմանալով ոուսերեն և ծանոթ շլինելով պիեսի բնագրին, Մնակյանը չի իմացել ինչպես վարվել

¹ С. С. Данилов, Очерки по истории русского драматического театра, стр. 212.

Ֆամուսովի երկարաբան պատասխանների հետ: (Ֆամուսովի կարճ պատասխանները այդպես էր թարգմանել պիեսի թարգմանիչը): Երիսթովը գրում է, որ այդ տեսարանը «երկու արտիստը ևս բոլորովին անգույն անցկացրին: Բայց հանցանքը դերասաններինը չէ, այլ թարգմանիչինը»¹:

Մնակյանի այս շատ հետաքրքիր դերակատարման մասին մեզ չեն հասել ավելի մանրամասն տվյալներ: Հայտնի է, որ «Խելքից պատուհասը» այդ թվականին Աերկայացվել է երեք անգամ և հաջորդ թատերաշրջանում էլ կրկնվել է մի քանի անգամ բավական մեծ հաջողությամբ: Մանդինյանի պատմելով «Մնակյանի խաղը մանավանդ շատ հավանել է ժողովուրդը» և շատ է ծափահարել հրան: Ռուսական մամուլը ուրիշ առիթներով ևս օրինակ է բերում Մնակյանի ֆամուսովի հաջողությունը. «Եթե մենք տեսնում ենք ոռուերեն խոսող զանազան Ալֆոնսների և Արմանների, ապա ինչո՞ւ պետք է մեզ տարօրինակ թվա հայերեն խոսող ֆամուսովը»²: «Դիմակահավանդեսի» բեմադրության առիթով մամուլում նորից է հիշատակվել հայկական ֆամուսովի հաջողության մասին³: Բացի Երիսթովից և մյուս քննադատներից, Մնակյանի դերակատարման մասին բարձր կարծիքի էր նույնպես հայերեն չիմացող ֆելիետոնիստ Բարոն Իքսը: Իր ֆելիետոններից մեկում նա կծու ծաղրով

¹ «Փորձ», 1881, № 2:

² „Կավկազ”, 1881, № 89.

³ Նույն տեղում, № 259:

է նկարագրում Թիֆլիսի տեղական ռուսական թատերախմբի «Խելքից պատուհասի» բեմադրությունը, ցանկություն հայտնելով այլևս չտեսնել «իր դերը բոլորովին շնակացած Ֆամուսովին»¹: Բարոն Իքսի կարծիքով, Մնակյանի Ֆամուսովը անհամեմատ բարձր է եղել: Դա միայն Բարոն Իքսի կարծիքը չէր: Ռուսական բեմադրության «համեմիսավոր տապալման» մասին գրվել էր և դրանից առաջ²:

Մնակյանի Ֆամուսովը առանձնահատուկ տեղ է գրավում անցյալ դարի հայ թատրոնի պատմության մեջ: Նրա դասական խաղացանկի դերերից ոչ մեկը այնքան բարձր չի գնահատվել, որքան Ֆամուսովը: Այս դերակատարումից ելնելով, Դավիթ Էրիքոնովը գրում էր. «Պարոն Մնակյանը յոր տաղանդով ամենայն բեմի զարդ կարող է համարվել»³: Այս բանն ասում էր ոչ պատահական մի քննադատ, այլ ռուս գրականությանը և Գրիբոյեդովին քաջատեղյակ մի բանասեր: Մնակյանից հետո նախատվետական շրջանի հայ բեմում Ֆամուսովի ոչ մի դերակատար չի արժանացել նման գնահատության: Ֆամուսովը եկավ ապացուցելու, որ Մնակյանն ամենալայն շնչի դերասան էր, որին մատչելի կարող էին լինել ամենատարբեր ժամանակների ու ոճերի պիեսներ՝ Դյումայի արկածային մելոդրամաներից մինչև Գրիբոյեդովի և Գոգովի ռեալիստական կոմեդիաները:

¹ «Тифлисские об'явления», 1881, № 245.

² Նույն տեղում, № 242:

³ «Фигаро», 1881, № 2:

Մնակյանի ստեղծագործական կյանքում երևոյթ կարելի է համարել ոռու դասական դրամատուրգիայի յորագանցուր կերպար: Այդ կերպարները արևմտահայ դերասանի համար բացում էին նոր, անձանոթ իրականություն, բերում էին բեմական ճշմարտության այլ ըմբռնում, կերպավորման այլ ձևեր ու սկզբունքներ: Դրանք նորություն էին ոչ միայն արևմտահայ դերասանների համար: Գրիբոյեդովը, Գոգոլը, և Լերմոնտովը նոր էին մուտք գործում հայ պրոֆեսիոնալ թատրոն: Բայց Վիշնևսկու և Ֆամուսովի դերակատարումներից հետո Մնակյանի համար այլևս դժվար չէին Գոգոլյան Քաղաքապետը («Ռուխզոր») և Պողկոլեսինը («Ամուսնություն»), առավել ևս՝ Արքենինը և Կազարինը Լերմոնտովի «Դիմակահանդեսում»: Սպանդարյանի ընդհանուր կարծիքն այն է, որ պղլամահայ դերասանները, դրանց թվում և Մնակյանը, ցուց են տվել, որ ոչ միայն եվրոպական, այլև «տեղական և ոռոսական կյանքից առնված պիեսներում նույնպես մեծ հաջողությամբ են խաղում»¹: Գևորգ Պետրոսյանի կարծիքով, Մնակյանը Քաղաքապետի դերում նույնքան հետաքրքիր և կատարյալ է գտնվել, որքան Ֆամուսովի դերում²: Մնակյանի այս շրջանում ստեղծած ոռոսական կերպարները, եթե լինեին նույնիսկ միջակ դերակատարումներ, դարձյալ չեր կարելի անտեսել նրանց պատմական դերը: Եթե հայ թատրոնում Ադամյանն էր Ժադովի, Չացկու, Խլեպուհիովի առաջին դերակատարը, ապա ճիշտ նույն ձևով Մնակյանից է սկսվում Վիշնևսկու, Ֆամուսովի,

¹ «Մելու Հայաստանի», 1882, № 19:

² «Արձագանք», 1894, № 17:

Քաղաքապետի, Պոդկոլեսինի, Արբենինի և Կազարինը
կերպարների բեմական ավանդությունը:

Հայ թատրոնում Արբենինի առաջին կատարումը տվու-
րաբար կապվել է Աղամյանի անվան հետ: Հայտնի է, թե
Աղամյանի մեկնաբանությունը ինչ դեր է ունեցել ոուսական
բեմում, հատկապես Արբենինի՝ Պիսարեսից հետո եկող
մեկնաբանների համար: Արբենինի աղամյանական ընկա-
լիումն այնքան հոր էր և ինքնատիպ, որ մոռացել է տվել
Մնակյանի Արբենինը¹:

Ինչն էր մղել Մնակյանին դեպի Լերմոնտովի դրաման,
որին նա ծանրացել էր Սենեքերին Արծրունու թարգմանու-
թյամբ, կամ ինչպես էր հասկանում Արբենինի կերպարը,
դժվար է ասել: Բայց ելնելով Մնակյանի ընդհանուր արտիս-
տական նկարագրից և այն փաստից, որ այդ տարիներին
ոուսական բեմում դեռևս չէր հաղթահարված Արբենինի
մելոդրամատիկ մեկնաբանությունը, պետք է կարծել, որ
Մնակյանի համար դա մեզ արդեն հայտնի սպոնային
դերերի մի տարրերակը պետք է լիներ: Այդ դերը, որ նա
խաղացել է ընդամենը մեկ անգամ, արժեքավոր է որպես
կերպարի առաջին կատարում հայ թատրոնում:

¹ Այս փաստը սիսակ է արձանագրված բանասեր Ս. Դաշինյանի
«Լերմոնտովը և հայ մշակույթը» (1960) աշխատությունում: Հեղինակը
պնդում է, որ «Դիմականանդես»-ը բեմադրվել է Մնակյանի հախաձեռ-
նությամբ և դեկապարությամբ, որ դերակատարների կազմը մի քանի
թատերաշրջան մնացել է անփոփոխ (Էջ 163): Թե ում հախաձեռնու-
թյամբ է բեմադրվել «Դիմականանդես», հայտնի չէ, քանի որ այս ներ-
կազացման միակ փաստը գրականության և արվեստի թանգարանի թա-

* * *

Փափազլանի պատմելով, Մնակյանն իր հետ ունեցած մի գրուցում խոսողվանել է, որ փորձել է նաև Համետ խաղալ, բայց անհաջող: Այս վկայությունն աշնքանով է հավաստի, որ Թիֆլիսում եղած ժամանակ Մնակյանը մտածել է Պետրոսչիոյից և Կլավդիոսից բացի, հանդեռ գալ շեքսափիրյան խաղացանկի որևէ խոշոր դերով: Շատ հնարավոր է, որ նա տարվեր Համետով, մի դեր, որի մասին մտածել է ամեն մի դերասան: Այնուամենայնիվ Մնակյանի բեմական անձնավորությունը հեռու էր Համետից: Նա կարող էր բեմում կերպարանափոխվել արտաքուստ և ներքուստ, ներկայացնել ծայրահեղորեն տարբեր հոգեբանություններ և խառնվածքներ, տրամադրություններ և հոգեվիճակներ, բայց նրա բեմական խառնվածքի մեջ ամենից ավելի Համետն էր պակասում: Որքան էլ ցցող լիներ Մնակյանը մելոդրամաներում, որքան էլ տակն ու վրա աներ հանդիտառեսի հոգին, որքան էլ արցունք քամեր նրանից, այնուամենայնիվ խարակտերավեությունը և հումորի նուրբ

տերական բաժնում պահպող 1881-ի նոյեմբերի 19-ի աֆիշն է: Խև ներկայացումը, դերակատարների նույն կազմով, մի քանի թատերաշրջան խաղալու մասին ոչ մի փաստ չկա: Հայտնի է նաև, որ Մնակյանը 1881—82 թատերաշրջանի վերջում մեկընդմիշտ գնացել է Պոլս: Դանիելյանի գրքում սիսակ է գրված նաև Մնակյանի անունը՝ Գևորգ: Հայ թատրոնում Գևորգ Մնակյան անունով, այն էլ «ականավոր դերասան» չի եղել:

զգացողությունը նրան դարձնում էին ավելի արտահայտիչ և հետաքրքիր: Ծեքսափիրյան ողբերգությունը և ողբերգական կերպարը Մնակյանի խաղում կարող էին դրսնորվել ոռման-տիկ պաթոսի ձևով միայն, ինչպես «Կոմետի ֆրանսեզի» Աշանավոր վարպետներից մեկի՝ Սիլվենի մոտ, որ Մնակյանի ժամանակակիցն էր: Սիլվենը եղել է խարակտերային դերասան և բավական հետաքրքիր, բայց ողբերգական կերպարներում ապավինել է միայն պաթետիկ հոեստրականությանը, մի կողմ թողնելով բնավորության և տիափի զգացողությունը, որն այնքան լավ է դրսնորվել ոչ ողբերգական դերներում: Հետագայում ժամանակակիցները ընդհանուր գծեր են տեսել այս երկու արտիստների ստեղծագործական նկարագրում¹: Մնակյանն իր դերակատարումներում և տրամադրություններ է որոնել, և բնավորություններ, բայց Թիֆլիսի բեմում նրա մեջ հայթել է բնավորությունների դերասանը, կամ ավելի ճիշտ, Ադամյանի նման դերասանի կողքին նա հնարավորություն է ունեցել որպես այդպիսին դրսնորվելու: Եվ պատահական չի եղել, որ շեքսափիրյան խաղացանկից նա ընտրել է Ծեյլոկը:

«Տիֆլիսակիե օրյավլենիյա» թերթի 1881 թվականի համարներից մեկում կարդում ենք. «Այսօր, դեկտեմբերի

¹ Արմեն Արմենյանը, որը Մնակյանի խաղին ականատես է եղել 90-ական թվականների սկզբում, մեզ հնու ունեցած բանավոր գրուցում (1961-ի հոկտեմբերին) այն միտքը հայտնեց, որ Մնակյանն իր խաղի սկզբունքով շատ նման է եղել Սիլվենին: Այդ նույնը է հաստատել նաև փարիզահայ դերասան Տրդատ Նշանյանը մեզ ուղղված իր նամակներից մեկում (10 հոկտեմբերի, 1962 թ., Փարիզ):

31-ին հայկական թատրոնում տեղի կունենա տաղանդավոր դերասան Մնակյանի բենեֆիսը: Պարոն Մնակյանն իր բենեֆիսի համար ընտրել է Շեքսպիրի «Շեյլի» հինգ գործողությամբ դրաման: Շեյլիի դերով հանդես կգա ինքը՝ բենեֆիցիանուը: Հայ հասարակությանը բավական հարմար առիթ է ներկայանում արժանի հարգանք մատուցելու պատվավոր արտիստին»¹: Մնակյանի արխիվում պահպանվել է նաև ներկայացման աֆիշը: Այստեղից պարզվում է, որ Մնակյանը «Վենետիկի վաճառականը» կոմեդիալում, բացի Շեյլիից, այդ նույն երեկո խաղացել է նաև Մարոնկի իշխանի դերը: Ինչպես տեսնում ենք, նրան այստեղ ևս գրավել է կերպարանափոխվելու արվեստը: Ոչ հայկական, ոչ ռուսական, ոչ էլ վրացական մամուլում այս ներկայացման մասին որևէ հաղորդում կամ թատերախոսական չի հրապարակվել: Դա առիթ է տվել ներադրելու, որ ներկայացումը տեղի չի ունեցել²: Բայց ներկայացումը տեղի ունեցել է և մամուլի լուսավորությանը պարզ պատահականություն է միայն: 1882 թվականին «Արձագանքը» հրապարակել է նախորդ՝ 1881 թվականին խաղացված ներկայացումների լրիվ ցանկը: Այստեղ նշված է, որ «Վենետիկի վաճառականը» Գ. Բարխուդարյանի թարգմանությամբ բեմադրվել է 1881 թվականի դեկտեմբերի 31-ին և ներկայացումից

¹ „Тифлисские об'явления“, 1881. № 290.

² Լ. Սամվելյան, Աղամյանը և Շեքսպիրի կերպարները, Երևան, 1981, էջ 47:

ստացված եկամուտը կազմել է 620 ռուբլի¹: Ցուցակից երևում է, որ թատերաշրջանի ներկայացումների գգալի մասը անհամեմատ պակաս հանդիսատեսներ է ունեցել, քան «Վենետիկի վաճառականը»: Ուրեմն, խսկապես, այդ երեկո «արժանի հարգանք է մատուցվել պատվավոր արտիստին»:

Հայտնի է, որ Զնշկյանը 1866-ին բեմադրել էր «Վենետիկի վաճառականի» չորրորդ գործողությունը, իսկ 1873-ին և 1880-ին՝ առաջին և երկրորդ գործողությունները: Այսպիսով՝ 1881-ի ներկայացումը Շեքսպիրի այդ գործի առաջին ամբողջական բեմադրությունն էր հայ թատրոնում, որ իրագործվում էր Մնակյանի նախաձեռնությամբ: «Անսանձի սանձահարումից» և «Համլետից» հետո սա երրորդ շեքսպիրյան լրիվ ներկայացումն էր կովկասիայ բեմում: Մուսական լրագրի հայտարարությունն ասում է, որ «Վենետիկի վաճառականը» բեմադրվել է ոչ որպես կոմեդիա, այլ՝ դրամա, այն էլ «Շեյլոկ» վերնագրով: Ուրեմն ներկայացման հիմնական բովանդակությունն է կազմել հրեա Շեյլոկի դրաման: Պետք է կարծել, որ Մնակյանն իր մեկնաբանության մեջ հետևել է արդեն ընդունված ավանդությանը, որի սկզբնավորողը հայ բեմում Զնշկյանն էր: Շեյլոկի դերը Մնակյանի համար պատահական ընտրություն չի եղել, այլ վաղոց մտածված ու մշակված: Հավանաբար նա մեծ հաջողությամբ է կատարել այն, այլապես չէր ընտրի բեմեֆիսային դեր: Հիմնվելով ժամանակակիցների հիշողությունների վրա,

¹ «Արձագանք», 1882, № 13:

Ծարասանը գրել է. «Մնակյան այս շրջանին անմահացավ Շեյլոքով»¹: Գրեթե նունն է ասում Սմբ. Դավթյանը. «Մնակյան Տիխիսի մեջ Շեյլոքի ծանոթ դերով նշանավոր եղավ»²:

Ինչպիսի՞ն էր Մնակյանի Շեյլոկը: Դերասանն ընդգծել է կերպարի էթնիկական հատկանիշները. սրածայր գլխարկի տակից դուրս ցցված նոսր մազեր, նիհար ու ուկրոտ դեմք, խոշոր աչքեր, կեռ ու երկար քիթ, շարժուն ձեռքեր, լայն բերան և ճյուղավոր մորուք, շքեղ խալաթ, արևելյան մուճակ-ներ, գոտուց կախված փողի քամկ: Այս պատկերը ինչ-որ տեղում հիշեցնում է Խրվինագի Շեյլոկին և այն ավանդական Շեյլոկներին, որ երբեւ տեսել է եվրոպական բեմը: Այսպես է պատկերել Շեյլոկ-Մնակյանին ժամանակակից Ակարիչը: Նկարն առաջին անգամ հրապարակվել է 1912 թվականին Մնակյանի բեմական գործունեության հիմնամյա հորելյանի առթիվ³:

Վ. Փափազյանի վկայությամբ Մնակյանը Շեյլոկի դերով հանդես է եկել նաև հետագայում: Եթե ճշմարիտ է այս, ապա, համենայն դեպս, ըստ այդ վկայության դա Շեքսպիրի Շեյլոկը չի եղել: Մնակյանը պիեսը թարգմանել է թուրքերեն, հարմարեցրել է Պոլսի տեղական բարբերին «Ղալաթիո վաշխառուն» վերնագրով, Շեյլոկին վերանվա-

¹ Ծարասան, նշված աշխ., էջ 40:

² Ս. Դավթյան, Մարտիրոս Մնակյան, Կենսագրական նշումներ (ԳԱԹ, Ս. Դավթյանի փոնդ):

³ Տե՛ս Կենսագրական Մնակյանի:



Մնակյանը Շելովի դերում



նելով Աքրահամ¹: Հստ Փափազյանի, շեքսպիրյան պիեսի այս աղավաղված բեմադրության մեջ անգամ Շեյլոկ-Աքրահամ-Մնակյանը «ոչնչով ետ չէր մնում նովելլիից, որն իսկապես փայլում էր այդ դերում»: Համոզիչ է թվում Փափազյանի այն հայտարարությունը, որ Մնակյանը կերպարին տվել է մելոդրամատիկ երանգ, առաջին պլանի վրա դնելով Շեյլոկի հայրական վիշտը: Հստ Փափազյանի, Մնակյանը կերպարի այսպիսի ընթռնմամբ մոտենում էր Իրվինգին: Իսկ ինչպես հայտնի է, Իրվինգը շեքսպիրյան դերերում մինչև վերջ չի կարողացել հաղթահարել մելոդրամայի դերասանին: Եթե Փափազյանի վկայության մեջ կա ճշմարտություն, ապա կարելի է ենթադրել, որ Մնակյանի մելոդրամատիկ մեկնաբանության մեջ պետք է լինեին նաև 1881-ին խաղացված Շեյլոկի մոտիվները:

1881—82 թվականներին Մնակյանը քայլ առ քայլ ավելի է խորացել դասական կոմեդիայի կերպարներում, իսկ մելոդրաման փոքր տեղ է գրավել նրա խաղացանկում: Բայց դրա հետ միասին մամուլում այլևս չենք հանդիպում դերասանի խաղի այնպիսի հանգամանալից գնահատումների,

1 В. Папазян, История развития турецкого театра (ԳԱԹ): Փափազյանը գրում է, որ Մնակյանը 1890—900-ական թվականներին բեմադրել է Շեքսպիրի «Ռիշարդ 4-րդը» «Ալիֆ-Ալան» վերնագրով: Փափազյանի ասելով, Մնակյանը եղել է «Բիյակապ Ռիշարդ», որին նա ներկայացրել է միջնադարյան օսմանցի նվաճողի կերպարանքով: Բայց իսկապես՝ 900-ական թվականներին Մնակյանի խաղացանկում եղել են «Ղալաթի վաշխառուն» և «Ալիֆ-Ալան» վերնագրով պիեսներ: Մեր պրատումներն այս ուղղությամբ արդյունքի չհանգեցրին:

ինչպես նախորդ երկու տարիներին: Սպանդարյանի ընդարձակ հոդվածների փոխարեն «Մեղու Հայաստանին» հրապարակել է կարճ հաղորդումներ, երբեմն էլ կցկոտուր կարծիքներ այս կամ այն դերակատարի մասին և ավելի հաճախ լոել է: «Մշակը» և Գրիգոր Արծրունին, որ երկու տարի առաջ այնպես կրբուտ կերպով ժխտում էին ոռմանտիկական ուղղությունը և կոչ էին անում բեմադրել հայ, ոռու և եւլրոպական դասականներին, այժմ լուսայամբ էին արձագանքում անպիսի բեմադրությունների, ինչպիսիք էին «Վենետիկի վաճառականը», Մոլիերի «Դոն Ժուանը», Լերմոնտովի «Դիմակահանդեսը», Գոգովի «Ռոկորը» և «Ամուսնությունը», Սունդուկյանի «Խաթաբալան» և «Էլի մեկ զոհը»: Այդ է պատճառը, որ Մնակյանի այս դերակատարումների մասին չնշին բան է հայտնի, իսկ մի քանիսի մասին էլ պատմում են միայն «Արձագանքում» հրապարակված հայտարարությունները:

Թիֆլիսյան շրջանում Մնակյանի համար պակաս նշանակալից չի եղել նաև ժամանակակից հայ թատերագրությունը: Սունդուկյանի «Խաթաբալա» և «Էլի մեկ զոհ» կատակերգություններում նա հանդես է գալիս Իսայու և Սարգսի դերերով, Ա. Քիշմիշյանի «Օրիորդ Բերդյանց» դրամայում վաճառական Գոլյանի և Մուրացանի «Ռուզանում»՝ Հասան Զալալի դերերով:

«Ռուզանը» առաջին անգամ բեմադրվում է 1882 թվականի փետրվարի 4-ին, Վարդանանց տոնի առթիվ: Մնակյանի համար Հասան Զալալը տառապող հոր և ազնվա-

կան ծերութու տարրերակներից մեկն էր, որտեղ հեշտությամբ կարող էր պահպանել ոռմանտիկ դերասանի հմալքը և մելոդրամապի վարպետի ներգործման ուժը: Պատկառանք ներշնչող համդիսավոր ծերութիւնի, արքայավայել կերպարանք: «Նրա խաղը լիովին համապատասխանում էր իր պատկանելի դերին»¹—գրում է «Կավկազը»: Հասան Զալալը Մնակյանի համար քենեֆիսապին դեր էր: Եվ եթե այն նորություն չէր դերասանի համար, ապա սունդուկյանական կերպարները անպայման նորություն էին: Այստեղ առավել նշանակալից եղավ Սարգսի կերպարը:

Մնակյանի Սարգիսը չէր կարող նմանվել ոչ Ամրիկյանի և ոչ էլ Ավալյանի ստեղծած կերպարներին: Նրա դերակատարումը հեռու է եղել տեղական կոլորիտից և սունդուկյանական թատրոնի ոգուց: Սունդուկյանը հատկապես պղասհայ դերասանների համար վերամշակել է իր «Էլի մեկ զոհը», փոխադրելով այն գրական լեզվի: Մամուլում նույնիսկ ակնարկ է եղել, թե պիեսը ֆրանսիականացվել է²: «Կառկած չկա,—գրում է Մանդինյանը,—որ Մնակյանը լավ կկատարել և Ավալյանի դերը (պսիհոք Սարգիսը-Հ. Հ.), բայց չկարծեմ այն տիպը ներկայացնե, ինչ տիպ տեսել ենք մինչև այսօր Ամրիկյանցի և Ավալյանցի խաղով: Մնակյանի Սարգիսը ուրիշ Սարգիս կլինի»: Մանդինյանն իրավացի էր, և ինչպես երևում է նրա հիշատակարանի հաջորդ էջերից, Սարգիս-Մնակյանը չի նմանվել

¹ „Կավկազ”, 1882, № 38.

² „Кавказский курьер”, 1881, № 24.

թիֆլիսեցի վաճառականի: Նա նույնիսկ չի էլ փորձել որևէ կերպ ընդգծել տեղական կոլորիտը: Իսկ մամուլի գնահատումներն ասում են, որ Սարգիսը եղել է Մնակյանի լավագույն դերերից մեկը: «Պ. Մնակյանը Սարգիս աղայի դերում ամենամեծ արվեստ ցուց տվեց և ներկայացրեց մի գեղեցիկ տիպ՝ խոսելով առանց կեղծումների, բնականաբար և ազատությամբ, ուստի և կարողացավ հարուցանել ժողովրդի մեջ հոգեկան շարժումն և հաճախակի ծափահարություններ»—գրում է «Մեղոն Հայաստանին»¹:

Մնակյանի այս դերակատարումը նույն կերպ են գնահատել նաև ոռուսական թերթերը: «Կամկազսկի կուրյերը» այն բնորոշում է որպես «անկրկնելի տիպ»², որպես «անթերի արտիստական կատարում»³: «Որքան ճշմարտություն և շերմություն կար նրա խաղում, որի գեղեցիկ ապացուցք համեդիականների միահամուռ կանչերն էին և բազում ծափահարությունները»—գրում է «Տիֆլիսակին օրյավլենիյան»⁴:

Այսքան հիացմունքից հետո դժվար է թերագնահատել Մնակյանի դերակատարման արժեքը, այն բանի համար, որ նրա ներկայացրած կերպարը չի եղել տիպիկ թիֆլիսեցի վաճառական: Կերպարի գեղարվեստական ճշմարտացիության շափանիշը Մնակյանը չէր կարող որոնել միայն տեղային հատկանիշների ճշգրիտ վերաբերության մեջ:

¹ «Մեղոն Հայաստանի», 1881, № 7:

² „Կո և այս այ կորեր”, 1881, № 24.

³ Նույն տեղում, № 38:

⁴ „Тифлисские об'явления”, 1881, № 22.

Կենցաղայնությունն իհարկե հասուկ է Սունդուկյանի կատակերգություններին, բայց դա չէ նրա ռեալիզմի ուժը: Կենցաղայնությունը սունդուկյանական կատակերգության գլխավոր տարրը չէ, և սունդուկյանական կերպարները անկախ տեղայինից, ամենից առաջ գեղարվեստական բարձր ընդհանրացումներ են. խիստ տեղային արտաքինի տակ նրանք իրենց մեջ կրում են համազգայինն ու համամարդկայինը: Մնակյանի Սարգիսը թող չիներ թիֆլիսի, թող լիներ պոլսահայ վաճառական: Դրանով կերպարը չեր կորցնի ոչ գեղարվեստական ճշմարտացիությունը, ոչ էլ սոցիալական սրությունը: Նկատենք, որ մամուլն ուշադրություն է հրավիրում ոչ միայն Մնակյանի կատարողական վարպետության, այլև այն հաճախանքի վրա, որ նրա ստեղծած բեմական կերպարը եղել է անկրկնելի, ճշմարիտ, բնակյան և ամենակարևոր՝ տիպական:

Սարգսի կերպարը Մնակյանի մեջ ավելի էր հաստատում բնավորությունների թատրոնի դերասանին, դասական կոմեդիայի վարպետին: Սա գալիս էր հաստատելու, որ Պետրոսին, Ֆամուսովը, Քաղաքապետը, Շեյլոկը պատահական հաջողություններ չեն նրա ստեղծագործական կյանքում: Դրանք հատկանշում են դերասանի շրջադարձը դեպի բեմական ռեալիզմը, որն սկսվել էր նախ մելոդրամային կերպարներում: Եղավ մի շրջան, երբ Մնակյանի ստեղծագործական անհատականության մեջ համատեղվեցին մելոդրամայի վարպետը և բնավորությունների թատրոնի դերասանը: Արտաքուստ թվում է, որ ոչինչ ընդհանուր չեր կարող

լինել նրա մեղոդրամային ու վոդնիլային և դասական դրամատորգիայի կերպարների միջև, թվում է, որ այդ միմյանցից շատ հեռու թվացող կերպարները Մնակյանի բազմակողմանի տաղանդի տարբեր դրանորումներն են: Անկասկած, դերասանի բազմակողմանի օժտվածությունն ու ներքին ձկությունը փոքր տեղ չունեն այստեղ: Բայց ամենակարևորն այն ներքին տրամաբանական կապն է, որ կա Մնակյանի նախորդ և այս շրջանի դերակատարումների միջև. մեղոդրամային «ազնվական հայրեր» և հետո՝ Ֆամուսով, Քաղաքապետ, Սարգիս, վոդնիլային «կատակախոսներ» հետո՝ Խաչի («Խաթաբալա»), Պոդկոլեսին («Ամունությունն») և այլն: Առաջին դեպքում գրական կերպարը սիսեմա է, երկրորդ դեպքում սիսեման կենդանացված է որպես տիպ, մի դեպքում՝ վերացական բարոյախոսություն, մյուս դեպքում՝ տցիալական և հասարակական չարիքների մերկացում: Դերասանը մի տեղում հաստատում է բարոյախոս հոր բարոյականությունը, մյուս տեղում ծիծաղում է այդ բարոյականության վրա: Դասական կոմեդիայի կերպարները պետք է փոխեին Մնակյանի վերաբերմունքը դեպի մեղոդրաման, և մեղոդրամային կերպարները բոլորովին այլ կերպ պետք է իմաստավորվեին դերասանի աշքում: Մնակյանի շրջադարձ ոչ թե շրջադարձ էր, այլ շրջափոխություն՝ աստիճանական զարգացում Հյուգոյի և Դյումայի ոռման-տիզմից մինչև Գրիբոյեդովի, Գոգովի և Սունդուկյանի ունալիզմը:

* * *

1882 թվականի մայիսի 26-ին տեղի է ունենում Թիֆլիսի հայկական թատերախմբի վերջին ներկայացումը¹: Դա ավելի շուտ եղել է հանդիսավոր երեկո, որտեղ ներկայացվել են «Խելքից պատուհասի» առաջին և երկրորդ գործողությունները, Ադամյանը բանաստեղծություններ է կարդացել, մեծարանքի խոսքեր են ասվել և նվերներ մատուցվել խմբի գլխավոր կազմակերպիչին՝ իշխան Ամառունուն, Ադամյանին և Մնակյանին: Սրանով էլ դադարում է, այսպես կոչված «մշտական թատերախմբի» գործունեությունը: Դրանից հետո Ադամյանը մեկնում է Ռուսաստան, իսկ Մնակյանը՝ Պոլիս:

Մնակյանի համար դա եղավ ճակատագրական սխալ, բայց նա շատ ուշ գգաց իր սխալի ծանրությունը:

Թիֆլիսի բեմում Մնակյանը խաղաց ընդամենը երկու տարի, բայց հնարավորություն ունեցավ դրսերվելու իր անհատականության բոլոր կողմերով, հիմնավորապես և գիտակցորեն ըմբռնելու բեմական ռեալիզմը, մշակելու նոր խաղանք, մելոդրամայի դերասանի պարետիկան, թատերավիճ հնարներն ու պայմանական խաղի ձևերը զուգորդելով կենական ճշմարտության հետ:

Մնակյանին նույնապես վիճակված էր անցնել այն ճանապարհը, որով գնացին Ադամյանը, Ազնիվ Հրաչյան, Աստղիկը, Սիրանուշը, Մարի Նվարդը, Գարագաշյանները,

¹ № ս .Тифлисские об'явления*, 1882, № 119.

հետագայում՝ Թրյանցը: Տարբեր եղան նրանց ճակատագրերը, բայց բոլորի համար ընդհանուր մնաց մի բան. կովկասահայ թատրոնը նրանց արվեստի վրա դրեց ռեալիզմի կնիքը: Մնակյանը ճիշտ է ըմբռնել և պատկերավոր գնահատել այն փոխհարաբերությունը, որ եղել է կովկասահայ թատրոնի և պոլսահայ դերասանների միջև. «Մենք Կովկասին տվինք մելոդրամներ, իսկ անոնք մեզի տվին Համետներ և Օթելլոներ: Արվեստին խմորը մենք հայթայթեցինք, իսկ արվեստագետներ հոնկն եկան հոս արդեն կաղապարված և կատարելագործված: Այդպես եղավ Ադամյանի, Հրաչյայի, Թրյանցի և որիշներուն համար: Կովկասի դրոշմը նվիրագործեց զմեզ արվեստագետի կնիքով»¹:

¹ Թեոդիկ, «Ամենուն տարեցուցը», 1923, էջ 354:

ԿՈՐՈՒՏԾՆԵՐԻ ԳՆՈՎ

Մեղք, որ Մնակյանի պես աննկուն, համառ
աշխատող մարդ մը իր կյանքին կարևոր մեկ մասը
գրեթե ապարդյուն անցուցած եղավ:

Շարասան «Թրքահայ բեմը և
իր գործիչները»

Մնակյանը 1882 թվականի մայիսին շտապում էր
Պոլիս: Զգու՞մ էր արդյոք, որ դրանով ճակատագրական-
սխալ է գործում, մտածու՞մ էր երբեմ, որ Պոլսում այլևս
հնարավոր չէր վերակենդանացնել ի հիմանե փլված հայ
թատրոնը: Այստեղ սխալի գիտակցությունն էլ քիչ էր նրան
ետ կանգնեցնելու համար: Մնակյանին ոչինչ չէր մնացել
անելու, Պոլիս դառնալուց բացի: Թիֆլիսի «Հայ թատրոնի
մշտական խումբը», որ պահպում էր Նապոլեոն Ամառունու
և որիշների մեկենասությամբ, կազմալուծված էր: Նոր խումբ
կազմելու հեռանկարը հավատ չէր ներշնչում. դերասաններն
իրենք էին պատրաստվում ստանձնելու խմբի պահպանման

գործը, ապավիճելով ապագա ներկայացումներից սպասվող հասույթներին: Եվ այստեղ նպատակահարմար ելքը Պոլսի ճանապարհը բռնելն էր, որ նրան էր սպասում Վարդովյանից ժառանգություն մնացած թուրքերեն լեզվով խաղացող հայ դերասանների խումբը:

Պոլսում Մնակյանն իրեն գտնում է նույն տարտամ ու անորոշ վիճակում, ինչ որ Կովկաս մեկնելուց առաջ: Խմբի դերասանապետությունը նաև հանձնել էր դերասան Տիգրան Թուպատյանին, որը կարճ ժամանակ անց միացել էր Թովմաս Ֆատուլյանի թատերախմբին և սնցել արտսահնան: Մնակյանի դերասաններից ոմանք հրաժարվել էին բնմից, ոմանք էլ ապաստանել էին Սերովի Պենկյանի օպերետային թատրոնում: Նրանք, ովքեր դուրս էին մնացել Ֆատուլյանի և Պենկյանի թատերախմբերից, կազմել էին առանձին խումբ և դեպքից դեպք պատահական ներկայացումներով երևում էին Պոլսի արվարձաններում:

Մնակյանին հաջողվում է իր շուրջը համախմբել այս դերասաններին, որոնց մեջ էր նաև Մարի Նվարդը: Ամբողջ մայիս ամսվա ընթացքում այս խումբը «Օսմանյան թատրոն» անվան տակ, Մնակյանի գլխավորությամբ թուրքերեն լեզվով ներկայացումներ է տալիս Պոլսի «Շահզադե բաշը» թատերաբանում: Մնակյանը ներկայացումները շարունակում է նաև ամսվա ընթացքում, իսկ աշնանը փորձում է պաշտոնական ձև տալ իր խմբին, նպատակ ունենալով Պոլսում հիմնել մշտական դրամատիկական թատրոն: 1882 թվականի հոկտեմբերի 25-ից սկսվում են այդ թատրոնի ներկայացումները և կաճ ժամանակ անց ընդհատվում:



Մհակյանը 90-ական թվականներին



Այն ժամանակ, երբ Մնակյանը ջանքեր էր գործ դնում դրամատիկ թատրոն հիմնելու, Բերայի «Կոուասան» կոչված թատրոնի շենքում պարբերական ներկայացումներ էր տալիս Պենկյանի օպերետը: Պենկյանը Մնակյանին իր խումբն է հրավիրում որպես ռեժիսոր և դերասան: Ներկայացումները մի շրջան շարունակվում են Պոլսում, այնուհետև, Մնակյանը խմբի հետ միասին մեկնում է շրջագայությունների՝ Սալոնիկ, Դարդանել, Լիմնոս և այլ քաղաքներ: Այդ ընթացքում նա մասնակցում է օպերետի բոլոր ներկայացումներին որպես «առաջին բարիտոն», կատարելով իր նախկին դերերը:

Մնակյանի բացակայության ժամանակ նրա խմբի գործունեությունն ընդհատվում է: Դերասաններից մի քանիսը՝ Մանուկ Սիսակը, Հարություն Ալիքսանյանը, Տիգրան Սանջակյանը և որիշներ լինենում են թուրք դերասանապետ Քյուչուկ Խամայիլի թատերախմբին: Պոլսի վերադառնալուց հետո նա նորից ձեռնամնում է լինում թատերախմբի վերականգնմանը: Բայց հաստատոն թատրոնական կազմակերպությունն հիմնելու համար նյութական միջոցներն էին պակասում: Մի քանի ներկայացումներից հետո Մնակյանին դարձյալ սպասում են նյութական վճառն ու սնանկացումը: Իսկ Պոլսի միակ կանոնավոր թատերախումը դարձյալ Պենկյանի օպերետն էր: 1883 թվականի շրջագայությունների ընթացքում այս խումբն անցնում է նաև Աթենք և Փայտոն հաջողությունից հետո պատրաստություն տեսնում անցնելու Եգիպտոս: 1884-ի գարնանը Պենկյանի օպերետը

մեկնում է Եգիպտոս, խմբի մեջ ունենալով Սիրանուշին, որպես առաջատար դերասանուհի և Մնակյանին, որպես ուժիոր:

Ներկայացումներն սկսվում են Կահիրեի «Էղպեքին» պարտեզի ամառային թատերապահում: Սիրանուշի կողքին հավասար հաջողությամբ փայլում է Մնակյանը իր «առաջին բարիտոնի» դերերգերով: Նա բացառիկ հաջողությամբ է կատարում Լեբլեբիչ Հոր-հոր աղայի դերը Չոխաջյանի համանուն օպերետում: Մնակյանն այս դերում ավելի հետաքրքիր գտնվեց, քան Թագվոր Նալլանը, որն այս դերի առաջին ստեղծողն էր, քան Պենկլյանը, որի դերակատարումը երկար ժամանակ համարվել էր անգերազանցելի և այնպես էլ գնահատովել էր արենական թերթերում¹: Շարասանի վկայությամբ, Մնակյանը նոյնպիսի վարպետությամբ է ներկայացրել նաև «Մենելավի բազմակննիո դերը»²:

Այս շրջանում Պենկլյանի օպերետային թատրոնը եզակի երևոյթ էր Մերձավոր արևելքում, եզակի, որպես ժամանակակից պրոֆեսիոնալ թատրոն, եզակի՝ իր բնույթով և խաղացանկով: Հոնասատանում և Եգիպտոսում թատրոն հաճախող հանդիսատեսն առաջին անգամ էր ունենդիր լինում արևելյան երաժշտության եվրոպական ոճով կատարման, իսկ Պոլսում և Մերձավոր արևելքի մյուս խոշոր քաղաքներում օպերետը դարձել էր ամենասիրելի թատերական ժանրը: Վարդովյանի թատրոնի փակումից հետո Պոլսում

¹ Շարասան, նշված աշխ., էջ 55:

² Նոյն տեղում, էջ 40:

այս խմբին էր պատկանում Եվրոպական տիպի ներկայացումների մեջաշնորհը: Նրա հանդիսատեսների շրջանը անհամեմատ լայն էր ու բազմապահի, քան Վարդովյանի թատրոնին էր եղել: Որպես օպերետային դերասան Մնակյանն այստեղ դրսերդում է իր անհատականության այն կողմերով, որոնցով կատարելագործվել էր դասական կոմեդիայի կերպարներում: Այսպես էր ներկայացնում նրան «Արևելյան մամուլը»: «Պարոն Մնակյանի տաղանդն, եղերական, մանավանդ կատարելագործի մասն, անժառական է: Ունի ճշմարիտ դերասանի բնատուր ձիրք, որ ավելի կատարելագործվելով Եվրոպա, կրնար առաջին կարգը բռնել թերևս»¹:

Այստեղ ուշադրություն է գրավել Մնակյանի արվեստի էական կողմերից մեկը՝ կատարելագործիկականի և դրամատիկականի համատեղումը: Պատահական չէր, որ նրա արվեստի այս առանձնահատկությունը երևում էր օպերետային ժանրում: Մենելյափի և Հոր-հոր աղայի կերպարները հենց այդպիսին են՝ խարբված ծերութիւններ, կյանքի կոմիկական հանգամանքներում: Երկուսի մարդկային արժանապատվությունն էլ ոտնահարված է. մեկի կնոջն են իլել, մյուսի՝ աղջրկան: Երկու կերպարներն էլ ստեղծված են այսպես կոչված, «գրան պրեմյեր» դերասանական ամպլուայի սխեմայի վրա և երկուսն էլ «գրան պրեմյերի» պարոդիան են: Այս դերակատարումներում Մնակյանը համատեղում էր դասական կատարելագործյան դերասանին և մեղողամայի վար-

¹ «Արևելյան մամուլ», 1884, էջ 517:

պետին: Քննադատի աչքին աննկատ չի մնացել նաև Մնակյանի՝ խարակութապին դերասանի տաղանդը և ներքին կերպարանափոխման վարպետությունը. «Ինքն իրուր զգապիրը տեսարանին վրա, այլ իրուր կօճանա գրավել ունկնդիրներու բոլոր ուշն ու աշքը, այնպես որ իր ընտրած դերերուն մեջ ինք չերևիր, այլ այն անձն, որու լեզուն, ձևերն ու շարժումները քաջ գիտե»¹:

Մնակյանը մի շրջան մնում է օպերետում: Խմբի հետ նա երկրորդ անգամ է այցելում Եգիպտոս: Կահիրեի «Խտիվիալ» կայսերական թատրոնի դռները լավ բացվում են Պենակյանի խմբի առաջ, և հաջողությունն ավելի մեծ է լինում, քան նախորդ անգամ: Մնակյանի կենագրի վկայությամբ, նա այս շրջանում «շատ փայլուն ու շողշողուն գնահատման կարժանանա թատերասեր հասարակութենեն իր ներկայացուցած «Ժիրոֆիկ-Ժիրոֆլայի» մեջ Բոլերոյի, «Օրֆեոսի» մեջ Պլուտոնի, «Մադամ Անգոյի» մեջ Բոնբոնի դերերով»²:

Չնայած օպերետում ունեցած հաջողությանը, այդ ժամանք Մնակյանին այլևս չէր գոհացնում: Դրամատիկ թատրոն հիմնելու միտքը նրան հանգիստ չի տալիս: Այդ թատրոնը, որի մասին նա մտածում էր դեռ նախքան Կովկաս մեկնելը, վերջնականապես կազմակերպվում է 1885 թվականի սկզբին «Օսմանյան դրամատիկ թատերախումբ» անվան տակ: Թատերախմբի գլխավոր դերասաններն

¹ «Արևելյան մամուլ», 1884, էջ 517:

² Կենագրական Մնակյանի, էջ 9:

Էին Մարի Նվարդը, Մանուկ Սիսակը, Հարություն Ալիքսան-յանը, Ռուբեն և Աղավենի Բինենեմեջանները, Միքայել Զափ-րաստը և որիշներ: Մնակյանի թատրոնը նորություն էր մայրաքաղաքում: Վարդովյանի թատրոնի փակումից հետո թատերական ձեռնարկումներից ոչ մեկը կանոնավոր և տևական գործունեություն չէր ունեցել, եթե չհաշվենք Պենկյանի օպերետը, որը մեծ մասամբ Պոլսից դուրս էր հանդիսանելու որոնում: Մնակյանի թատրոնի գործունեության տարիներին Պոլսում ժամանակակից եվրոպական տիպի ներկայացումներ գրեթե չկային արդեն: Բացառություն էին կազմում ֆրանսիական և իտալական երկրորդական թատերախմբերի հազվադեպ այցելությունները Բերա: Գրաքննությունից ազատ էին միայն թուրքական զավեշտախմբերը: Կառավարության աշքում այս արհամարհված ժանրը ոչ վտանգ և ոչ էլ արժեք էր ներկայացնում: Սա «օրթա օյունու»-ի մի տեսակն էր «թյուլուաթ» անունով, որ իր բնույթով շատ էր հեռու գրական թատրոնից: «Թյուլուաթը» իմպրովիզացիայի թատրոն էր, որտեղ խաղացվում էին էժան ու գոեհիկ զավեշտներ, հանգատրատից հորինված և ձևած ավանդական սյուժեների վրա: Այս խմբերի խաղացանկում կային նաև Մոլիերի և Գոլդոնիի կոմեդիաներից, թուրքացված ձևով: Այստեղ փոխվում էին պերտնաժների անունները, մտցվում նոր պերտնաժներ, նոր տեսարաններ և այլն: Ինչպես «օրթա-օյունու», «թյուլուաթը» ևս խաղացվում էր առանց գրական տեքստի, իսկ սյուժեները շատ անգամ հորինվում էին ներկայացումից մեկ—երկու ժամ առաջ,

սրբարանում կամ գինետանը: «Թյուլուաթը» նույնապես ունեցել է իր վարպետները, որոնցից առավել հայտնի են Եղել Ապոին և Ծեզը Հասանը: Եվրոպական ժամանակակից թատերական կյանքի ֆոնի վրա թուրքական Էկզոտիկ թատրոնը հետաքրքիր էր այնքանով, որ պատմության էր պատկանում, գալիս էր դարերի խորքից, բերելով իր նետ արևելյան միջնադարյան թատերախաղերի ավանդները: Այդ ավանդներն իհարկե վաղուց վերասերվել էին, կորցրել իրենց, հասարակական հողը, և XIX դարում ստեղծված «Թյուլուաթը» ավելին չէր, քան գունիկ զավեշտախտություն և էժան բուփնադրա: Այս միջավայրում Մնակյանի կազմակերպած «Օսմանյան դրամատիկ թատերախամբի» կազմակերպումը երևույթ էր, որքան էլ որ սահմանափակված լինեին այդ թատրոնի հնարավորությունները, որքան էլ այն ցածր լիներ Պոլիս այցելող եվրոպական թատրոններից: Իր դարը վաղուց ապրած Էկզոտիկ թատրոնի կողքին կանգնած էր Եվրոպական տիպի թատերախտումբը:

«Օսմանյան դրամատիկ թատերախամբի» ներկայացումներն սկսվում են Սկյուտարի «Զիֆթիկի» թատերասրահում, 1885 թվականի հունվարից: Կիրակի օրերին խումբը ներկայացումներ է տալիս Բերայի «Կոնկորդիա» թատերասրահում: Բեմադրվում էր հիմնականում 70-ական թվականների խաղացանկը, որի լավագույն նմուշներից էին «Քամելագարդ կինը» և Օկտավ Ֆելլեի «Դալիլան»: «Քամելագարդ կինը» երկար ժամանակ մնում է խաղացանկի կենտրոնում, որպես Մնակյանի այս շրջանի գործունեության ամենալուսավոր կետը: Սա եղել է ուժեղ դերասանական անսամբլի

Ներկայացում: Ժամանակակցի հիշողության մեջ վառ են տպավորվել Մնակյանի Արմանը, Մարի Նվարդի Մարգարիտը, Սիամի Դյուվալ-Բայրը և Ալիքսանյանի Վարվիլը: «Այսքան կատարյալ կազմով «Քամելազարդ կին»-ի ներկայացում մեր մեջ չէ եղած բնավ, իսկ օտարներու մեջ՝ հազվադեպ»—գրում է նա¹: Ներկայացման կենտրոնում են եղել Մնակյանը և Մարի Նվարդը: «Արման Դյուվալի գլուխությունը և առաջնակարգ դերը Մնակյան շատ մեծ արվեստով կատարեր,—պատմում է մյուս ականատեսը,—հանդիսականներու կուրծքին տակ հրդեհներ, ալեկոծություններ. կամ խաղաղ, կապույտ երկինքներ հարուցանողը կըլլար իր այնքան վարպետ ու բնականացած շարժ ու ձևով, ձայնին ելնեցովը կամ աչքերուն արցունքներովը»²:

Մնակյանի խաղընկերն այս ներկայացման մեջ Մարի Նվարդն էր: Արման-Մնակյանը Մարգարիտներից ոչ մեկին այնքան չէր սիրել, որքան Մարի Նվարդին: Այս տաղանդավոր դերասանութին իր ճակատագրով կապված էր Մնակյանի նետ. նրա նետ էր եղել գավառական սուրբներուն, նախքան Թիֆլիս մեկնելը, աճել էր նրա ձեռքի տակ և նրա դերուսուցությամբ դարձել «կատարյալ արվեստագիտութիւնը»³: Ընդառաջ գնալով դերասանութու տաղանդին ու նախասիրություններին, Մնակյանը նրան էր հարմարեցրել նորակազմ թատրոնի խաղացանկը: Մարգարիտ Գոթյեն,

¹ Թեոդիկ, Ամենուն տարեցուցը, Փարիզ, 1929, էջ 394:

² «Սուրբանդակ», 1904, թիվ 1530:

³ Շարասան, նշված աշխ., էջ 124:

Կոմսուինի Էլեոնորան («Դալիլա»), Կատրին Հովհարդը «Օսմանյան դրամատիկ թատերախմբում» չունեցան ավելի լավ դերակատարուինի, քան Մարի Նվարդը: Արտաքուստ աննկատ, մանկականորեն պարզունակ, միշտ թախծուո, բայց բեմում հմայքով ու ջերմությամբ լիբը, ծայրահեղորեն տրամադրության դերասանուինի: Այսպես է մեզ ներկայանում կերպարը այն դերասանուիո, որի անապատելի և ողբերգական մահը առաջին ծանր հարվածն էր Մնակյանի թատրոնին:

1885-ի մայիսի 16-ին «Շահօպադե բաշը» թատերասրահում ներկայացվում է «Քամելազարդ կինը»: Թատրոնը լեցուն է հանդիսատեսներով: Ամեն անգամվա նման «Մնակյան անթերի հարազատությամբ կանձնավորեր Արմանը»¹: Անթերի հարազատությամբ Մարին ժառում, լաց է լինում և... մեռնում: Վարագույրն իշխում է: Հանդիսարահը որոտում է խելակորուս ծափերից, բայց դերասանուինի դուրս չի գալիս հանդիսատեսի ծափերն ընդունելու:

Մարի Նվարդը իսկապես մեռած էր:

Գլխավոր դերասանուիո մահը ամենածանր վիշտն էր Մնակյանի համար:

—Մեռնողը Մարին չէ, մեռնողը մենք ենք,—ասում է Մնակյանը դերասանուիո թաղման ժամանակ: Այդ կորուսով ողբերգական սկիզբ էր դնում ապագայի մտահղացումների առաջ:

¹ Թեոդիկ, Ամենուն տարեցույցը, 1929, էջ 395:

«Օմանյան դրամատիկ թատերախումբը» պոլսահայ թատրոնական կազմակերպություններից ամենավերջինն էր, ամենաերկարառուը և «ամեննեն դժբախտը»: Ապագգայնացումը, որ միշտ սպառնացել էր արևմտահայ թատրոնին, այստեղ վերջնական ավարտին է հասնում: Զախողված տևանելով իր բոլոր ծրագրերն ու մտահղացումները, Մնակյանը թատրոնն էր հիմնել թուրք հանդիսատեսի համար, բայց թատրոնի խաղացանկում չկային թուրք հեղինակների գործեր: Դրանով էլ Մնակյանի հիմնած թատրոնը մի քայլ եւ էր Վարդովյանի «Օմանյան թատրոնից», որի խաղացանկում եղել էին ոչ միայն եվրոպական թարգմանություններ և հայ պատմական ողբերգություններ, այլև ժամանակակից թուրք հեղինակների պիեսներ, նաև՝ թուրք դերասաններ: Խսկ հայատառ թուրքերենով թարգմանված եվրոպական մելոդրամաներ խաղացող և հայկական արտասանությամբ թուրքերն խոսող հայ դերասանների խմբին դժվար թե կարելի լիներ թուրքական թատրոնն անոնը տալ: Բեմուն հայերն լեզուն արգելված էր, և Մնակյանի թատրոնը թուրքական կարելի էր անվանել այնքանով, որքանով թուրքական կարելի է անվանել Պոլսում հայատառ թուրքերենով հրատարակված մամուլը: Մնակյանի թատրոնն արևմտահայ պրոֆեսիոնալ թատրոնի վերասերումը, ապագգայնացումն էր հատկանշում: Դա արևմտահայ թատրոնի ճգնաժամի ամենաուժեղ արտահայտությունն էր, և նրան

վերջնական կործանումից փրկողը թերևս «Օսմանյան» անունն էր:

Թատրոնի խաղացանկը նույնն էր, ինչ 60—70-ական թվականներին, բայց նրանից հանված էին Վոլտերը, Մոլիերը, Հյուգոն, անգամ՝ Դյումա-նոր որոշ պիեսները, հանված էին բոլոր պատմական դրամաները, անկախ նրանից, ինչ հեղինակի էին պատկանում՝ թուրք, հայ, թէ՝ Եվրոպական: Բեմում խոսք չպետք է լիներ ոչ թուրքական, ոչ էլ հայկական հայրենասիրության մասին, իսկ «հայրենիք» բառն ընդհանրապես արգելված էր: Խաղացանկում բացառված էին նաև Շեքսպիրը և Շիլերը, բացառված էին բոլոր այն պիեսները, որոնցում որևէ բառ հանդիսատեսին մտածել կարող էր տալ սոցիալական և ազգային անհավասարության, հեղափոխության և սահմանադրության կամ ընդհանրապես հասարակական առաջադիմության մասին: Այս բառերն անգամ հանված էին թուրքական բառարանից: 1885 թվականից հետո Թուրքիայում արգելքի տակ էին Վոլտերը, Տոլստոյը, Բայրոնը, Շիլերը, պատմաբաններ Վերերի, Ֆայֆի և Սոլովյովի երկերը, իսկ թուրքական «Դարյուլ-ֆուզունո» («Գիտությունների տուն») կոչվող համալսարանում արգելված էր փիլիսոփայության, պետական իրավունքի և բնական գիտությունների դասավանդումը¹:

Տարով իր թատրոնին «Օսմանյան» անունը, Մնականը

¹ А. Ф. Миллер, Пятидесятилетие младотурецкой революции. Москва, 1958, стр. 41—42.

ձեռք էր բերել ներկայացումներ տալու պետական արտոնագիր և հարկադրված էր ենթարկվելու համիլյան գրաքըննության ամենածաղրահեղ, ծիծաղելիորեն դաժան սահմանափակումներին։ Նա դեռևս լրիվ խորությամբ չէր զգուն այն ողբերգությունը, որ վիճակված էր արևմտահայ թատրոնին, ամբողջ արևմտահայ մշակույթին և ընդհանրապես արևմտահայությանը։ Նա թերևս չէր ել մտածում, որ այդ ճշգնաժամը երեք տասնամյակ էր տևելու։ Կարծելով, որ դեռ հնարավորություն կունենա վերականգնելու հայ թատրոնը, Մնակյանը փորձում է հայերեն թարգմանություններից կազմել իր խաղացանիը։ Նա Գրանտերենից հայերենի է թարգմանում մոտ տասնինգ պիես, դրանց թվում ժ. Օնեի «Դարքնոցապետը», Օ. Ֆելլեի «Աղքատ երիտասարդի վեպը», Ժ. Բուշարդիի «Անիրավություն և պատիժը», Ա. Բուրժուայի «Կոյր զորապետը», Ա. դ'Էնեերի «Երկու որբունիները», փոխադրում է մի քանի կոմեդիաներ՝ «Ժամագործին գլխարկը», «Ապարանչանը», «Անձանոթը» և այլն։ Սակայն Մնակյանի փորձերըն ապարդյուն են անցնում։ Նա ստիպված է լինում թուրքերենի վերածել իր հայերեն թարգմանությունները¹։ Ընդհանրապես ապարդյուն են անցնում նրա հայ թատերական կյանքի աշխատման փորձերը։ Մնակյանին հայկական ներկայացումների իրավունք չի տրվում²։

¹ «Մնակյան իմ հուշերուս մեջ» (ձեռագիր հատվածներ Հ. Շ. Սիրունու «Հուշերուս գրքից», ստացված անձնական համակարգության միջոցով)։

² Գ. Ստեփանյան, Արույրակ Փափազյան, էջ 101։

Գրաքննական սահմանափակումները տարեցտարի ընդունում են ավելի ծայրահեղ ձևեր: 1888 թվականին Թուրքիայում հրապարակված մասովի վերաբերյալ նոր օրենքները արգելում են լրագրերում տպել արտասահմանում տեղի ունեցող քաղաքական մասնիքեատացիաների և պալատական հեղաշրջումների մասին, կետադրական հշաներից արգելվում է բազմակետը՝ «անհաճո ենթադրությունների առիթները չտալու» և հասարակության «հանգստությունը շխանգարելու համար»: Այս տարիներին և հետագայում գնալով մեծանում է արգելված բառերի ցանկը: Դրանց մեջ էին մտնում «եղբայր», «անցյալ» «արդարություն», «աստյակ», «ծեր», «քիթ» և բոլոր այն բառերը, որոնք հեռավոր ձևով կարող էին կապ ունենալ փաղիշահի անձնավորության կամ քաղաքականության հետ: Մնակյանը հուսահատորնեն ու դառնությամբ գրել է. «Թվական չմնաց, Անցյալը մոռացվեցավ, Արդարությունն անհետացավ, Ծեր, Քիթ բառերը շնչվեցան: Պիեսները նախապես գրաքննիչներու տեսողության բովեն կանցնեին, բայց անկե ետք իրքն քաղաքական դատապարտյալներ՝ ոստիկանության դուռն ալ սկսան դրկվիլ: Գրաքննիչներն այեւս մը ազատելու համար, հարկ էր կաշառք տալ՝ մինչև 20 ուկի»¹:

Այս նույն ժամանակ Մնակյանի թատրոնն ուներ մի գորեղ մրցակից: Դա Պենկյանի օպերետն էր, որ երբեմն իր մեջ էր առնում Մնակյանի խմբի դերասահմերից ոմանց: Այդ մրցակցությունն սկսվում է թատերախմբի կազմակերպ-

¹ Թեսդիկ, Ամենուն տարեցուցը, 1927, էջ 419:

ման օրվանից: 1885 թվականի գարնանը Պենկյանը վերադառնում է հերթական եգիպտոսյան տուրնեից, իր խումբը հրավիրում Մնակյանի դերասաններից մի քանիսին և տանում Զմյունիա: Մնակյանի խումբը քայլայման առաջ է կանգնում, իսկ Պենկյանի խումբը Զմյունիայից վերադառնում է գրեթե սնանկացած և միանում Մնակյանին: Նրանց համագործակցությունը տևում է երկու տարի (1886—1888) և ավարտվում նրանով, որ Պենկյանը վերակառուցում է իր խումբը և նորից մեկնում շրջագայության: Մնակյանն այս խմբի հետ երրորդ անգամ է գնում Եգիպտոս: Պոլիս վերադառնալուց հետո նրան հրավիրում են Բարձրագուն դուռ և առաջարկում դառնալ Համիդի պալատական թատերախմբի դերասանապետը: Մնակյանի այս պաշտոնը, հավանաբար, ամիսներ է տևել. հայտնի չէ, թե երբ և ինչպես է ընդհատվում այն: Բայց հայտնի է, որ այդ ընթացքում նրա հակական թատերախմբի գործունեությունը չի ընդհատվել: Պառակտումներին ու բաժանումներին վերջ տալու համար նա իր թատրոնում հաստատում է խատագուն կարգապահություն՝ մի կարգ, ըստ որի, դերասաններից ոչ մեկն այլևս իրավունք չպիտի ունենար մասնակցելու որիշ խմբերի ներկայացումներին:

Սկսած 1890 թվականից Մնակյանի խումբը վերջնականապես հաստատվում է Պոլիսի արվարձաններից մեկի՝ Գատըգյուղի փայտաշեն թատրոնում:

Գնալով նեղանում է նրա թատրոնի գործունեության ոլորտը, սահմանափակվում է հանդիսատեսների շրջանը: Բերայում տրվող ներկայացումների թիվը տարեցտարի

Ավագում է: Գրաքննական հալածանքին միանում են նյութական դժվարությունները, անհատված ներկայացումները: Գրեթե դատարկ հանդիսարահների առջև են խաղացվում «Դարբնոցապետը», «Տիկին Օրբեն», «Դալիլան», «Քամելազարդ կինը»: Մնակյանը հարկադիմած է լինում ավելի հազվադեպ ներկայացնել «նորք պիեսներ», դրանց փոխարեն խաղացանկ մտցնել ցնցող և տեսարանային ներկայացումներ՝ ինը, տասը պատկերից, կառուցված արագ զարգացող գործողության վրա, իթը առեղծվածներով ու առեղծվածների լոծումներով, հետապնդումներով, սպանություններով ու թունավորումներով: Այդպիսի պիեսներ են նրա բեմադրած «Մոմե արձան շինողը», «Քողարկյալ կինը», «Կարմիր կամուրջին ոճիրը», «Միսկ փողոցին ոճիրը», «Բանտարկյալ հոր բանտապահ որդին», «Վրեմինդիր մայրը» և այն: Հետագայում նա շատ առիթներ է ունեցել կշտամբանքներ լսելու, թե ինչո՞ւ չի ներկայացնում ֆրանսիական խաղացանկի լավագույն գործերից: Խոսք վերաբերում էր Էմիլ Օժեի, Էմիլ Ֆարրի, Օկտավ Միրբոյի և Ժորժ Օնեի դրամաներին, որոնք այդ տարիներին շատ են տարածված Փարիզի բեմերում: Սրանք Մնակյանի ամենասիրելի հեղինակներն են, բայց նա ցավով խոստվանում էր, որ այդ հեղինակներին բեմադրելու համար իր թատրոնին և՛ կրթված դերասանն էր պակասում, և՛ կրթված հանդիսատեսը: Մտավորականությունը, որ նրա թատրոնի հանդիսատեսների փոքր մասն էր կազմում, դերասանապետից պահանջում էր «լուրջ և նորք պիեսներու ներկայացումներ»:



Տիառարան «Այսուհետ Խմբեր» ներկայացրութիւն:
Կենտրոնական Միջազգային:



Մնակյանը, որ շատ լավ գիտեր, թե ինչ ասել է լուրջ խաղացանկ, իրեն ուղղված կշտամբանքներին ստիպված էր պատասխանել. «Ոչ, բարեկամս, լավ է, բայց սիսալ է ձեր գաղափարը: Ֆրանսիացիք այնչափ զարգացած, նրբացած են, որ իրենց ախտրժած ու գրած գործերը միայն իրենց հատուկ են: Մենք տակավին իմացական կարողության այդ աստիճանին չենք հասած. այդ տեսակ գործերով, թե ժողովուրդը կանձրացնենք, և թե մենք անորթ կմնանք¹»:

Մնակյանին ու նրա դերասաններին ամենից ավելի սպառնալիս է եղել «անորթ մնալու» վտանգը: Եվ դրա համար ինչ էր մնում անել դերասանապետին, եթե ո՞չ՝ պարբերաբար «թարմացնել» խաղացանկը՝ կարդալ ժամանակին տարածված մոդայական, արկածային վեպերը և նրանցից սարքել պիեսներ, անընդհատ նոր թարգմանություններ կատարել, բեմադրություններ պատրաստել ամենաշատը մեկ շաբաթվա ընթացքում: Եվ այս ամենը նրա համար, որ կարողանա աշխատավարձ վճարել դերասաններին, զգեստներ ու դեկորներ գնել եվրոպացի անտրեպրենորներից, կաշառել գրաքննիչներին և այլն: Մնակյանը գնալով ավելի է համոզվում, թե որքան անհեռանկանը² է իր բունած գործը: Ամեն առիթով նա ստիպված էր խստովանել այդ բանը. «Մուրալը կամ անոթութենե մերնիլը այս վիճակեն հազար անգամ նախամեծար է, բայց ինչ օգուտ, գործին մեջ արվեստի խենթություն կա²»:

¹ Վենսագրական Մնակյանի, էջ 10:

² Նոյն տեղում, էջ 11:

Այնուամենայնիվ նյութական վճարը շարունակում է հետապնդել Մնակյանի թատրոնին: Խոսմբը վերածվում է մի տեսակ շահակցական ընկերության և բոլոր տեսակի վեճերն ու գժուորթյունները գնում են այս հոդի վրա: Մինչև 1892 թվականի աշնան սկիզբը խոսմբը երկու անգամ պառակտվում է: Դերասանների մեծ մասը, դժգոհ ներկայացումներից ստացվող եկամուտներից, լքում է դերասանապետին և առանձին թատերախմբով մեկնում Բուրսա: Դերասանապետը մնում է գրեթե բոլորովին մենակ: Այդ նույն ժամանակ թուրք դերասանապետ Քյուչուկ Խամայիլը փորձում էր օպերետի խոսմբ կազմել: Մնակյանը շանում է երան համոզել ետ կանգնելու այդ մտքից և ձեռնարկել դրամատիկ ներկայացումների: Բայց Խամայիլը, որ նպատակ էր դրել օպերետի ձևով բեմադրել «Կարմենը» (Ժ. Բիզեի երաժշտությամբ), ետ չի կանգնում իր մտքից: Հակառակ Մնակյանի սպասումների, այս ներկայացումը հաջողվում է: Փորձերը տևում են մեկ ամսից ավել՝ մի քան, որ հազվագյուտ երևույթ էր (սովորաբար Մնակյանի թատրոնի ներկայացումները պատրաստվելիս են եղել ամենաշատը մեկ-երկու շաբաթում): Մնակյանը պատրաստում է Ցումիգայի դերերգը, իսկ Կարմենը՝ Գոհարիկ Շիրինյանը, որ Պենկյանի թատրոնի աստղերից էր: Այս բեմադրությունը մի քանի անգամ հաջողությամբ կրկնվում է «Դիրեքլեր-Արա» թատերասրահում, քայց վերջին ներկայացումներից ստացված գումարն այնքան քիչ է լինում, որ խոպական երաժշտախմբին վճարելոց հետո չնշին քան է մնում:

Օպերետն ու ելրոպական երաժշտոթյունը ամենահեռագայթականարմար չէին Պոլսի արվարձանների հանդիսատեսի համար: Բերայի Աերկայացումների մենաշնորհը պատկանում էր հիմնականում ելրոպական թատերախմբերին ու դերասաններին, իսկ հայ դերասանների և Մնակյանի գործունեության ասպարեզը մեծ մասամբ արվարձաններն էին կամ գալանները: Իսկ այստեղի հանդիսատեսի համար անհամեմատ դյուրամարս էին արկածային մեղոդրամաները և պարզունակ գալիքները:


Թատրոնի խաղացանկում կային նաև դասական մելոդրամայի հմուշներ, ինչպես Վ. Դյուկանի «Երեսուն տարի կամ խաղամոլի կյանքը», Թ. Բարդյերի «Փարիզի աղքատները», Ֆ. Պիաջի «Փարիզի հնահավաքը» և «Տառնապանքի մարդը», Օ. Ֆելեի «Աղքատ երիտասարդի վեպը»: Սրանց կողքին գգալի թիվ էին կազմում և այն պիեսները, որոնք ժամանակին գրվել, թարգմանվել ու խաղացվել են հարյուրավոր օրինակներով: Կենդանի բնավորությունների ու տիպերի փոխարեն՝ պիեսից պիես թափառող ավանդական դիմակներ, կրկնվող բեմական հանգամանքներ, դրամատիկական հանգուցի լուծման միքանի տարբերակներ, չարի ու բարու վերացական հակադրություն ու նախվ քարոյախոսություն, շաբլոն ձև և պարզունակ միտք: Հիմնականում սրան էին հանգում Քսավիե դ'Մոնտեպենի, Ժյուլ Մարիի, Անիսե Բուրժուայի և մյուս երկրորդական հեղինակների գործերը, որոնք տարիներ շարունակ մնում էին «Օսմանյան դրամատիկ թատերախմբի» խաղացանկում: Այսպիսի գրական հիմքի վրա միշտ չեր կարելի

ստեղծել բարձր բեմական արվեստ: Եվ ժամանակի ընթացքում խաղացանկն իր կնիքն է դնում Մնակյանի խաղակերպի վրա. նա աստիճանաբար կորցնում է այն, ինչ ձեռք էր բերել տասը տարի առաջ: Նրա որոշ դերակատարումներ, ոչ զերծ տաղանդի փայլատակումներից (Ժիլբեր-«Միսք փողոցի ոճիրը», Նոտար-«Սեղբատ երիտասարդի վեպը») ցուց էին տալիս, որ նրա մեջ չեր խաթարվել ատեղծագործող արվեստագետը: «Ամեն պարագային վարպետի պես կիսադա իր արվեստին կանորելապես տեր», գրել է նրա քննադատներից մեկը, բայց և հիշեցրել. «քիչ մը նվազ դյուրաքորքորոշություն և ավելի խտացյալ հանդարտորեն գորավոր հուզում կուզենք որ ունենար»¹: Մոտե արձաններ շինողի դերում (Ք. դ'Մոնտեպեն՝ «Մոտե արձաններ շինողը») Մնակյանը կարողացել է «ճշմարիտ տաղանդի մը արտահայտության մեջ վեր հանել» հանիրավի դատապարտված մարդու կերպարը, որոշ տեսարաններ «աննման, անհավասարելի կատարել», իսկ դրամատիկ տեսարաններում «անքաղդատելի ըլլալ»²: Բայց դրա կողքին Մնակյանը կորցրել էր ամբողջ դերը կանոնավոր և վայելու խաղալու սովորությունը: Խաղում էր այնպես, ինչպես պատահեր. երբեմն՝ անտարբեր ու սառը, երբեմն էլ՝ հարրած, ինքնամուացության մեջ, հանձնված պատպիական ու չկատավարվող տրամադրությունների հոսանքին: Այստեղ էր, որ նա կորցնում էր չափի զգացումը և քննադատներին առիթ տալիս հիշեց-

¹ «Հայրենիք», 1891, թիվ 66, 90:

² Նոյն տեղում, թիվ 80:

Տեսաբայութեան մասին գիտական հարցութեան մասին՝ Առաջին պալատական ազգային կուսակցութեան կողմէ:





նելու իրեն շատ լավ հայտնի մի ճշմարտություն, թե «դերասանը պետք է ձևերու և բացագանչությանց մեջ ժումկալ ըլլա և իր նուրբ արվեստով գրավե հասարակությանը»¹:

Մնակյանն այդ տարիներին շարունակում էր մնալ ամենահարգված և ամենահեղինակավոր դեմքը պոլսահայ դերասանության միջավայրում, ուստի քննադատությունն էլ աշխատում էր պատշաճություն պահպանել նրա հանդեպ, ավելի քիչ գրել նրա թերությունների մասին: Բայց լուսավորությունն էլ քննադատությունն էր: Մնակյանն ուներ նաև իրենով հիացողների շատ մեծ շրջան: Դա Պոլսի արվարձանների թուրք հանդիսատեսն էր, որ Մնակյանով էր դաստիարակվել և որիշ թատրոն չէր տեսել, նրա թատրոնից բացի: Բայց Մնակյանի խաղից դժգոհ էին նրանք, ովքեր տեսել էին նրան տասը տարի առաջ, ովքեր տեսել էին նրան Ֆամուսի և Քաղաքապետի դերերում՝ Արքամյանի Զացկու և Խլեստակովի կողքին: Նրանք ցանկով էին խոստովանում, որ Մնակյանի խաղում քիչ բան էր մնացել նախկին բարձր արվեստից: Այդ մարդկանցից էր Գևորգ Պետրոսյանը, որ 80-ական թվականներին բեմ բարձրաւայրով, Մնակյանի խաղընկերն էր եղել և մոտիկից հաղորդակից դարձել նրա արվեստին: Պետրոսյանը, որ այժմ արդեն ձևավորված ու կազմակերպված դերասան էր, Պոլսի էր գնացել (1891թ.) Թիֆլիսի թատերախմբի համար դերասաններ հրավիրելու նպատակով: Դրանից երեք տարի անց նա գրում էր, «Ինչ ասենք մեր անմոռանալի Մնակյանի մասին, որ թեպետ

¹ «Հայրենիք», 1891, թիվ 80:

շթողեց յուր արվեստը, բայց շարունակելով գործը տաճկական անձաշակ բեմի վրա հետադիմել սկսեց: Երբ մի քանի տարի առաջ ես նորան տեսա Գատչեռոյ բալագանու (թատրոն չէ կարելի անվանել) երկու-երեք մեղողրամաներում, լաց եկամ, հիշելով թե որքան հիանալի էր խաղում նա Ֆամուսովի, Գորոդնիչի դերերը՝ բոլորովին անձանոթ լինելով ոռուական կյանքին»¹:

Մնակյանի մասին այդ նույն կարծիքին էր նաև Ազնիվ Հրաչյան: Մնակյանի նման նա էլ 1882-ին հեռացել էր Թիֆլիսից: Բայց Հրաչյան չէր մասնակցում Պոլսում տրվող ոչ հայերեն, ոչ էլ բուրքերեն ներկայացումներին, թեև հետևում էր եվրոպական թատերական կյանքին, կարդում էր Անտոնանի «Ազատ թատրոնի» մասին արտասահմանյան լրագրերում ու հանդեսներում հրապարակվող հոդվածները: Ազնիվ Հրաչյան վաղուց եկել էր այն մտքին, որ «Եժեկտներու դպրոցը» հնացել է, և ապագան պատկանում է Անտոնանի ստեղծած ուսալիզմին: Հետաքրքիր է Հրաչյայի զրուցը

¹ «Արձագանք», 1894, № 17: Այս հոդվածը, որ հրապարակվել է «Հին դերասան» ստորագրությամբ, վերագրվել է Զմշկյանին (տե՛ս Գ. Զմշկյան, Իմ հիշատակարանը, Երևան, 1952, էջ 208 և Ս. Հարությունյան, Գևորգ Զմշկյան, Երևան, 1960, էջ 98):

Հայտնի է, որ Զմշկյանը 90-ական թվականների սկզբին Պոլսում չի եղել և Մնակյանի ներկայացումները չի դիտել: 1891-ին դերասաններ հրավիրելու նպատակով Պոլսի է գնացել Գևորգ Պետրոսյանը: Բացի Պետրոսյանից այդ թվականներ արևելահայ բեմի նշանավոր գործիչներից ոչ մեկը Պոլսում չի եղել:

Հարություն՝ Ալիքսանյանի հետ։ Ալիքսանյանը նրան հարցը-նում է, թե արդյոք ինքը կա՞րող է հաջողություն ունենալ կովկասահայ բեմում։ Հրաչյան պատասխանում է. «Եթե դուք պիտի ներկայացնեք այնպես, ինչպես այստեղ, վատահ եղեք, որ ընդունելություն չեք գտներ, բայց եթե դուք դերասան եք, լուրջ կուսումնասիրեք ձեր դերերը ինչպես որ պետք է, ես վատահ եմ, որ այն ատեն ընդունելություն կգտնեք։ Պ. Մնակյան ալ այստեղ քանի մը գավաթ կոնծելով բեմ կելլե ու կպոռա, կկանչե։ Խորիզ հասարակությունը գոհ կմնա անկից ալ, ձենեն ալ. բայց հոն նույն բանը չէ։ Պ. Մնակյան հոն շատ լավ կուսումնասիրեք իր դերերը, անիկա հոն լավ դերասան էր»¹։

Մնակյանը ներքուստ քարձր էր կանգնած իր միջավայրից և չէր փոխել իր պատկերացումները իսկական թատրոնի և իսկական արվեստի մասին։ Ժամանակին ուսումնասիրած լինելով ֆրանսիական բեմական դպրոցի սկզբունքները, Մնակյանն այժմ էլ հետևում էր ֆրանսիական թատերական կյանքին և շատ լավ էր հասկանում այն պայքարի եռթյունը, որ մղում էր Անտուանը «Կոմեդի ֆրանսեզի» ակադեմիզմի դեմ։ Մնակյանի քննադատներից մեկը նույնիսկ հիշեցնում է այս մասին։ «Մնակյան գիտե այս ամենը, կարդացել է և ֆրանսիական թատերգության այս տագնապին մեջ կըսե որ ոուս դերասանները ամենեն աղեկ տուամ կիսադան»²։ Մնակյանը վերապահությամբ էր ընդունում և «Կոմեդի ֆրանսեզի»

¹ Ազնիվ Հրաչյա, էջ 121։

² «Հայրենիք», 1891, թիվ 80։

ակադեմիզմը, և Անտուանի ռեալիզմը, որն ազատ չէր նատուրալիստական ծայրահեղություններից: Նա, որպես դերասանական արվեստի շափանիշ, այժմ ընդունում էր դրամա խաղաղու ռուսական ոճը, որին նա ականատես էր եղել 80-ական թվականների Թիֆլիսում, ի դեմս ոռու հշանավոր գավառային դերասաններ Չերնովի, Նեմիրովա-Ռապֆի, Խվանով-Կոզելսկու և ուրիշների: Մնակյանի համար շափանիշ չէր և այն դրամատորգիան, որի վրա նա անտեղի ուժեր էր վատնում: Խոսելով իր թարգմանություններից մեկի մասին (Ֆ. Պիա' «Տառապանքի մարդը») Մնակյանը վկայակոչում է Հյուգոյի այն միտքը, թե թատրոնում հանդիսականների մի մասը կիրք է որոնում, մի մասը՝ գործողություն, մեկ այլ մասը՝ գաղափար: Մնակյանը գրում է. «Այս երեք կետը պարունակող խաղ մը գտնելը որչափ դժվար է: Կան բարձր հեղինակներ, որոնք գրած են այդ տեսակ երջանիկ թատերգությունք, բայց ինչ օգուտ, դժբախտաբար արգիլալ են: Այս պատճառով թարգմանածն խաղերուն մեջ հիշյալ երեք մասերն ալ գոհացնելու արժանի գործեր քիչ կը գտնվին»¹:

Ժամանակ առ ժամանակ Մնակյանը հնարավորություն է ստանում ավելի շատ ներկայացումներ տալ մայրաքաղաքի կենտրոնում՝ Բերայում: Այստեղի հանդիսատեսը, որ երբեմն առիթներ ուներ դիտելու եվրոպական թատերախմբերի ելույթները, անհամեմատ պահանջկոտ էր և ցանկալի էր

¹ «Հայրենիք», 1891, թիվ 66:

համարում Մնակյանի խաղացանկում տեսնել «նվազ ոճիր և ավելի կյանք պարունակող խաղեր»: Հայ մտավորականության դժգոհությունը տարբեր ձևերով միշտ հասնում էր դերասանապետի ականջին: Բայց քիչ էին այն պիեսները, որ և լավ լինեին, և գրաքննությունը վատ աշքով չնայեր նրանց: Այնուամենայնիվ, Մնակյանը խոստանում էր Բերապում այնպիսի գործեր ներկայացնել, «որ թատերասեր ազգայինք միշտ գոհունակությամբ սրտի ելնեն թատրոննեն»¹: Դրանցից մեկը «Տիկին Մանկոտեն» կոմեդիան էր՝ ֆրանսիական խմբերում բավական շատ խաղացվող, զվարճալի և բարոյախոսական մի գործ, մյուսը՝ «Դարբնոցապետը», որի հեղինակը՝ Ժորժ Օնեն այդ տարիներին Փարիզում ավելի ընդունված էր, քան Զոլան, Դոմեն և Մոպասանը:

90-ական թվականների սկզբում հայ մտավորականության վերաբերմունքը Մնակյանի հանդեպ մասամբ փոխվում է դեպի լավը: Այն փաստը, որ Ադամյանը երեք տարի առաջ հնարավորություն էր ստացել հայերեն լեզվով խաղալու, ոմանց հույս էր ներշնչում, թե Մնակյանի թատրոնը ժամանակի ընթացքում գուցե անցնի հայերեն ներկայացումների: Ամենից ավելի խոսվում էր հայերեն ներկայացումների վերականգնման մասին, քանի որ Ադամյանի ներկայացումներից հետո մթնոլորտը հանդարտվել էր, և Սիրանուշը նոյնպես խաղացել էր հայերեն: Գրաքննությունը շարունակվում էր նույն խաղությամբ, բայց Ադամյանի և Սիրանուշի

¹ «Հայենիք», 1892, թիվ 115:

ելույթները ցուց էին տալիս, որ քաղաքի արվարձաններում արդեն կարելի էր խաղալ հայերեն: Հատկապես ֆասուլյանցանի թատերախմբի հայերեն ելույթից հետո (1892) թվում էր, որ այլևս քիչ բան էր մնում հայկինին վերադառնալու համար: Մնակյանին ևս մտահոգում էր պոլսահայ թատրոնի վերաշնորհյան խնդիրը, բայց այստեղ նա ավելի հեռատես էր և հույսեր չեր կապում մի քանի պատահական ներկայացումների հետ: Չուզենալով անզգուց քայլով կորցրած լինել իր այնքան դժվարությամբ հիմնած թատրոնը, ևս գգուշանում է այն հիմնովին վերակառուցելու մտքից: Հայկական մշտական թատերախումբը չեր կարող հեռանկար ունենալ սովորանական Թուրքիայի մայրաքաղաքում: Բայց հայերեն լեզվով խաղալու պահանջ կար և անհրաժեշտություն: Այդ անհրաժեշտությամբ էլ, Մնակյանը 1892 թվականին փորձում է վերադառնալ հայկական ներկայացումներին: Դրա համար նա առանձնացնում է իր խմբի մի մասը, որին միանում են նաև սիրողներ: Այս ձևով, Մնակյանի թատրոնի ներկայացումները մի շրջան շարունակվում են հայերեն և թուրքերեն լեզուներով: Հայերեն լեզվով տրվող ներկայացումները ոչ մի անգամ դուրս չեն գալիս արվարձաններից, քանի որ Բերայում արգելքը պահպանում էր իր ուժը, և դրությունը գրեթե չեր փոխվում: Ազգային թատրոնի վերակառուցման համար շատ բան էր պակասում: Իրավացի էր Գր. Զոհրապը, երբ «հասարակության մը բարոյական անեացման» հետ էր կապում ազգային թատրոնի կործանումը: Մնակյանի մեղքով չեր, որ կործանվում էր թատրոնը,

և ոչ էլ միայն թատրոնն էր կործանվողը. անկում էր ապրում պոլսահայ հասարակական կյանքն ընդհանրապես: Իսկ թատրոնը ոչ թե մի հարվածով էր կործանվել, «այլ հանդարտիկ ալիքներով ամենօրյա լիզումով, խարտոցի համառ ու հարատն աշխատությամբ»: «Եվ ի՞նչ կուզեք, որ ըլլար թատրոնի ճակատագիրը,—շարունակում է Զոհրապը,—այն միայն կանգուն ու բարձր մնար, եթե ամեն բան մեր մեջ կիյնար, կը ցածնար իր շուրջը»¹:

Մնակյանը լավ գիտեր նաև, որ ազգային թատրոնը պետք է բարձրանար միայն ազգային դրամատորգիայի վրա: Եվ նա փորձում է դիմել հարցի այդ լուծմանը:

1893 թվականի հունիսի 27-ին առաջին անգամ Մնակյանի թատրոնում բեմադրվում է Պետրոս Դուրյանի «Թատրոն կամ թշվառներ» դրաման²: Մնակյանը կատարում է Մուրադովի դերը:

Մնակյանը վաղուց էր ծանոթ Դուրյանի այս պիեսին և հրաժարվել էր այն բեմադրելուց, անվանելով «տղայական»: Դերասանապետու իրավացի էր այնքանով, որ բեմադրած թարգմանական պիեսներից շատերը («Դարբնոցապետ», «Տիկ. Մանկոտեն», «Զազա», «Սյուզան Նմբեր», «Քամելազարդ կինը» և այն) գեղարվեստական արժանիքներով անհամենան բարձր էին, քան Դուրյանի պիեսը: Մնակյանի թատրոնում քիչ չէին ինարկե գեղարվեստական խորություն զորիկ գործերը, քայց դրանք գրված էին խվելի շատ

¹ Գր. Զոհրապ, Երկերի ժողովածու, հ.2, էջ 303—305:

² «Արևելք», 1893, թիվ 2819:

գործնական նկատառումներով՝ միայն բեմադրվելու համար։ Այդ պիեսները բեմականության առումով որոշակի արժեք էին ներկայացնում։ Անկասկած, Դուրյանի «Թատրոն կամ թշվառներ» դրաման ուներ այնպիսի արժանիքներ, որոնցից զուրկ էին Մնակյանի թարգմանություններից շատերը։ Հայ պատմա-հայրենասիրական ողբերգությունների ֆոնի վրա Դուրյանի դրաման, իր ուժեղ արտահայտված սոցիալական բովանդակությամբ, հետաքրքիր և բարձր երևույթ էր։ Շատերին տարօրինակ և անհանդուրժելի էր երևում այն փաստը, որ թեև քառորդ դար էր անցել պիեսի ստեղծումից, բայց այն մնացել էր առանց բեմադրվելու։ «Դուրյանի «Թատրոնը» իր արժանավոր ներկայացումը պիտի ունենա», —գրում էր Գր. Զոհրապը, գտնելով, որ չեայած ոճական թերություններին և մի քանի տեսարանների պակաս բեմական լինելուն, պիեսն իր ամբողջության մեջ «հաստատ և գեղեցիկ է. ամեն պարագայի մեջ նորելուկ թատերգությանց նման անշահ խոսակցությանց շարք մը չէ»¹։

Եվ ահա, Զոհրապի այս հոդվածի հրապարակումից մեկ-երկու շաբաթ անց Մնակյանը ձեռնարկում է Դուրյանի «Թատրոն կամ թշվառներ» դրամայի բեմադրությունը։ Ամենից առաջ նա կոմպոզիցիոն վերամշակման է ենթարկում պիեսը։ Կրճատում է որոշ հատվածներ, փոխում է մի քանի տեսարանների հաջորդականությունը։ Այս ձևով, Մնակյանն աշխատում է շուկել պիեսի այն պակասությունները, որոնք գալիս էին պատանի հեղինակի բեմական արվեստի օրենք-

¹ Գր. Զոհրապ, Երկերի ժողովածու, Բ.2, էջ 377—378։

Աերը լավ ուստմնասիրած չլինելոց: Դերասանապետը թերևս
 չէր փոխել իր կարծիքը պիեսի բեմական արժանիքների
 մասին, բայց չէր էլ կարող չնկատել, որ քառորդ դար առաջ
 գրված այդ գործը, որի հեղինակը հազիվ տասնյոթ տարե-
 կան էր, բարձրացնում էր իրեն և շատերին հուզող մի ցավոտ
 հարց՝ դերասանի սոցիալական ճակատագրի հարցը: Բեմա-
 դրության մեջ Մնակյանը շեշտը դնում է պիեսի այդ կողմի
 վրա: «Ներկայացման համեյսատեսներից մեկը՝ արձակագիր
 Անն Բաշալյանը գրում է. «Թատերաբեմին վրա դերասանը
 կը գանգատի, թե գրականությունը ապերախտ է մեր մեջ
 և հայ մատենագրին վախճանը ողորմելի»: Բաշալյանը նկա-
 տել է տալիս, որ ներկայացման մեջ ամենահովիշը եղել է
 «այն տեսարանը, որ կներկայացնե դերասաններու կյանքը,
 ցուրտին մեջ դողդողալով, բարակ հագուստներ հագած,
 կրակարանը իրարու ձեռքե խվելով»¹: Դա Մնակյանի թատ-
 րոնի պատկերն էր, և համեյսատրահում հայ մտավորական-
 ներից ամեն ոք զգում էր, որ Մնակյանն այդ ներկայացումով
 իր ողբերգության մասին էր պատմում, ողբերգություն, որ
 իրենը չէր միայն: Խսկ օթյակներից մեկում նասած նախկին
 դերասանապետ Վարդովյանը թաշկինակն աշքերին արտաս-
 վում էր:

Այդ նույն թվականին Մնակյանը բեմադրում է նաև
 Ժամանակակից հեղինակ Տիրան Փափազյանի «Ներկարա-
 դը» դրաման, այնուհետև՝ իր խաղացանկի լավագույն նմուշ-
 ը:

¹ «Հայունիք», 1893, թիվ 515:

Աերից մեկը՝ «Սյուզան Իմբեր» դրաման: Թարգմանում է Զուդերմանի «Պատիվը» (1892), որը չի հաջողվում բեմադրել: Այդ նույն թվականին նա բեմադրում է Ա. Չոպանյանի «Մութ խավերը»: Թատրոնի խաղացանկը բարձրացնելու համար Մնակյանն անում է այնքան, որքան հնարավոր էր անել անցյալ դարի 90-ական թվականների Թուրքիայում: Բայց որքան էլ Մնակյանը բարձր լիներ իր միջավայրից, որքան էլ բարձր լինենին նրա ստեղծագործական ըմբռնումները, այնուամենայնիվ նա մենակ էր՝ ճաշակներ վերափոխելու և հեղաշրջումներ կատարելու համար:

Այն ժամանակ, երբ Մնակյանը հայ թատերական կյանքի աշխուժացման փորձեր էր անում Պոլսում, Թիֆլիսի նոր կազմված «Թատրոնական մասնաժողովը» մտածում էր ուժեր հրավիրել Պոլսից: Մասնաժողովում կային մարդիկ, որոնց կարծիքով ամենից առաջ պետք էր հրավիրել Մնակյանին, որպես դերասան և ռեժիսոր: Տար տարուց ավելի էր անցել այն ժամանակվանից, ինչ Մնակյանը թողել էր Թիֆլիսը, բայց շատերի հիշողությունից դեռ չէին ջնջվել նրա անընդօրինակելի կերպարները: Մնակյանին հրավիրելու առթիվ «Արձագանքը» գրում էր. «Մենք մեր կողմից այ. Մնակյանի մասնակցությունն անհրաժեշտ ենք համարում նախ իբրև բազմակողմանի, փորձառու դերասանի և երկորդ, որ ավելի գլխավորն է, իբրև միակ հմուտ ռեժիսորի: Հույս ունենք, որ թատրոնական գործի ներկա կառավարիչներն աչքի առաջ կունենան փորձառու և հմուտ այ. Մնակյանին,

որին վաղոց փափագում է տեսնել Թիֆլիսի հայ հասարակությունը»¹:

Մնակյանը նամակով հայտնում է իր համաձայնությունը: Միաժամանակ նա ցանկություն է հայտնում, որ իր հետ միասին թատերախոսմբ ընդունվեն մի դերասան և երկու դերասանութի՝ «սուբրետ» և «էնժենյու» դերերի համար²: Մինչև իր նամակի պատճախանն ստանալը, Մնակյանն իր թատերախմբով կարծ ժամանակով մեկնում է Ադրիանապոլիս: Ահա այդ ժամանակ ընտանիքում պատահած մի անակնեալ դժբախտություն ստիպում է նրան առժամանակ հետաձգել դեպի Կովկաս կատարելիք ուղելիությունը: Ադրիանապոլսում, ներկայացումներից մեկի ժամանակ նրան է հասցվում իր կրտսեր որդո՛ Արշակի մահվան լուրը: Այս առիթով Շարասանը հետևյալն է պատմում. «Ադրիանապոլս մեջ ներկայացման մը պահուն գումզեցավ իրեն, զավկին՝ Արշակին մահը, որ Կ. Պոլիս պատահած էր: Դերասաններ ու հանդիսականներ կուգեն խաղը ընդհատել այդպիսով հասկցնելու համար, թե իրենք ալ կը մասնակցեն մեծ արվեստագետին կրած անդարձմանալի ցավին: Սակայն Մնակյան կը մերժե. արվեստին սերը տիրականորեն կուգա գոցելու իր հայրնեկան ալեկոծված գգացումները: Կը խաղա և հիանալի կը խաղա: Ալպերի («Հավատք, հույս, սեր») դերին մեջ այս անգամ գերազանցություն մը կը դնե. Կեղծ արցունքներ, շինծու ճիշեր չկան այլնս. ճշմարիտ արտա-

¹ «Արձագանք», 1893, № 85:

² Նոյն տեղում:

սուբի կաթիլներ, սրտին խոր ու քզկտված անկյուններնեն հնառաշներ դուրս կը ժայթքեին, և ամբոխը որոտընդոստ ծափերով, սրտահույզ բացականչություններով յոթն անգամ բեմ կը կանչե արվեստին այս անձնադիր ուստյալը»¹:

Ներկայացման հաջորդ օրը Մնակյանը վերադառնում է Պոլիս: Այդ նույն տարի Թիֆլիս է մեկնում Ազնիվ Հրաչյան: Նրա հետ միասին մեկնում են Մնակյանի թատրոնի դերասաններ Ռուբեն և Աղավնի Բիննեմեճյանները:

Հաջորդ տարի՝ 1895-ին սովորանական կառավարության ազգային հաղածանքը հայերի հանդեպ այնպիսի չափեր է շնորհնում, որ Պոլսից շոգենավով Ռուսաստան մեկնելը դառնում է անհնարի: Իսկ հայկական ներկայացումները իսպան դադարեցվում են, լիներ այդ մայրաքաղաքի կենտրոնում, թե՛ արվարձաններում: Քաղաքական սարսափները գալիս են վերջ դնելու Մնակյանի ազգային թատրոնը վերականգնելու ձգտումներին:

1895-ի աշնանը Թուրքիայի հայաբնակ գավառներում և Արևմտյան Հայաստանի բոլոր վայրերում կառավարության նախօրոք կազմած ծրագրով սկսվում է հայերի մասսայական ջարդը: Այս անգամ ջարդեր են տեղի ունենում նաև մայրաքաղաքում, որ գոհերի թիվը հասնում է ութ հազարի:

Պոլսում վերջին հայկական ներկայացումը եղավ Ա. Չոպանյանի «Մոլո խավերը»՝ 1895-ին: Այլևս ինչ հայ թատ-

¹ Ծարասան, էջ 44—45:

րոնի մասին կարող էր խոսք լինել, երբ վտանգի տակ էր դրված հայ ժողովրդի ֆիզիկական գոյությունը:

* * *

Սկսած 1895-ից մինչև 1908-ի երիտթուրքական հեղափոխությունը Պոլսում հայկական ներկայացումները պաշտպապես արգելված էին: Այդ տասներեք տարիները Մնակյանի կյանքի ամենառիջերգական տարիներն էին: Բայց կրելով ամեն տեսակի գրկանքներ, նա չի ընկճվում ոչ ֆիզիկապես, ոչ էլ բարոյապես: Նա ապրում էր Գատըգյուղի իր համեստ թնակարանում կնոջ ու երկու որդիների հետ, որպես ազնիվ ամուսին ու հոգատար հայր և հավատացյալի մոլեռանդությամբ շարունակում էր իր գործը, շարունակում էր պահպանել իր խումբը, որպես միակ եվրոպական տիպի թատրոնական կազմակերպությունը սովորանական Թուրքիայի մայրաքաղաքում, շարունակում էր անդավաճան մնալ իր արտիստի կոշմանը և արժանապատվությամբ կրել այն: Իր ընտանիքի և իր դերասանների «անորի չմնալու» հոգսն ուսերին, նա շարունակում էր քայլել գլուխը բարձր և անվրդով հպարտությամբ, եվրոպական ևս ուղինագոտը հագին, բարեկազմ և գեղեցիկ, միշտ սպիտակ, մաքոր օճիքով և սև, փայլուն փողկապով: Տաճկական կարմիր ֆեսի տակից դորս ցըցված ծխագույն, նուր մագերը մատնում էին նրա տարիքը, իսկ սև ներկված բեղերը նրան նմանեցնում էին իտալացի գաւարույր դերասաններին: Ժամանակակիցների պատմելով,

Մնակյանը չէր սիրում ժողովատեղիներ հաճախել, չէր սիրում հասարակության մեջ երևալ և իր բոլոր ազատ ժամերին, նատած իր փոքրիկ աշխատանենյակում, կարդում էր «Անծ վարպետներու թատերական արվեստի վերաբերյալ երկերը, քննադատությունները, ֆրանսիական րեպերտուարին երկդարյա գործերը»¹: Սովորություն է ունեցել միշտ կարդալ իրեն հասնող եվրոպական լրագրերում հրապարակված բոլոր թատերախոսականները, հոդվածները և հանդիպողի հետ «գեղարվեստն զատ որևէ նյութի վրա» չխոսել: «Այս է իմ կոչումս,—հաճախ ասել է նա,—բնությունը անսահման օվկիանոս մէ, հառաջադիմությունը մասնագիտությամբ կարելի է»²: Կամ՝ «ամեն ոք իր սիրուին ունի, իմ սիրուին աղ բեմին տախտակներն են»³: Եվ Մնակյանն ապրում էր իր ստեղծած աշխարհում, իր «սիրուին» հետ, կտրված հասարակական իրականությունից, հեռու իրական աշխարհի ցավերից: Իր փայտաշեն թատրոնում նա իրեն երեվակյում է եվրոպական բեմերի դերասան՝ Սալվինիի և Ռուսիի եղբայրը, մտովի գրուցում էր նրանց հետ, իսկ փորձերի ժամանակ սիրում էր խոսել հայերենի և իտալերենի խառնուրդով: «Երդվալ արտիստ», թատրոնական գործի ֆանատիկ: Այսպես կարելի է կոչել 90—900-ական թվական-

¹ Կենսագրական Մնակյանի, էջ 11:

² Նույն տեղում:

³ Է. Թոլայանի ձեռագիր նիշողություններից:

Աերի Մնակյանին: «Պատահական չէ, որ ժամանակակիցները հիացմունքով խոսելով նրա Քինի մասին, միշտ հիշում են նրա խրոխտոթյամբ արտասանված խոսքերը. «Պետք է ավարտել այնպես, ինչպես սկսար, պետք է մեռնիլ այնպես, ինչպես ապրեցար. մեռնիլ, ինչպես մեռավ Մոլլեր՝ ծափահարությանց, սովորեներու և կեցցեներու ժխորին մեջ»:

Մնակյանի թատրոնը նման էր անցյալ դարի Փարիզի «բոլվարների թատրոններին», որոնց թեմերում 60—70-ական թվականներին փայլել էին Ֆրեդերիկ Լեմերը և Պոլ Թազադը: Այժմ XIX դարի վերջը և XX դարի սկիզբն էր: Մելոդրաման այնքան էլ հարգի չէր Եվրոպայի կանոնավոր թեմերում, բայց Ֆրեդերիկի հետևողդները դեռ կենդանի էին և չէին կորցրել իրենց հմայքը: Բերայի թատերաբարաններում մելոդրամատիկ ռեպերտուարով երբեմն երևում էին ֆրանսիական բեմի վարպետներ Էժեն Սիլվենը և Ալբեր Լամբերը: Կյանքը փոխվել էր, փոխվել էին թատերական արվեստի չափանիշները, բայց մելոդրամայի «վերջին մոհիկանները» իրենց հին երգն էին երգում: Եվ այդ երգը լսողներ դեռ շատ կային: Իր հին երգն էր երգում և Մնակյանը, որ ամեն երեկո Գատը գյուղի փայտաշեն թատրոնում խաղում էր «աստոծն արդարությունը» որոնող, դժբախտ, հալածված ու դատապարտված առաքինի մարդու դերը: Թշվառ հայրեր, խարված ու լրված ծերունիներ, որ ամեն տեսակի գրկանքներ ու անհրավություններ կրելով, պիեսի վերջում հասնում են արդարության հանգրվանին: Սա է Մնակյանի խաղացած բազմաթիվ դերերի ամբողջ բովանդակությունը: «Աստոծն արդարութերերի ամբողջ բովանդակությունը:

թյունը երբեք չի կորսվիր», «զավակս, ներեցի գքեզ, թևերիս մեջ եկուր», «օ՝ աստված, որքան մեծ է քո արդարությունը. այսպիսի ու նման խոսքերով են վերջանալիս եղել Մնակյանի այս շրջանում խաղացած գրեթե բոլոր դերերը: Հանենք բոլոր պիեսներից չարի կործանման և առաքինության հաղթակալի մասին բարոյախոսությունը և կտեսնենք, որ Մնակյանը բեմում պատկերում էր այն մարդու տառապանքները, որ ապրել է իր ամբողջ կյանքը, առանց ճանաչելու մարդուն և աշխարհը, առանց իմանալու, որ ինքը խարված ու կողոպստված է եղել: Դա նման էր շեքսպիրյան Լիրի ողբերգությանը, դա իր՝ Մնակյանի ողբերգությունն էր: Հայ հանդիսատեսն այդպես է ընկալել նրա ներկայացումները: Ահա թե ինչ է պատմում բանասեր Սիրունին Մնակյանի խաղից ստացած իր առաջին տպավորության մասին. «Ոչ թատրոնը կիմշեմ հիմա, ոչ ալ ներկայացուցած թատերախաղը: Կիմշեմ միայն, որ որդեկորուս հոր դեր մը կխաղար լաղով ու լացնելով արահը: Հոգված էի և ես: Բայց խաղը չէր, որ զիս հափշտակած էր: Ինձի այնպես կթվեր թե բեմին վրա Մնակյանն իր երգը կերգեր. «Հերիք որդյակը, այսքան տարվան տառապանք»¹:

Մնակյանը բեմի վրա է, բոնադատված արդարությունը մարմնավորող հերոսի դերում: Պիեսը մեծ է՝ մոտ 10—15 պատկերից, և այդ ընթացքում հուզման ու ցնցումի սիրահար

¹ Հ. Սիրունի, Մնակյան իմ հուշերուս մեջ: Մնակյանի այս երգը ժամանակին եղել է տարածված հայրենասիրական երգերից մեկը, և հրապարակվել է Միանարդյանի «Քնար Հայկականում»:

հանդիսականների բազմությունը, տառապում է հալածվող հերոսի հետ: Թաշկինակներ են թրջվում Մնակ Էֆենդիի համար, ատամներ են սեղմվում չար ուժու անձնավորող Ալիքսանյանի դեմ... մինչև վերջին արարվածի սկիզբը, երբ արդարությունը ցույց է տալիս իր լուսաճանանշ դեմքը. Մնակ Էֆենդին հաղթանակում է, իսկ Ալիքսանյանը զնդան է նետվում, մեռնում կամ խեղագարվում: Վարագույրն իշխում է ծափերի աղմուկի մեջ: Մնակյանը դուրս է գալիս բեմառաջք, խոնարի ու գոհունակ գլուխ տալիս:

—Դերերնիդ հիանալի կատարեցիք Մնակյան Էֆենդի,
—կովիսներում նրան է դիմում մի հիացած թատերասեր:

—Չէ տղաս, ոգածիս պես չէ ու չպիտի ըլլա. և սակայն ասկից ավելին ալ չի կրնար ըլլալ,—պատաժանում է Մնակյանը հիացած թատերասերին:

Հաջորդ օրը Մնակյանն իր տաճը գրուցում է նույն թատերասերի հետ:

—Կը մտածեմ,—ասում է դերասանապետը տխոնր ժպիտով,—թե ի՞նչ անցավ ձեռքս այսափ աշխատության փոխարեն: Եթե այսքան ուժ ու կորով որիշ գործի մը տայի, հիմա երջանիկ, շատ երջանիկ եղած կըլլայի»¹:

Մնակյանին չեն գոհացրել ոչ իր դերերը, ոչ էլ հանդիսատեսի ծափերը: «Եթե օր մը հայտնի թատերական նազով-րեցի մը, կառնե խարազանը և ամենքիս ալ կվանե այս տաճարեն, ըսելով «Տուն իմ տուն աղոթից կոչեսցի, բայց դուք արարիք այրս ավազակաց. դուք ինչով եք արժանի

¹ «Սուրբանդակ», 1900, թիվ 444, 445:

հաջորդելու Տալմային, Լըկենին, Կլեոպատրին, Գարրիկին, Լըմեթրին»¹: Այսպես է գրել նա տարիներ անց իր համակներից մեկում:

Մնակյանի խաղի ոճը մելոդրամայի «վերջին մոհիկան-ների» ոճն էր՝ իր բոլոր առավելություններով ու թերություններով: Թերությունների աղբյուրը մի կրդմից միատեսակ խաղացանկն ու միանման դերերն էին, մյուս կրդմից՝ օդին, որին նա անձնատուր էր լինում քեմում հոգեկան լիցք ստանալու համար: Ժամանակի ընթացքում նա սովորություն է դարձնում խաղը կառուցել միայն մելոդրամատիկ էֆեկտների, սրտակեղեք հարվածների և մի քանի քեմական տրյուկների վրա: Էֆեկտը սկավում էր դերասանի հետոց առաջին մուտքից և կարող էր նույն ձևով կրկնվել տարբեր ներկայացումներում: Մտնելուց առաջ ոտների դոփյունով, ձայնով, կամ քեմի ներքեւից լովող երաժշտությամբ իմաց տալ հանդիսատեսին՝ նախապատրաստել մուտքը և հետո այնպես մտնել, որ դառնալ ուշադրության կենտրոն, հանդիսատեսի ծափերն ընդունելուց հետո փոքր դադար տալ՝ կենտրոնացնել հանդիսատեսին, սպա առաջին խորից ամբողջ հանդիսարարիը վերցնել իշխանության տակ և «կոկորդեն բռնած տանել մինչև տռամին վախճանը»: «Գերիվեր կարողությամբ մը հանդիսականներու կուրծքին տակ մեծամեծ հուզումներ, դժնդակ ցավեր ու խորին երանություններ ստեղծելու մոգականությունը ունի»,—գրում է Շարասանը և հետո ավելացնում. «Այսուամենայնիվ Մնակ-

¹ Թեսոդիկ, Ամենուն տարեցուցը, 1910, էջ 380:

յան՝ մամավանդ իր բեմական գործունեության վերջին շրջանին՝ զերծ չէ մնացած թերություններեւ, որոնցն գլխավորն է իր հակումը դեպի հանդիսավորություն, շափականցություն, կացության հետ անհամեմատական դառնար միտում մը»¹:

«Մնակյանը լավ դերասան է, եթե չհարրի, գիտե ոսումնասիրել իր դերերը»², —գրում է Ազնիվ Հրաչյան 900-ական թվականների Մնակյանի մասին: «Մնակյան հարմարվելով միշավայրի ճաշակին, —գրում է ժամանակակիցներից մեկ ուրիշը, —հարմարած էր խաղերուն, և իր ունեցած տաղանդը խաղանի մը ինքնասահ հոսանքին հանձնելով իր արժանիքները թափած էր ծովու մը մեջ... մեռյալ»³: Բայց այստեղ էլ Մնակյանի մեջ իրեն զգացնել էր տաղիս նախկին կրակը իր մարվող, վերջապահային գեղեցկությամբ: Հանդիսատեսը երբեք չէր դադարում նրանով հիանալուց և Գատըգյուղի թատրոնն ամեն անգամ դդրդում էր ծափերից, երբ բեմ էր մտնում պատկանելի ծերունին:

Գատըգյուղի թատրոնն ապրում էր իր ուրույն կյանքով, կարծես անտեղյակ աշխարհի անցուդարձին: Թատերախումը երբեմն շրջում էր Պոլսի մի արվարձանից մյուսը, երբեմն էլ՝ գավառական քաղաքներում: Այդ նույն ժամանակ Բենայի «Վարյեթե», «Դիրեքլեր—Արա» և «Օդեն» կոչվող թատերասրահներում երկրորդական թատերախմբերի

¹ Ծարասան, Եշված աշխ., էջ 48:

² Ազնիվ Հրաչյա, էջ 179:

³ Թեոդիկ, Ամենուն տարեցույցը, 1920, էջ 418:

հետ երբեմն երևում էին Սառա Բեռնարդ, Ռեժանը, Սյուզան
Դեպրեն, Մունե Սյովլին, Կոկլենները: Ահա մոտավորապես
անցյալ դարի վերջի և մեր դարի սկզբի թատերական Պոլսի
պատկերը: Համիդի գրաքննությունը համեմատաբար զիշող
էր եվրոպական խմբերի ու դերասանների հանդեպ: Այստեղ
դեր ունեին այն կապիտուլյացիոն պայմանագրերը, որոնցով
Թուրքիան տնտեսական ու քաղաքական կախման մեջ էր իր
արևմտյան «հովանավորներից»:

Մնակյանը և թուրքական զավեշտախմբերը գրկված էին
այն իրավունքներից, որոնցից օգտվում էին եվրոպացի ոչ
միայն առաջնակարգ, այլև երկրորդական դերասաններն ու
թատերապետները: Մնակյանը բռնել էր հարմարվելու
ճանապարհը: Ունենալով Պոլսի քաղաքագլուխ Ռըտվան
փաշայի հովանավորությունը, նա ինքն էր ստանձնել իր
պիեսների գրաքննությունը: Ծրջապատում այնքան լրտես-
ներ կային, որ իրավունք և ապահովություն ունենալու
միակ ելքն այդ էր: Միայն Պոլսում «ջունալջինների»
(լրտեսների) թիվը հասնում էր երեսուն հազարի: Բայց միշտ
չէ, որ Մնակյանի զգուշությունը փրկում է նրան: Դեպքեր են
պատհում, որ մի բարի համար ոստիկանությունն ընդհա-
տում է ներկայացումը և հաջորդ օրը Մնակյանը քաղաքա-
պետարան է կանչվում: Դերասանապետին հոգնեցրել էին և
իր դերասանների Այութական անապահովությունը, և գրա-
քննությունն ու լրտեսները, և դերասանական ընտանիքը
քայլայող անդրկուլիսյան գժտությունները: «Շատ, քիչ
կկառավարեմ խումբը. մեկուն երեսին կըխնդամ, մեկուն

երեսին կուլամ, մեկուն լուրջ խաղ կիստանամ, մեկուն՝ «դաշուցն ու թույն», մանավանդ կցավիմ անանկներու վրա, ովքեր թևերուս տակ ապաստանելով զիս մրոտելու կելլեն»¹: Այս խոսքերով է Մնակյանն ավարտում իր՝ ինքնակենսագրությունը 1901 թվականին:

900-ական թվականներին Պոլսում գնալով շատանուն են Մնակյանի հակառակորդները: Դրանք եվրոպական կրթություն ստացած թուրք մտավորականության ներկայացուցիչներն էին, մտահոգված թուրքական ազգային թատրոնի ստեղծման գաղափարով: Քննադատվում էր Մնակյանի թատրոնի խաղացանկը, Մնակյանի թարգմանությունների լեզուն, հայ դերասանների թուրքերեն վատ իմանալը և վատ արտասանությունը: Այդ պայքարի նպատակն էր ազատել թուրք թատրոնը հայ դերասաններից, և «հայու թուրքերն-նից»: Թուրք մտավորականությունն այստեղ առաջնորդվում էր միայն ազգայնական տրամադրություններով, իսկ մելոդրամայի հանդեպ բռնած դիրքում չէր ելնում ավելի բարձր գեղագիտական սկզբունքներից: Զափանիշն այստեղ ոչ թե եվրոպական դասական դրամատորգիան էր, այլ ժամանակակից, մոդայական «ֆարս-ֆրանսեզ» կոչված ժանրը, որի ամենամոլի շատագովը Ռեշտ Ռըտվանն էր՝ Պոլս քաղաքագլուխ որդին:

Այս շրջանում դերասանապետն սկսում է ավելի հաճախ ներկայացնել «Տիկին Մանկունք», «Դարբնոցապետը»,

¹ «Լույս», 1901, թիվ 37:

«Քամելազարդ կինը», «Սլուգան Խմբերը» և իր խաղացանկի այն պիեսները, որոնցում հիմնականը ոչ թե արկածային տարրն էր, այլ կնոջ ազատության, ազատ սիրո, ընտանիքի սրբության և ամուսնական հավատարմության քարտը: Այս մոտիվն ողեկցում էր Մնակյանին սկսած 90-ական թվականներից, և նոյնիսկ ավելի վաղ: Այսուղև Մնակյանի մեծագույն ծառայությունն այն էր, որ նա իր թատրոնում ներկայացումներ էր տալիս նաև կին հանդիսատեսի համար: Կանանց համար նախատեսված այդ ներկայացումները տեղի են ունեցել ցերեկվա ժամերին և շարունակվել են կանոնավոր կերպով՝ ամսվա ընթացքում մի քանի օր: Մնակյանի կազմակերպած ներկայացումները համընկնում են այն շրջանին, երբ կնոջ հասարակական դերի հարցը դարձել էր համակվորպական քննարկման պողորդա: Ֆեմինիզմը, որպես գաղափարախոսություն, առաջ գալով բորժուական հեղափոխությունների ժամանակաշրջանում, առանձնահատուկ պրոբլեմ էր ստացել XIX դարի վերջին տասնամյակում, երբ ազգային ֆեմինիստական կազմակերպությունները միավորվել էին որպես միջազգային կազմակերպություն: (1888-ին հիմնվել էր «Կանանց միջազգային խորհուրդը», իսկ 1902-ին՝ «Հնարական իրավունքի և իրավահավասարության համար կանանց պարարի միջազգային միությունը»):

Մնակյանի թատրոնի հանդիսատեսն են եղել հիմնականում բարձր դասի կանայք: Անցյալ դարի թուրքական իրականության մեջ գրեթե անհնար էր որևէ կերպ թատրոնի նետ կապել ցածր խավի կանանց, բայց և փոքր քանի չեղ

Փեմինիզմի գաղղոփարակիր լինել մի հասարակության մեջ, որը դեռ ազատ չէր տպիական բռնակալության և մահմետական կրոնամոլության կապանքներից: Մնակյանի այս ծառայությունը ժամանակին բարձր է գնահատել նաև բանասեր Սմբատ Դավթյանը: «Քիչ չեն այսօր այն թրքութիւնները, որոնք Մնակյանի անձը կնկատեն իրեւ վարդապետ մը, առաքյալ մը, որ իրենց հերշնչած է ազատագրումի գաղղափարներ»¹: Բայց անմասնական մացարք նախորդ է առաջակայացնելու համար:

Մնակյանի 900-ական թվականների գործութեառությունը մասսմբ լուսավորական բնույթի է: Դա պետք է համարել համապատրաստական շրջափոկ թորք ազգային թատրոնի համար: Մնակյանը ետք էր մնացել իր ժամանակի թատերական արվեստի պահանջներից, երա բեմական դպրոցը անցյալին էր պատկանում, թորք թատրոնի համար անընդունելի էին Մնակյանի հայատու և հայկական շրջադատթյամբ թադրմանված եւլորպական մեղողամաները, երա այնդամ բեմպերան լեզուն, բայց անգեահատելիորեն մեծ էր երա գործութեառության բարոյական նշանակությունը: Մնակյանի վաստակնեալն էր, որ իր «անհոնց աշխատանքով ու երլրածել կամքով ստիլում» էր թորք հանդիսատեսի հարգել թատրոնը և նրա աշխատավորներին², որ քառորդ դար շարունակ «կարագիողի», «օրթա օյունոի», «թյուլուաթի» համեյսատեսի մեջ դաստիարակում էր գրական թատրոնի գաղղափարը, բարոյական հոդ և մթնոլորտ համապատրա-

¹ «Մանզումի Եֆրայր», 1912, թիվ 2507:

² В. Папазян, История развития турецкого театра.

տում ապագա թուրք պրոֆեսիոնալ դրամատիկական թատրոնի համար: Եվ այդ բանն արվում էր Թուրքիայի համար այնպիսի մոռալ ժամանակաշրջանում, որին թուրք պատմաբաներն անգամ տալիս են «զուլում» անունը:

1904-ին Մնակյանի թատրոնին հանում է ամենածանր հարվածը. կառավարական հրամանով մայորաքաղաքում արգելվում են բոլոր տիպի թատերական ներկայացումները, բացի եվրոպականից: Որտվան փաշան Մնակյանին հրավիրում է իր մոտ և պաշտոն առաջարկում քաղաքապետարանում: Մնակյանը մերժում է փաշայի առաջարկը և որոշում ներկայացումները շարունակել Պոլսից դուրս:

Երկու տարի շարունակ Մնակյանի թատրոնը շրջում է Թուրքիայի ծովափենյա քաղաքներում: Շատերը կարծում են թե նա հեռացել է բեմից, իսկ ումանք էլ, Մնակյանի Պոլսից դուրս գալուց հետո, նրա մահվան լուրն նև տարածում: Մի քանի լրագրեր նույնիսկ մահախտականներ են հրապարակում: Եվ անսպասելի, և իրոք անհավատալի էր Մնակյանի մահը: Զրկանքների ու փորձությունների միջով անցած այդ տոկուն և համառ մարդը չէր կարող այդպես անսպասելի, պատահական դիպվածով մեռնել: Նրա գործակորի համբերատարությունը այնպիսի հավատ էր ներշնչում շրջապատին, որ թվում էր, թե նա նույնիսկ չի ծերանում, չի փոխվում: Թվում էր, չեն փոխվում նրա տաճկական ֆեար, սաթե համրիչը, եվրոպական ոեդինգոտը և սև ներկված բեղերը, թվում էր հենց այնպես ծնվել էր նա ու այնպես էլ պիտի մնար՝ իր հանդիսավոր կեցվածքով, դողացող բարիտոնով և արտիս-



Մնակյանը Քինի դերում



տիկ խոսելակերպով: «Սովորական և գիծերուն մեջ իր մահը ծանուցանող երկու տող կարդացած ըլլալով, միամիտ պատրանքն ունիմ, թե վաղը սուս պիտի ելլե այն զրուցը, որ ամեն կողմ տարածված է», —գրում էր պատմաբան Արշակ Ալպոյանցանը Մնակյանի կարծեցյալ մահվան առթիվ¹:

Մի քանի ամիս անց նոյն լրագրերը, որ մահախտականներ էին տպագրել Մնակյանի մասին, լորեր են հաղորդում Սամսոն, Ռոդոստ, Տրավիզոն, Բորսա, Դարդանել քաղաքներից՝ Մնակյանի թատրոնի ներկայացումների մասին:

1906-ին Պոլսում վերացվում է ներկայացումների արգելքը: Մնակյանը վերադառնում է մայրաքաղաք: Դատարկ սրահների առջև մի քանի ներկայացումներ տալուց հետո, նա նորից իտալացի «կապակոմիկոների» նման բռնում է գավառական թափառումների ճանապարհը:

Խումբը վերջին անգամ Պոլիս է վերադառնում 1906 թվականի սկզբում՝ երիտրուրքական հեղափոխության նախօրեին:

¹ «Քյուզանիոն», 1904, թիվ 2256:

ու շատ շատրածք ու սպառապուն» քայլութերինու բառ
ամսություն կարդաց նազարյանի ըստ ուղարկ բանականու գիշե
առ պահապահ օնու մեջ իրավու ուստի ցըսափ և անմասն մասնակությունը
նաշան նացունաւառ ով նույր—, ու նախճակառ նյամ ունաւ
։ Քիչպա նախճան քայլանու մասնակությունը քայլանու մասնակությունը
առուստանան որ ցպաքքարուց մասն զնաւ տիտա վանագ քն
-ցըսան նա թըսաց միսան մասնակությունը քըսաքարու նոյն զնանամ
յմաքըսաթ ասութ մարզասազ ասութ մարզան մարզան նույր
-ուն վայելնուոց ՀՆԻ ԵՎ ՆՈՐԻ ՍԱՀՄԱՆԻ Վ ընդհանուր

Յուրօրինակ զինվորական խոռվություն էր 1908-ի
«երիտրուրբական» հեղափոխությունը, որի անմիջական
արդյունքը եղավ 1876-ի սահմանադրության հոչակումը:
Թուրքական հեղափոխությունը XX դարի սկզբում ամենա-
սահմանափակ և ամենաթույլ կառավարական հեղաշրջում-
ներից մեկն էր: Դա փաստուն ոչ թե հեղափոխություն էր,
այլ բնակալ միավետի դեմ ուղղված եր՝ ճարպիկ դավա-
դրություն, որի նպատակն էր վերականգնել բնադրաված
«օրինականությունը»: Հեղափոխության անմիջականորեն
նախորդել էին ցուցերն ու խոռվությունները՝ Մակեդոնիայի
քաղաքներում և Երգրումի ապատամբությունը (1907): Այս
ամենի ավարտը եղավ այն, որ «Իթթինադ վե թերաքի»
(«Միասնություն և առաջադիմություն») կուսակցության
պարագլուխները Սալոնիկից հեռագիր ուղարկեցին սուլթա-
նին, «քանակի և ժողովրդի» անոնից պահանջելով վերա-
կանգնել երեսուն տարի արգելքի տակ դրված սահմանա-

դրությունը։ Ահաբեկիված սովորանը՝ «ողորմածաբար» սովորագրեց սահմանադրության հոչակման «իրադեն» (հրամանագիրը), և հուլիսի 25-ին Պոլսի առավոտյան լրագրերում մարդիկ տպարակուած և սարսափով կարդացին խոշոր տատերով գրված «սահմանադրություն» բառը։ Դա արդյոք չար կատակ չէ՞ր, սարքված սովորանը լրտեսների կողմից, սահմանադրականներին որսալու համար։ Ահաբեկիված այս մորթից, շատերը դեռ հետեւցին թերթերը։ Օրն անցավ սովորականի նման, կարծես ոչինչ չէր փոխվել և սրան հաջորդեց «հուրիեթի գինովորությունը»՝ համընդհանուր ոգեվորություն և միտինգներ, ճառեր, կեցցեներ ի պատիվ սահմանադրության և «ողորմած» փառիշամի։

Հունիսի 26-ին Մնակրանի թատրոնի վարագույրը բացվում է «Համիդիե» հանիֆակոր քայլերգի հաջուների տակ, խորու բազմության ծափերի ու կեցցեների աղմուկի մեջ։ Դերասանական խոմքը բեմ է նտնօւմ Օսմանյան պետական դրոշը պարզած, ողջունու հասարակությանը և «փառիշամի չոգ լաշա» («կեցցե փառիշամի») երից աղադակելուց հետո սկսում ներկայացումը։ Թվում էր, թե պիտի վերածնվի երեսու տարիների ընթացքում կործանվածը։ Այդ սպասմով էլ լրագրերը կեցցեներ էին հոչակում «վեհ սովորանն» իր «շնորհած» ազատության համար և գրում, որ Մնակրանի թատրոնը «պիտի ներկայացնե տեղական կյանքե թատերախաղեր, ինչպես նաև հայ կյանքե հայ լեզվով ներկայացումներ»։

«Մանգումի Եֆրամ», 1908, թիվ 2176:

Սահմանադրական «գարուն» անցավ երկիշխանության պայմաններում: Համիդը մնաց գահի վրա, իրենց տեղերում մնացին բոլոր նահանգապետերն ու աստիճանավորները, բայց կառավարումն անցավ իթթիհադականների ձեռքը: Խսկական հեղափոխությունն իրագործվելու էր մեկ տարի հետո, Համիդի տապալումով: Ազատ արձակվեցին 40. 000 բանտարկյալներ, վերադարձան քաղաքական վտարանիները, վերացավ բացահայտ լրտեսությունը և... գրաքննությունը: Համենիհանուր ոգևորության օրերին Պոլսում մահմենդականների մի մեծ բազմություն այցելում է հայկական գերեզմանոց և պակեներ դնում համիդյան շարդերին զոհ գնացած հայերի գերեզմաններին, իսկ Բեյրութում թուրք սպաններն ու զինվորները հայկական եկեղեցում մասնակից են դառնում բռնակալության զոհերի հիշատակին տրվող պատարագին: Թերթերը ողողվում են հավասարության և ազգային եղբայրության կոչերով: Այդ նույն տրամադրությամբ, Մհակյանը թուրքական թերթերից մեկում գրում էր, որ ծառայելով թուրք թատրոնին իր նպատակն է եղել «հայրենակից եղբայրներուն մեջ ևս տարածել թատրոնի ճաշակն ու սերը»: Դերասանապետը ժողովուրդների մշակութային մերձեցման կոչ էր անում: «Եթե միայն հայ թատրոնին համար աշխատինք,—գրում էր նա, —մեր հայրենակից եղբայրները ետ ձգելով մշակույթի այդ մարզին մեջ, մենք մեզի համար վնասակար գործ կատարած կը լլամբ, նման Նասրեդին հոճային, որ իր նատած ծառին ճյուղը կը կտրեր: Ժողովուրդներու միահամուռ վերելքը պետք է կատարվի անկեղծ իրար օգնությամբ մը և մշտապես աշխատելով իրարու

զարգացնան, որպեսզի մարդիկ միաժամանակ հասնեն մտավորական և բարոյական քաղաքակրթության բարձրագույն մակարդակի, զերծ կրոնական ամեն կաշկանդումներեւ և նախապահարումներեւ»¹:

Մնալյանն ուզում էր հավատալ, որ այդպես կլինի և գգուչորեն թեմ էր հանում արցելված պիեսները: Դրանց թվում էին Նամքը Քեմալի «Վաթանը», Շիլերի «Ավագակները», «Փարիզյան բոհեմնեներ», «Մոմե արձան շինողը» մելոդրամաները և որիշ գործեր: Բայց Պոլսի թաղերում մի քանի ներկայացումներ տալուց հետո, Մնալյանը փորձում է հիմնովին փոխել թատրոնի խաղացանկը: Նա հանձնարարում է թուրք մի քանի թատերագիրների՝ գրել ներոսական դրամաներ թուրք ժողովրդի պատմական անցյալից: Մնալյանը գտնում էր, որ ժամանակի գաղափարներին ու տրամադրություններին արձագանքելու նպատակահարմար ձևերից մեկը ներոսական դրաման կարող էր լինել: Ծուտով նա սկսում է թեմադրության պատրաստել Սիլահ Զիմջողի «Սելիմ երրորդ» պատմական դրաման, որի հյութն առնված էր XVIII դարի վերջի քաղաքական դեպքերից, երբ Սելիմ երրորդ ստլթանը և Բայրակդար փաշան պայքարելիս են եղել հանուն կենտրոնացված միապետության, փորձելով եվրոպական ձև տալ օսմանյան պետական կարգին: Բայրակդար փաշան ենիշերիական տարերքի գոհ էր դարձել, իսկ նրա քաղաքական գործունեությունը Թուրքիայի պատ-

¹ Ե. Թոլայանի ձեռագիր նիշողություններից:

մության մեջ հիշվում էր որպես լուսավոր և հերոսական մի էջ:

Մեակյանը՝ ոգևորությամբ է, ձեռնամուխ լինում այս պիեսի հերկայացմանը, «քացաղկ աշխուժով մը» անձնավորելով Բայրակիդար փաշալի հերոսական կերպարը: «Սեղմ երրորդի» բեմադրությունը այս շրջանի թատերական կյանքի հզանակալից երևույթներից մեկը դարձավ: Դա առաջին բեմադրությունն էր, որով սկավեց թուրք դերասանների մուտքը Մեակյանի թատրոն: «Սեղմ երրորդին» հաջորդեցին թուրք հեղինակների նոր գործեր, որոնց բեմադրություններում հայ դերասանների հետ միասին մասնակից դարձան սպագա թուրք թատրոնի դերասաններ Նորեւին Ծեգաթին, Հասան Զեադը, Էյոր Սարրին, Օթելլո Քյամիլը և ուրիշներ:

Սահմանադրության հոչակումը մայրաքաղաքում առաջ է բերում թատերական կյանքի մի անսովոր աշխուժացում: «Արտասանության առաջին վարժություն կառարողը կը նետվեր բեմ, առաջին գրիչ բոնողը՝ արդեն թատերագիր էր դարձած»—գրում է ժամանակակիցը¹: Օր օրի կազմվուն են նոր թատերախմբեր, հրապարակ են գալիս սկսնակ թատերագիրներ, իրենց օրվա կյանք ունեցող պիեսներով, աշխաժանում են թուրքական զավեշտախմբերը, մի խումբ հայ երիտասարդ դերասաններ կազմակերպում են իրենց «Ազատ թատրոնը», որոշ ժամանակ անց գաստրոներով Պոլիսակադի Սառա Բեռնապը՝ իր մշտական խաղընկերը Մեսրոպ

¹ «Հուշարար», 1912, գիրք Բ, էջ 11:

Մաքսուրյանի հետ: Այս եռուգեղի մեջ բոլորովին անհետառ են անցնում Մհակյանի բեմադրած հայրենափական պիեսները («Վարդան», «Վասպուրականի հերոսները»): Եվ Պոլսի թատերական հորիզոնում փայլում է մի երրոր անոնք, խոստանալով պապայի Աղամյանը լինել: Դա երիտասարդ Վահրամ Փափազյանն էր, որ 1908-ի օգոստոսի 7-ին խաղում է իր առաջին Օթելլոն: Դրանից որոշ ժամանակ անց Պոլսի է այցելում Արելյան-Արմենյան թատերախումբը, և մի շրջան հայ հասարակությունը մտունում է ծերունի դերասանապետին ու նրա թատրոնը:

Մնակյանը և Գրի Զոհրապը պոլսահայ մտավորականության մեջ առաջիններից էին, որոց շնապեցին ողջունեց Արելյանի գալուստը: «Ըստ պարտականության գացի բարի գալուստ մաղթելու պահանջման մեջ իրեն մասնակցող խումբին, որ այս անգամ առաջին այցելությամբ շնորհ բերած էին Կ. Պոլսու ազգակիցներուն»՝ գրում է դերասանապետը: «Երբ տեսան զիս, ովութացին բողոքուիքս, իրենք զիս պայմիկ կանվանեին, ես ալ զիրենք որդի ու թոռներ, իրենք իմ ձեռքս կիպարուեին, ես ալ իրենց երկու պատենին, իրենք իմ միտքին մեջ Տիֆիսի հիշատակները կարթնացնեին, ես ալ կիհշեի: իմ երիտասարդական օրերն: Արելյան և իրեն մասնակցող այն կոկիկ խումբն երբ տեսան, ունեցած տպավորությունս շատ մեծ և շատ գորավոր է եղավ»: Մնակյանին հիացնում է Արելյանի տաղանդը, այն Արելյանի, որին

Ս. Մելիքսերյան, Հովհաննես Արելյան, Երևան, 1954, Էջ 185 (բաղկացած է 1908 թ. «Բյուզանդիոն» թերթից):

հանդիպել էր Թիֆլիսում, երբ նա դեռ սկսնակ էր: Այժմ նրա «փառքը տեսնելով կուզար ուրախութենեն և իր հին փառքի օրերը կվերհիշեր, երբ սիլինար գլխարկը գլուխը՝ Աղամյանի հետ կանցնի եղեր Թիֆլիսի փողոցներեն»¹:

Արելյան-Արմենյան թատերախամբի խաղացանկում էին «Պատվի համարը», «Ալվազակները», «Դոկտոր Շոռկմանը», «Օթելլոն»: Մնակյանի արտահայտությամբ «ամենքն ալ իրական կյանքն առնված գործեր», որ «կպատկերացնեն՝ բնականը, օգտակարն ու շահեկանը»: Անկեղծորեն կըսեմ,— շարունակում է նա,—որ կարծե իբրև խումբ, իբրև պիես ու իբրև թատրոն երթալ տեսնել այս կոկիկ ու կատարյալ խմբի ներկայացումները»²:

Պոլսում հայ թատերական կյանքի աշխուժացումը չի կարողանում սակայն իր մեջ առնել Մնակյանին, որի խումբը, տարիներ շարունակ խաղացած լինելով թուրքերեն, այժմ դժվարանում էր անցնել հայերենի: Խոսմբը նորացել էր, համարլվել թուրք դերասաններով և յոթանասնամյա դերասանապետն իր մեջ այլևս ուժ չէր գտնում իրագործելու վաղեմի մտահացումները: Հայ թատրոնում նորարար լինելու համար նա շատ էր ծեր: Հայ հասարակությունն այժմ «Ազատ թատրոնի» և Փափազյանի հետ էր կապում իր հույսերը: Մնակյանը մտածում էր, որ հին մարդկանցից կազմված և հին ավանդներով դաստիարակված իր խումբն

¹ Ե. Թողարյան, Հովհաննես Արելյանը Պոլսում, Խորհրդային արվեստ, 1936, № 13—14:

² Ս. Մելիքսերյան, Հովհաննես Արելյան, էջ 135:

այլև անկարող էր նոր բան ստեղծել: Բայց ոգևորված պոլսահայ թատրոնի վերածնության հեռանկարով, նա ինքն էլ փորձում է մասնակից դառնալ «Ազատ թատրոնի» ներկայացումներին:

«Ազատ թատրոնը», որի կազմում էին նաև Մնակյանի թատրոնից հեռացած երիտասարդ դերասաններ, սահմանադրական ոգևորության անմիջական արդյունքն էր: Սկզբից ևեր բեմ էր հանվել Հյուգոյի «Թագավորը զվարճանում է» դրաման, իսկ որոշ ժամանակ անց (1909) խաղացվեց դարձյալ հակաբունակալական տրամադրությամբ գրված մի գործ՝ ուն Հմայակ Արամյանի «Անմահն Ժիրայր» թատերախաղը: Պիեսի հյութն առնված է եղել հնչակյան հեղափոխության դեպքերից, իսկ գլխավոր հերոս՝ Ժիրայրը եղել է պատմական անձնավորություն՝ կախաղանի վրա զոհված հայ հեղափոխական: Այս դերը հանձնվում է Մնակյանին, և հանդիսատեսը անօրինակ ոգևորությամբ է ընդունում ներկայացումը: «Մնակյանի անունը և Ժիրայրի հիշատակը լեփ-լեցուն ըրեր էին սրահը, որ հազիվ չվլավ ծափերու և կեցցեներու աղմուկին», պատմում է ներկայացման հանդիսատեսներից մեկը՝ բանաեր Սիրունին¹:

Երկար տարիներ կտրված լինելով հայ թատրոնից, Մնակյանն այժմ ուզում էր վերադառնալ այնտեղ, բայց, հանգամանքների բերումով, ժամանակակից երկրորդական հեղինակի պիեսով էր սկսում իր այս նոր շրջանը: Ինչպես

¹ Հ. Սիրունի, Մնակյան իմ հուշերուս մեջ. (Ճեղագիր):

գրվեց մամուլում, «Անմահն Ժիրայրը» ոչ թեմական մի գրր-
փածք էր, որ այսպագույն դեպքում՝ «ընթերցումի կրնար
սահմանված ըլլալ և ոչ ներկայացումի»¹: Իսկ Մնակյանի
դերակատարման մասին ասվում էր. «Եռանդուն հեղափոխա-
կանի այս դերը անհարմար էր բոլորովին պ. Մնակյանին, որ
մեզ համար կմնա միշտ թշվար հայրերու խարված ամուսին-
ներու և ծեր սիրահարներու հաջող արտահայտիչը»²: Մնակ-
յանն ինքն էլ զգում էր, որ իր այս դերը պարզապես անցյալը
վերապրելու մղում էր, իսկ թեմ դատեալու հապահած ճիգ:
«Անմահն Ժիրայրը» եղել է հապենապ պատրաստված մի
տոհական ներկայացում, և Մինչապես գրում է Սիրունին, «ոչ
վայրկյանը, ոչ թատերախառը և ոչ ալ խաղընկերները
հարմար են Մնակյանին դափնի պահովելու»³:

Բայց այդ նույն շրջանում Մնակյանը դարձյալ հանդես է
գալիս հայերեն դերակատարմամբ, այս անգամ Պոլիս
գաւորունների եկած Զարիֆյանի խմբի հետ: Օկտով
Միրունի «Տիմար հովիվներ» դրամայում նա ընտրում է ծեր
գործադրի դերը: «Կը հիշեմ թե այդ փոքր դերին մեջ ծերու-
նի վարպետը կաջ մը կը պահեր դեռ հին արվեստագետնեն
և վարձատրվեցավ շերմ ու անկեղծ ծափերով»—գրում է նոյն
ականատեսը:

Մնակյանը լոթանատնամյա հանսկում չկարողացավ
իրեն կապել հայ թատրոնի հետ, քանի որ զանամանադրու-

¹ «Արևելք», 1909, թիվ 7063:

² Նոյն տեղում:

³ Հ. Սիրունի, Մնակյան իմ հուշերուն մեջ:

թյանը հաջորդող առաջին տարիներին Պոլսում կանոնավոր գործող նոր թատերախումբ չստեղծվեց: Հայոց թատերական կյանքում ամենանշանակալից իրադարձությունները կովկասիայ խմբերի այցելություններն էին: Չափից ավելի կարևոր տևում «Ազատ թատրոնի» գործունեությունը, անարդյունք են անցնում Զարիֆյանի, ապա նաև Փափազյանի հայկական թատերախումբ ստեղծելու ջանքերը: Արդյունքի չեն հանուն նաև Ռեշատի և Եվրոպական կրթություն ստացած թուրք դերասան Բյուրհանետինի ջանքերը, որոնք փորձում էին թուրք թատրոն հիմնել առանց հայոց դերասանների: Եվ այսուեղ ասպարեզը դարձյալ մնում էր Մեսակյանի խմբին, որը միակ կանգուն թատրոնն էր: Մեսակյանը միակն էր, որ չնայած զարգացած հասակին, ի վիճակի եր ուղիմներ գտնելու ապագան թուրք թատրոնի համար: Նա ուշացած էր համարում հայոց դասնանու իր ջանքերը, մտածելով, որ եթե մի նոր բան կարող է անել ապա միայն իր թատրոնում: Նա այն մտքին էր, որ թուրք թատրոնը պետք էր վերակառուցել նոր, ունալիստական միմբի վրա, իսկ դրա համար պակասում էր ամենազիավորը՝ թուրք ժամանակակից դրամատուրգինեան: Մեսակյանն իր շորջև է հանճախմբում մի քանի երիտասարդ թուրք գրողների, պատվիրելով նոր խաղացանել կազմել թատրոնի համար: Թուրք թատերական գրականությունն անուննելու գաղափարը ոգևորում է թատրոնի բախում անհանգստացած երիտասարդ գրողներին, Ապրիլ 1909—10 թատերաշրջանի ընթացքում մեկը մյուսի եւուից երևան են գալիս Սայիդ Ալիի, Ահմեդ Նուրիի և Հյուսեին Սուադի ժա-

մանակակից կյանքից առնված կենցաղապին կատակերգությունները և դրամաները:

1910 թվականի սեպտեմբերի սկզբում Մնակյանը բեմադրում է Սայիդ Ալիի «Թունավոր ծաղիկներ» և Ահմեդ Նուրիի «Հարճը» դրամաները: «Անոնք առաջին փորձն էին ունախզմի տանելու թուրք թատրոնը, և այդ փորձը չէր կրնար իրականանալ առանց Մնակյանի գործակցության», —գրում է Սիրունին:¹

Մնակյանը տակավին վաղ էր համարում բեմից հեռանալը և զգում էր ժամանակի հետ համարայլ ընթանալու անհրաժեշտությունը: Այդ մղումով էլ նա մեկը մյուսի ետևից բեմադրում է Հյուսեին Սուադի «Աղտոտ լաթերը» և «Խանձարուրը», Ահմեդ Նուրիի «Հարս և սկեսուր», «Անքիծ առագաստ», «Եկեանե» պիեսները: Այս նոր բեմադրություններում Մնակյանը ջանում էր հեռանալ «Էֆելտներու դպրոցից», մոտենալ այն նոր ունախտական ոճին, որ վաղուց արդեն տիրապեսող էր ֆրանսիական բեմում, և որը լավ ծանոթ էր Պոլսի թատերական աշխարհին: Այն, ինչ Պոլս էր բերել Սյուզան Դեպրեն, եթե ոչ ավելի բարձր, համենայն դեպս ավելի նոր էր, քան Սառա Բեռնարի արվեստը: Մնակյանն ուներ այդ նոր արվեստի զգացողությունը, թեև որպես ստեղծագործող հեռու չէր Ֆրեդերիկ Լեմեթրի ավանդներից: Բայց իր նոր բեմադրություններում նա փորձում է մերձենալ ֆրանսիական նոր ոճին: Մնակյանն իր ավանդական խաղանքն էլ աշխատում է հարմարեցնել նոր թատրոնի ոգուն,

¹ «Ազատամարտ», 1910, էջ 374:

ձգտելով ավելի զուսպ արտահայտչածների, խոսքի իրականին ավելի մոտ ինտոնացիաների¹:

Ի՞նչ էր ներկայացնում Մնակյանի այս խաղացանկը: Երիտասարդ հեղինակները լավ ծանոթ էին եվրոպական թատրոնների խաղացանկին և անցյալ դարի երկրորդ կեսի ֆրանսիական դրամային: Ուստինասիրած լինելով ֆրանսիական հեղինակների, հատկապես Դյումա-որդու դրամատուրգիան, նրանք փորձում էին ստեղծել դրա թուրքական տարբերակը, նույն ոգով և նույն գաղափարախոսությամբ: Այստեղ նրանց գրավողը մի կողմից ֆրանսիական դրամայի արտաքին, բեմական իմաստով կատարյալ ձևն էր, մյուս կողմից՝ ֆեմինիստական գաղափարախոսությունը: Այդ սրդումը խիստ բնական էր. հովհայան սահմանադրությունից հետո հրապարակ եկած թուրք պատմական պիեսները բացարձակորեն գործ էին բնմականությունից, և թուրք մտավորականությանը հուզող հարցերից մեկը ընտանեկան և հասրարակական հարաբերություններում կնոշ դերի հարցն էր: Դա, ինչպես տեսանք, երկար ժամանակ եղել էր Մնակյան-արվեստագետին հուզող հարցերից և նրա թատրոնի առաջատար թեմաներից մեկը:

¹ Բանասեր Հ. Սիրունին, որ Մնակյանի «թուրք թատրոնը ունալիօմի տանելու» փորձի առաջին գնահատողն էր մամուլում, 1966-ի սեպտեմբերի 26-ին, ՀՍՍՀ գիտությունների ակադեմիայի փոքր դահլիճում Մնակյանի մասին իր հուշերը պատմելիս, հաստատեց իր այն միտքը, որ Մնակյանը բնմական կերպավորման այլ սկզբունքներով էր մոտենաւ իր վերջին շրջանի դերերին:

Նուրիի և Սուադի պիեսները գրվել են եվրոպական պիեսների սխեմաների վրա: Այդ բանը հայտարարել են հենց իրենք՝ հեղինակները: Նուրին ինչ-որ առիթով խոստովանել է, որ ինքն օգտվել է Օկտավ Ֆելեյի դրամաների պուժեներից¹: Ծիշտ նույն ձևով Սուադը իր «Խարխուլ հիմք» պիեսը գրել է Էմիլ Ֆաբրի «Կավե տնակը» պիեսի պուժենիման վրա²: Այնուամենայնիվ այս դրամատորգիան ուներ ինքնուրույնություն և այդ արտահայտված էր, ամենից առաջ, նրա միտումնավոր գաղափարախոսության մեջ: Բեմադրելով Նուրիի և Սուադի պիեսները, Մնակյանը նոր աստիճանի էր բարձրացնում թատրոնի հասարակական դերը թուրքական իրականության մեջ: Պատահական չէ, որ նա հենց այդ թվականին (1910) գրել է հետևյալ տողերը. «Թատրոնական բեմը գաղափարին տաճարն է, տիեզերական ներդաշնակությանց ցուցահանդեսը, մարդկային ցեղին գործական դպրոցը: Ով որ կըսէ թատրոնը պարզ ժամանցի վայր մըն է հիմար է, մոլի և մարդկության թշնամի»³: Այն, ինչ ուսուցանում էր Մնակյանն այդ գործական դպրոցում, ուղղված էր նախապաշտումների, նահապետական բարքերի և մահմեդական ֆանատիզմի դեմ: Եվրոպական իրականությունից փոխառնված կանանց ազատագրման գաղափարը թուրքականացնելու մեջ:

¹ «Ազատամարտ», 1910, թիվ 384:

² Մուստաֆա Նիհատ, Թուրք ժամանակակից գրականության պատմություն (թուրքերեն), Խաթանրուլ, 1934, էջ 278:

³ Թեոդիկ, Ամենուն տարեցուցը, 1910, էջ 384:

կան իրականության մեջ ուներ առանձնահատուկ իմաստ և սրություն: Մնակյանը քանի հինգ տարիների ընթացքում թատրոնը դարձել էր առօրյա պահանջ թուրք հասարակության բոլոր խավերի համար: Այժմ նրա շանքերն ուղղված էին այն բանին, որ այդ հասարակությունը թատրոնում տեսնի իր առօրյա կյանքը, նրանում գտնի իրեն հուզող հարցերի պատասխանը:

Բայց Մնակյանի պայքարը կողմնակիցներ քիչ է գտնում թուրք մտավորականության շրջանում: Այստեղ ևս ուղիներ էին որոնում թուրք ռեալիստական թատրոն ստեղծելու համար, բայց հակահայկական ազգայնականությունը, որով համարված էր մտավորականության մեծ մասը, թույլ չէր տալիս խոսուվանել, որ այդ գաղափարն իրագործվում էր հայ դերասանակետի նախաձեռնությամբ: Բացի այդ, Նուրիի և Սուադի կողքին հրապարակ եկած թատերագիրների մի խումբ զարկ էր տվել պատմական քրոնիկոններին: Թուրքական սիրողական խմբերում մեկը մյուսի ետևից խաղացվում են «Սուլթան Սուստաֆա», «Ալեմտար Փաշա», «Պոլս առումը», «Պոլս անկումը», «Սուլթան Յըլիքը», «Ազատության արշալոյաք» և այսպիսի վերնագրերով մի ամբողջ շարք պիեսներ, որոնց ամբողջ էֆեկտը հայրենասիրական բացականչությունների, դրոշակներ ծածանելու, կրակոցների ու աղաղակների մեջ էր: Մրանց հեղինակները, անգիտակ բեմական արվեստի օրենքներին, չէին կարողացել հեռուն գնալ պատմական իրադարձությունների աղավաղված, պրիմիտիվ վերարտադրությունից և վերամբարձ, անկենդան

դիալոգներից: Մնակյանն աշխատում էր իր թատրոնը հեռու պահել այս «դրամատորգիայից»: «Եւիմ երրորդը» միակ պատմական դրաման էր նրա խաղացանկում, որն ընդամենը մի քանի անգամ էր խաղացվել:

Թուրքական թատերախմբերում պատմական պիեսների առատությունը ապակողմնորոշում էր մասապական հանդիսատեսին, որ դժվարանում էր ըմբռնել, թե վերջապես ո՞րն է խևական թատրոնը, Մնակյանինը, թե՛ մլուսները: Բերայի թատերասրահներում թուրք բեմի բարենորոգչի և Սիլվենի աշակերտի պիտակի տակ երթեմն երևում էր Բյուրհանետդինը, որ իր դասական արտաքինից ավելին ոչինչ չէր խոստանում և դրանով էր փորձում մրցակից դառնալ Փափազյանին: Թեև շատերն էին նրա հետ հույսեր կապում, բայց նա ըստ երևույթին այն մարդը չէր, որ կարողանար թատրոն ստեղծել: Ի վեջո, Բյուրհանետդինն ինքն էլ համոզվում է, որ դեռ վաղ է առանց հայ դերասանների թուրք թատրոն հիմնելու մասին մտածելը և ստիպված է լինում դիմել Մնակյանին: Մի շրջան Մնակյանի թատրոնում են հավաքվում բոլոր քիչ թե՛ շատ լուրջ, կամ իրենց լուրջ համարող դերասաններն ու դերասանապետները: Այս նույն շրջանում Մնակյանի մոտ է գալիս նաև Փափազյանը, որը երկար չի մնում այսուեղ և մեկ երկու ներկայացման մասնակցելուց հետո մի փոքր խմբով մեկնում է Զմյուռնիա:

Թուրք ունախտական թատրոն ստեղծելու Մնակյանի ջանքերը շարունակվում են մինչև 1911 թվականի վերջը: Պարզվում է, որ հեղափոխությունն ու սահմանադրությունը

շատ բան չէին փոխել երկրի քաղաքական կյանքում: Հավասարության, եղբայրության և արդարության կոչերի ետևում նույնն էր մնում հասարակարգի և պետության պատկերը: Նոր սովորական Ռեշատ Մահմեդը գրեսում տարվա պայմանական բանտարկությունից հետո գահ էր քարձրացել հոգեպես ու ֆիզիկապես հիվանդ: Իլթիհադականներն իրենց նոր քաղաքական ծրագրում գրեթե հրաժարվել էին հեղափոխությունից և ազգային, հատկապես հայկական հարցում հասել ծարքահեղ շովինիզմի¹: Խակ այն գործը, որ սկսել էր Մնակյանը, ոչ աջակիցներ, ոչ իսկ շարունակողներ գտավ թուրք մտավորականության շրջանում: Ռեալիստական դրամա ստեղծելու նորիի և Սուսահի ջանքերը անօգուտ ու անհետեվանք անցան, և նրանք նույնպես մենակ մնացին: Թատրոնի խաղացանում նոր պիեսներ շատ քիչ ավելացան, որոնցից էին Զենաք Շահաբեդինի «Սուսը» և Ալի Նիհատի «Սատանան»: Թուրքական թատրախմբերը հեղեղվեցին գոեհիկ և էժան զալեշտներով:

Թատերական կյանքի աշխատացումը Պոլսում տևեց շնչամենք չորս տարի (1908—1912): Սահմանադրական ոգևորությունը, հայկական ներկայացումները, Արելյանի և Կովկասահայ միուս խմբերի այցելությունները, թուրքական ազգայնական թատրոնի աղմուկը և վերջապես Մնակյանի ռեալիստական թատրոն ստեղծելու ջանքերը ավարտվեցին նրանով, որ թատրոնը գրեթե դադարեց գոյություն ունենալուց:

¹ Ст'я А. Ф. Миллер, Краткая история Турции, М., 1949, стр. 131—132.

Ամփոփելով այդ չորս տարիների թատերական կյանքը՝ «Հուշարար»-ը գրել է. «Թատրոնը...ինկապ թևաբեկ ինչպես հասարակական մյուս իդեալները, որոնք վայրկյան մը փայլել ետք՝ վազեցին մթության գիրկը իյնալու»¹:

* * *

1912 թվականի ապրիլին Պոլսի թատերական կյանքը հշանավորվում է մի անսովոր իրադարձությամբ: Հանրօգուտ շինությանց նախարար Զավիդ բեյի հովանավորությամբ տոնվում է Մնակյանի թատերական գործունեության հիմնամյակը: Դա առաջին դեպքն էր Թուրքիայի պատմության մեջ, որ հայ դերասանի հոբելյանին տրվում էր պաշտոնական ձև: Արևմտահայ և արևելահայ թերթերն ու հանդեսերը հրապարակում են կենսագրականներ: Պոլսում հայերեն և թուրքերեն լեզուներով տպագրվում է լուսանկարազարդ մի ալբոն դերասանապետի կյանքի ու բեմական գործունեության մասին: Հորելյանական հանդեսի հայտագիրը տպագրվում է երեք լեզուներով՝ հայերեն, ֆրանսերեն և թուրքերեն: Թե կենսագրականներում, թե այստեղ Մնակյանը հայտարարվում է օսմանյան թատրոնի հիմնադիր: Բայց հորելյանը դառնում է հայ մշակույթի ցույց:

Հանդեսը տեղի է ունենում ապրիլի 29-ին Բերայի «Վարիետե» թատրոնում: Գրիգոր Զոհրապը հայերեն ճառով բացում է երեկոն և խոսում պոլարիայ բնմի սկզբնավորման,

¹ «Հուշարար», 1912, գիրք Բ, էջ 11:

Մնակյանի և անցյալի մյուս բեմական գործիչների մասին։ Գալով թուրքական ներկայացումների շրջանին, ևս Մնակյանին ներկայացնում է որպես ժողովուրդների համերաշխության և մշակութային մերձեցման ջատագով¹։ Հեռագրերից ու ճառերից հետո կառավարության անունից Մնակյանին է դիմում դիվանապետ Սալամերին բեր և որպես կայսերական պարգև նրան է հանձնում «Մեարիֆի» ոսկե շքանշանը։ Ինչպես գրում է այդ իրադարձությանն ականատես Վահրամ Փափազյանը, այդ պարգևը պարզապես ցուցադրական ժեստ էր, որով ցուց էր տրվում, թե Թուրքիայում ևս դերասանը հայդված է, ինչպես եվրոպական երկրներում։ Դրամից մի քանի տարի առաջ անգլիական կառավարությունը իր վիճակին շնորհել էր ազնվականի տիտղոս, իսկ Սառա Բենեարը պարգևատրվել էր «Պատվո լեգեոն»-ի շքանշանով։ Ինչո՞ւ էր պակաս թուրքական կառավարությունը անգլիական և ֆրանսիական կառավարություններից։

Կառավարական պարգևը չէր, որ հուզում էր ծերունի դերասանապետին, այլ այն, որ թեև երեսուն տարի կորած էր մնացել հայ թատրոնի համար, բայց նրան չէին մոռացել։ Մնակյանին հեռագրերով շնորհավորում էին Թիֆլիսի հայկական թերթերն ու հանդեսները, Սպանդար Սպանդարյանը, Սիրանուշը, Զարիֆյանը, Արամ Վրույրը², Բաքվի հայ դերա-

¹ «Բյուզանդիոն», 1912, թիվ 4726։

² Մնակյանի հորելյանի առթիվ Վրույրը գրել է նաև հոդված (տե՛ս «Հորիզոն», 1912, № 11)։

սաները և գրական ու թատերական որիշ գործիչներ: Իսկ Թիֆլիսի Հայոց դրամատիկական ընկերությունը հրան ընտրում է պատվավոր անդամ:

Մնակյանին վշտացնում էր այն, որ թուրք մտավորականության մեջ կար մի խավ, որ մոռացել էր իրեն: Հոբելյանի հաջորդ օրը «Բյուզանդիոն» գրում էր. «Վարիեթե» թատրոնին մեջ հազիվ կնշմարվեին մեկ քանի թուրք հայրենակցի դեմք: ...Թուրք դերասաններու կողմեն խոսող պարու մը երեկ իր գեղեցիկ ճաղին մեջ Մնակյան էֆենդի նմանցոց Մուսե Սյուլլիի, ըսկեռով թե ֆրանսիացիք ունին Մուսե Սյուլլի, թուրքերն ալ ունին Մնակյանը: Բայց արդյոք մեր սիրելի հայրենակցներն այսպե՞ս կգնահատեն իրենց Մուսե Սյուլլին»¹:

Մնակյանի հոբելյանի առթիվ հանդեսներ են կազմակերպում նաև գավառական քաղաքներում, նոյնիսկ՝ մի քանի գյուղերում, որտեղ ներկայացումներ էր տվել նա: Հանդես է կազմակերպվում նաև Սկրոտարում՝ «Հայ ուսումնասեր ազգայնոց» կողմից: Այստեղ մի քանի հայ դերասաններ ու թատերասերներ, բեմադրում են Ֆրանսուա Կոպակի «Կրեմնի վճագործը» դրաման: Մնակյանը խաղում է Ֆերրարոյի դերը, իսկ երեկոյի վերջում խմբի հետ միասին երգում իր տարիներ առաջ հորինած հայրենակիրական երգը:

1912 թվականից հետո Մնակյանը հազվադեպ է բեմ բարձրանում, երբեմն հայերեն, երբեմն թուրքերեն ներկա-

¹ «Բյուզանդիոն», 1912, թիվ 4726:

յացումներով: «Ծամանյան թատրոնի» գործունեությունը գը-
ճալով նվազում է, իսկ մեկ տարի անց՝ դադարում:

* * *

Մնակյանի կես դար տևող բեմական գործունեության
ընթացքում թատերական արվեստը Եվրոպայում ապրել էր
իր էվոլյուցիան՝ ոռմանտիզմից մինչև նատուրալիզմ: Փա-
փազյանի այն միտքը, թե Մնակյանը տիրապետում էր
Ֆրեդերիկից մինչև Անտուան, պահինքն՝ ոռմանտիզմից
մինչև նատուրալիզմ տարածվող արվեստի բոլոր ձևերին և
որ նրա վարպետությունը այլազան ազդեցությունների
արդյունք էր, պետք է ընդունել որոշ վերապահությամբ:
Որպես դերասան Մնակյանը ժամանակակիցն էր XIX դարի
մեծ ողբերգակների և դաստիարակվել էր հիմնականում
Ֆրեդերիկից եկող ավանդներով, եթե նկատի չառնենք նրա
գործունեության Թիֆլիսյան շրջանը: Բայց ահա, XX դարի
սկզբում նա տեսականորեն հանգել էր նոր թատրոնի
սկզբունքներին, իսկ գործնականում մնացել էր Էկլեկտիկ
ստեղծագործող, որի մի ոտքը հնում էր, մյուսը նորում:
Պատահական չէ, եթք ժամանակակիցներից մեկը՝ դերասան
Տրդատ Նշանյանը ընդհանոր գծեր էր տեսնում Մնակյանի
և «Կոմեդի ֆրանսեզի» դերասաններ Ալբեր Լամբերի ու
Սիլվենի միջև¹: Լամբերը եղել է Մունե Սյուլիի հետևորդը և
ընդօրինակողը, իսկ Սիլվենը՝ տիպիկ նեոկլասիցիստ,

¹ Անձնական նամակ (10 Բոկտեմբերի, 1963, Փարիզ):

փորձելիս է եղել իր արվեստում միացնել նորագոյն նատուրալիստական հնարները դասական կեցվածքների և դեկլամացիայի հետ: Ժամանակակիցների տպավորությունն այն է ասում, որ Մնակյանն այդ շրջանում մոտ է եղել կանգնած բեմական ռեալիզմին, բայց նրա կատարման մեջ նկատելի են եղել կիսակլասիցիստական, կիսառոմանտիկական խաղողի տարրերը¹, պահպանված թերևս 60-ական թվականներից: Մնակյանը ճիշտ է ըմբռնել հնի և նորի փոխհարաբերությունը արվեստում, բայց այն միշտավայրը և հասարակագրը, որի պայմաններում գործել էր քառորդ դարից ավել, հնարավորություն չէր տվել նրան իրականացնելու արվեստի իր ըմբռնումը: Տեսականորեն Մնակյանը կանգնած էր իր ժամանակի թատերական մտածողության բարձրության վրա, բայց ի վիճակի չէր եղել իրագործելու իր սկզբունքները: Լինելով մտավոր բարձր զարգացման տեր, ինանալով մի քանի լեզուներ (թուրքերեն, ֆրանսերեն, իտալերեն, հունարեն) ուսումնասիրած լինելով եվրոպական թատրոնի պատմությունը, ֆրանսիական դրամատուրգիան, դերասանական արվեստի հին ու նոր դպրոցները, հետևելով իր ժամանակի թատերական կյանքին, Մնակյանը դերասանի արվեստի մասին ունեցել է որոշակիորեն ձևավորված հայացքներ: Հատ որոշ վկայությունների, նա ուսումնասիրել է նաև Փարիզի կոնսերվատորիայի դրամատիկական ճյուղի դասընթացը²: Մնակյանի տեսական ըմբռնումների հարցը

¹ Անձնական համակ (12 դեկտեմբերի, 1963 թ., Փարիզ):

² Կենսագրական Մնակյանի, էջ 10:

թերևս քննության առարկա չդառնար պատճեղ, եթե նա հեղինակը չիներ «Դերասանը» խորագրով մի ընդարձակ հոդվածաշարի, որից մեզ հասել է միայն նրա պլանը:

1909 թ. Պոլսում հրատարակվող «Կոհակ» շաբաթթերթի խմբագրությունը նամակով դիմել է դերասանապետին, որպեսզի վերջինս հանդես գա դերասանի արվեստի մասին տեսական հոդվածներով: Մնակյանն իր համաձայնության հետ միասին խմբագրությանն է ողարկել իր ունումնասիրության պլանը, այնուհետև առաջին հոդվածը¹, որից հետո, մեզ անհայտ պատճառներով, թղթակցությունը չի շարունակվել:

Ի՞նչ է ներկայացնում Մնակյանի տեսական ուսումնասիրությունը: Դա տասնվեց հոդվածներից բաղկացած մի համառոտ ձեռնարկ է՝ դերասանի արվեստի տարրերի հանրամատչելի բնութագրումներով: Հոդվածաշարը մի կողմից հեղինակի փորձից դուրս բերված եզրակացությունների, մյուս կողմից անցյալ դարի դերասանական արվեստում հաստաված նորմերի և ընդհանուր սկզբունքների յուրահատուկ ամփոփումն է: Մնակյանը նպատակ է դրել բացարել դերասանի պրոֆեսիայի էությունը, հենվելով այդ ընդհանուր նորմերի, սկզբունքների և ավանդների վրա: Դժվար չէ մասամբ վերծանել հոդվածաշարի ընդհանուր բովանդակությունը, նիմք ունենալով դերասանապետի մեզ արդեն հայտնի մտքերը և «Կոհակում» հրապարակված ցանկը:

¹ «Կոհակ», 1909, թիվ 1, 2:

Առաջին հոդվածում Մնակյանը խուսում է դերասանի ֆիզիկական տվյալների մասին: Հատ նորա, ֆիզիկական կատարելությունը դերասան դառնալու առաջին պաշմաներից մեկն է: Իր արվեստը հիմնականում կառուցած լինելով արտաքին վարպետության հնարների վրա, Մնակյանը միշտ եղել է այն կարծիքին, որ բեմական ստեղծագործության համար նախ և առաջ դերասանի ֆիզիկական ապարատը անթերի պետք է լինի: Մնակյանի համար դա նշանակում է համաշխափ զարգացած և ճկուն մարմին, լավ լսելի ձայն, ոչ անպայման գեղեցիկ, բայց անպայման համաշխափ ու արտահայտիչ դեմք, լավ ճակատ, կանոնավոր քիթ և ճիշտ դասավորված, խոսուն աչքեր: Մեկի կամ մյուսի բացակայությունը կյանքում կարող է նկատելի չլինել, բայց «թատերաբեմին վրա անհաջողության գլխավոր պատճառ ըլլալ»: Լավ ուսումնասիրած լինելով բեմական շարժման արվեստը, Մնակյանը գտնում է, որ դերասանը պիտի կարողանա բեմ չտանել իր «հոռի սովորությունները» և հմտություն ունենա աննկատելի դարձնել բեմի վրա միշտ խոշոր երևացող իր փոքր ֆիզիկական պակասությունները: Բայց ունենալով կատարյալ ֆիզիկական տվյալներ, «դերասանը պետք է բոլորովին ազատ ըլլա եսության զգացումնեն», այսինքն իր այդ տվյալները կարողանա ծառայեցնել որպես գործիք, միջոց, այլ ոչ թե ինքնանպատակ ցուցադրման առարկա:

Երրորդ հոդվածում, խոսելով «դերասանին հարկավոր եղած ընդհանուր և մասնակի հմտությունների» մասին, Մնակյանն ամենայն հավանականությամբ նկատի ունի բե-

մական գրագիտության և դերասանական տեխնիկայի տարրական պահանջները, որոնց տիրապետելու համար հարկավոր է ժամանակ և աշխատանք: Մնակյանն իհարկե տեխնիկային և արտաքին վարպետությանը չի հանգեցնում դերասանի ամբողջ ստեղծագործությունը: Բայց նրա կարծիքով, արտաքին վարպետության հնարեներին քիչ թե շատ տիրապետելուց հետո միայն խոսք կարող է լինել դերասանի ներքին վարպետության մասին:

«Թմացական ովզ, հոգի, երևակայություն, զգացում և զգայնություն»: Պլանում այսպես է վերևագրված չորրորդ հոդվածը: Մնակյանն այն կարծիքին է, որ դերասանի ստեղծագործությունը ամենից առաջ գիտակցական աշխատանք է, մտածողության յուրահատուկ ձև: Բայց այդ մտածողությունը, պատկերավոր, հուզական մտածողություն է: Իր միտքն ավելի պարզելու համար նա գրել է ֆրանսերեն «sensibilité» բառը, որ նշանակում է զգայունակություն, դյուրագգացություն: Զգայունակությունը դերասանին ընդունակ պետք է դարձնի հեշտությամբ ենթարկվելու զգացմունքին և նույնքան հեշտությամբ կառավարելու իր մեջ տարբեր զգացմունքների փոխանցումները: Բանականություն, երևակայություն և զգայունակություն հասկացությունները որոշակի հերթականությամբ միացնելով մեկ վերևագրի տակ, Մնակյանը մոտենում է դերասանի ստեղծագործական հոգերանության ամենանորը հարցին՝ գիտակցական և ենթագիտակցական գործոնների փոխարարերությանը: Անմիշականորեն այս հարցի հետ է կապվում նրա ուսումնասիրության հիմնական դրույթ-

ներից մեկը՝ բնականության և ճշմարտության խնդիրը: Խններորդ հոդվածը ալղպես էլ վերնագրված է. «Բնականը և ճշմարիտը. դերասանը բնութենեն ինչ և որչափ քաղելու է»: Խոսքը վերաբերում է կենսական ճշմարտության և բնմական ճշմարտության տարբերությանը, հավաստիի և պայմանականի զոգորդմանը: Այս իմաստով, հետաքրքիր են Մնակյանի երկու տարբեր մտքերը՝ հայտնված տարբեր առիթներով. «Խոսե այնպես, ինչպես ընկերներուդ հետ կխոսիս, ինչպես որ թաղիդ աղջկներուն հետ կսիրաբանիս»: Եվ՝ «դերասանը, իսկական իմաստով արվեստագետը չպիտի զգա այլ պիտի կեղծե զգուշ, չպիտի խնդա, այլ պիտի կեղծե լավ, չպիտի հուզվի, այլ հուզվիլ պիտի կեղծե: Ասոր համար է, որ դերասանությունը արվեստ է» (ընդգծումները մերն են-Հ.Հ.): Մնակյանի տեսակետը շատ որոշակի է. կեղծել առանց իրականի զգացողությունը կորցնելու, կեղծել զգուշ, կեղծել վարպետությամբ, արվեստով: Մնակյանն այստեղ մերժում է նաև ուրախիզմը, մերժում է զուտ ենթագիտակցական ստեղծագործությունը, հաստատելով դերասանի անձնավորության մեջ երկու «եսի»՝ մի կողմից զգացողի, մյուս կողմից զգացումը կառավարողի անհրաժեշտությունը:

Դիդրոյի «Պարադոքսից» եկող այս տեսակետը հիմնական սկզբունքներից մեկն է ֆրանսիական բնմական դպրոցի համար: Դիդրոն այն միտքն է հաստատում, որ դերասանի

¹ Գրականության և արվեստի թանգարանի թատերական բաժնի ամստիպ նյութերից (Ս. Դավթյանի ֆոն):

արտասուքը ոչ թե սրտից, այլ ուղեղից պետք է հոսի, որ դերասանի տաղանդի շափանիշը ոչ թե խոր վերապրումն է, այլ ապրումի ճգրիտ վերարտադրությունը: Ըստ Դիդրոյի, քեմի վրա դերասանը պետք է լաց լինի «ինչպես անհավատ քահանան, ինչպես գայթակղիշը կնոջ ոտքերի մոտ, ինչպես մուրացկանը փողոցում կամ եկեղեցու դռանը, ինչպես կորտիզզանուինն, որը ոչինչ չզգալով հուզմունքից դողում է ձեր գրկում»¹: «Հուզելու համար չպետք է հուզված լինել: Դերասանը պետք է տիրապետի իրեն և ոչինչ չթողնի պատահականության կամքին», գրում է Կոլեն-ավագը՝ ֆրանսիական խաղաղի ամենատիպիկ ներկայացուցիչներից մեկը²: Մնակյանը չէր կարող ծանոթ չլինել Կոլենի գրքին: Եթե նույնիսկ ծանոթ էլ չի եղել, ապա թիշ նշանակություն չի տվել ֆրանսիական թատրոնից եկող ներկայացումի արվեստին:

Իր ուսումնահիրության մեջ Մնակյանն առանձին գլուխ է հատկացրել անընդմեջ քեմական գործողության՝ հարցին, որը ձևակերպել է այսպես. «տեսարանը լեցնել, խոսիլ և լուել»: Խոսքը ոչ թե դերասանի դատարկ, իմաստազորկ, անօգնական լուրջան մասին է, այլ լուրջունը իմաստավորելու մասին, առանց խոսքի՝ գործողությունների և տրամադրությունների ընթացքի մեջ գտնվելու մասին: Մնակյանը չէր կարող ծանոթ լինել Ստանիլավսկու հայտնագործած «գործողություն» տերմինին, բայց նրա «տեսարանը լեցնել»

¹ Д. Дидро, Парадокс об актёре, Л.—М., 1939, стр. 51.

² Коклен-старший, Искусство актера, М.-Л., 1937, стр. 71

արտահայտության մեջ առկա է բեմական գործողության խոր ըմբռնումը՝ գործողություն ոչ անպայման ֆիզիկական իմաստով: Մնակյանը տեսարանը լեցնելու հետ է կապում նաև բեմական շփման հարցը: Բեմի վրա խոսելը շատ ավելի հեշտ է, քան լոելը, և Մնակյանն էլ միշտ եղել է այն մտքին, որ «դերասանի մը ամեննեն լավ գիտնալիք բանը լսելն է», երբ նա կարողանում է հասկանալ, օգալ խաղակցի խոսքը, երբ հանդիսատեսը կարողանում է նրա արտահայտության մեջ կարդալ խաղակցի «խոսքերուն թողած ազդեցությունը»: Հստ Մնակյանի, դերասան չէ նա, ով միայն խոսքեր է խաղում, ով չի կարողանում հոգեբանորեն իմաստավորել անխոս և ստատիկ բեմավիճակները:

Մնակյանին զբաղեցրել են դերասանի արվեստի ամենատարբեր կողմերն ու առանձնահատկությունները: Նա մտածել է գրել կամ գրել է «Անմանողության (imitation) վնասների», դերի ուսումնասիրության պրոցեսի, խաղարկության մեջ հոգեբանական փոխանցումների և «զանազանիչ գույների», «ձայնի և առոգանության», «դիմախաղի և շարժման», դերասանական ամպլուաների, դիմահարդարության և հանդերձելենի օգտագործման հարցերի մասին:

Մեծ հշանակություն տաղով ներկայացման և կերպավորման արվեստին, Մնակյանն այդ քանին ավելի շատ կապել է դերասանի ներքին տեխնիկայի, քան գրիմի և օգեստի միջոցով ծառվելու, անձանաչելի դառնալու հետ: Նույն է ասում նրա մեփական օրինակը. Մի քիչ կարմիր՝ այտերին և աչքերի անկյուններում, մի քիչ ճերմակ՝ հոնքերի և բեղերի

վրա, քունքերին երկու փոքրիկ, ալեխատոն բակենքարդեր և մի քանի սկզբանի վրա: Ահա Մնակյանի ամբողջ դիմափոխությունը: Նշանակություն չտպով արտաքին կերպարանափոխմանը, նաև միշտ եղել է հաստատ համոզման, որ «արվեստը արտիստին կուրծքին տակն է, մտքին մեջ, աչքերուն խորը, մնացած բաները երկրորդական են»՝ կամ «մարդու կերպարանքը իր հոգու հայելին է, հայելին պետք է մաքուր ըլլա, որ արտահայտած պատկերը պարզ արտացոլել»²:

Բայց հիմնական դերը, ըստ Մնակյանի, պատկանում է աչքերին: «Աչք, մանավանդ աչք,—գրում է նրա խմբի դերասան Թողարկանը,—աչք չունեցող դերասանը ոչինչ կարժեր նրա համար»³: «Աչքը դերասանին հոգին է,—ասել է Մնակյանը,—հանդիսականը դերակատարին աչքին կուղղե իր նայվածքը, աչքեն կզգացվի»⁴:

Դերասանի արտաքին արտահայտչականության մասին նոյն կերպ են մտածել նաև անցյալ դարի եվրոպական և ռուսական բնմի նշանավոր վարպետները: Գրիմը փոքր տեղ է ունեցել նրանց արվեստում: Ինչպես հայտնի է, կերպավորման արվեստի երևելի վարպետներից մեկը՝ Վասիլի Վասիլևիչ Սամոյլովը կարողացել է անճանաչելի դառնալ ընդամենը մեկ-երկու գույնի օգնությամբ: Լենսկու այն հարցին, թե ինչո՞ւ նա ծերունիների դերեր խաղալիս

¹ Ե. Թողարկանի ձեռագիր հիշողություններից:

² «Սովետական արվեստ», 1955, № 4, էջ 38:

³ Ե. Թողարկանի ձեռագիր հիշողություններից:

⁴ Նոյն տեղում:

գորշ-դեղնավուն գույներ չի օգտագործում, Սամոյլովը պատասխանել է. «Երիտասարդությունը և ծերությունը, սիրելիս, մաշկի գույնի մեջ չէ, այլ աչքերում»¹:

Դժվար է ենթադրել, թե բեմական վարպետության մյուս հարցերը, որոնք հիշատակված են ուսումնասիրության պլանում, ինչպիսի կոնկրետ լուծումներ են ունեցել Մնակյանի մոտ: Թատերական կյանքի աշխուժացումը Պոլսում կարճատև ոգևորության շրջան էր, ու թերևս սրանով պետք է բացատրել, որ Մնակյանի միայն առաջին հոդվածը հրապարակվեց, իսկ շարունակությունը այդպես էլ երևան չեկավ: Այնուամենայնիվ պլանում նշված տասնվեց կետերն արտացոլում են դերասանապետի տարիների փորձից դուրս բերված եզրակացությունների, սահմանումների ու ձևակերպումների համակարգը:

Դերասանապետը նպատակ չի ունեցել ստեղծել դերասանի արվեստի տեսություն, այլ ծանոթ լինելով արդեն ըստեղծված տեսություններին, նրանցից ընտրել և առանձնացրել է ամենաէականը՝ այն այրութենը, որ «իբրև աղոթագիրք պիտի կարդա ամեն օր ոչ միայն դերասանացուն, այլ նաև վարպետ դերասանը»:

Մնակյանի հոդվածների ցանկը միակ փաստաթուղթն է նախասովետական շրջանի հայ թատերագիտական մտքի պատմության մեջ, որտեղ փորձ է արված վերլուծել դերասանի վարպետության տարրերը պրոֆեսիոնալ տեսանկյունով: Որպես մտածող, Մնակյանն առաջին հերթին

¹ А. П. Ленский, Статьи, письма, записки, М., 1950, стр. 88—89.

դերասանի արվեստի տեսաբան է, այն թատրոնի ներկայացոցիշը, որտեղ ստեղծագործող դեմքն ամենից առաջ դերասանն է, իր հոգեֆիզիկական ապարատին անթերի տիրապետող և ռամփայի մոտ խաղացող դերասանը: Մնակյանն ավելի բարձր իմաստ է վերագրում դերասանի կոչմանը, քան կարող է թվայ: Նա գրում է. «Դերասանական կոչումը բարձր, վստ և հոգերանական է, ավելի տորը է անհիմա, քան կուսակրոն կղերին կոչումը»¹: Թատրոնն անվանելով դպրոց և տաճար, վերագրելով նրան խոշոր հասարակական դեր, Մնակյանը դերասանին համարում է քարոզիչ, առաջալ, մտքեր և հոգեբանություններ կազմակերպող, նրանից պահանջելով «մտավորական ուժ, և «քարոյական զորություն» որպեսզի նա կարողանա թարգման հանդիսանալ Ռասինի և Վոլտերի, Շեքսպիրի և Շիլլերի, Տոլսոտի և Նբսենի մտքերին²: Մնակյանի իդեալը ֆիզիկապես օժտված և մտավորապես զարգացած դերասանի կերպարն է: «Եթե չես օժտված ֆիզիկապես, եթե չես զարգացած մտավորապես, մի մոտենար այդ տորը տաճարին, մի ստորացներ արվեստը, մի պըծեր սրբավայրը», — գրել է նա³: Դերասանական արվեստին նվիրվող նախ պետք է «զավ քննեն իրեն ներքուստ և արուարուստ»: Նա նույնիսկ այն միտքն է հայտնել, որ ապագա դերասանին պետք է մարզել սկսած մանուկ հասակից և համառ ու տևական աշխատանքով հասուն տարիքում հասցնել կատարելության: Ստեղծագործության մեջ առաջին հերթին

¹ Թեոդիկ, Ամենուն տարեցուցը, 1910, էջ 380:

² Նույն տեղում:

³ Նույն տեղում:

տեսնելով ինտելեկտուալ աշխատանք, Մնակյանը եղել է այն կարծիքին, որ «մարդ հիսունեն ետքն է, որ լավ դերասան կըլլա»¹: Նա ուզում էր միատեղ տեսնել հիսնամյա մարդու մտավոր հաստնությունը և երիտասարդի մարմնական ուժն ու ճկունությունը:

«Ի՞ն Օթելլոն» գրքում Փափազյանը գրում է, որ իր ձայնական ոչ հարուստ հնարավորություններն օգտագործելը ստվորել է Մնակյանից: Փափազյանի տեսած և իմացած դասական Օթելլոները, Կասսիոյի և Սոնտանոյի մենամարտության տեսարանում հայտնվելիս, միշտ դիմել են «ձայնական ուժեղ վատնումների»: Առանց ունենալու Սալվինիի ձայնի հարստությունը, Պոսարտի թավշային ձայնը կամ Մունե Սյուլիի օպերային բարիտոնը, երիտասարդ Փափազյանն ամեն անգամ փորձելիս է եղել «բամբ գոռոցով» սաստել մենամարտողներին և ամեն անգամ մտահոգվել, զգալով իր ձայնի թույլ հնարավորությունները: Փափազյանի դեռևս երեկվա հանդիատեսներս հիշում ենք, որ այդ տեսարանում Փափազյանը երբեք չէր գոռում, և գոռազու էֆելիտին փոխարինում էր հեռվից նետվող սուրբ: Իսկ եթե բեմական հանգամանքները խանգարում էին սուրբ նետելուն, նա մոտենում էր մենամարտողներին և արի այնպիսի մի շարժում անում, որի մեջ կար նրա ներքին զայրությը: Օթելլոյի «ինչ է պատահել այստեղ» խոսքերը Փափազյանն արտասանում էր խոլ ձայնով և ներքին, դժվարությամբ զապվոլ զայրութով: Զայրութի չափը գոռոցով ցուցադրելու փոխարեն, նա ցուց

¹ Գ.Ա.Թ, թատերական բաժնի անտիպ նյութերից (Ս. Դավթյանի գոնդ):

Էր տալիս զայրույթը զապելու ճիգերը: Փափազյանի Օթել-րոյի այս տեսարանում մասն ունի Մնակյանը: «Պոլսում, իմ պատահելության օրերին,—գրում է Փափազյանը,—Մնակյանը ինձ պատմել է, թե մի երեկո Մատկովսկին, իր ձայնի հանկարծակի խզման պատճառով, ստիպված փորձել է, ձայնի վերոհիշյալ վատնումի փոխարեն, մոտենալ իրականության այն ձևին, որ իմ նախասիրածն է եղել միշտ, և եթե պարագաները հաջող են եղել, հնարավորություն է տվել հասնել գերազանց մի արվեստի բացարձակ արտահայտության սահմաններին»: Այնուհետև Փափազյանը, որ այդ գերազանց արվեստի արտահայտությանը հնատել է հիշելով Մնակյանի խորհուրդը, գրում է. «Մի գիշեր, երբ անհաջող մի Օթելլոյից հետո, հատել էի ինքս ինձնից դժգոհ ու ամրող աշխարհից խոռված, Պոլս անմարդ մի գարեջրատան մենավոր անկյունում հիշեցի Մնակյանի խորերը: Եվ այդ սկիզբը եղավ հետագա իմ կատարումների այն ինքնուրույն ձևին, որը ոչ միան տպավորությամբ գերազանցորեն ուժեղ է, այլև իր մեկնաբանությամբ առավել շափով հարազատ Մավրի բնույթին»¹:

Նոյն գրքի մեկ այլ տեղում Փափազյանը դիմում է Մնակյանի խիստ հետաքրքիր և պատկերավոր մի մտքին, որ շատ բնորոշ է դերասանապեսի վարպետությանը և տեսական լրբունումներին: Օթելլոյի կերպարի բեմական վարքագիծը և զարգացումը Մնակյանը պատկերացրել է հետևյալ կերպ. «Այս թատերգության չորս արարվածները նման են մեծ աշտարակի մը վրա մագլցելուն: Իսկ հինգե-

¹ Վ. Փափազյան, Խմ Օթելլոն, Երևան, 1964, էջ 177—178:

բորդը գլխապտույտ անկում մըն է դեպի անդունդը։ Այդ անկումը միայն դերասանական արվեստով չիրականացվիր։ Հոն, այդ կետին հասնելեն ետքը պետք է կարենալ ինք-զինքը վար հետել։ և այդ գործողության միջոցին, շմեռնելու համար իբրև դերասան, ոչ թե պետք է արվեստի պոչեն բոնել, այլ ինքնահամոզման և հավատքի»¹։ Մնակյանի այս խոսքերում հստակ է արտահայտված վերապրումի և արվեստականի նրա ըմբռնումը։ «Օթելլոյի» առաջին շորս գործողությունները թերևս կարելի է խաղալ հենվելով վարպետության և զգացմունքը ցուցադրելու վրա, բայց հինգերորդում, երբ սկսվում է բուն ողբերգությունը, դերասանն ուրիշ ելք չունի, բացի «ինքնահամոզումից և հավատքից», այսինքն իսկապես զգալոց և վերապրելոց։ Հակառակ դեպքում դրաման կիսատ կմնա։ Մնակյանի միտքն այն է, որ իսկական ողբերգությունը չի կարելի իրագործել միայն բեմականորեն, տեխնիկայի և վարպետության միջոցով։ Հասկանալի է նաև, թե ինչու նա այդ խորհուրդը պետք է տար իր կյանքի երրորդ տասնամյակը նոր միայն ոտք դրած Փափազյանին, որը յուրացրել էր մեծ վարպետների տեխնիկան, բայց չուներ բավականաչափ կենսակործ։ Վահրամ Փափազյանն իր խոստվանությամբ շատ բան է ստվորել Մնակյանից։ Ահա թե ինչ է պատմում նա «Քինի» իր առաջին ներկայացման (1911)² հաջորդ օրը Մնակյանի հետ ունե-

¹ Նոյն տեղում, էջ 499—500։

² Վ., Փափազյանը Պոլսում առաջին անգամ Քին խաղացել է 1911-ի նունվարի 26-ին։

ցած հանդիպման մասին: «Այն ամենը, ինչ սովորեցրեց ինձ Մնակյանը, ինձ համար անսպասելի գաղտնիքներ էին, ավանդույթներ: Այդ ամենը լայն էր, ինչպես աշխարհը և պարզ, ինչպես ճշմարտությունը: Այդ կես ժամվա ընթացքում նա գործնականորեն սովորեցրեց ինձ այն ամենը, որ սովորեցրել էին ինձ դպրոցում տարիներ շարունակ: Նրա սովորեցրածը միայն Քինհն չէր վերաբերում, այլ դերասանի արվեստի ամբողջ էությանը: Դա այն անկյունաքարն էր, որի վրա ես հետագալում կառուցեցի այն շենքը, որ բարեհաճ մարդիկ անվանում են իմ վարպետությունը: Ես չգիտեմ անգամ, թե ում ավելի շնորհիակալ լինեմ իմ վարպետներից: Նովելիին, Զակ'ոնիին, Զիոնլամո Գո'ցցիին, -թե՛ Մնակյանին»¹:

1913 թվականին կառավարության հրավերով թուրք պետական թատրոն և կոնսերվատորիա հիմնելու համար Պոլիս է հրավիրվում Անդրե Անտուանը: Նրա և Մնակյանի միջև հաստատվում են մտերմական կապեր: Պատմում են, որ Մնակյանի թատրոնում Անտուանը դիտում է մի քանի հերկայացումներ և ապագա թատրոնի համար դերասաններ ու դերասանութիներ ընտրելիս Մնակյանը լինում է նրան աջակցողներից մեկը: Անտուանը և Մնակյանը հաճախ են հանդիպում, երբեմն ժամերով նատում Բերայի «Թոքաթլան» ուստորանում, մի փոքրիկ սեղանի մոտ, երկար գրուցում թատրոնի ու դերասանի արվեստի շուրջ, վիճում, թե

¹ В. Папазян, История развития турецкого театра.

ինչպիսին պետք է լինի ապագա թատերական արվեստը¹: Ի դեմք Անտուանի, Մնակյանը տեսնում էր նոր ժամանակ-ների մեծագույն արվեստագետներից մեջին, ապագան պարզ պատկերացնող, բազմակողմանի ու խոր մի մարդու, որը դեռևս երկու տասնամյակ առաջ թատերական արվեստի ամենախոշոր նորարարն էր Եվրոպայում և այժմ հիացմունքով էր խոսում Ռեյնարդտի ու Ստանիլավսկու մասին: Անտուանի հետ գրուցները Մնակյանին ավելի են համոզում, որ Ֆրեդերիկ Լեմեթրի ավանդներին փոխարինելու են գալիս դերասանական արվեստի բոլորովին նոր սկզբունքներ և չափանիշներ, որ եթե մի ժամանակ «դերասանի վարպետության մեջ գլխավոր դերը պատկանում էր հրա արտաքինն, շարժումն, սուրը և թիկնոցը խաղացնելու վարպետությանը, ապա այժմ ամբողջ արվեստը հանգում էր հոգերասանկան նրբերանգներին, կիսատոններին և քառորդ տոներին»²: Փափազյանը պատմում է, որ այդ բանն ապացուցելու համար Մնակյանն օրինակներ էր բերում Զուդերմանի, Հառիպտմանի և Տոլստոյի դրամաներից: «Լավ իմացիր, որ հիմա բյութուն արվեստը տոների վրա է, կես, չերեկ և ուղերդորդ տոների վրա, Անտուանը սովորե, իբանը ձեռքեղ

¹ S. Նշանյանի անձնական նամակից (16 դեկտեմբերի, 1963 թ., Փարիզ): Մնակյանի և Անտուանի բարեկամության մասին հիշատակություն կա նաև Մնակյանի նամակներից մեկում ուղղված Արշակ Չոպանյանին (տե՛ս Գ.Ա.Թ, Ա. Չոպանյանի ֆոնդ, նամակներ):

² В Папазян, История развития турецкого театра.

մի ձգե՞ր»,—խորհուրդ է տալիս Մնակյանը երիտասարդ Փափազյանին, երբ վերջինս պատրաստվում էր մեկնելու Թիֆլիս (1913): Հակամետ թատերական արվեստի անտուանյան ըմբռնմանը, Մնակյանը երազում էր բեմականացնել Դոստոևսկու «Կարամազով եղբայրները» և անպայման խաղալ Սմերդյակովի դերը: Եվ դա մնաց նրա վերջին չիրագործված ցանկությունը:

* * *

Կյանքի վերջին տարիներին Մնակյանը ականատեսն էր այն մեծ ողբերգության, որ կրեց արևմտահայությունը 1915 թվականի ապրիլին: Ծերումի դերասանապետը դրանից հետո ապրեց ևս հինգ տարի: Իր կյանքի վերջալույսին նա սարսափով տեսնում էր, որ ինքը մենակ է մնացել... նահատակների ձայնը ականջում:

Պատերազմի ավարտից հետո՝ 1918-ին նորաբաց «Դարյուլբեդային» (թուրքական կոնսերվատորիան) Մնակյանին ուժիսորի պաշտոն է առաջարկում² չնչին աշխատավարձով, բայց մի քանի ամիս անց այդ էլ մերժվում է, և դերասանապետն ընկնում է ծայրահետ թշվառության մեջ:

Այդ նույն թվականին նոր կազմակերպված «Պոլսահայ դրամատիկ» թատերախումբը «Բըթի-Շան» թատրոնում դերասանապետի օգտին բեմադրում է Ա. Ահարոնյանի «Ար-

¹ «Սովորական արվեստ», 1955, № 4, էջ 38:

² Թեոդիկ, Ամենուն տարեցույցը, 1927, էջ 219:

ցունքի հովիտ» դրաման: Ութառներկուամյա դերասանը վճռում է բեմ բարձրանալ Զիննիի դերով:

«Արցունքի հովիտը» Մնակյանի «Կարապի երգն» էր:

«Այդ շրջանին մեծանուն դերասանը գրեթե զառամած էր արդեն,—պատմում է ֆրանսահայ նշանավոր դերասան Արտաշես Գմբերյանը: —Սակայն իր այդ վիճակին մեջ իսկ մեծ էր այդ օրը: Ականջներուս մեջ մինչև այսօր տակավին կհնչեն.

Նրանք երեք էին, մեկ մեկից սիրուն
Երկուսը տղամարդ, այ, էն սարի պես
Մինը աղջիկ էր, այ, էս ծառի պես...

Զիննին էր, թե Մարտիրոս Մնակյանը, խելագար Զիննին էր, թե մեծ արվեստագետ Մնակյանը.

Տղամարդիկը էս հողի տակին,
Աղջիկը էնտեղ, էն սարի գլխին...

Զիննին էր, թե Մարտիրոս Մնակյանը, որ գերեզմանի սեմին և մահվան բեմին վրա իր վերջին դերը կխաղար...»¹:

Ներկայացման վերջին տեսարաններից մեկում Մնակյանը բեմ է գալիս և լուս կանգնում: Տիրում է մի երկար, տագնապալից լուսթյուն: Ծերունին մոռացել էր դերը և հուշարարի ձայնը չէր լսում: Նա փորձում է իմաստավորել իր լուսթյունը, բայց հանդիսարարի նրան դատարկ է թվում: Ոչ մի արձագանք: Զգում է, որ դադարը երկար է տևել,

¹ «Զվարթնոց», Փարիզ, 1956, № 4:

Աներկայացումը կանգ է առել: Մերունու աշքերը մշուշվում են, ու հիշում է Քինի խոսքերը. «Պետք է ավարտել... պետք է ավարտել այնպես, ինչպես սկսար, պետք է մեռնի այնպես, ինչպես ապրեցար: Պետք է մեռնի՝»:

Մնակյանն ուղղվում է, դառնում դեպի հանդիսարան և ասում.

—Սիրելի հայ ժողովորդ, դոք ինձի կը ճանչնաք...

Դերս միտքս չի գար, ծերացել եմ, ներողամիտ եղեք, եթե կարդալով կատարեմ դերս¹:

Նա գրպանից մի թուլթ է հանում և սկսում կարդալ: Դահլիճը թեթևացած շունչ է քաշում: Մնակյանը շարունակում է կարդալ դերը դողացող ձայնով, բայց չի կարողանում հասցնել մինչև Աներկայացման ավարտը: Այս անգամ նորից է դառնում դեպի դահլիճ և ներողություն խնդրում, որ այլև շարունակել չի կարող... Ու հոգնած հատում է ստվարաթղթից սարքված քարաքեկորի վրա:

Իջնում է վերջին վարագույրը:

Մեկ տարի հետո՝ 1919 թվականի ամռանը ապագայի պայծառ ծրագրերով Պոլիս է ժամանում Օվի Սևումյանը: Սևումյանն այժմ ծրագրել էր միավորել արևմտահայ և արեվելահայ բեմական ուժերը, ստեղծել նոր թատրոն: Պոլսում նա աշքի առաջ ուներ «Պոլսահայ դրամատիկը» և նրա գլխավոր ուժերին, բայց ինչպես Պոլիս այցելող ամեն մի հայ դերասան, այնպես էլ Սևումյանը, իր պարտքն է համարում այցելել

¹ Տ. Նշանյանի անձնական համակից (10 հոկտեմբերի, 1963, Փարիզ):

դերասանապետին: Իր ծերունական հասակում նա ոգևորվում է Սլումյանի մտահղացումներով, ի դեմք այդ մտածող արվեստագետի տեսնելով հայ թատրոնի ապագան: Ի հիշատակ այդ նշանավոր հանդիպման Սլումյանն ու Մնակյանը լուսանկարվում են: Մնակյանն այդ լուսանկարի տակ գրում է. «Առ իմ բեմական հերոս պաշտելի Սլումյան, տեսա զքեզքին վրա, երջանիկ եմ, պաշտելի բեմը»:

Հոգևոր հայրդ 84 տարեկան»¹:

Մնակյանն այս տողերը գրել է 1919 թվականի դեկտեմբերի 18-ին: Դրանից ուղիղ երկու ամիս անց, 1920 թվականի փետրվարի 18-ին արևմտահայ բեմի նահապետը կնքեց իր մահկանացուն:

Մնակյանի թաղումը Պոլսում վերածվում է մեծ արարողության: Բերայի Ս. Երրորդության եկեղեցում հավաքվում են Պոլսում բնակվող բոլոր ազգությունների ներկայացուցիչները՝ տարբեր խավերի, տարբեր կրոնների ու տարբեր դավանակների մարդիկ: Թուրքիայի պատմության մեջ դա եղել է մի չտեսնված ու չլսված իրադարձություն: Մնակյանի դագաղի շուրջն են հավաքվում թուրքեր, հայեր, հույներ, հրեաներ իրենց կրոնական առաջնորդներով և նրանցից յուրաքանչյուրը հոգեհանգատի իր ծխակատարությունն է անուն: Խնչակն գրում է արարողությանն ականատես Վահրամ Փափազյանը, այդ «երևույթի բարոյական արժեքը գնահատելու համար պետք է դուրս գալ նեղ ազգային մտավորականից և ընդունել, որ արվեստը մի մեծ, համամարդկային բարեկամություն է»²:

¹ «Հայ բեմի վաստակավորները» (ալբոմ), Վենետիկ, 1951:

² «Սովետական արվեստ», 1955, № 4, էջ 37:

Մարտինական պիօնության վերաբերյալ (1919):





Մնակյանը թաղվում է Շիշլի հայոց գերեզմանատանը,
Պեշիկլթաշլյանի, Մարի Նվարդի, Աղամյանի կողքին:

* * *

Մարտիրոս Մնակյանի ստեղծագործական կենսագրությունը անցյալ դարի հայ թատրոնի պատմության ամենապրամատիկ էջերից մեկն է: Մաքառումներով ու տքնություններով, դժվարին վերելքներով ու մեծ հուսախաբություններով լի այդ կյանքը իսկապես նման է մարտիրոսության:

Հայ թատրոնի պատմության մեջ Մնակյանն ամենից առաջ ավանդների սկզբնավորող է, ավանդներ, որոնք նրան անուղղակիորեն կապում են պատրիա թատերական արվեստի հետ: Մնակյանի ավանդներից մասն ունեն սովետահայ և սփյուռքահայ թատրոնի ալն վարպետները, որոնք իրենց ստեղծագործական կյանքի սկզբում առիթ են ունեցել նրա հանդիսատեսք լինելու կամ շփվելու հրա հետ:

Մնակյանը հանդիսանում է հայ թատրոնի խոշորագույն վարպետներից մեկը, բեմական արվեստի այնպիսի վիրտուոզ, որին ժամանակին ուսուցիչ է ճանաչել Վահրամ Փափազյանը: Ծակատագրի բերումով նա դատապարտված էր գործելու մի միջավայրում, ուր օդ չկար ստեղծագործող այտիստի համար, դատապարտված էր կրելու իր ապրած իրականության ամբողջ ծանրությունը և այնուամենայնիվ մնալու կանգուն սյունը արևմտահայ անհետացող թատրոնի, խորհրդանշելով դերասանական մի ամբողջ սերունդ:

ՄԱՐՏԻՐՈՍ ՄՆԱԿՅԱՆԻ ԴԵՐԱՎԱՏԱՐՈՒՄՆԵՐԻ ՑԱՆԿԸ

1860—1867 թթ.

«Ազահ» (Մոլիեր)	Կլեանտ
«Ակամա բժիշկ» (Մոլիեր)	Լեանդր
«Անձանռք» (վողեկի 1 գործ., թարգմ. Մ. Մնակյանի)	Որսորդ
«Անհիշաչար բարեկամություն» (վողեկի 1 գործ. թարգմ. Մ. Մնակյանի)	Զենարո
«Անջեղո» (Վ. Հյուգո)	Ռոդոլֆո
«Արիստոտել» (Վ. Մոնտի)	Կեսիրա, Գոնիպոս
«Արշակ Բ» (Մ. Պեշիկառավյան)	Սիսակ
«Արքայն զբոսնու» (Վ. Հյուգո)	Ֆրանցիսկ թագավոր
«Բոնի ամուսնություն» (Մոլիեր)	Լիկաստ
«Երևակայական միվանդ» (Մոլիեր)	Կլեանտ
«Երկու հիմնապետներ» (Ռոթա)	Մարշալ
«Էլեոնորա» (Մր. Թոլլան)	Ռինալդո
«Թեմիստոկլես» (Պ. Մետաստազիո)	Նեոկլես
«Թերեզա» (Ա. Դյումա-որդի)	Արտյուր
«Ժան դը Բալե» (թարգմանություն ֆրանս. թենից)	Ֆերնանդո
«Ժորժ Դանդան» (Մոլիեր)	Քլիթանդր
«Ժլտեկնոտա» (թարգմանություն իտալերենից)	Ռիկարդո
«Լուկրեցիա Բորջա» (Վ. Հյուգո)	Զենարո
«Կատրին Հովարդ» (Ա. Դյումա-Բայը)	Հենրի 8

¹ Մնակյանի ներակատարումների ցանկում գրեթե ամբողջությամբ ընդգրկված են միայն 1880—1882 թատերաշրջանում խաղացված դերերը: Մնացած տեղերում ցանկը լիիվ չէ: Պոլսում տեղի ունեցած ներկայացումների աֆիշների մեծ մասը չի պահպանվել և շատ բան հապտնի է միայն ըստ մասովի և կենսագիրների հաղորդած տվյալների:

«Կճեագոյծը» (Ա. Դյումա-Բայր)	Եղմոն
«Համեատության վարձատրություն» (Վոդկի 1 գործ.)	Գարեգին
«Հավատք, հույս, սեր» (Ա. Բուրժուա)	Ալբեր
«Մեծն ներսես» (Ա. Վանանդեցի)	Պապ
«Մենաստանի աղորին» (Տիկ. Ռենիոն դը Բրեպուա)	Սելինյան ասպետ
«Միհրդատ» (Ա. Վանանդեցի)	Փառնակետ
«Միսիթար Դյուցազն կամ Ծիջումն վերջին աստեղ հայոց բախտին» (Գ. Տեր-Պողոսյան)	Վաշտակ
«Մովսես» (Ռ. Շաբորիիան)	Քրմապետ
«Նավատի Բերտրան» (Ժ. Բուշարդի)	Հակոբ թագավոր
«Պամելա» (փոխադրություն Ս. Ռիչարդսոնի համանուն վեպից Սր. Մանավանի)	Ռընե
«Պարոն Փուրսոնյակ» (Մոլիեր)	Էրաստ
«Ջրաղացպանի աղջիկը» (փոխադրություն Ֆրանսերենից Սր. Մանավանի)	Ռոժե
«Ռոբերտ ավագակապետ» (գրված Ծիլերի «Ավագակենդի» հիման վրա, նեղ. Լամարտեր- լիր)	Ռազման,
«Սանդուխտ» (Թ. Թերզյան)	Վոյայք
«Վահրամ կամ ասպետն երկաթաբազուկ» (Սր. Հերիմյան)	Երիանդ
«Տարտյուֆ» (Մոլիեր)	Վահրամ
«Ցոփն ու կեղծավորը» (թարգմանություն իտալերենից)	Վալեր
«Ֆրանչեսկա դա Ռիմինի» (Ս. Պելիկոն)	Ռոբերտո
	Պաոլո

1872—1879 թթ.

«Ալպյան հովվութիւն» (Ը. դ'Օուայն և Ա.
դ'Էնմերի Կոմս Ժորժ, Մորիս

«Անտոնիո Էննես» (թարգմանություն ֆրանս.)	Դ'Արրուա
«Ամերիկյան ծովանուններ» (թարգմանություն ֆրանսերենից)	Պոլ Բերար
«Արիֆ» (Տ. Չոխաջյան)	Արիֆ
«Արյան բիծ» (Ա. Մելքան և Գուրյե)	Վիկտոր դ'Սերվալ
«Դալիլա» (Օ. Ֆելլեն)	Անդրե Ռոզվայն
«Դուգլաս կամ Լոնդրայի աշտարակ» (Է. Սյու)	Կոմս Մյուտեյ
«Դոկտոր Շինտան» (թարգմանություն ֆրանս. սերենից)	Ռոզանապոլ
«Դոն Սեզար դը Բազան» (Ֆ. Դյումանուար և Ա. դ'Էնների)	Դոն Սեզար
«Երեսուն տարի կամ Խաղամոյի կյանքը» (Վ. Դյուկանժ և Դինո)	Ժորժ Ժերմանի Մորելոս
«Երկու հիսնապետներ» (Որթա)	Կոմս դ'Լինիեր
«Երկու որբ» (Ա. դ'Էնների)	Տելրինեն, Տակորեք
«Թափառական հրեա» (Է. Սյու)	դ'Լունե
«Թերեզա» (Ա. Դյումա-որդի)	Գեներալ Մորեն
«Ժողեփ Փարիզի շրջմոլիկը» (թարգմ. Փլանս.)	Հոր-Բոր աղա
«Լերլերիչի» (Տ. Չոխաջյան)	Լեսյուրկ, Ժերոմ
«Լիոնի սուրբանդակ կամ կողոպսված փոստ»	Պոլ Դիդիե,
(Է. Մորո, Սիրոդեն, Դելակուր)	Սարգան
«Լյուսի Դեղին» (թարգմ. ֆրանս.)	Սիմոն
«Ծեր կապրալը» (Ֆ. Դյումանուար և Ա. դ'Էնների)	Ֆերդինանդ Օրբի
«Կարծեցյալ հոմանութիւն կամ Հարստահարված առաքինություն» (Արրինգ)	

«Կեսար Բորջա» (թարգմանություն իտալերենից)	Ֆարին Օրսինո
«Կովյո Ժեներալ կամ Մարիաննա» (Ա. Բուրժուա և Մ. Մասոն)	Ժեներալ Արշակ Բ
«Կովյոն Տիրան» (Թ. Թերզյան)	
«Հրաշագեղ Հեղին» (Ա. Մելլակ և Լ. Հալկի, երաժշտ. Ժ. Օֆֆենբախի)	Մելլառուն Իշխան. Թեզինա Սարիվան
«Հրեութին» (Լ. Հալկի և Է. Սկրիբ)	
«Մալթայի ծովահենները» (թարգմանություն Փրանսերենից)	Գաստոն
«Մարտովել» (թարգմանություն Փրանսերենից)	Ի' Մյուրվիլ Բյուրիդան
«Ների աշտարակ» (Ա. Դյումա-Բայը)	
«Ա. Պողոսի եկեղեցու զանգահարը» (Ժ. Բուշարդի)	Լորդ Հենրի Բետֆոր
«Անը առանց համարման» (թարգմ. իտալերենից)	
«Վենետիկութին» (թարգմ. իտալերենից)	Կոմս Էրքուե
«Փարիզի աղքատներ» (Թ. Բարբյեր)	Սալֆիերի Պիեռ Բերնիե, Անդրե Բերնիե, Բլանդրոն
«Փարիզի հնահավաքը» (Ֆ. Պիա)	Ժան
«Փոքր Բոլոնիա» (թարգմ. Փրանսերենից)	Լյուտին Ժերար
«Քամելազարդ կինը» (Ա. Դյումա-Ռոդի)	Արման Դյուվալ

1880—1882 թթ.

«Ալֆոնս» (Ա. Դյումա-Ռոդի)	Ի' Մոնտիգնեն
«Աննուսալի ելք» (Է. Օժյե)	Ռոդոլֆ Կավերլեն
«Ամուսնություն» (Ն. Գոգոլ)	Պոդկուսին
«Անիրավություն և պատիճ» (Ժ. Բուշարդի)	Գասպարոն

«Անանձի սանձահարումը» (Վ. Շեքսպիր)	Պետրովիչիո
«Առ ժամանակ» (Հարտման, փոխադրություն Գ. Զմշլյանի)	Բարսեղյան Կարլ Մոռը
«Ավագակներ» (Ֆ. Շիլեր)	Վիշնևակի
«Արդյունավոր պաշտոն» (Ա. Օստրովսկի)	Նորվադի
«Բաղդադի իշխանութիւն» (Ա. Դյումա-ռոդի)	Գավին
«Գալո, Մինար և ընկերներ» (Է. Գոնդինե, թարգմ. Մ. Մնակյանի)	Կոմս Կարինովի
«Դալիլա» (Օ. Ֆելլեր)	Արքենին, Կազարին
«Էկմակահանդես» (Մ. Լերմոնտով)	Դոն Ժուան
«Իոն Ժուան» (Մոդիեր)	Վիլիելմ
«Երկու հիմնապետներ» (Ռոբա, թարգմ. ֆրանս. Մ. Մնակյանի)	Սարգիս
«Ելի մեկ զոհ» (Գ. Սունդուկյան)	Բեկկեր
«Ընտանեկան գաղտնիք» (Դ. Օգնորդիշին)	Անտոն
«Ընտանեկան փոթորիկ» (Վիկտորով)	Անտոնի Բերնհարդ
«Լինդա կամ մայրնկան օրինություն» (թարգ- մանություն անգլերենից)	Խայի
«Խաթարալա» (Գ. Սունդուկյան)	Ֆամուսով
«Խելքից պատուհաս» (Ա. Գրիբոյեդով)	Ռենար, դ'Ակերոն
«Կանանց շոգեկառք» (թարգմ. ֆրանս.)	Անրի դ'Յավինո
«Կանանց պատերազմ» (Է. Ալեքսի)	Լուազոն
«Կարմիր տարատ»» (Վոլոնիլ 1 գործ. թարգմ. ֆրանսերենից Մ. Մնակյանի)	
«Կրթության հետևանքները կամ վաս պահ- ված աղջիկը» (Վոլոնիլ 1 գործ. թարգմ. ֆրան- սերենից)	Բոորիկուր Արդիգոն Պալմիերի
«Կորրադո» (Պ. Ջիակոմուտոտի)	Կլավիդիոս
«Համետ» (Վ. Շեքսպիր)	Բուատրինաս
«Հնագիտական ժողով» (Վոլոնիլ 1 գործ., թարգմ. ֆրանսերենից Մ. Մնակյանի)	

«Ծշմարիտ քաջություն» (վողեկիլ 1 գործ., թարգմ. ֆրանսերենից Մնակյանի)	Լուգ
«Մարդս կատարյալ չէ» (կատակերգություն, թարգմ. ֆրանս. Մ. Մնակյանի)	Միշոն
«Մարի ժան կամ մայրական սեր» (Ա. Դ'Էնների)	Բժիշկ Ապահանի, Բերտրան
«Մերի» (Խշիս. Ն. Պ. Ուրուտով)	Պլոտիր Նագորնով
«Մի կնոջ տանջանք» (Է. դ'Ժիրարդեն)	Ժան Ալվարեց
«Միհրդատ» (Ս. Վանանդեցի)	Միհրդատ
«Ոչ» (վողեկիլ 1 գործ., փոխադրություն Գ. Զմշկյանի)	Բժիշկ Սարգսյան
«Պոլ Չոն» (Ա. Դյումա-Բայը)	Լուի Աշառ
«Ռևիզոր» (Ն. Գոգոյ)	Քաղաքագլուխ Ակվոգնիկ- Դմուխանովսկի Հասան Զալալ
«Ռուզան» (Մուրացան)	Ալբեր
«Սանսեի կոմսութին» (թարգմ. ֆրանսերենից Մ. Մնակյանի)	Զիրուամո
«Սեր առանց համարման» (թարգմ. իտալերեն- ից)	Ծովակալ Կաստիլիո Շեյլուկ, Մարուկի իշխան
«Սիրուց խելագար» .(Մ. Տամայո և Բառու)	Ալտինգիհանովեն
«Վենետիկի վաճառական» (Վ. Շեքսպիր)	Կոմս դ'Օել
«Վիլիելմ Շելլ» (Ֆ. Շիլլեր, Ի պատկեր)	Ժան Բերնիկ
«Սփինք» (Օ. Ֆելլե)	Բարանտեն
«Տեսոր Տամբրլիկ կամ յուտ դիեզ» (վողեկիլ 1 գործ., թարգմ. ֆրանսերենից Մ. Մնակ- յանի)	259
«Տիկին Օքրեի գաղափարները» (Ա. Դյումա- որդի)	

«Տիրուհին աղախին» (Ֆեղերիկո Զենարո- -Անտոնիո)	Ութերստ
«Տփխիսցի Ասպետյաններ» (Ս. Արծրունի)	Գևորգ Ասպետյան
«Օրիորդ Վարդուհի Բերդյան» (Ս. Քիշմիշյան)	Գրիգոր Գուլյան
«Համելազարդ կինը» (Ս. Դյումա-որդի)	Ժորժ Դյումալ
«Քույր Թերեզա» (Լ. Կամոլեստի)	Գուստավ Էմպոլի
«Ֆրոնտեն կամ ամուսնացյալ ամուրի» (Վորդէ- վիլ 1 գործ., թարգմ. Մ. Մնակյանի)	Կոմս Էդվարդ

1882— 1918 թթ.

«Ապարանչանը» (Վորդէվիլ 1 գործ., թարգմ. ֆրանս. Մ. Մնակյանի)	Պարոն
«Անմահն Ժիրայր» (Հմ. Արամյան)	Ժիրայր
«Առաքինությունը կհաղթվի՝ միթե» (թարգմ. ֆրանս. Մ. Մնակյանի)	Մարտել
«Ավագակներ» (Ֆ. Շիլլեր)	Ֆրանց Մոնր, Ֆոն Մոնր
«Արցունքի հովիտ» (Ս. Ահարոնյան)	Ջիննի
«Գող Սիմոն» (թարգմ. ֆրանս. Մ. Մնակյանի)	Սիմոն
«Դարբնոցապետ» (Ժ. Օնի, թարգմ. Մ. Մնակ- յանի)	Մուլինե
«Դժբախտ կինը» (թարգմ. ֆրանս. Մ. Մնակ- յանի)	Կոմս Մորել
«Երեսուն տարի կամ խաղամոլի կյանքը» (Վ. Դյուկան և Դիեն, թարգմ. Մ. Մնակյանի)	Պարոն Ժերմանի
«Երկու որբ» (Ս. դ'Էնեների, թարգմ. Մ. Մնակ- յանի)	Պիեռ
«Զազա» (Բրետոն և Սիմոն, թարգմ. Մ. Մնակյանի)	Դյուֆրեն, Կասկարէ Հասան Փաշա Մուրադով
«Թարիգ» (Արդուլիսադ Համիդ)	
«Թատրոն կամ թշվարներ» (Պ. Դուրյան)	

«Ժակ Վարդել» (թարգմ. Փրանս. Մ. Մնակյանի)	Ժակ
«Ժիրոֆլե-Ժիրոֆլյա» (Շ. Լեկոկ)	Բոլերո
«Կարմեն» (Ա. Մելյակ և Լ. Հալկի, ըստ Պ. Մելիմենի, երաժշտություն Ժ. Բիզեի)	Կապիտան Ցունիկա
«Կարմիր թղթապանակ» (թարգմ. Փրանս. Մ. Մնակյանի)	Հրամանատար
«Կրեմոնի վճագործ» (Ֆր. Կուպան, թարգմ. Ա. Չուպանյանի)	Ֆերրարո
«Մադամ Անգոյի աղջիկը» (Շ. Լեկոկ)	Բոնբոնե
«Մոմե արձաններ շինողը» (Ք. Դ'Մոն- տեապեն, թարգմ. Մ. Մնակյանի)	Մոմե արձաններ շինող
«Միսկ փողոցի ռադիոը» (Ա. Բելո, թարգմ. Մ. Մնակյանի)	Ուկմոն Ժիլբեր
«Նախանձության փորձանք» (թարգմ. Փրանս. Մ. Մնակյանի)	Ամբրուազ Վարժապետ
«Ներկարարը» (Տ. Փափազյան)	Պրեման
«Պարտականության հանդեպ» (Զ. Շահարեն- թին)	Հոճան
«Սատանա» (Ալի Նիմատ)	Բայրակդար փաշա
«Սևիմ Գ» (Սիլան Ջիմչող)	Ահմեդ
«Սուտը» (Զենաք Շահարենթին)	Իմբեր
«Սյուզան Խմբեր» (թարգմ. Փրանս. Մ. Մնակ- յանի)	Կերմեստ
«Տիկին Մանկուտն» (Ռ. Ռոմե և Է. Բլեսմ)	Ծեր գործավոր
«Տիմար հովիվներ» (Օ. Միրռո)	Քարակոփ
«Քարակոփը» (անհայտ հեղինակ)	Քին
«Քին» (Ա. Դյումա-Բայը, թարգմ. Մ. Մնակ- յանի)	Ֆրոնտեր
«Քողարկյալ կինը» (թարգմ. Փրանս. Մ. Մնակյանի)	

«Օձի հետքը կամ սև ջրաղաց» (թարգմ.


Ֆրանս. Մ. Մնակյանի) Մարի դ'Սևեն

«Օրփիեոսը դժոխքում» (Օ. Կրեմյե, Երաժշտ.

Ժ. Օֆֆենբախի) Պլուտոն

ԲՈՎԱՆԴԱԿՈՒԹՅՈՒՆ

Հեղինակի կողմից	5
Ազգային թատրոնի գաղափարը	11
«Արևելյան թատրոնում»	23
70-ական թվականներին	65
Մելոդրաման և դերասանական ավանդների գաղտնիքները	91
Ռեալիզմի ճանապարհին	126
Կորուստների գնով	169
Հերի և նորի սահմանին	241
Մարտիրոս Մնակյանի դերակատարումների ցանկը	254



ՀԵՆՐԻԿ ՎԱԶԱԽԻ ՀՈՎՀԱՆՆԻՍՅԱՆ
ГЕНРИХ ВАГАНОВИЧ ОГАНЕСЯН

ՄԱՐՏԻՐՈՍ ՄՆԱԿՅԱՆ

Տպագրվում է ՀՍՍՀ ԳԱ
արվեստի ինստիտուտի գիտական
խորհրդի որոշմամբ

Պատ. խմբագիր՝ Լ. Հ. Հալավերդյան
Հրատ. խմբագիր՝ Ս. Ա. Անաստասյան
Նկարչ. ձևավորումը՝ Կ. Կ. Դաֆաղարյանի
Տեխ. խմբագիր՝ Ս. Կ. Զաքարյան
Սըրագրիչ՝ Լ. Ս. Սարգսյան

Վ.Ֆ. 03411, հրատ. №2938, եջել № 1127, պատվեր 641, տիրամ 1500
Հանձնված է արտադրութ. 18/IX 1968 թ., ստորագր. է տպագ. 16/V
1969 թ. տպագ. 16,5 մտմուլ + 9 ներդիր, հրատ 9,14 մմմ., պայմ.
11,73 մմմ., թուղթ №1, 70×108 1/32⁺ Գինը 78 կ.

Հայկական ՍՍՀ Գրտությունների Ակադեմիայի հրատարակու-
թյան էջմիածնի տպարտն



ԳԱԱ Հիմնարար Գիտ. Գրադ.



FL0049413

A T
10685